

اللمبة

شريفه حسينه



”عزوه الإنسانه فيه اللامه”

اللمبة

"عزف الإنسانف فف اللاممكاف"

شرفف عساف

الإصدار الأولف: مارف 2024



إفوان

إهداء لظرف مني غنلنوخ،
لأنكم كنتم وقود هذا الكتاب!!!

شريفه



اللمبة

"عنه الإنسان في اللا زمكانه"

1. ليه 3
2. اللي منعرفوش 14
3. حاله من الغموض 26
4. No Signal 40
5. مسار كايروكي الأجباري 56
6. نقطة بدايه_1_الأختيارالأول 69
7. نقطة بدايه_2_نقطه، و من أول السطر 77
8. اللعبه "Under Pressure" 87
9. ما بين "أشمعني أنا" و "نظرية المؤامره" 104
10. البعد الرابع "فرق توقيت" 123
11. چين أبوكو أيه؟ 143
12. تحت السيطرة ج:1 فورمة الساحل 163
13. تحت السيطرة ج:2 صناعة الوهم (أصنام و تابوهات) 191
14. حقل في الأنتحار 222
15. "كارما"، و النسخه الأفضل منك 241



"لماذا أكتب ؟
لماذا ستقرأ ؟
لماذا نتواصل؟"



ليه؟

لما تقرر أنك تقرا الكتاب الأول لأى لكاتب، فمعنى كده أنك غالباً مسمعتش عنه قبل كده، و هنا طبعاً أقصد الكاتب، و طبعاً حيكون عندك كتير من الأسئلة فى عقلك، و الغريب أنها كلها لازم تبدأ بكلمة ليه، و طبعاً برضه حيكون عندك كامل الحق فيها. علشان كده قررت فى بداية الكتاب بدل ما أكتب مقدمه تقليديه، و اللى غالباً محدش بيقرأها، أنى أدمجها مع الفصل الأول، و يكون الفصل ده هدفه أنه يجاوبك على كتير من الأسئلة اللى أجاباتها حتخليك تقرر تكمل فى قراءة الكتاب ده و لا كفايه على كده.

خلونى أبدأ بأول سؤال، و هو ليه حتضيع جزء مهم جداً من وقتك -و اللى هو فعلياً وقت مقتطع من عمرك- علشان تقراً فيه الكتاب ده، و خصوصاً أنه الكتاب الأول للكاتب، و اللى زى ما قلنا، غالباً أنت متعرفوش؟

خلينى هنا أجاوبك من منظورين، الأول ككاتب للكاتب، و ثانياً لو بدلت الأماكن، و خلّيت نفسى مكانك كقارئ للكاتب. ككاتب للكاتب خلينى أحكيلك ليه أنا كتبت الكتاب ده، و أيه حكايته، و دى حتكون تانى ليه معانا فى الفصل ده.

البدايه كانت فى 2007، لما بدأت رحلتى مع صناعة الأفلام التسجيليه و الوثائقيه، بس بدايةً، أحب أعرّفكم أنى فى الأصل مهندس معمارى، أشتغلت فى أكثر من مجال من مجالات الهندسه، لكن عشقى للأفلام التسجيليه بدأ معايا من سن ال12 سنه تقريباً، و فضل الحلم ده معايا سنين، لحد ما تمكنت من تكوين فرق عمل معايا، و قدرت كمان أوفر الفلوس الكافيه لشرا كل المعدات اللى كنت محتاجها، و بدأت رحلتى كمخرج تسجيلى مستقل زى ما قلت بدايةً من 2007.

خلال رحلتى على مدار ال16 سنه دول، مكنتش بيهمنى مصير الفيلم أيه، حيثباع و لا لأ، طيب حيثقبل فى أى مهرجان، كل ده مكنتش مهم، لكن كان المهم عندى أنى أعمل الفيلم، أنى أرصد الحاله اللى شدتني و خلّتنى أبذل كل المجهود و الفلوس دى



علشان أوثقها، و ممكن كمان أسافر لها أكثر من 20 ساعه للتصوير، لدرجة أن مره كان التصوير فيها بره مصر.

22 فيلم و حالياً شغال في التسجيلي رقم 23، هي حصيلة أفلامى التسجيليه اللى عملتها لحد لحظة كتابتي ليك دلوقتى، أولادى اللى بعز و فخور جداً بيهم، لكن للأسف معدلات أنتاجى قلت جداً الكام سنه اللى فاتوا، و للأسف معاها كمان أتغيرت نوعيات مواضيع أفلامى، و ده بسبب صعوبة الحصول على التصاريح، و سؤال ليه اللى أصبح دائماً بيقابلنى، سواء لو حبيت أخذ التصريح، و دلوقتى زاد عليه ليه تانيه من الجهه أو الأشخاص اللى أخترت أصور معاها، لأن نظرية المؤامرة أصبحت هي المسيطره على تفكير كل الناس، خصوصاً مع مخرج مستقل زي. بأختصار وعلشان ما طولش عليك، بدأت قدرتى على أنى أعمل الشئ اللى أخترتة الهدف الأول لحياتى تتلاشى، و قدرتى هنا طبعاً مش مقصود بيها قدرتى أنا، لكن أقصد قدرتى على أنتاج عمل فى ظل الظروف الحاليه.

لكن زى ما حترقواوا معايا فى الكتاب، عملت بالحكمه اللى حانصحكم بيها فى واحد من فصول الكتاب ده، و هي "إذا لم تفعل ما تحب، فحب ما تفعل"، و من هنا قررت أنى أعمل الشئ اللى بحبه، لكن من خلال قالب تانى أو Platform تانى، و أخذت قرارى من حوالى 4 سنين أنى أبدأ رحلتى مع الـ Youtube و بعض مواقع الـ Podcasts، و ده من خلال كتابة بعض البرامج المعلوماتيه، و اللى بتهمتم بتحليل ما وراء المعلومه.

الخطوه دى فعلاً كانت خطوه فارقه فى حياتى، تغيير بسيط فى المسار كان لازم أعمله، علشان أقدر أو اصل الحياه، و ده سيكون واحد من أهم محاور الكتاب، التغيير دى نقلنى لدنيا تانيه، بتشوف فيها نتيجة شغلك بشكل شبه مباشر، بتقرأ آراء الناس فى شغلك بدون تملق، ناس لا أنت تعرفهم و لا هما يعرفوك، لكن اللى بينكم و بين بعض هو شغلك، بتتعلم من بعض الآراء و التوجيهات اللى بتجيلك فقادر تطور من نفسك طول الوقت.

عملت خلال الـ 4 سنين دول أكثر من 200 حلقة، كانت كل حلقة بالنسبالى أشبه برسالة دكتوراه، بحضر فيها كثير جداً، بالضبط زى ما كانت و ما زالت الأفلام



التسجيلية بالنسبالي، و أكتسب خبره كبيره جداً في كتابه ما يسمى بالArticles أو المواضيع وتحويلها لشيء Visual أو مرئي، وده أكسبني الخبرة أو الجراه في أني أقترح موضوع جديد، لكن قبل ما أتكم فيه معاكم، لازم أرجع بيكم لورا، من بدايات حياتي، لمشكلتي المزمه، و اللى أرقتني طول حياتي، و ضيعت عليا كتير من الفرص اللى فعلاً ندمت عليها فيما بعد، لكن أصبحت الميزه الأكبر اللى خلتنى أخذ خطوة الكتابه في هذا النوع من المواضيع، و أنا مش خايف أو قلقان من الغلط أو الأنتقاد.

صفه لازمتني طول حياتي، تقريباً بدأت معايا من سن ال8 سنين، لكن مبدأئش أحس بيها غير من تانيه ثانوي، سن ال16، و بعد ما أغلب أصدقائي في الفصل توجهوا لأستكمال تعليمهم للشهاده الأنجليزيه، و أنا لأسباب حأشرحها في واحد من فصول الكتاب مقدرتش أعمل زيهم و كملت ثانويه عامه، و هنا زى ما بيقولوا أنكشفت ورقة التوت الأخيره اللى كانت مغطيه شخصيتي، و هي عدت قدرتي على التأقلم مع الناس، أني شخص كنت و ما زالت طول الوقت لا منتمي للعالم اللى حواليه، و ده كان بسبب الخجل الشديد أحياناً، و بسبب أني مش حاسس أني متوافق مع الناس اللى حواليا في أغلب الأحيان، و أني كنت متحامى طول الكام سنه الأول في حياتي بمجموعه أصدقاء عرفتهم من سن الأربع سنين، في مرحله لسه مكنتش شخصيتي أتكونت بالشكل الكافي.

سنين عدت، و أنا عايش كأني بشوف الحياه من بره، حتى لو كنت بالفعل جزء من الحدث، بتفرج على Game لكن مش عايز أعبه، فأصبحت بالعب طول الوقت دور The Observer أو المراقب لكل حاجه حواليا، حاجه كده شبه فكرة حكم الVAR في كرة القدم، فبقيت أكثر أهتماً بمراقبة الحياه و سلوكيات الناس و تحليلها، و متابعة الGame اللى الناس جزء منه و عايشه فيه، و هي مش فاهمه أنه مجرد Game، و الفكره دى هي موضوع كتابي الثاني "Apocalypse" أو نهاية العالم و اللى بجهز فيه حالياً بالتوازي مع الكتاب ده، و اللى حأشرح فيه حقيقه فكرة الGame اللى كلنا عايشين، و اللى غالباً أحنا فيه مجرد قطع في لعبه، زى عساكر الشطرنج.



المهم كل السنين الى عدت، و نتيجته لمئات التجارب الى مرت بيها -سواء كنت مشارك فيها- أو مجرد بأرصدها من بره، و تبعاً لمبدأ أن اللي بره دائماً بيشوف الصورة بشكل أشمل و أفضل، فكل ده أضاف ليا حصيله كبيره جداً من عنصريين، الأولى هي كم من الخبرات عن أهم السلوكيات و الأخطاء الأنسانيه الحياتيه المتكرره، و اللي ممكن بتعديلها تكون تجاربنا الحياتيه أفضل بشكل كبير ، و الثانيه و دى الأهم و هي ما يسمى بالرؤيه، و الرؤيه ببساطه أنك يكون عندك وجهة نظر قادر تتبناها و تدافع عنها بالأدله و الحجج، و هما دول الحاجتين اللي جاى أشارككم بيهم في الكتاب ده.

أرجع تاني بيكم للنقطه اللي كنت واقف عنها قبل الكام فقره اللي فاتوا، و هي بدايات مشوارى مع البرامج المسموعه و المرئيه، و بعد ما كتبت و أخرجت عدد كبير جداً من البرامج المعلوماتيه، خلال الفتره اللي كانت أكثر فتره أختلطت فيها بناس في حياتي كلها، و ده طبعاً كان من خلال فكرة أن فيه فريق عمل، أكتشفت أنى بدأت بشكل شخصي أعانى من كل المشاكل الحياتيه اللي رصدتها خلال عمري كله. أختلافات وجهات النظر بيني و بين كل الناس اللي بدأت أتعامل معاها كانت كبيره و عميقه، و ده خلانى أفكر في فكره نصف شيطانيه، و هي أنى أوجه رسالي بشكل غير مباشر لفريق العمل اللي معايا، و ده عن طريق برنامج بنشرح فيه للناس كل أنواع المشاكل الحياتيه دى، و أزاى نقدر بهدوء و بساطه نتجنبها، ده إن مكنتش عندنا القدره على حلها حل نهائى.

عملنا البرنامج ك Podcast و نزل تقريباً على أغلب منصات ال Podcasts و نجح جداً، لدرجة أنه أخذ ترتيب كويس جداً بين كل البرامج الناطقه بالعربي، بالرغم من أن كل اللي نزل منه كان 3 حلقات بس، بس أنا كانت صدمتى كبيره جداً أن البرنامج نجح، لكن أنا اللي سقطت، لأن البرنامج محققش أى تغيير في فريق العمل اللي معايا، بما فيهم من قدمه بصوته و كان بينصح الناس من خلاله، و دى كانت أهم نقطه خلاف بيني و بينهم، و هي أحنا بنقدم البرنامج ده -أو كل برامجنا اللي قبل كده- ليه؟ و أنا ليا مقوله دائماً بقولها في طبيعة العلاقة بين أى مجموعه من الناس بتتشارك في أى حاجه، و دى برضه حتكون موضوع واحد من فصولنا و هي: "أختلاف الأهداف هي بداية الخلاف". من هنا و قفت البرنامج و أكتفيت بس بال 3 حلقات اللي نزلوا،



يد

وركنت الفكره لمدة حوالى سنه، لحد ما قلت لنفسى طيب ليه بما أنى مش حأقدر أقدمه بصوتي، نظراً لأن الموهبه دى للأسف مش عندى، ليه محلولوش لكتاب؟ و بما أن الحياه أصبحت أسهل و الكتب مبهتث مطبوعه و بس، لكن ممكن كمان تنزل Pdf على منصات كثير، طيب ليه مأخوضش التجربه دى؟ و من هنا جاتنى فكرة الكتاب ده، اللى أتمنى أن اللى حيقطع جزء من وقته و يقراه -حتى لو أجزاء بس منه-، ميندمش على أى وقت ضيعه فى قراءة الكتاب ده.

كده أكون أنا جاوبت على أول ليه من الليهات الكثير الموجوده فى الفصل ده، أو لو أعتبرتها مقدمه للكتاب، سميها ما شئت، لكن كل الأسباب السالف ذكرها كانت هى الدوافع و الأسباب أنى أخوض تجربة كتابة الكتاب ده، اللى هو الأول ليا، علشان نتشارك مع بعض فى طرح بعض مشاكلنا الفعلية، و نشوف أيه منها أحنا قادرين نحله بنفسنا، و أيه منها نقدر نتجنبه.

نوصل لليه التانيه، الليه الخاصه بيك أنت كقارئ، ليه تقرأ كتاب زى ده؟ ليه ممكن تضيع وقتك فيك؟ هل سيكون لمجرد التسليه، و لا فيه حاجه ممكن تطلع بيها من قرايته؟

طبعاً أنا مش حاجاوبك على السؤال ده بشكل مباشر، لكن حسلمك مفاتيح توصل بيها لأجابه، و الأكيد أن كل واحد منكم ممكن يطلع بأجابه مختلفه تماماً عن الآخر، و فى حكمه أنجليزيه بتقول "One man's poison, is another man's gold"، بمعنى أن اللى سيكون مش كويس بالنسبالك ممكن يكون كنز بالنسبه لغيرك، و طبعاً العكس صحيح.

أول مفتاح حأسملهولك هو مفتاح الحقيقه، و هو الهدف المطلوب و وصوله من الكتاب ده، و بمنتهى صدق حتكون أجابتي على السؤال ده. بدايةً، الكتاب ده مش هدفه خالص أنى أوصلك أن الحياه حلوه و أنك تشوف النص المليان من الكوبايه، بالعكس خالص، و هنا خلونى أقتبس فقره مكتوبه فى واحده من فصول الكتاب بتلخص فكرتى:



"في الكتاب ده مش جاي أقولكم خالص أن الحياه حلوه، أو أنى أحاول أدى نظره متفائله ليها، بالعكس خالص أنا شخص مقتنع زى كتير منكم ببعثية الحياه اللي مكنش لنا حق الأختيار في أننا نخوضها، بس أنا جاي في الكتاب ده بخبرات حياتي الكثيره اللي مررت بها، أشاركم في فكرة أزاى نعدى من تجربه الحياه الصعبه دى بأقل خسائر، أزاى نقدر نتغلب على بعض من المشاكل الكثيره اللي بتحاصرنا، لأن أحياناً الشخص لما بيكون واقع في مشكله، مش بيكون دائماً مركز في أفضل الطرق لحلها، بالرغم من أن الحلول ساعات ممكن تكون سهله جداً و قدام عنيه."

إذن فأحنا بنعيش في حياه مكنش لنا الحق في أختيار أننا نخوضها أو لأ، لكن في نفس الوقت أحنا مضطرين نكمل فيها، و نكمل فيها بشكل مكنش واقعين فيه تحت ضغوط طول الوقت، سواء ضغوط نفسيه أو ماديه، أو أى نوع تانى من الضغوط. طيب أزاى نقدر نكمل بشكل شبه مريح، و بأقل الخسائر، ده إذا مقدرناش نوصل لمكاسب؟ للأسف دائماً الشخص الواقع تحت ضغوط، أو اللي في قلب المشكله، بيكون مجال نظره ضيق جداً، مش بيقدر يشوف كل الحلول المتاحة، لأن عقله بيكون زى عدسة الكاميرا الـ Close أو القريبه جداً، فالـ Scope أو مجال الرؤيه بتاعه بيكون محدود، بينما لو في شخص شايفه من بره، حيكون شايف بعدسه Wide أو واسع، فمجال رؤيته أوسع و أشمل، و الأهم بيكون شايف حاجات الشخص نفسه مش بيكون شايفها، فخلينا نتفق أننا حُرسي مع بعض في الكتاب ده Guidelines أو خطوط تكون زى دليل لحل كتير جداً من المشاكل الحياتيه.

تاني مفتاح و هو مفتاح حساس جداً، لكن من المهم أنه يكون واضح، و هو خاص بنقطه التوجه الديني للقارئ. أنا أثناء الكتابه مش بكون عارف ديانة الشخص اللي ممكن يقرأ الكتاب ده أيه، أو عقيدته أيه، أو حتى لو كان بلا أى توجه ديني، علشان كده حرصت أن الكتاب يكون مفتوح، مش بيناقش أى مشاكل أو بي طرح أى حلول بأى شكل ديني، حتى لو كانت بعض المواضيع لها أجابات دينيه، بس وجهة النظر اللي تم تبنيها في الكتاب ده، أن أكيد كل قارئ عارف الدين الخاص بيه يقول أيه، و مش هو بس، ده أكيد أغلب الناس عارفه تعاليم دينها، لكن أحنا حنناقش و نقدم



يد

حلول في أطار من التفكير المنهجي و العقلي و الأنساني، لكن بما أن أي دين أو عقيدة أياً كانت، هدفها الأول الأرتقاء بالأنسان و وضع أطر و ضوابط للعلاقات بين الناس، فديماً حتظل الأهداف الدينيه و الأنسانيه واحده.

تالت مفتاح و هو أن مواضيع الكتاب ده بتكمل بعضها، لكن في نفس الوقت كل موضوع له أستقلاليته التامه، و دي كانت المنهجيه اللي قررت أتبعها في كتابته، و ده حيتيج لك أنك تقرأ الكتاب من أي فصل، و بأي ترتيب، أو تكتفى بأنك تقرأ اللي أنت عايزه بس، أو الموضوع اللي ممكن تحس أنه يهملك أو لمس معاك و بس، و ده كان واحد من أهداف الكتاب.

نوصل لتالت ليه عندنا و قبل الأخيره، و هي ليه أنا كتبت الكتاب باللغه العاميه و مش بالفصحى، أو حتى اللغه الأدبيه الوسيطه؟

اللغه العربيه واحده من اللغات –إن مكنتش أكثر اللغات- اللي فيها فجوه كبيره جداً بينها و بين متحدثيها، و ده له سبب مهم جداً أحب أشرحه، و هي أن اللغه العربيه مكنتش اللغه الأصليه ل90% من متحدثيها، اللغه العربيه دخلت على دول هي بالفعل كان لها حضاراتها و ثقافتها، و بالتالي لها لغاتها الخاصه بيها. مكنش سهل على أهل الدول دى زى مصر و بلاد شمال أفريقيا أنها ترمي فجأة لغات كانت بتتكلم بيها، و تتكلم لغه جديده و غريبه عليهم تماماً، يعنى من ضمن المعلومات الأكيده أن في قرى في الصعيد فضلت تتكلم اللغه القبطيه –و هي لغة مصر لحد دخول الإسلام- لمدة 300 سنه بعد دخول الإسلام.

عايز أوضح نقطه أن اللهجه العاميه مش حديثه، يعنى مكناش بتتكلم فصحي و فجأة قلبنا للعاميه، لأهي موجوده من يوم دخول اللغه العربيه، و بتتطور كلغه عاميه مع مستحدثات العصر، بالضبط زى عامية التوانسه و المغاربه و الجزائريين، و اللي أخذت من لغتهم الأمازيغيه الأصليه كلام كتير جداً، و فيما بعد أمتزجت مع اللغه الفرنسيه و طورت العاميه من نفسها مع كل مُستحدث. أنا من فتره بسيطه سمعت بعض الأزجال من فترة المماليك، لقيتها بالضبط نفس اللهجه اللي أحنأ بتتكلم بيها حالياً، إذن فعاميتنا بتحمل صفات الشخصيه المصريه، بتحمل جذور من اللغه



يد

القبطية في كثير جداً من المفردات التي بنسخدمها في حياتنا اليومية، إذن و بما أن العامية هي اللهجة التي أنا وأنتم بنسخدمها في كل تفاصيل حياتنا، فليهد أكتب كتاب هدفها التواصل معاك، و أول خطوه فيه –و هي لغة التواصل- تعمل بيننا نوع من الBlock أو القفله.

كان ليا تجربته في بدايات شغلي كمخرج تسجيلي، و هي أني قررت في بداياتي أني أكون واحد من المكاتب التابعه لأحد قنوات الأفلام التسجيليه الكبرى، و فعلاً قابلت مدير القناه و رحب بالفكره، بس بشرط أني أبعت عينات من شغلي لكن بشروط محده خاصه بالقناه، كان من بينها أن الحوار و التعليق الصوتي لازم يكونوا بالفصحى، و بالفعل حولت التعليق الصوتي لأثنين من أفلامي بالفصحى علشان أبعتهم، و أتقبل الفيلمين لكن أنا مكنتش حاسس أن الأفلام بالصياغه ده ممكن تنتمي ليا بأى بشكل. و الحمد لله أن التجريه مكملتش سنه، و إلا كنت حأتقولب في شكل ألي جداً بالنسبالي. و مره ثانيه الحمد لله أني رجعت ثاني للأصل اللي أنا أتديت بيه. يمكن بعضكم ميعجبوش كلامي، يمكن البعض الثاني يحس أن النقطه دي ممكن تكون ثغره و نقطه ضعف للكتاب، بس أتمنى أن محدش يستعجل في الحكم لحد ما يقرأ من الكتاب ما يجعله قادر على الحكم بشكل كامل.

الليه الرابعه و الأخيره هي أسم الكتاب "اللمبه"، و الليه دي لها حكاية طريفه جداً، ده غير أنها جت بالصدفه البحته. في البدايه كان أختياري لأسم الكتاب هو نفس أسم البرنامج اللي كان نواه للكتاب، و كنت أستقرت عليه خلاص. لكن أثناء عملية ترتيب للمكتبة الخاصه بيا، وقعت عيني على كتاب كنت أخذته هديه و أنا في زياره لمعبد بوذي، و ده كان أثناء زيارتي للهند من 10 سنين، و كان الكتاب لأهم أقوال و تعاليم بوذا، كنت قريته أول ما ما رجعت مصر و نسيتته تماماً بعدها، و بالمناسبه البوذية ليست ديانه بل تعاليم، و بوذا نفسه في الكتاب ده بينفي أنه إله أو ملاك، المهم الكتاب كان أسمه "Be a lamp upon yourself" أو كون مصباح ينير لك، و بالمناسبه فكلمة بوذا أو بنطقها الصح المُفترض "بودا"، معناها "المتنور، و هي ده الفكرة الرئيسييه في الديانه البوذية، أكتشاف النور الداخلي داخل الإنسان .



الأسم شديداً بشكل غريب، خصوصاً أنها نورت عندي أنا شخصياً نقطة مهمه جداً، أن في كل الأديان و العقائد النور دائماً هو المرادف للعلم و المعرفة سواء كانت معارف حياتيه أو روحانيه، مرادف للوصول لمرحلة الفهم الكامل لكل شيء، مثال في سورة البقرة، الآية 257 "الله ولى الذين آمنوا، يخرجهم من الظلمات إلى النور". أما في المسيحيه و اليهوديه، ففي سفر أشعيا من العهد القديم المشترك بين الديانتين إصحاح 60 العدد 1: "قومي أستيري لأنه قد جاء نورك"، أما في العهد الجديد اللي هو خاص بس بالمسيحيين، ففي سفر متى إصحاح 5 العدد 14 "أنتم نور العالم، لا يمكن أن تخفي مدينه موضوعه على جبل". أما الأغرّب فحنلاقيه في المحافل الماسونيه، أن الأشخاص اللي بيوصلوا للدرجه 33، و اللي بتمثل أعلى درجه من المعرفة في الماسونيه، فأسمهم "المتنورين".

كل الأسباب دي، مع أسم الكتاب الأهم لبودا، خلوني أقرر تغيير أسم الكتاب ل "اللمبه" لما تحمله الكلمه من مضامين في كافة الأوساط و الأديان و المعتقدات و الأيدولوجيات، و من هنا كان اختيار أسم للكتاب ده، و اللي أتمنى فعلاً أنه ينور عندكم أى جزء ممكن يكون محتاج يتعمل عليه Spot و لو بسيط عليه، أتمنى أنه يساعد في تحليل كثير من معاركنا اليوميه مع الحياه، و أخيراً و لتانى مره أتمنى أن أى وقت حتقضيه مع الكتاب ميمثلش بالنسبالك أى وقت ضايح، لأن الحياه فعلاً لا تحتمل أى لحظه تضيع فيها.

ملحوظتين مهمين أحب أختم بيهم الفصل ده أو المقدمه دي، الأولى خاصه بالعنوان التانى للكتاب، و هو العنوان الوصفى "يوميات الأنسان في اللا زمكان" و اللي يهمنى توضيحه هنا هو كلمه "زمكان".

زمكان هو تعبير فيزيائى، و هو ترجمه للتعبير اللي أستخدمه العالم العظيم ألبرت أينشتاين، و أعتبر فيه أن الزمن هو البعد الرابع للمكان، و المصطلح الأنجليزى هو "Spacetime" لكن تُرجم بالعربى لكلمه زمكان بدلاً من الترجمة الحرفيه و اللي حتكون مكان الزمان، و معنى الكلمه هنا -و اللي قصدته في العنوان- هو أى محاول



يد

أناقش نوعيه من المشاكل أو الصفات الأنسانيه الموجوده في كل زمان و مكان، فده بس توضيح حبيت أقوله لفهم معنى الكلمه.

تاني ملحوظه، و هي أعتذار، و فيها بعذر لكل قارئه لهذا الكتاب، لكن الذنب فعلاً مش ذنبي، و أعتذاري عن أن اللغه العربيه -سواء عاميه أو فصحي- بتحدد الجنس في ضمير المُخاطب، و معاه بيتحدد جنس الأفعال، يعني أنت فعلت أو أنتي فعلتي، عكس أغلب اللغات اللي أصلها لاتيني زي الأنجليزيه، فكلمة You و الفعل اللي بييجي وراها بيكون محايد، يعني ممكن يكون المُخاطب رجل أو أمراه. و بما أن اللغه العربيه أكثر دقه، و بما أني مش كل مره حافضل أقول أنت و أنتي، و بما أن أغلب اللغات - بما فيها اللغه العربيه- هي لغات ذكوريه، فلأسف حاكون مضطر أستخدم الصيغه المذكوره، بما أنها المتعارف عليه لغوياً في حالة عدم تحديد الجنس، و ده غصب عني و الله، و أتمنى من كل القارئات يقبلوا أعتذاري عن هذه الغلطه الغير مقصوده.

13 فبراير 2023



"لماذا نبني أختياراتنا على المتعارف عليه فقط؟
لماذا نصدر طول الوقت أحكاماً مسبقه؟"



الى من عرفوش

شر البلية ما يضحك، و دى مقوله واقعيه جداً، و الى حأتكم عنه فى الفصل ده مش بليه واحده، لكن بلاوى، و للأسف كلها غلطات -أحنا مش عارفين و مش مقتنعين خالص أنها ممكن تكون غلط-، و ده أسوأ ما فيها، الغلط اللى بنعمله، و أحنا مش مقتنعين أنه غلط، و على رأى المتنبي "كَمْ ذَا بِمِصْرٍ مِنَ الْمُضْحِكَاتِ وَلَكِنَّهُ ضَحِكٌ كَالْبُكَ".

حأبدأ معاك الفصل ده بمشكلة كبيره جداً و لها أشكال و متحورات كثير، لكن مش هى المشكله الرئيسيه فى الفصل، لكنها حتكون المدخل اللى حأدخل من خلاله على المشكله الرئيسيه، لكن التسلسل ده مهم جداً علشان تفهم معايا طريقه التفكير اللى بتحكم حياتنا، و اللى بنبنى على أساسها أغلب قراراتنا فى الحياه. المشكله العامه اللى حأتفرع منها للمشكله الرئيسيه عندنا هى مشكله التعميم.

التعميم هو المشكله اللى بتعانى منها أغلب -إن مكنش كل- الشعوب العربيه، لأن التعميم جزء من ثقافتنا، و التعميم معناه ببساطه تطبيق نفس الحكم أو الرأى أو وجهة النظر على كل الناس أو على كل الحالات، دون النظر لأختلاف كل حاله عن التانيه. التعميم له نماذج كثير جداً فى حياتنا، تقريباً هو داخل معانا فى كل تفاصيل حياتنا، لكن أنا أخترت منهم بعض النماذج، اللى من وجهة نظرى هى الأكثر تأثيراً على مسار حياتنا، و اللى مخليانا زى ما دايماً بقول بنمشى فى مكاننا، مبنقدرش نتقدم خطوه لأننا أسرى النمط ده من التفكير.

خولنى أبدأ بالنموذج الأخطر من وجهة نظرى على الأطلاق و هو الأحكام و الفتاوى الدينيه، و دى للأسف كارثة الكوارث، لأن ببساطه مغيث حكم أو فتوى يصلح لحالتين على الأطلاق، لأن طبعاً كل حاله أنسانيه فى الدنيا لها خصوصيتها، و تعالوا نفتكر موضوع طرحته الإعلاميه هاله سرحان، و أستخدمته وقتها علشان طبعاً تعمل فرقعه و تعلق نسبة مشاهدات البرنامج بتاعها، و قلبت الحلقة وقتها مسخره و طريقه، مع أن الحال اللى صدرت فيها الفتوى كانت حاله خاصه جداً، و لم تتكرر،



الحج منفرود

ده طبعاً بعيداً عن احتمالية صدق المرويه الأصليه أو لا، لكن أنا هنا بتكلم عن الحاله اللى أثارها هاله سرحان، مش حاله الفتوى نفسها.

الموضوع وقت ما أثارته الأستاذه الإعلاميه سبب مشاكل كتير جداً، كانت قربت توصل لفتنه طائفية بجد، وده بسبب دخول قس مسيحي على الخط، و الخط هنا مش قصدى بيه أتصال تليفوني، لكن أقصد أستغلاله للموضوع فى برنامج على أحد القنوات المسيحيه. وقتها قامت الدنيا ومقعدتش، و طالب مسلمين كتير بأعتيال القس ده، مع أن الموضوع فعلاً من الأساس ممكن ميكنش صح، أقصد الفتوى اللى تنبنتها هاله سرحان، و اللى مكنش لها لى فايده و لا هدف غير الفرقة الإعلاميه.

هاله سرحان بدأت تقترح أن كل الناس تعمل بالفتوى ده، و ده كان مسار السخريه فى الحلقة، لكن ده اللى يهمنى، و ده اللى أنا عايز أوصله، و هو هل الفتوى تصلح لكل زمان و مكان؟ لأ طبعاً، و ده ياخدنى لنقطه مهمه جداً، أن عاملى الزمان و المكان بيفرقوا جداً فى الفتوى. حيطلعلى شخص ما يقولى ده دين، يعنى أحكام ثابتة و مفهوش الكلام ده، أرد بكل بساطه و أقوله مكنش بقى فى مذاهب أربعه بتختلف فى كتير جداً من الأحكام فيما بينها، حتى من غير أختلاف العصر، يعنى المذاهب الأربعة ممكن تختلف فى رأيها فى نفس الحاله أصلاً، و على أرض الواقع ده بيحصل فى كتير جداً من الحالات طول الوقت، و ده شئ صحى جداً، و ضرورى جداً، أن الفتوى تطبق على حسب الحاله، و أن كمان نفس الحاله يكون لها أكثر من أختيار. موضوع الفتاوى الدينيه حيكون له جزء مهم جداً فى آخر الفصل ده، لما أوصل معاك لموضوع حلقتنا الرئيسى، علشان نشوف تأثير الفتاوى و خطورتها، و آيه المدى اللى ممكن توصلهولنا الفتاوى.

أدخل معاك فى النموذج التانى، و هو نموذج الفتاوى الصحيه، و اللى بلا أستثناء كلنا كعرب بنشترك فيها، و بالأخص الستات، و هنا التعميم بييجى فى شكلين، الأول هو عملية تشخيص الحاله، و التانى هو طبعاً أقترح العلاج.

طبعاً محدش مننا ماسمعش الست الوالده بتكلم واحده صاحبته فى التليفون و تقولها "أه.. يبقى بيسنن، أو أه لو عنده مغص يبقى أديله كذا" و أحياناً أقلبيه على بطنه، أو أعملى فيه كذا و كذا، أهم حاجه فى الفتاوى دى -من وجهة نظرى-، أنها



اللعج منفروش

بتم بالتليفون، يعنى بدون ما الشخص اللى بيدعى الخبره و بيشخص حتى يشوف الحاله أياه، هو أو هي بيشخصوا بالسمع و بس، و بتكون غالباً الفتاوى العظيمة دى خاصه بأطفال رُضع لا حول لهم و لاقوه، و عادى بنجرب فيهم بدعوى الخبره.

أو الشكل التانى و هو نصايح الأدوية، و اللى دايماً بتبدأ بالجمله الشهيره جداً "خده على مسئوليتى، أنا مجربه"، و دى للأسف بنعتبرها كعرب خبره و شئ واجب احترامه، و ممكن كمان الشخص اللى بيفتى يزعل لو اللى بينصحه مخدش بكلامه، و طبعاً و بالرغم من أننا لسه موصلناش لجزء الأمثال، لكن عندنا مثل فاشل بيقول "أسأل مجرب و لا تسأل طبيب" و ده بعتبره واحد من أكثر الأمثال ضرراً فى التاريخ.

مش حنسى مره رحى الصيدليه لصيدلى صديق أشتكيتله من مشكله فى القولون عندى، فأصر يدينى حاجه ملهاش أى علاقه بحالتى، و كل ما أحاول أفهمه أن دى مش حالتى، يضحك و يفتكرنى مكسوف من أنى أعترف بوجود بدايات كرش، و أنى بحاول أجمل الموضوع، و فضلت أحاول أقنعه أن مشكلتى ملهاش أى علاقه بالدوا اللى كان عايز يديهونى، لكن هو عقله كان رافض تماماً أنه ممكن يكون غلط. طيب بجد ده مش حاقول هو أنخرج من كلية صيدله أزاى، لأ حاسأل دخلها أزاى من الأساس. المهم بأختصار أحنا كتير بنضر بعضنا بنصايح طبيه كارثيه، و حقيقى الغلط مش على اللى بيفتى، الغلط الفعلى على اللى بيسمع لكلامه و بياخذ بيه.

شكل تانى من أشكال التعميم، و هو تعيم السمعه، و المعروف باللغه الأنجليزيه ب "Stereotype"، فيعنى أياه "Stereotype"؟

ببساطه هي فكرة الأحكام المسبقه على الناس نتيجته كونهم من بلد معينه، أو ببشغلوا شغلانه معينه، أو من دين معين، أو أى حاجه شبه كده، فمثلاً أحنا كمصريين دايماً بنقول أن الدمايطه بخله، أنا معرفش ده بناء على أياه، و هل اللى بيقول الكلام ده عمره قابل أصلاً دمياطى فى حياته، بس هو أتربى على أن الناس بتقول كده، فبقت دى الحقيقه المسلم بيها بالنسبه له. و زى مثلاً سمعه موظف الحكومه اللى بيتعامل مع الجمهور أنه كذا و كذا، مع أن الحالات الأيجابيه دايماً بتكون أكثر بكثير من السلبيه.



الحج منفر فوش

خليني أفكرك بجاحه كانت منتشره في السبعينيات و الثمانينيات و نص التسعينيات، و هي فكرة النكت اللى بتبدأ دايماً بالجمله الشهيره "مره واحد صعيدى" و دى كانت البدايه اللى بتمهدلك أن الشخص بطل النكته شخص غبى، طبعاً دلوقتي بدأنا نفهم أن ده أسمه تنمر، بس وقتها الكلمه دى مكنش حد يعرفها، و كانت النكت دى بتمثل شكل من أشكال التمييز عنصري في غايه الخطوره. عايز أقولك أن سكان أغلب المحافظات بره القاهره، مش بيحبوا القاهريين بسبب النظرة العنصريه للقاهريين على باقي المحافظات، و اللى دايماً فيها تمييز و تعالي ملهمش أى مبرر.

نموذج رابع من نماذج التعميم، و هو برضه من النماذج الكوميديه، لكن برضه نموذج كارثي، و هو بيكون أما عند فئة الفنيين اللى بتشتغل بأيدھا، أو فئة أصحاب العلم و الشهادات، متمستغربش لأنى حثبتلك أن الأثنين بيوقعوا في نفس الغلطه الخاصه بالتعميم. نبدأ بالفنى و الصراع الدائم من وجهة نظره بينه و بين الشخص صاحب الشهاده، سواء كانت العلاقه بين فنى و مهندس، أو الممرضه و الدكتور، أو أى نموذج شبيهه. أحساس الفنى طول الوقت بأنه أكثر درايه من الشخص الدارس، لكن بما أننا -على رأى عادل أمام- "بلد شهادات صحيح"، فهو بيحس دايماً أنه مقهور مع أنه الأفضل، و يمكن كمان يحاول دايماً أنه يوقع صاحب الشهاده في الغلط، و ده الصراع الأبدى الدائم بين الخبره و العلم، و اللى عمره ما حينتهى.

خليني أضرب نموذج بالنوع ده من الفكر و أرجع معاك للثمانينات من القرن العشرين، وقتها كانت العربيات اللادا منتشره جداً في مصر، و كانت بتيجي من الأتحاد السوفيتي، مكناش لسه بدأنا نجتمعها محلياً، و طبعاً الجو هناك تلج، ففى حاجه في العربيه أسمها الترموستات -و دى اللى بتحدد المروحه تشتغل على درجه حراره كام- مبتشتغلش في الأجواء المصريه بشكل جيد، لأن الترموستات كان مصمم لدرجات حراره أكثر بروده، فما كان من الميكانيكي المصري العبقري إلا أنه شال الترموستات من العربيات اللادا و غيره، و نجحت الفكره بشكل أكثر من ممتاز.

نجاح الفكره دى خلى كل الميكانيكيه ينفذوها مع كل أنواع العربيات اللى فيها مشكله خاصه بحرارة الموتور، مع أن العربيات دى كانت جايه من دول درجة حرارتها مختلفه تماماً عن روسيا، زى إيطاليا و اليابان، و طبعاً كانت المشكله بتتفاقم، و صاحب العربيه دايماً هو اللى بيشتيل المشكله، كل ده ليه، لأن فيه فكره نجحت مع



العجبة منغروفوش

عربيه معينه، فنجربها مع كل الأنواع، بدون الأهتمام بالتفاصيل العلميه، اللي من أهمها بلد المنشأ، و طبيعة تصميم الموتور، بس أحنا كده، لو حد نجح في حاجه، لازم نطبقها في كل حاجه.

النوذج التانى اللي حاضريه هو نموذج الدكتور الكبار في مصر، و للأسف كل ما الدكتور أسمه بيكبر، كل ما بيتعالى على الأهتمام بالكشف الدقيق لكل حاله بشكل خاص، و أذكر حالتين كانوا قريبين منى جداً، و كنت بروح معاهم للدكاتره طول الوقت، و طريقة تعامل الدكتور مع حاله، لدرجة أنى لحد النهارده محمل الدكتور المعالج لأحد الحالات فيهم سبب الوفاة، بسبب تعاليه و رفضه عمل كشف أدق للحاله، و ده أنا شفته بعنيه، فكتب للحاله دوا للجلطه زودت السيوله جداً، بدون ما يقدر أن حاله متمحملش، و أن الدوا ده مش مناسب لباقي المشاكل اللي عندها، و كانت السيوله دى سبب وفاتها خلال ساعات، و يمكن أنا كنت لسه ذاكر المثل بتاع صديقي الصيدلى.

للأسف كلا الطرفين سواء الفنى أو صاحب الدرجه العلميه، بيعتمد طول الوقت على خبراته السابقه، من غير ما يدرك أن لكل حاله خصوصيتها، كل واحد فيهم مش عايز يطلع من وهم أن خبراته كافيه جداً لتشخيص أى حاله، و أنه قادر على التشخيص بالنظر بس، و للأسف أكثر، محدش فيهم بيتغظ من أخطائه.

نموذج خامس بس مش ح أطول فيه، و هو نموذج المشاريع الناجحه. في أغلب الدول العربيه لو حد عمل فكره جديده و نجحت، حتلاقي على طول أغلب اللي بيشتغلوا في نفس المجال قلده أو سرقوا الفكره، يعنى مثلاً لما ظهر الكريب في مصر، فجأه أصبح كل محلات الأكل بتعمل كريب، كأن المصريين طول عمرهم مبيكوش غيره، و اللطيف جداً أنك أحياناً بتلاقي المحلات التانيه سارقه كمان نفس الأسم، زى الكم الهائل من محلات الفول اللي أسمها الشبراوى، أو محلات الكبده اللي أسمها الشرفاوى، أو محلات إصلاح الشكمان اللي أسمها الزقازيقى.

المشكلة الحقيقيه أن السوق بيحصله نوع من التشبع، فبتلاقي أن الضغط بدل ما كان على محل أو اثنين، أنقسم على عشرين، و ده معناه أن دخلك أصبح عُشر اللي كان مفروض يدخلك، فبالتالى أغلب المحلات دى مش بتغطى حتى مصاريفها، و



علشان كده أحنا طول الوقت في أغلب المجالات التجاربه عندنا كساد، لأن اللي بيقلد بيبوظ تركيبه السوق على نفسه قبل ما بيبوظها على اللي بيبعد وبيعلم حاجه مختلفه، لأن أغلب الناس مبتعرفش تقدر أمتي السوق حيوصل لحاله التشبع دى، لأن للأسف في دولنا العربيه محدش بيعلم أى نوع من الدراسه قبل ما يبدأ أى مشروع، و النتيجه دايماً بتكون زى ما أحنا شايفين.... كساد.

أوصل بيك لسادس و آخر نموذج من أشكال التعميم، و اللي أنا بعتره أهمهم - حتى لو مكنش أخطرهم زى ما قلت على موضوع تعميم الفتاوى-، لأنه للأسف بيمثل الثقافه العامه لشعوبنا، و جزء كبير من المبادئ اللي بتشكل حياتنا، و هو الأمثال الشعبيه. النموذج السادس ده أو الأمثال، هو اللي حيدخلنى معاك في موضوع الفصل الرئيسى، لكن في البدايه خلينى أوضح أن الأمثال دى ما هي إلا أقوال أتقالت من شخص في ظرف معين، و هي يا أما بتمثل ملخص قصه أو موقف، أو رأى شخص ما في أحداث حصلت، و طبعاً وارد جداً أن رايه يكون غلط.

خلينى أضرب مثال بالشكل الأول، و هو الأمثال اللي بتمثل ملخص قصه، و نبدأ بالمثل اللي بيقول "اللى أختشوا ماتوا". المثل ده عباره عن مقوله أتقالت لما حصلت حريقه في حمام شعبى للستات، فالستات اللي أتكسفت تطلع و هي مش لابسه ماتت في الحريقه، فهل الأستخدام الحالى للمثل يحمل نفس المعنى الأصيل و المهم جداً للمثل؟ طبعاً لأ، المثل أتحول لحاجه ثانيه لا علاقه لها بالأصل، و تحول لمثل تعميمى خاطئ جداً، بيوصم الناس كلها بالفجر بدون أى أساس. للأسف و بعيداً كمان عن كون فكرة الأمثال و التدليل بيها، هي غلط في حد ذاتها، فكمان أحنا في حالات كتير مش بنكون فاهمين المعنى الأصيل للمثل.

خلينى أضرب مثال تانى لنفس الشكل، و هو المقوله اللي أتقالت نتيجته ظرف أو حدث ما، و خلينى أتكلم عن المثل اللي بيقول "اللى يعوزه البيت يحرم على الجامع" و اللي أغلب -إن مكنش كل- اللي بيستخدموا المثل ده، مش فاهمين معناه الأصيل، و يكفي أنى أعرفكم أن الجامع هنا مش مقصود بيه المسجد خالص، لكن مقصود بيه جامع الضرايب اللي كان بيلف على البيوت و ياخذ من الناس الضرايب، و على



الحج منعرفوش

فكره، في مثل تانى بيكمل المثل ده لما كان جامع الضرايب بيتأخر أو ميبروحش يلم الضرايب من الناس في وقتها، وهو "بركه يا جامع".

نوصل للمثل الكارثي، و اللي أتعملت الحلقة دي كلها علشانه، المثل ده يتكتب فيه كتب، مش مجرد فصل في كتاب، لأنه بيمثل أخطر مفهوم في عقلية أغلب الشعوب العربية، و الشعب المصرى بشكل خاص جداً، وهو "اللى نعرفه أحسن من اللى منعرفوش"، المثل اللي بيمثل كل مشاكلنا مع الآخر، مشاكلنا مع العلم أحياناً، صراع الأجيال بين الأهالي و الأبناء، لدرجة أنه بيمثل أحياناً أرهاب و قتل زى ما حأشرح و بأمثله حصلت من واقع الحياه، كل ده من ال 5 كلمات دول.

بدايةً، أنا عايز أسأل كل اللي بيتبع المثل ده سؤال، ما اللى أنت تعرفه في كل نواحي الحياه، غير اللي غيرك يعرفه، و غيرك ده عايش معاك في نفس البلد، و ممكن يكون جارك في الشقه اللي قدامك، فليه أنت تفترض أن اللى أنت تعرفه أحسن من اللى هو اللي يعرفه؟ أو العكس برضه، ليه هو يفترض أن اللى هو عارفه أحسن، و مقياس أحسن ده معناه أيه؟ هل معناه أحسن بشكل عام، و لا أحسن لك أنت بس؟ و حتى لو كان أحسن لك أنت بس، هو مين اللى قال كده، و هل هو أحسن لمجرد أننا عارفينه فنبقى في الأمان؟ و الأمان ده ممكن يخسرنا فرص في حياتنا ممكن جداً نندم عليها بعد كده، و خصوصاً طبعاً في مجال العمل؟

أنا عايز أى حد فيكم يجرب تجربته مع أصحابه في خروجه، و يقولهم تعالوا ناكل في مطعم صيني أو ياباني أو حتى هندي، و يكونوا مجربوش النوعيه دي من الأكل قبل كده، أنا ممكن أقولك من دلوقتي كل اللي حيتقال، حتسمع "دول بياكلوا كلاب" مع أن و الله المنيو مفيهوش شاورمه كلاب أو شيش كلاب، أو "دول بياكلوا سمك ني"، و أضعف الأيمان حتسمع الجملة الأشهر: "ده أكلهم بيوجع البطن"، مع أنه ممكن يكون بياكل كبده و سجع من عند واحد واقف بعربيه على ناصية الشارع، و مش عايز أكمل الباقي، بس طبعاً "اللى نعرفه أحسن من اللى منعرفوش" و أحسن هنا حتكون بمفهوم "أضمن لأننا مجربينه". نفس المنطق حتسمعه لو حاولت تقنع



الحج من عرفوش

واحد صاحبك مبيشوفش غير أفلام عربي، أنكم تشوفوا فيلم روسي مثلاً، حيصر على العربي حتى لو كان تافه، وحيحاول يقنعك أن الفيلم تاني ممل و..... إلخ.

أنا طبعاً بحاول أدخل في الموضوع ببدايه خفيفه، لأن الموضوع بجد كارثي، وخليني أبداً معاك من واحده من النقط اللي أنا ذكرتها كأثار للمثل ده، وهى فكرة صراع الأجيال، وعقلية الأهالي المتحجره، واللى واقفه على اللي هى عارفاه.... و بس.

حأبدأ بتجربه شخصيه جداً حصلتلنى وأنا فى سن ال16، وكانت السبب الرئيسى فى تغيير مسار حياتى 180 درجه. وقتها كنت فى أولى ثانوى، وكان فى شهاده بريطانيه بتتاخد و معترف بيها فى الجامعات المصريه، لكن أغلب الأهالي مكنوش سمعوا عنها وقتها، وهى الGCE، واللى أتطورت فيما بعد لIGCSE، وكانت الشهاده دى ممكن تتاخد بعد أولى ثانوى مباشرة، بمعنى أنك كمان ممكن توفر سنه من عمرك.

وقتها حاولت كتير جداً أقنع والدى بيها بس رفض تماماً...ليه؟ لأنه مسمعش عنها قبل كده. أضرطيت أكمل ثانويه عامه، بس معظم أصدقائى اللي أهاليهم كانوا عارفينها دخلوها ونجحوا، وطبعاً دخلوا كليات، وكنت أنا لسه فى ثانويه عامه. لما جه أخويا الأصغر يطلب أنه يعملها، طبعاً والدى وافق على طول...ليه برضه؟ لأنها دخلت فى أطار اللي يعرفه، مع أنه كان ممكن يتأكد وقت ما أنا طلبتها، بس هو ده صراع الأجيال اللي طول الوقت بيسببه المثل الشيطاني ده. للأسف معظم الأهالي مش بتثق فى كلام أو رأى أولادها، واللى هما بالتأكيد عارفين دنيتهم أكثر من الأهالي، لكن طبعاً "اللى تعرفه أحسن من اللي متعرفوش".

أكمل معاكم شويه فى موضوع التعليم، و مدى ارتباطه بما يمسى "أحتياجات السوق"، وأن الدراسه لازم ترتبط بأيه الوظائف اللي السوق عايزها، لكن الأهالي ما زالوا عايشين فى أطار طب و هندسه، و مش عارفين أن الزمن أتغير، و أن فى تخصصات تانيه بقى لها أحتياج كبير جداً، زي الGraphic Design، و الGenetics، و الPsychology. و بمناسبه الPsychology، كنت سمعت حوار بين أم و بنتها اللي نفسها تدرسه، بس البنه كل ذنبها أنها جايه مجموع كبير يدخلها أى كليه. حوار كان غريب جداً، لكنه بيدل على عقلية "اللى نعرفه". طبعاً سمعت العبارات المتوقعه زي: أيه اللي أنتى بتفكرى تدرسيه ده، و عايزه تتعلمى مع



الصح منفر فوش

مجانين و يجننوكي و أنتي مش ناقصه، و في حد يجيله فرصه يدخل الطب و يرفض، و أنتي حتندمي بعد كده، بنفس المنطق اللي ممكن تشوفه في فيلم من الأربعينات من القرن اللي فات، و طبعاً و بالتأكيد أنتصر رأى الأم بالقوه الجبريه، و كأن اللي جايب مجموع كبير لازم يتعاقب. محظوظون هم أصحاب المجاميع المتوسطه.

في مسرحية شاهد مشافش حاجه، قال سرحان عبد البصير -أو عادل أمام اللي جسد دوره- كلمه واحده في منتهى الخطوره و هي "قالولو"، الكلمه اللي كانت أفيه مهم جداً في العرض، لكن هي حقيقه واقعه في كل مجتمعاتنا العربيه، و خليني أربطها لك بموضوع المثل، و بأخطر حادثتين حصلوا في مصر بناء على مبدأ "قالولو".

بدايةً، يعنى أيه الكلمه دى، أقصد كلمه "قالولو". يعنى أن في ناس أهل ثقه، من اللي أحنا عارفينهم قالولنا معلومه، و أحنا بدون تفكير -طالما أنهم أهل ثقه- حناخد كلامهم على أنه كلام مسلم بيه، و أحياناً و زى ما حاحكيلكم، بناخده أنه دستور أو منهج حياه أو شريعه لازم نمشى عليها.

أحياناً بتوصل ثقتنا في "الى نعرفه" -و المره دى "الى نعرفه" بتكون لأشخاص، مش لمعلومه-، لدرجة التقديس، فبنعتبر كلامهم وحي، مينفعش نراجع وراه، و ده بيحصل في كافة نواحي الحياه، لكن حاخص هنا طبعاً الجانب الديني، لأن "قالولو" هنا بتكون كارته بمعنى الكلمه، وخليني أكلمك على أشهر حادثتين "قالولو" حصلوا في مصر، الأولى محاولة اغتيال الكاتب الكبير نجيب محفوظ، و الثانية اغتيال الكاتب و المفكر "فرج فوده"، و الاتنين تموا بكلمه "قالولو".

خليني أبدأ بمحاولة اغتيال الكاتب الكبير نجيب محفوظ، و اللي تمت بالفعل، لكن هو ممتاش. في يوم 14 أكتوبر 1995، أتعرض نجيب محفوظ للطعن بسكينه في رقبته على أيد شابين، و السبب كان ببساطه أنهم أتقال لهم أنه كافر و خارج عن المله، بسبب روايه "أولاد حارتنا"، و طبعاً بسبب الثقه المتناهيه في الناس اللي قائلتهم -"أهل الثقه" يعنى-، و اللي كلامهم واجب التصديق، و طبعاً عدم معرفه الشابين بالروايه من الأصل، و يمكن بنجيب محفوظ نفسه، حاولوا يغتالوا أنسان، حتى بغض النظر عن مكانته.



الحج من عرفوش

الغريب أن الرواية مكتوبة من سنة 1950، يعنى قبلها ب45 سنة، أنتشرت في الأول كمقالات مسلسله في الأهرام، لكن وقتها أتوقفت و أتمنعت، و بعد 8 سنين عرف ينشرها في لبنان، و الموضوع مات من وقتها، لحد ما حصل نجيب محفوظ على نوبل سنة 1988، و رجع مره ثانيه أسم الروايه و فكرتها يتردد. طبعاً الأثنين اللي قاموا بمحاولة الأغتتيال هما من الشباب بسيط الثقافه، و اللي علاقته بالأدب علاقته منعدهم، فهنا كان اللي من عرفوش حرام، لأننا سمعنا أنه حرام. بأختصار قالولو.

نجي بقى لمحاولة الأغتتيال الثانيه، و اللي تمت بالفعل، و هى أغتتيال الكاتب فرج فوده، و كانت في 8 يونيو 1992، و المره دى كان السبب مناظره نظمها الهيئه العامه لقصور الثقافه ضمن فعاليات معرض الكتاب في 8 يناير 1992، و كان عنوانها هو "الدوله الدينيه و الدوله العلمانيه"، و كانت بينه و بين الشيخ الغزالي و مأمون الهضيبي مرشد الأخوان في الوقت ده، و دكتور محمد عماره. بعدها ب5 أشهر بالضبط، قام شابين من أحد الجماعات بأطلاق النار عليه، و برضه كانت بسبب كتبه، و اللي مقراهاش لا اللي أعتالوه و لا اللي حرصوهم، لكن كان للمناظره و آرائه اللي قالها من خلالها، الدور الأكبر في التحريض ده، لأن يمكن قبل المناظره محدش منهم كان يعرفه، و برضه كانت كلمه السر قالولو.

بالمناسبه فشخصية فرج فوده و محاولة أعتياله، تم تجسيدها في فيلم الأرهابي سنة 1994 لعادل أمام، و كان من تأليف لينين الرملى و إخراج نادر جلال، و جسد دور فرج فوده الممثل الكبير محمد الدفراوى، لكن كانت في الفيلم بأسامي و تفاصيل مختلفه.

طبعاً و زى ما قلت في بدايه كلامي عن هذا المثل الكارثي "اللي نعرفه أحسن من اللي من عرفوش" أن الموضوع ده يتكتب فيه كتب، لكن بيتهيا إلى أنى قدرت أوصلك الفكره. طيب في النهايه أنا عايز أقول أيه؟ عايز أقول في الفصل ده، و اللي قسمته لموضوعين، الأول هو فكره التعميم و الأحكام المعلبه، و الثاني هو فكره أن الحاجه اللي من عرفاش دايماً غلط، لدرجة الوصول للتكفير و القتل، لأن حل المشكلتين في جملة واحده بس و هى "متسيبش حد يفكرلك"، متتقش في أى شخص، أيأ كان، لدرجة التقديس، خلى دايماً رأيك من دماغك، متحرمش نفسك من حقها في المعرفه و الأختيار، بس يكون مبنى على دراسه، متحكمش على شئ من غير ما تعرفه كويس،



الصح منعرفوش

وإذا كنت مش قادر أو مش عارف تدرسه، فخليك محايد، فرص المعرفه الأيام دى كتير جداً، و متاحه للجميع.

وده يرجعنى لأيام ما كنت صغير، و مكنش فى أى وسایل للتحقق من معلومات كتير، فكان فى كاتب و عالم شهير جداً وقتها، كان أغلب جيلى مصدق كل المعلومات اللى كان بيقولها فى برامج و كتبه. لكن للأسف فى عصر المعلومات الرهيب اللى أحنا فيه دلوقتى، أكتشفت مؤخراً قد أيه كان بيضحك علينا طول الوقت.

04 فبراير 2023



"لماذا يثير هذا المختبي خلف النظاره، كل
هذا الكم من الفضول ؟
ماسر النشوى فى حضرة تلك الحضره؟ "



حاله من الغموض

في الفصل الى فات كان عندنا موضوعين، موضوع شامل و كبير، و هو فكرة التعميم، و اللي دخلنا على موضوع الفصل الرئيسي، و هو اللي نعرفه و اللي منعرفوش، و أزاى أن دايماً اللي نعرفه بيمثل الأمان -و ده بس لأننا نعرفه و أتريننا عليه-، أما اللي منعرفوش، فهو دايماً بيمثل الجانب المظلم، اللي لازم نبعد عنه أو نكفره، بدون حتى ما نحاول أننا نفهمه أو نناقشه، و ضريت مثالين في آخر الفصل بمحاولتين أغتيال مشهورين جداً، واحده نجحت بالفعل، و هي أغتيال الكاتب المصرى الكبير فرج فوده سنة 1992، و الثانية منجحتش و كانت بعدها ب3 سنين، و هي محاولة أغتيال الأديب الكبير نجيب محفوظ سنة 1995، و الاتنين تموا بسبب أن المنفذين صدقوا الناس اللي يعرفوهم لما قالولهم أن الناس دى خارجه عن المله، و محاولوش أى محاوله أنهم يتأكدوا أو يعرفوا فكر الناس الى رايعين يغتالوهم، لمجرد بس أنهم ميعرفهمش، و أنا تعمدت أقفل بيهم الفصل الى فات، علشان تكون نفس النقطة النهايه دى، هي بداية الفصل ده.

الكاتب المصرى الساخر جداً أحمد رجب كتب في كتابه "كلام فارغ"، و اللي كان عباره عن مجموعة قصص قصيره ساخره جداً، أقوى و أقصر مقدمة كتاب في التاريخ، و كانت عباره عن جملتين بس، و بتقول المقدمه: " الكلام نوعان، كلام فارغ، و كلام مليون فارغ". الجمله أو المقدمه دى أستوقفتنى فتره كبيره جداً، و غيرت تفكيرى في كثير من المواضيع الى أنا جاى أناقشها معاك في الفصل ده، و اللي حتكون عن النوع التانى من الكلام، و هو الكلام المليون كلام فارغ، أو الكلام اللي يبهرك في ظاهره، لكن لو تمعننت فيه، و قررت أنك تحاول تفهمه أو تعرف الغرض منه، حتكتشف أنك كان كنت بتضحك على نفسك طول الوقت.

معنى فكرة أن في كلام مليون كلام فارغ، أن أنت اللي شايفه كلام مهم، أن أنت اللي بتديلى قيمه، و اللي هو ميستحقهاش، أن الكلام في الأساس كلام أجوف، فاضى، أو



مفاهيم من الفروض

على أحسن التقدير كلام بسيط، بس أنت اللي شفت فيه عمق، اللي كتبه نفسه مقصدهوش، و من هنا حتكون البدايه.

الغموض بشكل عام، كان هو المحرك الرئيسي للبشرية من البدايات، الغموض كان ورا أغلب الأختراعات اللي ساهمت في التطور البشرى عبر كل العصور اللي مرت بيها البشريه، الغموض كان ورا فكرة الأديان الموجوده في كل الحضارات القديمه، و خليني أشرحك البدايه كانت أزاى.

الموت كان شئ غريب جداً بالنسبه للإنسان في البدايات، فكرة أن شخص كان عايش معاه، و فجأة أصبح في حاله هو مش فاهمها، و أقصد بيها أن الجسد موجود، لكن مفيش حياه، دى شكلت بالنسباله لغز كبير جداً، بدايةً من السؤال الخاص بفكرة ليه الشخص اللي كان معايا من فتره صغيره، فجأة مبقاش بيتحرك أو بيتكلم؟ ليه فجأة مبقاش قادر على التواصل معايا؟

مع التطور بدأ الإنسان يفكر بشكل أعمق، أن فيه روح و فيه جسد، و أن الروح هي اللي سابت، لكن الجسد فضل موجود، و هنا جه تانى سؤال، السؤال اللي كان ورا ظهور فكرة الأديان في كل الحضارات الأنسانيه، و هو: هي الروح دى بتروح فين بعد ما بتسيب الجسد؟ و هل المكان اللي بتروحله، بيتوقف على أعمالنا في الحياه اللي كنا عايشين فيها قبل كده؟

تزامن كل ده مع مراقبة الإنسان للظواهر الطبيعيه، الطبيعه اللي كانت كويسه و حانيه عليه أحياناً، و قاسيه جداً معاه في أغلب الأحيان، فبدأ كل ده يتربط معاه بفكرة وجود حالة غضب أو رضا من قوه أكبر من تصوراته، و مع كلا الظاهرتين، ظاهرة الموت و الظواهر الطبيعيه، بدأت فكرة الأديان الغير موحد -بمعنى فكرة وجود أكثر من أله- في كل الحضارات القديمه بدون أى أستثناء، و أن كل ظاهره طبيعيه لها الإله الخاص بيها، و ده كان قبل مرحلة ظهور الأديان الموحد.

أما الغموض على المستوى العلمى، فكان هو الباعث الأساسى لكل الأختراعات أو الأكتشافات على مدار التاريخ البشرى، كانت فكرة الأشكال المضيبئه الغريبه الموجوده في السما هي الباعث الأول لعلوم الأستولوجى كلها، كانت فكرة التواصل مع الأخر الموجود في منطقه بعيده، هي الهاجس الدائم للبشرية، و بسببها وصلنا لما



وصلنا له من كل الأختراعات في مجال الCommunications، كانت فكرة المرض والألم، و ليه بنتألم، الباعث الرئيسي لكل علوم الطب و البيولوجي...إلخ.

نرجع لفكرة الغموض و تأثيراتها، و خليني أبدأها من أبسط و أنفه مثال، و هو علاقه الخاصه بين ولد و بنت، و أنا مرضيتش أديها مسمى واضح لأنها ممكن تتدرج من إعجاب لحب أو حتى لحب تملك، فخليني أسيبها كده بشكل عام.

من وجهة نظر البنات، فالرجل الغامض طول الوقت بيكون له جاذبيه خاصه جداً، مجرد فكرة غموضه أو عدم معرفة البنت تفاصيل كثير عنه، أو قلة كلامه، فده بيكون واحد من أقوى و أهم عناصر جاذبية الرجل بالنسبة لأى بنت، للدرجة اللي خلت لفكرة النضاره السودا، كل هذا المقدار من الجاذبيه، لمجرد أنها مخبيه العيون ليس إلا، ففكرة حجب جزء مهم من الوجه، أضافت درجه عاليه من الغموض، و بالتالي الجاذبيه.

طبعاً نفس الفكره بتحصل مع الرجل، لكن نوعيه معينه من الرجال، و هنا بتظهر في حالة البنت المنقبه بس تكون عامله كحل أو Eye liner حوالين عنيه، و خصوصاً في بعض الدول العربيه الخليجيّه، أو فكرة العبايه السودا في مصر، و ده يفكرني بصديقه مخرجه عملت من سنتين فيلم قصير عن فكرة العبايه السودا و تأثيرها، من واقع أحساسها هي كبنت، و أحساسها بالعنين اللي بتخترق أى بنت حلوه لابسه عبايه من النوع الضيق شويه، و اللي ممكن يثير نسبه كبيره جداً من الرجال.

فكرة الغموض و تأثيره لعب عليها الولاد و البنات من الناحيتين، و بحكم كوني رجل، فكنت بسمع كثير في بعض القعدات القليله اللي كنت بأقعدها مع زمالي الدراسه أو المنطقه، خصوصاً طبعاً أثناء مرحله الجامعه، فكرة تأثير قلة الكلام على البنات، و أستغلال ده لتحقيق المزيد من الجاذبيه، و للأسف لما كنت برصد بعض الحالات فى الكليه، كنت فعلاً بلاقي أن ده كان بيتحقق، و للأسف الفكره دى مستمره ليومنا هذا، يعنى أنا مستغرب من أن البنات لسه بسهولة بيتضحك عليها بتفاصيل ساذجه زى كده لحد النهارده، بس حتفضل النقطه دى من النقاط اللي صعب جداً تتغير مهما الدنيا أتطورت.



حأدخل على مثال تانى و هو الفن، حتلاقى دايماً أن أكثر الفنانين نجاحاً و شعبيته، هما دايماً أقل الفنانين كلاماً، لأنه طول الوقت مش بيخليك تشوف منه غير جانب واحد بس، و هو فنه، و عامل حاله من الغموض على أى تفاصيل تانيه خاصه بيه، و ده بينجحه طول الوقت أكثر من غيره اللى على نفس المستوى الفنى، لكن بيتكلم كتير طول الوقت، فده بيقلل من رصيده عند متابعيه، لأن كثرة الكلام طول الوقت بتوقع، و عندنا فى مصر المثال الشهير بين أثنين مطربين بدأوا مع بعض فى بداية الثمانينات، و كان واحد فيهم أعلى من التانى بمراحل فى البدايه، لكن كثرة كلامه فى الأعلام و كتره مشاكله وقعته، لأن الكلام الكثير دايماً بيوقع الناس من منزلة النجوم لدرجة أنهم أصبحوا بشر زينا، بالعكس فالكلام بيبين نقائص كتير، السكوت كان مخيبها.

المهم بدأ المطرب التانى يركز فى كل التفاصيل اللى تنجحه، و بعد تماماً عن الكلام، حتى التمثيل سابه بعد كام تجربة بسيطه، لأن برضه ده كان ممكن يوقعه، لأن التمثيل موهبة تانيه خالص غير الغنا، و مش لازم اللى بيعرف يغنى يعرف يمثل، و أهو فضل متربع على قمة النجوميه لحد النهارده، بالرغم من عدم أقتناعى بأغلب أغانيه، أو مناسبتها للمرحله العمريه الحاليه اللى هو وصلها، بينما التانى أنتهى تماماً، و مبسنعش عنه حالياً غير لو عنده مشكله، أو فى حوار بيشتم فيه أو بيقول فيه أنه سبب نجاح زمايله، و دى بقت نوعية حواراته طول الوقت.

نفس الكلام بينطبق على كتير من الممثلين، و دايماً حتلاقى أن الممثلين نوعين، نوع بيمثل و بس، و نوع موجود على ال Social Media و بس، و للأسف النوع التانى مش فاهم أن ده طول الوقت بياخد من رصيده، مش بيديله، لأنه بيحوله لسلمه رخيصه موجوده طول الوقت. فالغموض أحياناً كتير بيكون من أهم عوامل النجاح فى بعض المجالات، و أهمها المجالات المؤثره على الناس، زى التمثيل، الغنا، الأعلام، لأنها بتضيف هاله حوالين النجم أو الفنان، بتزود من نجوميته و جاذبيته.

الناس -و أنا هنا بتكلم بشكل عام على كل الناس فى الدنيا- بتستسهل فكره أن مثلاً لو شخص أعجب بكاتب أو شيخ أو محلل أو سياسى، و أنا هنا أخترت المهن الأربعة



دى تمثيلاً لكل المهن اللى فيها فكر، اللى بتحتاج أن صاحبها يكون له رؤيه أو منهج فكرى أو دينى أو سياسى واضح، يعنى كلامى حيكون عن "أصحاب الرؤى ووجهات النظر"، و أرجع معاك تانى أن لو الشخص أعجب بواحد من الناس دى، بعد كده ببدا أعتبر أن كل كلامه لازم يكون حقيقى و مُسلم بيه، و محدش بي فكر يراجع ورا الكاتب أو الشيخ أو أياً كان، و يتأكد هل كلامه صح أو غلط، لدرجه بتوصل زى ما ذكرت فى الفصل اللى فات للقتل. بس برضه مش هو ده المقصود فى الفصل ده، المقصود هنا هو سؤال مهم جداً، تعمل أيه لو مقدرتش تفهم كلام الشخص اللى أنت معجب بيه و بتتبع آرائه أو وجهات نظره طول الوقت؟

خلينى أحكيك حكاية شخصيه حصلت معايا، أقدر أشرحك من خلالها الفكره و أبسطها. الحكايه حصلت معايا فى بدايات التسعينات، و فى الفتره دى كان كل عشاق السينما، و أنا واحد منهم، بيعملوا هاله أسطوريه للمخرجين الكبار، كنا بندور فى الجرايد وقتها على صفحه السينما، و نشوف نقد الأفلام الجديده، و رؤيه الناقد -و اللى برضه كنا بنحطه فى منزله متقلش عن المخرج- لأفكار المخرج. أحننا نفسنا كنا لما بندخل فيلم، بنقعد نفترض أن المشهد ده المخرج كان قصده بيه معانى أعمق بكثير من الظاهر، و أن توزيعه الأضواء و النور اللى قاطع وش البطل مقصود بيه أنكسار الشخصيه... إلخ. المهم المقصود أننا كنا بنقعد نتخيل حاجات كثير، من شدة أعجابنا بالمخرج، بالذات فى الأفلام اللى فيها حاجات كثير مش مفهومه -زى أفلام يوسف شاهين وقتها-، لحد ما حصلى الموقف اللى حاكبه، و اللى كان صادم جداً لشخص حالم زبى فى الوقت ده، و اللى خلانى أوصل لنتائج أن مفيش شخصيه أسطوريه، أن كل الناس بشر زينا، ممكن شخص عنده موهبه أو علم أكثر شويه، لكن فى النهايه هو أنسان عنده نفس أخطاء البشر.

فى الفتره دى كنت أتعرفت بمخرج كان بالنسبه لى أهم مخرج مصرى وقتها، و هو بالفعل كان واحد من الـ Top 5، و كانت علاقتى بيه بحكم شغلى معا -بس كان فى مجال خارج أطار السينما- بتخلينى أشوفه كثير، فى الوقت ده كان لسه نازله فيلم، و الفيلم كمان كان مع أهم ممثله فى تاريخ السينما المصريه لحد النهارده.

طبعاً كالعاده كنت منبهراً جداً بالفيلم، فلما قابلته بعد ما دخلت الفيلم فى السينما، سألته الأسئلة اللى كانت فى دماغى كلها، يعنى كان قصدك أيه بالمشهد ده، و عملت



ده ليه.... إلخ. فجابوني الأجابه اللي حطمت في دماغى كل الأصنام الى كان مصورها لى خيالى، لأنه قالى ببساطه متناهيه أنه عمل الفيلم ده علشان كان مزنوق في قرشين، و أن الفيلم مفيهوش أى ما وراءيات، بالعكس هو نفسه كان عايز يقلب الفيلم بسرعه، لأنه مكنتش مبسوط بالشغل مع النجمه الأهم في تاريخ السينما المصريه، فكان عايز ينجز. بأختصار هو أيفلها فيلم، و أخذ فيه قرشين، و ده كان كل هدفه من الفيلم، أما الأبعاد الفكرية و العمق اللي كنت متخيله، فكان كله أوهام صورها عقلى، نتيجة عدم قدرتى على فهم -قبل الحكايه دى-، أن المخرج ده أنسان عادى زينا، و أن أحياناً الأخراج بيكون بالنسباله مجرد أكل عيش و مصدر رزق و بس. و من اليوم ده بدأت مرحله جديده في حياتى، بقيت أشوف فيها الناس بصوره واقعيه تماماً، بعيداً عن أى أشكال أسطوريه.

الحكايه دى حتدخلنى معاك لمثال تانى من أمثلة تأثير فكرة أو نظرية "حاله من الغموض"، و حافرك بحاله حصلت من حوالى 9 سنين، و ممكن جداً تفتكر معايا الموضوع اللي أنا حاكمك فيه دلوقتى. في رمضان 2014 أتعرض مسلسل كان مميز جداً، و فعلاً كانت فكرته جديده تماماً على الدراما المصريه، المسلسل حقق نجاح غير متوقع، لكن الغريب أنى مش حاكمك عن المسلسل، لكن حاكمك عن التتر بتاعه، و اللي كان التتر الأول من نوعه في تاريخ الدراما المصريه كلها.

التتر حقق وقتها نجاح يُماثل نجاح المسلسل، ده إن مكنتش أكثر، و أسباب نجاحه كانت كتير جداً، و كلها تستاهل، لكن أنا حاخذ منها دلوقتى سبب واحد بس، و هو المرتبط بموضوعنا النهارده، و هو أن محدش كان فاهم و لا كلمه من كلام التتر خالص. بدايةً، أنا طبعاً بكلمك عن تتر مسلسل السبع وصايا، و سبب عدم أستيعاب كل الناس لكلمات التتر، لأنها كانت من التراث الصوفى لمحى الدين ابن عربى.

التتر عمل حاله غريبه، خصوصاً مع الموسيقى الروك اللي عملها المبدع دايماً هشام نزيه، فأنقسم الناس مجموعتين، المجموعه الأولى محاولتش تفهم الكلام، و أكتفت بحاله النشوى الروحيه اللي عملهاها التتر، ففهم الكلام مبقاش مهم. أما المجموعه الثانيه و هى الأقل -و أنا منهم- فقررت تفهم معانى الكلام، و هنا بتظهر من وجهة نظرى مشكلة جزء كبير من الأشعار الصوفيه، أن قوتها تكمن في عدم فهمها، لكن لو حاولت تفهمها، حتكتشف أنه مجموعه من العبارات قوية الألفاظ،



البسيطة المعاني لأبعد درجه، وعلشان كده أغلب اللي بيحبوا الشعر الصوفي أو حتى اللي بيرددوه في الحضرات، بيكونوا مبهورين بيه لأنهم مش فاهمينه. الغموض ده دايمًا بيعمل نوع من السحر، وهو المطلوب. أسمى أشارك معاك كلمات التتر، اللي طبعاً مع الموسيقى اللي كانت أعلى من صوت الكورال، فصعبت أكثر عملية الفهم.

فَللَّهِ قَوْمٌ فِي الْفِرَادِيسِ مَذْأَبَتْ قُلُوبِهِمْ أَنْ تَسْكُنَ الْجَوْ وَالسَّمَاءَ

ففي العجلِ السرُّ الذي صدعتْ له رعودُ اللظى في السفلى من ظاهر العجى

وَأَبْرَقَ بَرْقٌ فِي نَوَاحِيهِ سَاطِعٌ يَجْلُلُهُ مِنْ بَاطِنِ الرَّجْلِ فِي الشَّوَى

فَأَوْلُ صَوْتٍ كَانَ مِنْهُ بِأَنْفِهِ فَشَمْتَهُ فَاسْتَوْجَبَ الْحَمْدَ وَالثَنَاءَ

وَفَاجَأَهُ وَحْيٌ مِنَ اللَّهِ أَمْرٌ وَكَانَ لَهُ مَا كَانَ فِي نَفْسِهِ اِكْتَمَى

فِي طَاعَتِي لَوْ كُنْتُ كُنْتُ مَقْرَبًا وَمَعْصِيَتِي لَوْلَاكَ مَا كُنْتُ مَجْتَبَى

فَمَا الْعِلْمَ إِلَّا فِي الْخِلَافِ وَسِرَّهُ وَمَا النُّورَ إِلَّا فِي مَخَالَفَةِ النَّهْيِ

خليني أحكيك تاني تجربته شخصيه ليا في الفصل ده، وحتكون عن موضوع الصوفيه، و أزاى ممكن تتحول بقدرة قادر لولى من أولياء الله الصالحين.

بدايةً، أنا طول عمرى عندى رأى خاص في فكرة الطرق الصوفيه و طقوسها. أولاً الصوفيه بمعناها الفعلى، فهى ظاهره مش إسلاميه على الإطلاق، الصوفيه أصلها يهودى، و اللي بدورها واخداها من الحضارات الأقدم، و كمان موجوده في المسيحيه بشكلها المعروف لنا و هو الأباء السواح، و أن هنا مازلت بتكلم على المفهوم الفعلى و الروحاني للصوفيه.

إذن فالصوفيه لو هى من صلب الدين كانت ظهرت من بدايات الدين، أيام الرسول. ثانياً أغلب الطرق لها طقوسها اللي حددها مُنشأ الطريقه، معنى كده أنه زى ما بنقول بالعالميه بيعلى على الدين. ثالثاً بنلاقى كل طريقه بتنقض باقي الطرق. رابعاً فكرة العهد اللي بتاخده، و اللي بيكون لطريقه واحده بس، طيب ليه؟ و أشمعى دى



بس هي اللي لازم تكون صح؟ خامساً و ده اللي يمكن أغلب الناس مبتعرفهوش، أن طرق كثير بترفع التكليف عن متبعيها، يعني أيه بقى رفع التكليف؟ يعني بيخففوا عنك أعباء الدين، يعني ممكن يقولوك أنك وصلت لمرحلة خلاص مش محتاج تصلى، أو تعمل كثير من العبادات. على فكره نفس المبدأ كان موجود في القرون الوسطى في المسيحيه، وكان أسمه صكوك الغفران، و دى ليها قصة طويله، لكن صكوك الغفران و مبدأ رفع لهم نفس النسق، بأختصار أدفع علشان تحجز مكان في الجنه. مبدأ رفع التكليف ده من أكثر الحاجات اللي بتدخل ناس كثير في كثير من الطرق الصوفيه، و أنا أعرف طريقه بتتبعها عدد كبير جداً من الفنانات، و طبعاً ده للسبب اللي أنا لسه قايله. طيب أيه دخل الصوفيه بموضوعنا؟

الصوفيه لها دخل بموضوعنا من خلال نقطتين، النقطه الأولى هي طقوس العباده نفسها، و اللي أبسطها بتكون الحضرة اللي بنشوف فيها الناس بتتمايل بشكل أنا بسميه هيسيتيرى، على كلام هما مش فاهمين منه حاجه، و على رتم و أيقاع على أحياناً، وصلوا لمرحلة تعذيب الجسد بطرق مختلفه، في كثير من الطرق الصوفيه القديمه، و كل ما كانت درجة عدم الفهم أعلى، كل ما الناس بتدى نوع من التقديس للطريقه بشكل أكبر.

خليني أحكيك عن تجربتي الشخصيه، في أن حضرت مولد طريقه صوفيه من حوالى 17 سنه، حضرتها و هي لسه في البدايات، أسسها رجل كان في وظيفه مرموقه في بلد عربى، عمل هناك فلوس كثير، و لما رجع مصر أعلن أن جده "رسول الله" جاله في رؤيا، و بلغه أنه حيكون الرجل اللي حيجدد الدين، لأن في مقوله بتقول أن على رأس كل 100 سنه بييجى شخص يجدد الدين. الرجل ده كان مقتدر مالياً جداً - زى ما سبق و ذكرت-، فقد عن طريق الموائد و الحضرات أنه يقنع عدد كبير من الناس بدخول طريقته، و الغريب أن عدد كبير منهم مكش من البسطاء أو قليلى الثقافه، لكن خليني أقولك هو أزاى قدر يقنعهم.

البدايه كانت عن طريق دواوين أشعار صوفيه كان بيكتبها، عباره عن كلام غامض، ملوش معنى واضح، بس هي عبارات رنانه، بس بالفعل هي ملهاش أى معنى على الأطلاق، لأنى قرأت الكثير منها، و تأكدت أن هي عباره عن رص كلام منمق و بس، خصوصاً أنى كنت قريب منه في فترة البدايات.



بعد كده دخل على Level 2، وهى مرحلة فلسفة الدين، والمستويات اللى لازم تعديها من المعرفه علشان تفهم كتبه و أشعاره، و الله الكلام اللى بقوله أنا عشته بنفسى، فكان بيحدد لهم خطوات و مراحل لازم يعدوها، علشان يقدرُوا يفهموا أشعاره و كتاباته، و الغريب أن أتباعه فضلوا فى أزيداد بشكل كبير جداً، لحد ما توفى هذا الشخص، و هنا بدأت المرحلة الأخطر أو الجزء الأكثر كارثيه من الموضوع.

الأتباع المقربين بقوا هما اللى بيقدوا المسيره، فكان لازم يزودوا جرعة الغموض شويه، عن طريق إضافة جرعة قدسيه، و تأليف كرامات و معجزات لهذا الرجل اللى خلاص مات، علشان تكون درجة قدسيته أعلى ممن سبقوه من مشايخ الصوفيه، و اللى معجزاتهم عدت معجزات الأنبياء. الطريقه ما زالت موجوده و أتباعها و مريديها عددهم فى أزيداد طول الوقت، و كرامات هذا الرجل بتزيد مع مرور الأيام.

كل طريقه صوفيه بتحاول تاخذك فى سكة دين جديد، مفيهاش من أصل الدين غير القرآن الكريم، اللى بيتحول شويه شويه للمرتبه الثانيه فى الأهميه، بعد طبعاً أشعار و أورااد القطب أو الولي أو شيخ الطريقه.

كل اللى فات ده، فهو الجزء الأبسط من كوارث الطرق الصوفيه، لكن ما زال فيه كارته أكبر، و هى النقطة الثانيه اللى عايز أتكلم فيها، و هى ما يسموه "الفهم الباطنى للنصوص". المبدأ ده بدء مع ظهور الفرق الإسلاميه، سواء سنه أو شيعه، و ببساطه علشان مدخلكش أكثر فى التاريخ، أن خلال التاريخ الإسلامى ظهرت فرق من الجانبين أسماها الفرق الباطنيه، و الفرق الباطنيه أتسمت بالأسم ده، لأنها أدعت أن القرآن فيه معانى باطنيه ميفهمهاش حد تانى غيرهم، و بقت كل فرقه توفق بعض معانى القرآن، بما يتوافق مع مصالحها و توجهاتها.

بكدّه أصبح القرآن بفكرة المعانى الباطنيه، و سيله بتتلاعب بيها الفرق دى علشان تحقق أهدافها، و طبعاً و للأسف أتبع الفرق دى ناس كتير جداً، و أنا عايز أدى نصيحه مخلصه لكل شخص حابب يفهم القرآن، و حاديله من تجربتى الشخصيه، و هى ببساطه أن فى علم رائع من علوم القرآن أسمه أسباب النزول، و ده موجود فى كتير من أمهات الكتب، العلم ده حيساعدك بنسبة متقلش عن 70% فى فهم أى سوره أو حتى أية عايز تفهمهما، و الأزهر كمان ساعد فى الموضوع لما قدر يرتب



السور القرآنية بترتيب نزولها، و ده بالتأكيد حيساعد على الفهم بشكل أكبر، تبعاً للتسلسل التاريخي للأحداث، و أرتباطها زمنياً مع الآيات، فأنت قادر و ببساطة تفهم حاجات كثير فيما يخص القرآن و بشكل واضح و مباشر، من غير ما أى حد يفيتلك.

أدخل معاك على شكل تانى بيلعب فيه الغموض الدور الرئيسي، و هو شديد الشبه بالشكل الى فات، و يقلش خطوره عنه، و هو الشكل الخاص بحضرات الزار. ليه بعض الناس بتلجأ للزار لحل مشاكلها؟ و يا ترى الزار ده أصله أهله أيه؟

بدايةً، أنا أخرجت من أكثر من 12 سنه فيلم تسجيلي عن الزار، وقتها طبعاً جمعت كل المعلومات التي تخص الزار من كل الجوانب، لكنى حاحاول أختصرها لك سريعاً، علشان تعرف معايا الزار ده دخل مصر أزاى، و ليه الناس بتصدق فيه.

الزار في مصر 3 أنواع، كلهم بيتقالوا في نفس الحضرة، لكن لكل واحد فيهم جذر مختلف تماماً عن الأثنين التانيين. الأول جالنا من أثيوبيا، بس أحنا بنسميه الزار السوداني، لأنه جالنا عن طريق السودان، و ده كان تقريباً في 1870، و النوع ده وصلنا من خلال آلاف السودانيين و الأثيوبيين الى جم مصر مع غزوات محمد على و من بعده للدول دي.

الزار السوداني عباره عن بعض الطقوس و التمايم الأفريقيه الى طبعاً محدش فاهمها، لكن زى ما بنقول دايماً، الشيخ البعيد سره باع، و بتمارس بنفس الطقس الأصلي بتاعها، مع طبعاً بعض البهارات المصريه الخاصه بيها، و من أهم طقوسها هو طقس التضحية، اللي بيكون عباره عن دبح بعض الحيوانات، و ناخذ بالننا دايماً أن طقس الدبح في طقوس جميع الأديان الأبراهيميه أو غير الأبراهيميه، بيمثل عملية الفداء أو التضحية، فهنا بقي أتقابلت الطقوس الأفريقيه بالمعتقد الديني و حصل التزواج، و من هنا جه النوع التاني من الزار و هو زار أبو الغيط.

زار أبو الغيط أتسمى بالأسم ده نسبةً لقرية أبو الغيط في القليوبيه، و اللي بدأ منها النوع ده من الزار، و النوع ده من الزار هو مزيج من الصوفيه و الطقوس الأفريقيه،



لأنه عبارته عن مزيج من الأنشاد الديني و الطقوس الأفريقيه، و بيغلب عليه الطابع الديني أكثر، و بتكون أغلب كلماته هي مديح للرسول.

أما النوع الثالث فأسمه زار الحريم، و ده جت فكرته من تعديد السيدات في الصعيد على الأموات، و غناهم أغاني مش مفهومه بتتسمى "عدوده" نسبة إلى التعديد، و طبعاً النوع ده في الأصل له جذوره الضاربه في التاريخ وصولاً للحضاره المصريه القديمه..

لما نتابع الأنواع الثلاثه من الزار، و خصوصاً طبعاً السوداني اللي هو الأصل، حنلاقي أن الغموض و الكلام الغريب، و فكرة أسامي الجن اللي بتتقال، هي اللي شدت الناس له، و بالتالي للتصديق بيه، و بنفس منطق أغاني ال Heavy Metal، أن الموسيقى ذات الأيقاع العالي، مع الجو اللي كله دخان سواء من البخور أو أى أنواع من المخدرات، بتخلي الشخص في حالة لا وعي، و عقله بيكون مؤهل لتصديق أى حاجه ممكن تحصل في الوقت ده، ده غير أنه أصلاً بيكون دافع علشان تتعمله الحضره، فهو من الأساس بيكون جاي مهيب، و زى كل الأمثله اللي ذكرتها قبل كده، كلما أزددت غموضاً، كلنا أزددت جاذبيه و أقتاع.

أنقلك بسرعه لأخر نموذج حأتكلم فيها، و هي فكرة الأدب، و الكتب اللي ممكن تعدى ال 300 صفحه، و متطلعش منه بأكثر من 3 صفحات، و حاركر معاك على مرحله ما بعد ظهور الطباعه، بعد ما بقت الكتب سلعه بتتباع، مش زى مرحله ما قبل الطباعه، لما كان أى كتاب ممكن عدد نسخه متتعداش عدد صوابع اليد، و هنا حأتكلم في نقطتين، الأولى نقطة شخصيه، و دى نقطه خاصه بالكاتب، و الثانيه نقطه تجاربه بحته.

النقطه الشخصيه الخاصه بالكاتب هي مجرد وجهه نظر ليا، فتحتمل الصح أو الخطأ، و نبدأ بوقت ما بدأت الكتب و أخص بالذكر الروايات تُطبع، في الوقت ده كان الناس نوعين مفيش وسط بينهم، فئه قليله جداً متعلمه، بس كان تعليمها و ثقافتها عاليه جداً، و باقي العامه جهلاء حتى بالقراءه و الكتابه. في الزمن ده كان الوقت طويل جداً لعدم وجود أي وسائل ترفيه، فكانت القراءه مصدر من مصادر المتعه



مقاله مزج الفروض

القليله جداً، فده خلى الكتاب يهتموا بالتفاصيل و الأسهاب و العمليه الوصفيه، لأن ده كان بيمثل نوع من المتعه للقارئ، و كانت لغه الكتابه متناسبه مع مستوى ثقافه الناس اللى كانت بتعرف تقرا وقتها، و كان الكُتَّاب بيعلوا على بعض فى الأسهاب و الأطناب و الجمل الوصفيه.

لكن مع أيقاع العصر الحديث، و ضيق الوقت، و تفاوت ثقافات الناس اللى بتقرا، أصبح التطويل، و اللغه الغامضه المش مفهومه، و الوصف المسهب، ملوش محل من الأعراب، غير أن الكاتب بيحاول يضيف حوالين نفسه هاله غموض بالأسلوب ده، و بقت قوه الكاتب بتتمثل فى عدم فهمك لكتبه، و خصوصاً لما تداخلت معاها النقطه الثانيه و هى النقطه التجاربه، لأن الكتب فى العالم كله سعرها بيزيد مع كبر حجمها، لأن المفهوم أصبح أن الكتاب الكبير هو دايماً الكتاب القيم، فتحولت الكتابه لتجاره بتتقاس بالحجم، و عدم فهم القارئ للكتاب أصبح نقطه قوه للكتاب، مش نقطه ضعف، فأصبح الكتاب بيحاولوا يزودوا جرعة الغموض، أولاً لأضافه هاله الجاذبيه دى، و ثانياً، لتطويل الكتاب قدر الأمكان.

فى النهايه أحب أقول أن المفروض أن قوه أى كاتب أو سياسى أو رجل دين، فى تمكنه من توصيل أفكاره لأتباعه، فىكون أتباعهم له منبعه فهم كلامه و الموافقه عليه، فأتمنى أنك كشخص قادر يقرا و يسمع و يختار، أن أختياراتك يكون أساسها دايماً الفهم الكامل، و على فكره متصدقش فكره أنك محتاج شخص يفهمك دينك، لأن الدين المفروض أنه لكل الناس، و للجاهل و الأمى قبل المثقف، بدليل أن الإسلام و المسيحيه و من قبلهم اليهوديه، ظهوروا فى مجتمعات نسبة الأميه فيها كانت بتعدى ال90%، و كان الأتباع بالأقتناع الكامل، بدليل تحمل الأتباع كل أنواع الأذى بمنتهى الأقتناع.

حأختم الفصل بأنى أفكرك أن فى الستينات من القرن الماضى ظهر فى مصر مجموعه كبيره جداً من الشعرا الأقويا جداً، لكن عامه الناس متفاعلتش -و لحد النهارده- مع أغلبهم، بسبب لغتهم الصعبه جداً، و المعانى الغامضه اللى محدش كان قادر يوصلها. لكن 3 منهم قدروا يعيشوا معانا لحد النهارده، و هما الأبندوى و



ملاحقته الفروض

نجم و جاهين، لأنهم كتبوا زى الناس ما بتتكم، فالناس حسيت بيهم و فهمت كلامهم، أما الباقيين فموجودين، بس في أوساط المثقفين و بس.

09 فبراير 2023



No Signal

"لماذا أصبح التواصل بيننا شبه منعدم؟
لماذا أصبحنا لا ننصت سوى لأصواتنا
فقط؟"



No Signal

على القناة بتاعتنا على الـ Youtube، كان عندنا برنامج عبارته عن أسكتشات ساخره نقديه للمجتمع، و البرنامج ده فعلياً كان أعلى البرامج مشاهدةً على القناة، أولاً، لأن جمهور الشباب يفضل النوع ده من البرنامج على البرامج المعلوماتيه، ثانياً لأن البرنامج كان بيناقش نوعيه من المشاكل الحياتيه أو الأحداث اللي بتحصل، و ده بيخلي الناس أكثر تفاعلاً، لأننا شعب بيعشق فكرة السخرية من مشاكله للتنفيث عن نفسه.

المهم أن البرنامج -و بالرغم من نسبة مشاهداته العاليه-، إلا أن داخلياً فريق العمل الخاص بيه كان عنده كثير من المشاكل في إدارة العمل، و اللي وصلت البرنامج أنه يبدأ تدريجياً في عدم النزول بأنظام بشكل أسبوعي زى ما كانت بدايته. طبعاً عملنا أجتماع و أتنين و ثلاثه لمناقشة المشكله دي، و كل مره بالتأكيد مكناش بنوصل لأى نتيجته مرضيه، لكن الأجتماع الأخير -و الكارثي-، كان سبب في أني أكتب الفصل ده من الكتاب، و لأهمية المشكله اللي طلعت بيها من الأجتماع، قررت أنها تكون من المشاكل الأولى اللي حناقشها في الكتاب، لأنها -بالنسبالي- هي المشكله الأهم في التعاملات بين الناس و بعضها -مش بس في مصر أو الوطن العربي، لكن بالنسبه للناس بشكل عام في العالم كله.

طبعاً أغلبنا -ده إن مكنش كلنا- مرت عليه تجربه العمل الجماعي في Team، سواء كان في الشغل، في الجامعه، في فريق رياضي أو فني، في نشاط أجتماعي، أو حتى في المدرسه. فكرة العمل الجماعي هي من أساسيات أى نشاط أنساني، سواء كان مهني، ترفيهي، أو دراسي. و طبعاً علشان نشغل في Team، فلازم يكون في أكثر من شكل من أشكال الأجتتماعات الدوريه، و اللي أهمها نوعين: الأول و اللي بيتم غالباً في البدايات بس، بيكون أجتتماعات مخصصه لتحديد المهام الوظيفيه لكل فرد في الـ Team، و الثاني بيكون أجتتماعات دوريه بتتم كل فتره لتقييم سير العمل و مشاكله، زى بالضبط الأجتتماعات اللي كنا بنعملها لحل المشاكل الداخليه الخاصه بالبرنامج بتاعنا.



No Signal

و الحقيقة أن فكرة النوع ده من الأتتماعات على المستوى الأدارى بتكون فى غاية الأهمية، خصوصاً أنها بتترسخ لنظام إدارى مهم جداً أسمه Modules، و كلمة Modules معناها وحدات، و مفهومها ببساطه أن كل واحد فىنا بىكون عارف تماماً مهامه الوظيفيه، عارف أيه هى حدود واجباته، و أيه هى مسئولياته، فبالتالى فى حالة وقوع أى غلطه -خصوصاً أننا بنشتغل مع بعض كTeam-، بنقدر نحدد ببساطه مين السبب فيها، و ده بيسهل عملية المحاسبه و تصحيح الغلط، و ده المفروض هو الهدف الرئيسى من سياسة الModules.

أحياناً كتير جداً فى مجتمعاتنا العربيه، النوع ده من الأتتماعات بينتهى بنتائج عكسيه تماماً، و أنا هنا طبعاً بأتكلم على الأتتماعات الدوريه الخاصه بتقييم سير العمل، على الرغم من أن كل الخطوات المطلوبه لأنجاح هذا النوع من الأتتماعات، بتكون مُتخذة بشكل صحيح جداً، طيب فكر معايا أيه سبب عدم نجاح النوع ده من الأتتماعات أحياناً؟

عدم النجاح بيرجع لأثنين من أهم الصفات السيئه المنتشره فى مجتمعاتنا، الأولى هى رفض أى شخص لفكرة أنه يكون غلطان، أو حتى أن الغلط ممكن يكون من ناحيته، و ده مش حيكون موضوعنا فى الفصل ده. أما الصفه الثانيه، و اللى مبنى عليها الفصل ده كله، هى أننا مش بنعرف نسمع لبعض، و دى الصفه أو العيب اللى أنا بسميها إنقطاع التواصل أو ال No Signal.

مشكلة ال No Signal، أو عدم قدرتنا على سماع الأخر و فهم كلامه، مشكله كارثيه بكل المقاييس فى مجتمعاتنا، بالرغم من أن فى حكمه شهيره جداً بتقول أننا عندنا لسان واحد و ودينين، علشان نحاول دايماً نسمع أكثر ما نتكلم، لكن الحقيقه أننا بنحب نتكلم أضعاف أضعاف ما بنسمع، بتوصل أحياناً أننا من كتر رغبتنا فى الكلام، أن ممكن جداً تركيزنا فى السمع بىكون شبه منعدم، و ده بىكون واحد من أسباب فكرة إنقطاع التواصل بين مجموعه من الناس بتحاول تتحاور أو تتواصل مع بعض.

فى الفصل ده حناقش معاك فكرة عدم قدره على التواصل بكل أشكالها، و نحاول نقسمها لمجموعه من الحالات المختلفه، تبعاً لأختلاف مجالات الحوار بين الناس، لكن للأسف هى موجوده فى كل مجالات و أشكال الحوار، و أسمحولى



No Signal

أبدأ بأول نوع من أنواع إنقطاع التواصل، وهو ال No Signal أو عدم القدره على التواصل مع الآخر في مجال العمل، و التي بدأت بيه كمقدمه سريعه للفصل ده.

طبعاً حأتكلم عن التي بيحصل في الأجتتماعات الدوريه الخاصه بتقييم سير العمل، و التي بعتبر نفسى من أكثر الناس اللي عانت من هذا النوع من الأجتتماعات، و ده على مدار حياتى كلها، و في كافة أنواع العمل اللي مارستها، و حاول معاك أننا نقوم مع بعض بعملية تحليل لى بيحصل في النوع ده من الأجتتماعات.

بتبدأ الحكايه دايماً أن أثناء الأجتتماع شخص ما بيقوم بعملية تحليل و تقييم للأخرين، و حبيدأ يحدد بعض الغلطات اللي وقع فيها بعض أفراد ال Team من وجهة نظره، سواء الشخص المتحدث ده كان رئيس ال Team أو حتى فرد منه، فمثلاً لو قال أن فلان ده عنده مُش... و- أقصد هنا طبعاً كلمة مشكله-، فبنلاقى على طول أن فلان ده أول ما بيلمح أن في كلمة مشكله حتتقال، فعلى طول بنلاقيه حبيدأ في عملية دفاع تلقائى، طيب هو أنت حتدافع عن أيه؟ هو أنت لسه عرفت المشكله فين؟

عملية الدفاع دى بتتبني على أنه غالباً عارف الآخر حينقده من أى زاويه، لأن زى ما قلنا نظام ال Modules بيحدد لكل فرد في ال Team مهام وظيفيه واضحه و محددده جداً، فبالتالى فلان ده بيكون عارف الغلطه أو المشكله فين بالضبط -حتى لو هو نفسه مكنش معترف بيها-، لكن في نفس الوقت بيكون رافض تماماً الاعتراف أن هو السبب في الغلط ده، لأن في مجتماعتنا العربيه مفيش حد بيغلط طبعاً -زى ما سبق وقلنا-، فبتتطلع منه أى مبررات واهيه تبرر أن المشكله أو الغلط مش بسببه أو من ناحيته، و ده عادة بيتم حتى قبل ما المُتحدث الرئيسى يكون خلص كل كلامه اللي عايز يقوله في تحليل و تقييم المشكله دى.

و بسرعه بتتحول عملية الدفاع -الى مش مبنيه على أى أساس- لشيء آخر تماماً، و ده بُناءً على قاعده مهمه جداً في كرة القدم بتقول: "خير وسيله للدفاع هي الهجوم"، فبنلاقيه بيتنقل لتانى مرحله -و دى هي الأهم بالنسبه لموضوع فصلنا-، و هي تحوله من شخص بيدافع عن نفسه، لشخص بيهاجم، و علشان يهاجم، لازم



No Signal

يلاقى أى نوع من الغلطات عند اللى بيتكلم -ده لو كان علاقه الوظيفيه بينه و بين الشخص اللى بيتكلم تسمح بكده-، أو يتحول لأى شخص تانى من اللى موجودين، لو كانت العلاقه مع الشخص اللى بيتكلم متسمحلوش بنقده. أضعف الأيمان لو الحالتين دول مكانوش ينفعوا، بيتحول للهجوم على أى شخص تانى ميكونش موجود فى الأجتمع.

عمليه الدفاع -اللى بتتم كمرحله أولى-، و الهجوم الخاطف اللى بيحصل أحياناً - لو أتيحت الظروف- كمرحله تانيه، بتتبني على الخطه التاليه:

المرحله الأولى هى مرحله تشتيت مسئولية المشكله أو الغلطه، و توجيهها لمسار تانى، بعيد تماماً عن حدود مسئوليات الشخص ده، و اللى هو -زى ما قلنا- بيكون عارفها كويس، لكن رافض الاعتراف بغلطه فيها، و عملية الدفاع دى فعلاً بتحصل بشكل غريزى جداً، بتكون نوع من الميكانيزم الذاتى لدفع مسئولية الغلط بعيداً تماماً عن حدود مسئولياته، بالرغم من أننا زى ما قلنا أن المفروض أن نظام الModules مش بيسيب أى فرصه لده، لكن حتى مع هذا التحديد الدقيق جداً للمسئوليات، الناس دايماً بتدور على أى شماعه لغلطاتها، و دى دايماً بتكون الخطه الأولى أو Plan A.

المرحله التانيه، علشان لو Plan A منجحتش، بتيجي الخطه البديله أو Plan B، و ده بيكون عن طريق الهجوم الخاطف السريع، و تحويل مسار الحوار لمشكله تانيه خالص، بس الذكاء بيفرض عليه أن المشكله دى يكون لها رابط بالمشكله الأساسيه، بس طبعاً لازم تكون المشكله التانيه بعيده تمام البعد عن حدود مسئوليته، و هنا بقى التشتيت بيكون مش بس تشتيت للمسئوليه، لكن بيكون تشتيت للمسئوليه و مسار الحوار مع بعض، و طبعاً أحنأ أساتذته فى تشتيت مسار الحوار، علشان فى النهائيه يتوه الموضوع الرئيسى.

طيب فين الNo Signal فى كل اللى قلته ده؟ عملية أنقطاع التواصل أو الNo Signal، بتتم أثناء أنشغال عقل الشخص اللى بيتم تقييمه بالتجهيز للرد، فطبعاً مش بيركز خالص فى الكلام اللى بيقوله المتحدث الأصيل تماماً، فبيقع منه أكثر من نص الكلام، و اللى هو المفروض أنه تقييم و توجيه له، هو عقله بس بيستوعب رأس



No Signal

الموضوع، و بعد كده ذهنه بيتشتت تماماً في التحضير السريع جداً للرد، و عايزك تجرب معاً تجريبه و تراقب أى أثنين بيتناقشوا أو بيلوموا بعض، حتلاقوا دايماً أن الكلام في اتجاه، و الرد في اتجاه تانياً تماماً.

في خطه بديله تالته أو Plan C، و هي بتكون الأضعف جداً، بس الأكثر شيوعاً، و غالباً بتكون أكثر حاجة بتحصل في مناقشات العمل الجماعي، و اللي حارج و أكد أن المفروض أن كل واحد فينا بيكون له دور محدد، و هي كلمة "طيب ما فلان برضه بيعمل كده"، الجملة دي دايماً بتمثل أسرع رد لأى مناقشه فيها توجيه مسئوليه أو لوم أو اشاره لغلط ما، مع أن دايماً الرد ده بيكون فيه نقطه ضعف مهمه جداً، و هي اختلاف نوعية مسئوليتنا في كل مرحله من مراحل العمل.

حأضرب مثال بسيط جداً بفكرة العاملين في Location تصوير، و اللي بيعتبر واحد من أهم نماذج فكرة العمل الجماعي أو الTeamwork، و هنا بتظهر جداً أهمية فكرة الModules. في شخص ممكن يتأخر و يياثرش قوى، أو حتى ممكن يكون له بديل، و شخص ملوش أى بديل و مينفعش يتأخر.

لو مثلاً شخص ما العمل كله بيتوقف عليه أتأخر، زي الممثلين -حتى لو أدوار ثانويه- أو المذيعيين، فالشخص ده في اللحظة دي ملوش أى بديل، فحجم مسئولية الشخص ده و تأثيره بيكون أكبر بكثير من غيره، و أنا هنا مش بقارن الفرق بين نجوميه ممثل أو مذيع بشخص تاني في فريق العمل، لكن بقييم دور و حجم مسئولية كل واحد منهم في اللحظة دي تحديداً، فممكن جداً شخص تاني ورا الكاميرا لو أتأخر، زميل له يشيله مؤقتاً، و على فكره، أحياناً كثير مساعد المخرج بيدير الLocation لو حصل أى ظرف ما و المخرج مقدرش يتواجد، و دي بتحصل عندنا دايماً في أواخر حلقات مسلسلات رمضان، لأننا ناس طول الوقت مبنعرفش نشغل غير على آخر لحظه، أن بيتم عمليتين تصوير بفريقيين عمل في نفس التوقيت في Locations 2 مختلفين لسرعة الأنجاز، لأن رمضان كل سنه بييجي فجأه.

نرجع تاني لموضوعنا، هو صحيح أن التأخير هو التأخير، و الغلط هو الغلط، لكن نوعية المسئوليه هنا هي اللي بتفرق، و ده تبعاً للModule بتاعك، و خصوصاً أن



No Signal

أحياناً العمل سيكون مرتبط بزمان معين لازم يتنفذ فيه، فالتأخير هنا يبضر بالعمل كله، سواء كعمل أو كأفراد أو كخساره ماديه.

المثال ده بينطبق على كتير من أشكال العمل الجماعى، و اللى دورك فيها بيحدد حجم مسئوليتك، ففكرة "طيب ما فلان برضه بيعمل كده" بتكون هنا فكره كارثيه، لأن ممكن دور فلان فى المرحله دى يكون تأثيره أقل من دورك، أو أن نوع الغلط أو المشكله اللى ممكن أنت تسببه بحجم مسئولياتك، يكون تأثيره أضعاف الخطأ اللى ممكن يسببه فلان ده، لكن للأسف هو ده بيكون نوع من أنواع الميكانيزمات الدفاعيه و الهجوميه، اللى بتحصل فى تقييم أى نوع من العمل الجماعى، و اللى بتفقد الأتجماع هدفه الأساسى، و هو عملية التقييم بهدف تطوير العمل، و غالباً كل الناس اللى بيتم تقييمها، بتخرج من الأتجماع كأنها مدخلتوش، بمعنى أنها مطلعتش منه بأى فايده.

يعنى ببساطه و علشان نلخص كل اللى قلناه فى الحاله الأولى من حالات ال No Signal، و هى حالة تقييم سير العمل و تحديد المسئوليات، بيتمثل السبب الرئيسى للمشكله، فى رفضنا سماع أخطاءنا، فبيبدأ العقل فى الأنشغال بخطط دفاعيه لأبعاد الغلطات أو المشاكل دى بعيد عننا، سواء بتحميل المسئوليه لشخص تانى، أو تحويل مسار الحوار لمشكله تانيه، أو الكلمه الأشهر: "طيب ما فلان برضه بيعمل كده"، و بالتالى بيغفل المتلقى فى كل الحالات الثلاثه التركيز فى الكلام الموجه له، و بيبدأ التواصل بين الأطراف ينعدم، لأن طبعاً مسار الحوار مبقاش ماشى فى الخط المرسوم له، و بينتهى الأتجماع غالباً بنتائج صفريه، و أن محدش فينا سمع التانى.

طيب، أيه المطلوب من كل واحد فينا؟ المطلوب أولاً عدم الشخصنه، أنت طالماً قبلت تشتغل فى عمل جماعى، فلازم تكون مهين لده، أحنا للأسف عندنا فكرة الخوف من تحمل المسئولية موروث فى عاداتنا، و حأفتكر كلمه قالها لى زميل ليا فى الدراسه، و كنا وقتها فى تانيه أعدادى، بس بصراحه هو كان سابق سنه بكتير، قالى أن الناس نوعين، نوع قائد و نوع مُنقاد، و بلغتنا الدارجة موسيقار و آلاتيه، فالنوع المنقاد ده، هو دائماً اللى بيكون عنده فكرة الهروب من المسئوليه، فكرة تحميل غلطاته و مشاكله لأى حد تانى، و ده اللى بيوصلنا لفكرة عدم قدراتنا على سماع بعض تماماً، لأننا ببساطه متناهيه، بننشغل بالرد على كلام، أحنا لسه مسمعنا هوش.



قبل ما أخوض في باقي الحالات الخاصة بفكرة الـ No Signal، عايزك معايا تفتكر مقوله شهيره و في غاية الأهمية للأمام الشافعي بتقول: "رأى صوابٌ يَحْتَمِلُ الخَطَأَ، ورأى غيري خطأً يَحْتَمِلُ الصَّوابَ"، و دي حكمه مهمه قوى، بتلخص لنا نظام حياه كامل، و هي فكرة أن أى رأى في الدنيا قابل للنقاش، أننا مش لازم نكون صح طول الوقت، لأن حتى النظريات العلميه بتتناقش و قابله للتغيير مع كل تجربه أو إكتشاف جديد. أضرب مثل أن خلال فترة الستينات قدر شاب أيرلندى في الثلاثينات من عمره أسمه جون بل، أثبات خطأ فرضيه ألبرت أينشتين عن الـ Quantum Physics، و الأغرب كمان أن اللى ساعده في أثبات نظرياته كانوا 3 شباب من الهيبيز، و اللى ميعرفش مين هما الهيبيز يدور في جوجل عنهم. خلاصة الكلام أننا لازم نسمع دايمًا، علشان أحننا مش لازم نكون صح طول الوقت، و أن تقييم الأخر لأخطائك شئ مفيد ليك، و لا يُنقص منك أى شئ، بالعكس ده بيضيفلك دايمًا.

ندخل على الحاله التانيه من أشكال الـ No Signal، و هي بالنسبالي الحاله الأخطر بكل المقاييس، أولاً لأنها سبب كل أنواع العنصرية الموجوده على كوكب الأرض، و أحيانًا بتوصل دول لحاله الحروب الأهليه، ثانياً هي سبب في كثير من مظاهر الإرهاب -و أنا هنا مش قصدى إرهاب جماعات بعينها-، لكن إرهاب أى مجموعه ضد مجموعه مخالفاها في الرأى، و نفتكر من فتره مش بعيده اللى حصل في أقليم الأيجور الصينى، و الإرهاب وقتها جه من أتباع عقيدته، هي المفروض الأكثر مناداه بالسلام بين كل الشعوب و العقائد في العالم كله.

فكرة الإرهاب مش مرتبطه بعقيده بعينها أو جنس محدد، لكنها مرتبطه بأسلوب تفكير خاطئ، أغلب شعوب و أعراق الكره الأرضيه أثربوا عليه، و هي فكرة أحننا الأفضل. أحننا بنسمع دايمًا تعبيرات "شعب الله المختاره، خير خلق الله، و أبناء الله" و ده من الناحيه الدينيه. أو أفضلية العرق أو لون البشره من الناحيه العرقيه، و بيتهيألى نظرية هتلر المبنيه على عظمة الجنس الأرى، و رفضه للعرب و اليهود، كانت أكبر دليل على أن الفكره دي مش مرتبطه بمجتمع دينى معين، أو خاصه بدول عالم تالت أو عالم أول، لكن الفكره و المبدأ مرتبطين بالفكر الأنسانى ككل، و ده على مدار التاريخ البشرى كله، و حتلاقى أفلام سينمائيه أو وثائقيه كثير، بتتكلم عن



No Signal

العنصرية في الولايات المتحدة الأمريكية لحد تقريباً منتصف الستينات من القرن العشرين، وحتكتشف أن دول العالم الأول كانت هي أكثر الدول تحريضاً وممارسةً للعنصرية، وده كان بيتم لحد فتره زمنيه قريه جداً، وحتكتشف كمان أن الرق و العبوديه كانت موجوده عندنا في العالم الإسلامي و بشكل بشع جداً، لحد أوائل القرن العشرين، بمعنى أنك مش حتلاقي مكان في العالم كله لم يوصم بالترفرقه العنصرية و أزدراء الأخر، أياً كان شكل الأزدراء أو التفرقه.

الفكره المهمه و الخطيره جداً الى عايز أناقشها بشكل سريع جداً في الفصل ده، هي فكرة الأخر، اللي باعتبارها أهم مشكله في التاريخ الأنساني، لكن دلوقتي حنناقشها سريعاً من زاويه واحده بس، و هي زاوية الحوار بينك و بين الأخر، أو أى شكل مناقشه بين أتئين من فكرين مختلفين، ممكن مسار الحوار يكون ديني، سياسى، فكرى، أو حتى كوره، و أنا هنا دايماً بسميه "الحوار الأطرش"، و الأطرش لى مش فاهم المصطلح، هو التعبير الشعبى للشخص فاقد حاسة السمع.

بدايةً، ففكرة مناقشة شخص من وجهة نظر مختلفه عنك، هي فكره كارثيه في مجتماعتنا العربيه بكل المقاييس، القاعده الأساسية في أى حوار من هذا النوع، أنك دايماً بتدخل الحوار مش علشان تسمع و بعدين ترد، لكن علشان تهاجم، و كل شخص من الأتئين المتحاورين بيدخل الحوار و هو بيكيل بمكيالين، مكيال و هو بيتكلم، و مكيال تانى خالص و هو بيسمع، لأن الأتئاء لأى شئ دايماً بيخلى الشخص مش واخذ باله من عيوب الشئ اللي هو منتميله، فمش بيكون موضوعى لما بيرد، مع أنه بيكون في قمة الموضوعيه لما بيناقش أو يبهاجم الأخر فيما يخصه، و بيكون دارس كل التفاصيل الخاصه بوجهات النظر في الجانب الأخر، سواء كانت المناقشات دى دينيه، سياسيه، أو أى اتجاه نقاشى أخر، و ده بيكون بس علشان يطلع في الجانب الأخر أى ثغرات.

طبعاً واحد من أكبر الأمثله على كده، هي قنوات الـ Youtube الدينيه، و اللي كل طرف فيها بيدخل المناظره علشان يهاجم الطرف التانى بس، و طبعاً بنشوف مناظرات في قمة اللا موضوعيه، لأنك و أنت بتابع من بره، بتشوف كل واحد منهم قارى كويس جداً فيما يخص الدين الأخر، و مطلع على أدق التفاصيل اللي ممكن تكون نقط ضعف و بالتالى نقط هجوم عليه، لكن و للأسف الشديد مش بتكون



No Signal

عنده الفكرة الكافية عن دينه، و اللى المفروض أنه جاى علشان يدافع عنه، و اللى تأهله للرد على هجوم الطرف التانى، و هنا بتحضرنى مقولة جورج برنارد شو، الكاتب الأيرلندى الساخر، أنه بيصدق كل الأديان لما بس بتتكم عن الأديان الأخرى، فبنشوف حوار شكله غريب جداً، أثنين بيهاجموا بعض طول الوقت، و مفيش حد من الأثنين بيرد على أسئلة الطرف التانى، طيب أمال هى أسماها مناظره أو حوار ليه؟

طبعاً و بعيداً عن الدخول فى تفاصيل، لأن ده مش موضوعنا، لكن نقطه مهم جداً أنى أوضحها بسرعه، و هى أن مشكلة أغلب الأديان حالياً هى التدخلات البشريه فيها على مر العصور، و كل تدخل بيتم، بيتحول بعدها لجزء صميم من الدين. حاضرب بسرعه بعض الأمثله، زى مثلاً أن فى الإسلام الناس بتتجوز على مذهب فلان، مش على شريعة الله، يعنى أزاي فى صيغة الزواج بيطلب من الشخص تلاوة صيغه بتقول أن الزواج ده على مذهب الأمام الفلانى و مش على شرع الله؟ و برضه مثل تانى مهم جداً و هو قانون الخلع اللى طلع فجأة علينا سنة 2000، و هل الناس كانت ناسياه و لا مش واخده بالها منه طول ال1400 سنه اللى قبلها؟ كمان فى المسيحيه السماح بالطلاق و أسباب الطلاق أتغيرت أكثر من مره فى مصر على مدار القرن الماضى، برضه بدون تبرير لفكرة ليه كان مسموح ببعض الأسباب للطلاق، و بعد كده الأسباب دى ألغيت ليه فى عهد البابا شنوده. فكل النقط دى بتفتح ثغرات لدخول عشرات من النقط للهجوم فى هذا النوع من الحوارات.

نفكر برضه شكل البرامج اللى كانت بتعتمد على وجود شخصين من اتجاهات أيديولوجيه مختلفه بيهاجموا بعض، و اللى بدأتها عربياً قناة الجزيره فى برنامج الأتجاه المعاكس، و قلده بعدها كل القنوات العربيه، و ممكن منكم اللى يفتكر حلقة فى أحد البرنامج على واحده من القنوات المصريه، و بالرغم من أن أتجاه الحلقة كان رياضى، إلا أنها أنتهت بالشتمه و الضرب بين ضيفى الحلقة، و كانوا أحمد شوير و المعلق أحمد الطيب.

الفكرة ببساطه أن مفيش شخص عنده مبدأ الرد بعد ما يكون أستمع للطرف الأخر، هى الفكرة أن كل واحد بيدخل الحلقة و هدفه الهجوم، مع أن الهدف الرئيسى للحوار بيكون الدفاع، لكن بما أن أغلب الناس مش بيكون عندهم حُجه قوية فيما ينتمون إليه، فطبعاً و بالتأكد بيكون الهجوم أسهل، طبعاً بالأضافه إلى المبدأ الأشهر



No Signal

و هو أننا دائماً على حق، و أن ما أنتمى إليه هو الصح و الباقي على باطل. فى النهاية بيكون المستفيد الأكبر من هذا النوع ده من البرامج طبعاً القناة، لأنها بتعلى نسبة المشاهدات بهذا النوع من الحوارات العقيمه، لكن المطعمه دائماً ببهارات الشتمه و الضرب.

و هنا بنوصل للمره الثانيه لمقوله الأمام الشافعى: "رأى صوابٌ يَحْتَمِلُ الخَطَأَ، ورأى غَيرى خَطَأً يَحْتَمِلُ الصَّوابَ"، و أنا هنا بطلب من كل واحد فينا أنه يضع المقوله دى قدام عنيه طول الوقت، يا جماعه لازم نسمع لبعض، لازم نشوف تقييم الأخرين لوجهة نظرنا، لأن دائماً اللى بره، و اللى غير منتمى، بتكون رؤيته أشمل و أوسع، بالعكس ممكن يكون قارى و عارف أكثر منك، فى الشئ اللى أنت المفترض أنك منتمى له، فالمطلوب منا هنا 3 نقاط أهم من بعض:

أولاً، أننا نبقى دارسين و فاهمين بشكل تام المذهب، أو الأتجاه الفكرى، أو أياً كان الشئ اللى أحنا بننتيميله، سواء كان دينى، سياسى، أقتصادى، أو حتى فنى، لأن المفترض أن مفيش أنسان بينتمى لشيئ بالتبعيه، لكن لازم قناعاته تكون كامله بما ينتميله، و ده مش بيتحقق غير بالدراسه الكامله له، علشان قناعته تكون كامله تماماً.

ثانياً، نكون دائماً على أستعداد للسمع و التحليل، يمكن تكون مقوله الأمام الشافعى صح، يا جماعه دى النظريات العلميه نفسها بيكتشف خطئها زى ما سبق و ذكرت من شويه، مش لازم نقفل على اللى أحنا عارفينه و بس، و غالباً و للأسف بتكون مصادر معرفتنا دائماً سمعيه و بدون دراسه.

ثالثاً، لازم نكون على قناعه أن أختلاف الناس فى كل شئ على كوكب الأرض -بدايةً من اللون، للفكر، للدين-، شئ مش موجود بالصدفه، لازم نكون متأكدين أن ده شئ له حكمه و هدف، حتى لو مكناش قادرين نوصل للحكمه دى، و أن أحنا لازم نتقبلها، علشان نعرف نتعامل و نتعايش معاها.

أوصل معاك لشكل كوميدى جداً من أشكال إنقطاع التواصل أو ال No Signal، و ده أنا بسميه الحوار الشكاى البكاى، و أنا أخترتله الأسم ده لأنه هو فعلاً بيكون



No Signal

مضمونه كده، و الحوار الشكاى البكاى بيكون له شكلين ثابتين و معروفين، و أعتقد أنك عمرك ما حتشوفهم خارج حدود دولنا العرييه، لأن الحاله دى مبنه على موروث ثقافى، أعتقد أنه أصبح جزء من التكوين الجينى بتاعنا، و تعال معايا نتعرف على الشكلين دول:

الشكل الأول، و هو اللى بيميل للشكى أكثر من البكى، بيبدأ عادة بأن شخصين أو أكثر بيكونوا متواجدين مع بعض، فيبدأ واحد منهم يحكى حكايه بيكون جزء منها الشكوى من شخص معين -مش موجود طبعاً فى الجلسه-، و عايزك تتوقع معايا أيه اللى ممكن يحصل بعدها.

بالضبط زى ما توقعت، كل اللى موجودين بيتحولوا لحوار غوغائى غير منظم للشكوى من نفس الشخص، كأنها عدوى، و ممكن تتحول كل محاسن الشخص ده فجأه لسيئات، و للأسف ده مش موضوعنا، لكن موضوعنا أزاى حتتحول الجلسه دى لمجموعة حوارات محدش فيها سامع التانى خالص -ده لو مكانوش كمان بيتكلموا فى نفس الوقت-، لأن كل شخص فيهم مشغول باللى بيقوله و بس، مش شاغله أى حاجه تانيه بتتقال، و حاوضح لكم السبب بعد ما أتكلم عن الشكل التانى.

الشكل التانى، و هو اللى البكائيات فيه بتكون أكبر من الشكى، و هو مبيختلفش عن النوع الأول فى أسبابه غير بس فى تفصيله واحده، و هى أن الحكايه اللى بيحكيها الشخص المتحدث بتكون نوع من البكائيه، مش شكوى من شخص، و فيها بيشتكى ظروفه و سلوكيات الناس و غلاء المعيشه... إلخ. و زى ما شرحنا فى الشكل الأول، بيحصل نفس الشئ فى هذا الشكل، بس يمكن قوة تداخل الحوارات فى الشكل ده بتكون أقوى بكتير، و ده برضه له أسبابه اللى حنكتشفها مع بعض، و تعال معايا نحلل أسباب النوع ده من أشكال إنقطاع التواصل أو ال No Signal.

السبب الرئيسى فى الشكل أو الحاله دى بيكون مصدره الرئيسى المره دى هو المتحدث نفسه، مش المتلقى، بمعنى أن الخطأ الفعلى بيبدأ من عنده. واحده من أكبر المشاكل اللى رصدتها فى التواصل بين الناس، هى فكرة أن أحيانا لما شخص ما بيتكلم مع شخص تانى، مش بيكون مقدر درجة أهمية حواراه عند المتلقى، بمعنى أوضح أنه ممكن يتكلم و يرغى فى مواضيع، ليس لها نفس الأهميه عند المتلقى، بل



No Signal

و أحياناً ميكنش لها أهميه من الأساس عنده، و دى نقطه أغلبنا مش بيدركها و هو بيتكلم، لأننا لما بنتكلم، بنتكلم دايماً في اللي يهمننا و بس، و كأننا بنفرضه فرض على المتلقى.

المتلقى لو كان على درجه عاليه من الذوق، فحيحاول يركز مع المتحدث في البدايه على قد ما يقدر، لكن تأكد أنه حيوصل لمرحله -غصب عنه- حيفقد فيها التركيز ده، فحبتداً مرحله هز الراس كل شويه كعلامه على تركيز و تفاعل مش موجودين على الأطلاق، بس حيعمل كده علشان ميحرجش المتحدث.

أما لو كان المتلقى مش على نفس الدرجه من الذوق -و ده برضه غصب عنه-، فحينصرف بذهنه عن الحوار بعد أول جملتين بشكل تلقائى، و ممكن ينشغل بأى حاجه تانيه، و ممكن تلاقيه يتحول لمسك الموبايل علشان يقلب فيه، بس حنأجل قصه الموبايل دلوقتى لحد الشكل الأخير عندنا، المهم أننا بنوصل في النهايه أن الحوار بيصبح بلا جدوى.

لكن نرجع تانى لشكل الحوار اللي ذكرناه، و اللي مبنى في الأساس على فكرة الشكوى، و ده نوع خاص جداً من الحوار، و اللي غالباً مبيهمش المتلقى بأى شكل من الأشكال، لكن في نفس الوقت هو بيحفظ عنده حاله خاصه جداً بيه هو شخصياً، بيلمس نقط مشتركه بتتلاقى في بعض الجزئيات، و سواء الشكوى دى كانت من شخص الأتنين عارفينه، أو بكائيه عامه، فالمتلقى بيحصل له نوع من الأشغال الذاتي، لأننا كلنا في مجتمعاتنا العربيه بلا أستثناء عندنا مشاكل، و في كل مجتمع المشاكل بتتشابه، فالمتحدث أول ما يبدأ في الشكوى أو البكائيه، و اللي بتكون عامله زى شرارة الأشغال الذاتي في البوتاجاز، بيبدأ المتلقى هو كمان يحذو نفس حذو المتحدث، و ممكن هنا المتلقيين يكونوا أكثر من شخص، فبنوصل لحاله فريده من الحوار الغوغائى اللي كل شخص فيه بيتكلم، و مفيش ولا واحد بيسمع.

طيب أيه المطلوب منك علشان توقف هذا النوع من الحوارات العديم الجدوى، و المضيعه للوقت؟ أنك تحاول لما تتكلم في أى موضوع تكون مركز في أهمية موضوع الحوار ده عند المتلقى، لأنك لو أستمرت طول الوقت في النوع ده من الحوارات، بتخسر Credit أو رصيد عند المتلقى، فبيبدأ يمل، و شويه شويه حيبداً ينصرف



No Signal

عنك غضب عنه، وأنت مش بتكون فاهم سبب أنصرافه عنك أيه، لكن لازم أعترف معاك أن النوع ده من الحوارات المنفث للغضب كلنا بنحتاجه، لأننا ببساطه كلنا بنحتاج نفضفض لأي شخص قريب منا، لكن لازم تكون من الكياسه أنك متطولش، وأنتك تحاول تلمس طول الوقت على نقط تهمة المتلقى. أما النقطة الأخيره اللي لازم تيجي قبل كل النقاط اللي فاتت، وللأسف برضه أغلب الناس مش بتراعيها، وهى أختيار الوقت المناسب للشخص المتلقى قبل ما تبدأ حوار الفضفضه الخاص بيك، لازم تتأكد أن المتلقى عنده قدره و على إستعداد للسمع، علشان متبقاش كل حواراتنا دايماً No Signal.

أوصل معاك لأخر شكل من أشكال الNo Signal، هو سيكون الأخير في الفصل ده و في أختياراتنا، بس بالتأكيد فيه غيره كثير، لكن أنا حاولت معاك أختار أكثر النماذج المنتشره في مجتماعتنا العربيه. الشكل الأخير اللي حأتكلم عنه هو جديد على مجتماعتنا، مكملش 15 سنه، لكن بالرغم من بساطته، إلا أن وراه فكر و تخطيط منظم جداً، التخطيط ده متعمد يوصلنا عن طريق الشكل الجديد ده، لمرحله أكبر من كده بكثير، حتمس حياتنا كلها بشكل عام.

الشكل اللي بتكلم عنه، و بالطبع كلنا لامسينه، و هو أنك تلاقى شخص ما بيتكلم مع شخص آخر، و ممكن يكون الكلام في غاية الأهميه، و تلاقى الشخص اللي قدامه ماسك الموبايل بيقلم في شوية Posts، أو بيكتب رساله غير ضروريه على Whatsapp، و أحب بس أوضح أن كلمة غير ضروريه هنا مش قصدى بيها تدخل منى في خصوصيات الآخر، لكن قصدى أنها ممكن تتأجل على الأقل الكام دقيقه بتوع الحوار.

على مدار أكثر من 10 سنين، عانيت بشده من الموضوع ده، خصوصاً أثناء حواراتي مع الأجيال الأصغر منى سناً، و للأسف ده شئ بيحصل طول الوقت. المشكله الأكبر بتيجي لما تحاول تتناقش معاهم أو تشتكى، بتفاجئ برفض عنيف جداً لفكرة أنك تنتقد الموضوع ده. أفكر مره كانت في رمضان، أيام حظر الكورونا، و كان الوقت متاح معانا للتصوير هو يا دوب الساعه اللي بعد الفطار، فكنا كلنا بنفطر مع



No Signal

بعض و بعد كده بنصور، المهم أن مقدمه البرنامج وصلت متأخره، تقريباً قبل ميعاد الفطار بأقل من ساعه، و للأسف مكنتش أهتمت أنها تقرأ الحلقة قبل ما تيجي، فبعد ما سبتها ترتاح شويه، بدأت أتناقش معاها في الحلقة، و كانت ماسكه الموبايل، طلبت منها تسيب الموبايل و تركز معايا أكثر من مره، فما كان منها إلا أنها أتعصبت و أتخانقت، و في الآخر نزلت و سايتنا و سابت البرنامج كله، بدعوى أني بتدخل في أمورها الشخصيه، و قبلها طبعاً قالت الجملة الأشهر اللي بسمعها دايماً من كل الناس اللي كانت بتشتغل معايا "متقلقش، أنا مش حاغلط وقت التصوير"، مع أن عمر ما ده حصل لا معاها، و لا أي شخص آخر، خصوصاً كمان لو مش محضر كويس.

التعبير الثاني الأشهر، و اللي ممكن تسمعه أكثر، في كافة أنواع هذا النوع من الحوار العايب، هو تعبير: "متقلقش أنا أصلي بعرف أركز في أكثر من حاجه في وقت واحد"، و طبعاً و بالمناسبه دي، فالجملة دي علميه غلط جداً، و بالصدفه لسه شايف من حوالى أسبوعين فيلم وثائقي من أنتاج قناة DW الألمانية الشهيره، بتأكد على كذب ادعاء التركيز العقلي في موضوعين في وقت واحد، يعني عقلك أستحاله يركز في قرابة حاجه على الموبايل، و في كلام شخص قدامك في نفس الوقت.

بعد كده وقت الجد بنسمع التعبير الثالث، و اللي لا يقل أهميه عن التعبير الأول و الثاني وهو: "معلش أصلي سقطت منك"، و ده طبعاً بيتقال لما يكون الطرفين أتفقوا على حاجه -ميعاد مثلاً-، و بسبب أنشغال الطرف الثاني باللعب في الموبايل، المعلومه بتكون وقعت أو أتتست.

أنا عايز أسأل سؤال لكل اللي بيعمل كده، هل فعلاً الPost أو الMessage اللي بتقرأها و كمان بترد عليها أثناء كلام الآخر معاك، متحتلمش أنها تستنى الدقيقه أو حتى الخمس دقائق اللي الشخص اللي قدامك بيكلمك فيهم؟ طيب أنت من الأساس قابل تتكلم معاها ليه، لو أنت بتعتبر كلامه مش مهم؟ اللي بيحصل ده من وجهي نظري مؤثر خطير جداً، و مُستهدف لخطه بعيدة الأمد بدأت تتنفذ بالتدرج، لعزل الناس اجتماعياً عن بعض، و ده لأهداف حأتكلم عنها في الكتاب الجاي، لكن بس أحب ألقى الضوء على نقطه صغيره لكارثه بدأت تتنفذ بالفعل، و هي كارثة الMetaverse، اللي بعتبرها نهاية المطاف و الخطوه الأخيره في خطة عزل الناس تماماً عن بعضهم.



No Signal

أتمنى بجد أننا نراجع نفسنا، و يا ريت دائماً تخلى نفسك مكان الطرف الأخر، و أسأل نفسك السؤال الأهم: هل حتقبل تتعامل بنفس الأسلوب؟ التواصل هو أهم سبب لتقدم البشريه، من أيام عصر الكهوف لحد النهارده، خد بالك أن أغلب اختراعات البشريه كانت دائماً في اتجاه المزيد من التواصل بين الناس و بعضها، يعنى التواصل المثمر دائماً معناه المزيد من التقدم، و الحياه مشيت على كده، من يوم ما بدأت على كوكب الأرض، ليومنا هذا، لكن اللي بيحصل دلوقتي له أهداف، مش مجالنا أننا نتكلم عنها في الكتاب ده.

في النهايه حارج مره ثانيه للحكمتين اللي قلناهم على مدار الحلقة، أنك عندك ودين و لسان واحد، علشان تسمع أكثر ما تتكلم، و مقولة الأمام الشافعي: "رأبي صوابٌ يَحْتَمِلُ الخَطَأَ، ورأبي غَيْرِي خَطَأٌ يَحْتَمِلُ الصَّوابَ"، و إذا كان الكلام من فضه فالسكوت و الأنصات لغيرك من ذهب.

02 أبريل 2023



"لماذا نختلف دائماً بعد النجاح؟
لماذا لا نتحد أبداً أهدافنا؟"



مسار كايروكي الإيجباري

في مقدمة الكتاب، و التي أتفقت معاك أننا نعتبرها الفصل الأول له، حكيت لك عن القصة وراء الوصول لفكرة جمع مواضيع كانت حتكون حلقات في برنامج، و إعادة صياغتها -مع إضافة مواضيع جديدته طبعاً-، علشان تبقى الكتاب الي بين أيديك دلوقت.

لكن الي يهمني في الفصل ده أني أشرحه، هو سبب ليه أنا مكملتش البرنامج و بعض برامجي التانيه -بالرغم من تحقيقهم لنجاح معقول جداً-، و ليه كتير من المشاريع الناجحه ممكن تتوقف لأسباب غير أفقتصاديه، أو أي نوع من الأسباب الخارجه عن إرادة أصحابها.

بدايةً، أنا قلت تعبير مهم جداً خاص بيا في الفصل الأول و هو : "أختلاف الأهداف هي بداية الخلاف"، التعبير ده يُمثل مبرط الفرس في الفصل ده، و خليني أحكيك عن قصه و تجربة جميله حضرتها بنفسي، لكن للأسف و كالعاده هي قصه لم نكتمل، مشروع توقف و هو في بدايات نجاح مبهر، و تعال أرجع معاك 12 سنه للخلف.

سنة 2011 كانت أهم سنه في مسار حياتي في مجال الأفلام التسجيليه، في السنه دى لوحدها عملت 4 أفلام، زائد فيلم كنت بدأته من 2010، و الغريب أني كنت خلصته قبل حادثة كنيسة القديسين بأيام، لكن حادثة كنيسة القديسين خلتنى أضيف نهاية تانيه للفيلم، و دى كانت من التجارب النادره و الغريبه في حياتي. و طبعاً أنا كنت برضه لسه مهندس في إحدى الهيئات الحكوميه، فكانت السنه دى ثريه جداً بالنسبالي، بكل ما تحمله الكلمه من معنى.

أحد أسباب الغزارة في أنتاجي أثناء 2011، هي أن مكنش وقتها في أي عراقيل أنك تصور في أي مكان في مصر، كان في حاله حلوه قوى، الناس كانت بتشجعنا لأن الناس نفسها كانت عايزه تتكلم -أيأ كان الموضوع-، فكانت حاله العامه رائعه، الأمور سهله في كل خطوه بنعملها، محدش ببسالك أنت بتعمل أيه، أنا طبعاً مش عايز أقولكم



قبل 2011 كم المعاناه كانت قد أليه علشان نقدر نصور، و طبعاً نفس الكلام بعدها، لحد ما بدأت عملية التوقف التدريجي لمشروع الأفلام التسجيليه بتاعى، يمكن فيلم كل سنه و أحياناً أكثر.

أثناء السنه دى، و خلال الكام الشهر التالين لثوره يناير، كانت بتحصل فعاليات كثير جداً فى مصر، فعاليات أغلبها كان بيحصل فى الشارع، فكنت أنا و المصور اللى معايا شايلىن كاميرتنا على كتفنا، و أحياناً بيكونوا كاميرتين، و موجودين فى كل حدث أو فعاليه بتحصل، فى القاهره أو خارجها. من بين أهم الأحداث دى، كانت الحفلات الغنائيه اللى كانت بتم فى الشارع بالمجان، للفرق اللى كانت بتسمى وقتها فرق "Underground" أو فرق تحت الأرض، و خلونى فى البدايه قبل ما أستفيض، أشرحلكم معنى التعبير ده و أيه المقصود بيه، و أرجع بيكم بالزمن شويه تانيين للخلف.

مع بداية الألفيه، يعنى بعد سنة 2000، كان الغنا وقتها قاصر على الشكل التجارى بس، بمعنى أن المطربين أو الفرق -و اللى كانت قليله جداً فى الوقت ده- بتتعاقد مع شركة إنتاج، و بيكون الأنتاج فى شكل ألبومات، سواء كانت شرايط كاسيت أو CD's، و تفاعلها مع الجمهور بيكون بشكل ضعيف جداً، و ده بيكون من خلال حفلات بسيطه و ساذجه جداً، زى ليالى التلفزيون، و كمان تذاكرها بتكون غاليه جداً. يمكن التفاعل الوحيد الحقيقى بين المطرب و الجمهور، كان بيتمثل فى حفلات الجامعات.

لكن زى ما أنا لسه قايل أن بداية الألفيه شهدت ظهور موجه جديده، تقريباً كلها فرق مش مطربين، الفرق دى مش بتعمل ألبومات تتباع، لكن بتعمل طول الوقت حفلات بأسعار منخفضه جداً، من خلال مكانين أو ثلاثه فى مصر كانت بستضيف الفرق دى، زى الساقيه فى الزمالك.

أهم ما كان يميز الفرق دى، أولاً نوعية الكلمات اللى خرجت عن الأطار التقليدى لفكرة الحب و الهجر... إلخ. ثانياً المزيكا الغير التجاريه، لأن المزيكا وقتها كانت نمطيه جداً بدايةً من نصف الثمانينات، من بعد ظهور حميد الشاعرى. ثالثاً التفاعل المباشر مع الجمهور. رابعاً أن أغلب أفراد الفرق دى كانوا مش واخذنها تجاره،



بالعكس، أغلبهم كان له وظائف كويسه جداً خارج إطار الموسيقى، فهم كانوا عشاق بجد للفن، مش ألاتيه و خلاص.

الفرق دى أطلقت على نفسها مصطلح كان موجود في أوروبا على نفس النوعيه من الفرق و الغنا ده، و هو مصطلح "Underground"، لأنهم مكنوش ظاهرين للناس العاديه، هما كانوا معروفين بس لنوعيه من الشباب المثقف اللى بيتابعهم و بيحضر حفلاتهم، بالرغم من مطاردة نقابة الموسيقيين لهم بأعتبارهم دخلاء على الموسيقي، لأنهم مش أعضاء فيها.

نرجع تاني ل2011، و اللى كانت أكثر سنه منوره للفرق دى، لأن المناخ كان محتاج النوع ده من الغنا، و زى ما قلت قبل ما أستطرد أن كان في حفلات مجانيه بتنظم طول الوقت في الشوارع للنوع ده من الفرق، و أنا كنت تقريباً باحضر أغلبها و بصورها كنوع من التوثيق الكامل للمرحله دى.

بدأت حكايتي مع عالم ال Underground من خلال حفله كانت في ميدان الكوربه بمصر الجديده، و بالرغم من أني كنت حضرت عشرات الحفلات قبلها، لكن الحفله دى كانت مختلفه في كل شيء، بدايةً من نوعية الفرق، التنظيم، تفاعل جمهور مصر الجديده -اللى أنا واحد منهم-، المهم، في اليوم ده قررت أني لازم أعمل فيلم تسجيلي عن عالم موسيقي ال Underground، من خلال أني أصور فيلم أتتبع فيه رحلة واحده من الفرق دى.

من خلال الحفله وقع أختياري على فرقة مكونه من 8 شباب، الفرقة مكنتش في الوقت ده من الأسامي المشهوره على الساحة خالص، لكن الأکید أنها كانت فرقة مميزه بكل معنى الكلمه، بدايةً من التنوع الرهيب في أعضاء الفرقة، اللى كل واحد فيهم جاي من بيئه و ثقافه و مجتمع و مستوى مادي مختلف تماماً، لنوعية المزيكا اللى بيقدموها، و اللى بتحتوي كل أنواع المزيكا، لأسم الفرقة اللى بيوصل المعني ده. الفرقة كان أسمها "عشره غربي"، و المقصود بيه المزيج بين الموسيقي المصريه "عشره بلدي" و الموسيقي الغريبه بكل ألوانها.



بعد الحفلة قدرت أتواصل مع أحمد ياسين -مطرب الفرقة-، و طلبت منه بشكل سريع مقابله، لأني عايز أعمل فيلم تسجيلي عن الفرقة. أحمد رحب جداً و أتفقنا على ميعاد للقاء مع باقي أعضاء الفرقة.

و أتفقنا، و بدأت تصوير الفيلم، و عشت معاهم شهور ما بين بروفات، تسجيل، حفلات داخل و خارج القاهرة، دخلت معاهم العالم السحري من جوه، و أتعرفت على كتير من الفرق التانية، بقيت معاهم على الstage و وراه، عايش معاهم تفاصيلهم الحياتيه، و كل طقوس ما قبل الحفلات.

توج رحلتي معاهم في الأخر حفله هما سموها "مش عشره غربي"، كان أميز ما فيها، هو أميز ما في غنا الUnderground في الوقت ده، و هو أن كل أغنيه غنوها في الحفله، كان معاهم ضيف شرف من فرقه من الفرق الكبيره وقتها، يعنى هاني عادل نجم وسط البلد و الممثل حالياً، أمير عيد من كايروكي، أحمد بحر من Black Thema، و غيرهم كتير جداً، و دي كانت واحده من أجمل التفاصيل في هذا النوع من الموسيقى في الوقت ده، و هي العلاقه بين الفرق و بعضها.

للأسف و لظروف كتير أنقطعت علاقتي بيهم بعد الفيلم، و اللي بعتبره واحد من أفضل الأفلام اللي عملتها في حياتي، لكن طبعاً كنت مهتم جداً بعدها بمتابعة أخبارهم، و اللي بدأت تقل بالتدريج، لحد ما عرفت أن الفرقة أنفصلت و أنتهى نشاطها تماماً. مش بس فرقة عشره غربي، لكن عشرات الفرق التانية وقفت أو أنفصل أعضاءها في الوقت ده، و كتير من أعضاءها سابوا المجال الفنى تماماً، و الغريب أن ده يحصل، و أغلب الفرق دي في قمة نجاحها.

طبعاً اللي حصل ده زعلني جداً على المستوى الشخصي جداً، و خلاني أسأل نفسي سؤال ييراودني دائماً، ليه في ناس كتير في عز نجاحها مش بتكمل؟ و أنا هنا بعمم السؤال على كل مجالات الحياه، لكن قررت أخذ المجال الفنى هو محور حديثي في الفصل ده، بالرغم من أن السؤال عام جداً، لكن دايماً ضرب الأمثال بيقترب الفكره بشكل كبير جداً للمتلقى.

بالتأكيد أن فيه أسباب كتير لفكرة انفصال أى مجموعه من الناس حققت نجاح مع بعض، سواء النجاح ده كان في المجال الفنى أو أى مجال تاني، يمكن يكون من



بينها أسباب اقتصادية، يمكن تكون الأسباب سياسيه أو لها علاقه بالمناخ العام في البلد، ممكن تكون الأسباب لها علاقه بأن المنتج اللى بتقدمه مبقاش له سوق، و ممكن أسباب تانيه كثير.

لكن في سبب مختلف هو اللى بيهمنى و بيمثل موضوع الفصل ده من الكتاب، و هو أن مجموعة الأفراد دى وصلت لمرحلة أختلاف الأهداف، و أرجع تانى لكلمتى اللى دايماً بقولها: "أختلاف الأهداف هي بداية الخلاف".

عنوان الفصل ده بيتضمن معنيين، الأول أسم أشهر فرقتين تمكنا من الأستمرار زى ما بدأوا خلال العشرين سنه اللى فاتوا، و هما كايروكي و مسار إجبارى، أما المعنى التانى فهو من أسم فرقة مسار إجبارى، و معنى مسار إجبارى أن في طريق تم الأتفاق على عدم الحيايد عنه، الطريق اللى لازم نمشيه مع بعض، خط أتفقنا عليه و كلنا ملتزمين بيه، و ده بيمثل واحد من أهم عناصر النجاح لأى مجموععه قررت أنها تحقق حلم مشترك مع بعض.

خلينى بسرعه أتكلم عن أهم تجربتين فنييتين ظهروا من رحم مرحلة فرق Underground، علشان يتحولوا لنجوم صف أول في مصر، و حابداً أحكى بسرعه أولاً عن الفرقة السكندرية "مسار إجبارى" و اللى أنا شخصياً بأعتبرها أهم و أنضج تجربه موسيقيه جماعيه في تاريخ مصر كلها.

خلونى أناقش في البداية الأسم الرائع -و الغريب جداً في نفس الوقت- اللى أختره أعضاء الفرقة الأربعة المؤسسين، الأسم الفلسفى العميق جداً، و اللى كان مقصود و مُستهدف من أعضاء الفرقة. "مسار أجبارى" كأسم أخترته الفرقة لنفسها كان مقصود بيه المسار اللى بي فرضه المجتمع على الناس، أن الناس في مصر عايشه حياه مفروضه عليهم، و في نفس الوقت زى ما بيقول أعضاء الفرقة، أنهم كلهم عاشوا فكرة المسار الإجبارى مع أهلهم، لأن كل أعضاء الفرقة كانوا من الصغر بيحلموا أنهم يكونوا موسيقيين، لكن الأهالى أجبروهم في البدايه على مسار آخر، لأن مفهوم النجاح في مصر في الوقت ده، يا أما أنك تكون دكتور أو مهندس. يعنى ببساطه أسم



الفرقة كان يُمثل معنى القهر اللي عايشه المجتمع، و اللي برضه عاشه أعضاء الفرقة قبل بداية مشوارهم الفني.

بدأت الخطوه الأولى للنجاح لما قرر أننين من أعضاء الفرقة الأربعة أنهم يسببوا عملهم و يتفرغوا للمزيكا، الخطوه دى معناها تحديد الهدف و الكفاح من أجله مهما كان التمن أو النتائج، بمعنى أن أعضاء الفرقة فعلاً وضعوا أول قدم على طريق مسارهم الإجماعى، لكن اللي هما أختاروه بنفسهم.

الفرقة بدأت سنة 2004 بأربع أعضاء، و فى سنة 2008 أنضم لهم العضو الخامس، و من وقتها و الفرقة بنفس ال Line up أو الأعضاء، و 19 سنه عدت و الفرقة ماشيه بنفس المنهجيه فى كل تفاصيلها، لكن بيُضاف لها الخبره فى كل خطوه الفرقة بتخطوها، و فى الكتاب ده بأحيى أعظم فرقه موسيقيه ظهرت فى تاريخ الفن فى مصر حتى اللحظه دى -على الأقل من وجهة نظرى-.

من النقط المثيره فى تجربه مسار إجبارى، أنهم بعد 3 سنوات بس من بدايتهم، يعنى بدءاً من 2007، كانت الفرقة بتعمل حفلات كثير خارج مصر، و بدأت فى 2007 بحفلتين فى مالطا و تركيا، و 2008 فى إيطاليا، و ده بالتأكيد كان قبل ما يتعرفوا فى مصر بالصوره الكافيه.

فيلم "ميكروفون" للمخرج المبدع أحمد عبد الله السيد و اللي تم تصويره سنة 2010، لكن عرض بالتزامن مع ثورة يناير، و اللي تنبأ فعلاً بالثوره قبلها بشهور، هو أحد العوامل الرئيسيه لشهرة الفرقة السكندريه، لأن الفيلم كان ينتمى لما يسمى ب Docudrama، يعنى كان ببساطه فيلم تسجيلى بيتكلم عن الفرق المستقله فى الأسكندريه، و المتغير اللي حصل للشباب فى الأسكندريه فى مرحله 2010، من خلال قصه دراميه بسيطه لأثنين شباب بيعملوا تجربه فيلم مستقل، والفيلم ده حكي جزء كبير و مهم من مشوار مسار إجبارى، بشكل كان جديد جداً على السينما المصريه.

الفرقه الثانيه اللي حنتكلم عنها هى الفرقة الأشهر فى مصر حالياً و هى طبعاً "كايروكى"، و فرقة كايروكى على عكس أسم واحد من ألبوماتهم و هو "أبناء البطه السوداء"، بالعكس ففرقة "كايروكى" أعضاءها ممن يطلق عليهم "ولاد ناس قوى"، كلهم من منطقه المعادى، و 4 منهم كانوا أصدقاء طفوله و زملاء فى المدرسه.



الفرقة بدأت بأثنين بس من الأعضاء و بأسم "Black Star"، و كانوا بيغنوا أغاني معروفه باللغه الأنجليزيه، يعنى "Cover versions" لأغاني مشهوره، ما عدا أغنيه واحده لهم كانت باللغه العربيه أسمها "غريبه"، و الغريب أنها كانت أكثر أغنيه بتتطلب منهم فى الحفلات.

فى 2003 أتكونت الفرقة فعلياً ب4 أعضاء -زى ما قلنا كلهم كانوا زملاء مدرسه- فى المعادى، و الأسم كان عبارته عن مزيج من كلمتين، "كاريوكى" و هى فكرة غناء الجمهور فى بعض الأماكن الخاصه على موسيقى أغاني بتسمى "minus 1"، و الكلمه الثانيه و هى "Cairo" أو القاهره باللغه الأنجليزيه. فى سنة 2008 أنضم لهم العضو الخامس لأن الفرقة كانت محتاجه عازف keyboard شاطر، و من 2008 للنهارده و الفرقة بنفس ال lineup أو الأعضاء.

فى المرحله الأولى، و هى مرحله ما قبل 2011، كانت الأماكن المتاحه فى القاهره لهذا النوع من الغناء قليله جداً، و كانت يا أما مكان زى ساقية الصاوى، أو Pubs زى Cairo Jazz Club، و دى كانت الفرص المتاحه للفرق المستقله ال Underground وقتها، و طبعاً شتان الفرق بين جمهور ساقية الصاوى، و مرتادى Cairo Jazz Club.

لحد يناير 2011، مكنتش فرقة كايروكى من الأسمى المشهوره وقتها، زى فرقة وسط البلد، و اللى خدمها برضه أنها ظهرت فى أكثر من فيلم سينيمائى زى "ملاكي أسكندريه" و "عودة الندله"، لكن كايروكى كانت أكثر فرقة أستفادت من الثوره، بدايةً من الأغنيه اللى أعتبرت أيقونة الثوره، و اللى عملوها مع مطرب فرقة وسط البلد هانى عادل و هى أغنيه "صوت الحريه"، و اللى من خلالها عرف الناس العاديه فرقة كايروكى للمرة الأولى.

فى خلال الفتره من 2011 ل2013 أصبحت فرقة كايروكى الفرقة الأولى فى مصر، من خلال مجموعه من الأغاني المُلهمه فعلاً، زى "يا الميدان"، "أثبت مكانك"، "مطلوب زعيم"، ال3 أغاني دول كانوا كافيين مع أغنيه "صوت الحريه" بوضع كايروكى على قمة الفرق الغنائيه فى مصر.



بدأ أنحدر تدريجي في مستوى أغاني الفرقة بدايةً من 2014، سواء ككلمات أو موسيقى، لدرجة أن كان لهم أغنية سنة 2015 أسماها "البابورت" و البابورت لى مش عارف هي بلاعة المجارى، و طبعاً جزء من الأنحدر و البعد عن نوعيه معينه من الأغاني اللى كانوا بيغنوها سابقاً مفهوم سببه، لكن النقلة كانت قويه و غريبه جداً، بس الأغرب أن النقلة النوعيه دى لم تُأثر في أستمرة نجاح الفرقة و شعبيتها على الأطلاق، و ما زال الفريق مستمر ليومنا هذا للسنة العشرين، و أصبحت فرقة كايروكى من سنين، هي الفرقة رقم 1 في مصر، و الفرقة الأكثر ظهوراً في الأعلام و الأعلانات.

بعد ما أستعرضنا بسره حكاية أهم فرقتين موسيقيتين موجودين على الساحة الغنائية المصريه، و أكتشفنا أن عمر مسار إجبارى 19 سنه، بينما فرقة كايروكى السنه دى حتكمل 20 سنه، طبعاً عمر كبير جداً، بينما أختفت في نص الطريق فرق كانت في وقت ما أشهر منهم زى وسط البلد، طيب أيه سبب قدرة الفرقتين على الأستمرار طول السنين دى -من وجهة نظرى- مع أختلاف منهجية كل فرقه فيهم؟ و ليه مظهرش بين أفراد الفرقتين الخلافات الشخصيه اللى بتظهر في كل الفرق في العالم، و بتكون سبب لتفكك فرق و هي في عز مجدها؟

قبل ما حابداً أحلل خلونى أرجع لفقره كامله قلتها في الفصل الأول و المُسمى "ليه" و كانت السبب الرئيسى في أنى قررت أكتب الكتاب ده، و قلت فيها: "بس أنا كانت صدمتى كبيره جداً أن البرنامج نجح، لكن أنا اللى سقطت، لأن البرنامج محققش أى تغيير في فريق العمل اللى معايا، بما فيهم من قدمه بصوته و كان بينصح الناس بيه، و دى كانت أهم نقطه خلاف بينى و بينهم، و هو أحنا بنقدم سواء البرنامج ده أو كل برامجنا اللى قبل كده ليه؟ و أنا ليا مقوله دايماً بقولها في طبيعة العلاقة بين أى ناس، و دى برضه حتكون موضوع واحد من فصولنا و هي: "أختلاف الأهداف هي بداية الخلاف". من هنا وقفت البرنامج و أكتفيت بس بال3 حلقات اللى نزلوا".



يعنى أنا و عن تجربته شخصيه، مقدرتش أكمل بعض البرامج الكثير على القناه على الخاصه بي الـ Youtube، بسبب فكرة أختلاف الأهداف و الرؤى ما بينى و بين فريق العمل اللى كان معايا، و هنا حنوصل للسؤال المهم، هل لما بندخل عمل جماعى دايماً كلنا بتكون لينا نفس الأهداف؟

أنا فى البدايه عايز أكدمرّه ثانيه أن الفصل ده مقصود بيه فكرة العمل الجماعى بكافه صوره، بس أنا أخترت نموذج براق و هو الغنا، لأنه بيحقق للشخص اللى بيمارسه أكثر من هدف و أكثر من شكل للنجاح، الشهره، الماده و تحقيق الذات. عادة اللى بيمارسوا الغناء بعيداً عن الشكل التجارى، بيكونوا طبعاً بيمارسوه عن حب، مش زى بعض الأخرين و اللى بيتسموا "ألاتيه"، و اللى بياخدوه بمبدأ "الاحتيايه" و السبويه"، فالفرق كبير جداً بين الأثنين، أن فى شخص واخذ الفن هدف و رساله، و شخص واخذ الفن أكل عيش و سبويه.

حأبدأ أحلل و أناقش تجربتي كايروكي و مسار إجبارى، و بأكد تانى أنا حاحلل التجارب من وجهه نظري أنا، و حأبدأ بفرقة كايروكي، الفرقة اللى بأعتبرها ماشيه على منهج النادى الأهلى و عمرو دياب و محمد صلاح، لأنها حولت مشروعها لعمل مؤسسى، بمعنى أن كايروكي أصبحت شركه لها إداره، و فى فريق عمل خلف الكواليس، و ده مش لأنهم أصبحوا نجوم، لكن لأنهم زى كل النماذج اللى أنا ذكرتها، قرروا يديروا مشروعهم بفكر إدارى، و ده اللى مخلق عمرو دياب على القمه -حتى لو مش هو صاحب أفضل أغاني-، و ده اللى عمله راحى عباس مدير أعمال محمد صلاح، و ده اللى مخلق فيه فرق كبير جداً بين الأهلى و الزمالك -بالرغم من أنى زملكواى-، فالفكر المؤسسى ده كان واحد من أهم أسباب أستمرار كايروكي طول السنين دى.

أعضاء فرقة كايروكي وحدوا أهدافهم على مبدأ النجاح و الأستمراريه، و ده فى حد ذاته هدف مهم بالنسبه لناس كثير، و علشان كده تعاملوا بقدر كبير من البرجماتييه، و تعريف البرجماتييه للى معرفهاش هو: "هى فلسفه تشجع الناس على أن يبحثوا عن الطرق، و أن يفعلوا الأشياء اللتى تحقق اهدافهم بشكل أفضل، لمساعدتهم على تحقيق غاياتهم المرغوبه". علشان كده الفرقة غيرت من شكلها الفنى و نوعيه أغانيها أكثر من مره على مدار مشوارها، و ده كان مبنى على فكرة "أيه متطلبات المرحله"، و طبعاً أنا مش بأعتبر أن ده صح على المستوى الفنى، لكن على المستوى



الأداری فده صح جداً، و بما أن الهدف كان الأستمرار، فكده نقدر نقول أن أعضاء الفرقة حققوا نجاح تام.

أعضاء الفرقة قدروا دائماً يحافظوا على Image أو شكل عام للفرقة بعيد عن أى مشاكل، التجارب الفردية لأمير عيد مأثرتش على الفرقة، و ده عكس اللي حصل مع فرقة وسط البلد، فتانى أرجع و أقول أن من وجهة نظري أن نجاح كايروكي، كان هو التوافق على أستمرار كايروكي تحت أى ظروف، لدرجة أنهم سمو حفلاتهم "جمهورية كايروكي"، و بدأوا يعملوا Merchandise لهم، بمعنى سلح، زى تى شيرتات و خلافه عليها أسمهم، بمعنى أن كايروكي كمان أصبحوا زى فرق كرة القدم بره، و الأهلى فى مصر، لهم علامه تجاريه بتتباع، و كمان صدر كتاب من 600 صفحه عن مشوارهم، بأختصار فتجربة كايروكي ما بعد 2011، أصبحت تجربة مشروع - جزء كبير منه تجارى-، و ده أهم عوامل أستمرار الفريق طوال ال20 سنه.

ينجى للتجربه الثانيه و هى تجربه مسار إجبارى، و اللي هى بشكل ما غامضه جداً بالنسبالى مقارنة بتجربة كايروكي، لكن أنا شايفها تجربه فنيه توافقيه جداً بين أعضاء الفريق، و أحب أفكرك مره تانه، أنا فى الفصل ده مش بسأل هى الفرق دى نجحت ليه، لكن بسأل هى أستمرت أزاى طول السنين دى.

أنا من خلال تجربتي مع فرقة عشرة غربى، فهتمت أزاى الأغنيه فى هذا النوع من الفرق الموسيقيه بتكون عمل جماعى، و الجماعيه هنا بتيجي فى مرحلة التوزيع، اللي بيتم من خلال مجموعه جلسات كثيره فى الأستوديو لكل أعضاء الفريق، كل فرد فيهم بيضيف للأغنيه تفصيله من خلال الأله اللي بيعزفها، و ده بيتم بمفهوم Brain storming أو العصف الذهني، و من خلال أكثر من فيديو شفتمهم لفرقة مسار إجبارى، حسيت أن الفرقة بتشتغل على نفس النهج ده، خصوصاً أن أعضاء الفرقة الخمسه من الموسيقيين المبدعين بجد.

تجربة مسار إجبارى هى تجربه فنيه جداً، لو سمعت أول أغنيه ليهم و آخر أغنيه عملوها، حتحس أنهم على نفس النهج، لكن أضيفت الخبره فى كل تجربه جديده بيعملوها، أنا بشوفهم مجموعه متجانسه جداً من الفنانين، اللي توافقوا على نوع من الموسيقي المتمرده ما بين الRock و الJazz و الBlues مع الروح الشرقيه اللي



عامله زى التوابل، هما دائماً مسار إجبارى فى كل أغنيه بيعملوها، السن بيُصقلهم و بيُكسبهم خبره، لكن روح الموسيقى الهاوى حتفضل موجوده فيهم للأبد. هما مقلين جداً فى ظهورهم الأعلامى، محافظين على Image للفرقه فيه وقار و غموض طول الوقت.

بعد مناقشة التجربتين المهمين جداً دول، نقدر نلخص أن تجربة كايروكي هي تجربة كان هدفها إن أسم كايروكي يكون Brand، هي تجربه إداريه ناجحه جداً، حتى لو وقعت أكثر من مره فنياً خلال السنين الأخيره، أما تجربة مسار إجبارى، فهي تجربه فنيه توافقيه بين مجموعه أعضاء الفريق، بتزداد صقلاً مع السنين.

طيب حنستفيد أياه بعد محاولة تحليل تجربه أستمرار الفرقتين لما يقرب من 20 سنه؟ حنستفيد أننا نحاول نشرح ليه التجارب الجماعيه فى العالم كله أحياناً كتير بتنتهى و هي فى قمة النجاح؟

ببساطه لأن أى عمل جماعى له شرطين مهمين جداً.

أولاً: توافق الأهداف بشكل تام. يعنى مينفعش أن أنا و أنت ندخل مشروع صناعى مثلاً، خلينا نفترض مصنع ملابس، و يكون أنا هدفي الجوده و أنت هدفك الربح المادى بأى شكل. كده الأهداف حتتعارض، و التجربه حتفشل. فى ناس بتؤمن أن الأسم بييجيب فلوس، و ناس تانيه بتؤمن أن الفلوس هي اللى بتجيب الأسم، و الأثنين صح، بس كل مبدأ فيهم له طريقه إداره مختلفه تماماً.

فى الفن برضه، مينفعش يكون فى أختلاف أهداف فى أى تفصيله، حتى لو كانت فى طريقه صياغة العمل، و إذا ده حصل، فلازم يكون فى قائد بيدير الدفه فى النهايه، و لازم الكل يكونوا مرتضيين رأيه، لأنى شفت بنفسى أن الفن بيكون دائماً من أكثر المجالات اللى بيحصل فيها خلافات فى وجهات النظر، سواء فنيه أو إداريه أو ماديه، علشان كده أى مجموعه قررت تعمل مشروع مع بعض -أى مشروع-، لازم تحدد أهدافها من الأول بشكل توافقى كامل، متسيبش نقطه بدون ما تتناقش، لأن الأختلاف فى الأول أسهل كتير جداً من الأختلاف أثناء العمل.



تاني نقطه، و دى سبق و ناقشتها في فصل "No Signal"، و هي فكرة العمل من خلال Modules، بمعنى أن كل واحد بيتحدد له Job description أو مهام وظيفته، و اللي من المفترض أنها لا تتعارض أو تتداخل مع أى مهام وظيفيه لشخص تاني، بمعنى أن العلاقه بين أفراد العمل تكون تكاملية و ليست تنافسيه، أحنا بنكمل بعض مش بننافس بعض، أى واحد فينا لو وقع، فالمشروع كله حيقع، فياريت قائد أى عمل يحاول دائماً يسكن الشخص المناسب في المكان المناسب، و يبعد دائماً عن الأختيارات اللي ممكن تسبب "نفسنه"، و ما أدراكم ما هي النفسنه.

كلمه أخيره، يا ريت لو أنت داخل أى مشروع -أياً كان نوعه- حتى لو كان مشروع زواج، تدى لنفسك الفرصه أنك تدرس الآخر و هو يدرسك، و تتأكدوا أن أهدافكم في المشروع ده واحده، و تكون مطمئن تماماً أن الشخص ده مكمل معاك للنهائيه، و أن هو أو هي بيشاركك دائماً نفس الرؤيه.

14 مارس 2023



"لماذا نسقط كثيراً في فخ الاختيار الأول في حياتنا؟
لماذا يؤدي هذا السقوط أحياناً للإكتئاب؟"



نقطة بداية_1_ الاختيار الأول

تقرير ظهر في 13 سبتمبر 2021، على الصفحة الرسمية لمنظمة الـWHO، و لو كنت متعرفش أيه هي منظمة الـWHO، فهي المنظمه الرسميه التابعه للأمم المتحده، الخاصه بالصحه، وأسمها بالكامل "World Health Organization" أو منظمة الصحة العالميه، يعنى نقدر نقول أنها وزارة صحة العالم كله، طيب أيه بقى موضوع التقرير، و علاقته بالفصل ده؟

التقرير بيتكلم عن مرضى الأكتئاب، و بيقول أن في العالم 280 مليون أنسان مصاب بالأكتئاب، بنسبه تُقدر بحوالى 3.8% من أجمالى سكان العالم، نسبه كبيره فعلاً، و بالتأكيد أن النسبه الحقيقيه أكبر من كده بكثير جداً، لأن طبعاً في ناس كتير -و خصوصاً في دول العالم الثالث- مش بتتسجل في الأحصائيات دى، لأن مش كل الناس عندها القدره أنها تروح لدكتور نفسى، فأكيد فيه ملايين الناس مكتئبه بينها و بين نفسها، محدش يعرف عنها أي حاجه، فبالتالى مش متسجله في أى نوع من الأحصائيات الرسميه.

من بين أحصائيات التقرير أن نسبة الأصابه بالأكتئاب بتزيد عند البالغين بشكل أكبر، و ده شئ طبيعى جداً و منطقى، لأنك كل ما بتكبر أو بتعدى مرحله، بتظهر لك أنواع مختلفه من المسئوليات و المشاكل، و اللى حجمها و نوعيتها بتكون أكبر بكثير من المرحله اللى قبلها، فطبيعى أن أسباب تعرض الشخص البالغ للأكتئاب ممكن تزيد جداً كل ما عمره بيكبر.

و مع كل مشكله بتواجه أى أنسان، و مش بيلاقى عنده القدره أو الوسائل لحلها، فكتير جداً من الناس لما بتصادفها مشكله من النوع ده مش بتواجه، مش بتحاول تدور على حلول بديله، لكن بتلجأ للأكتئاب، و اللى طبعاً نسبه مش صغيره من اللى بيوصلوا للأكتئاب، بيوصلوا للمرحله الأعلى و هى الأنتحار، و دى نقطه مهمه جداً حتكون موضوع الفصل الأخير من الكتاب.



نقطة بداية_1_ الأختيامالأولى

بند من التقرير أسمه "العوامل المساهمة في الاكتئاب" و مكتوب في بدايته "ينجم الاكتئاب عن تفاعل معقد بين عوامل اجتماعية ونفسية وبيولوجية. والأشخاص الذين عاشوا تجارب سلبية (البطالة، أو فقدان شخص عزيز، أو الأحداث الصادمة)، و من النقطة دي حنبدأ موضوع فصلنا، و هي أول سبب ذكرته منظمة الصحة العالمية في تقريرها و هو البطالة، و خلينى أسميه باسم تانى أصعب شويه و هو الفشل في مجال العمل، فهل فعلاً فيه شخص ناجح و شخص فاشل؟

من وجهة نظرى مفيش حاجة في الدنيا خالص أسمها شخص فاشل، أمال الفشل ده ببيجي منين؟ الفشل بيحصل نتيجة سبب من أتتين: الأول هو عدم قدرة الإنسان على التحديد الدقيق لقدراته، و اللي بيخليه مش بيختار العمل المناسب اللي يقدر عليه و يناسبه، سواء بدنياً أو ذهنياً، أو أي نوع تانى من القدرات، و دى أول نقطه حأتكلم عنها في الفصل ده، بس خلينا نقول السبب التانى و اللي حأتكلم عنه في الفصل اللي جاى و هو الحالمين و الواهمين. طبعاً في فشل لأسباب تانية، لكن أنا بعتبرها أسباب ثانويه وقتيه، لكن الفشل الأساسى جذوره بتكون لسبب من الأتتين اللي أنا لسه شرحهم.

نبدأ بالسبب الأول، و أنا بعتبره هو الأهم، و أسباب أهميته كتيره جداً، من بينها أن كتير من الناس فعلاً مبتقاش قادره أنها تقيم أمكانياتها، مبتقاش عارفه أن كل أنسان فينا زى الموبايلات و الكمبيوترات، قدراته لها حدود، و زى ما أنت لما بتنزل تشتري موبايل، يُفترض أنك بتفاضل في أمكانياته، و تختار أيه اللي حيناسبك منها، بناء طبعاً على أحتياجاتك، فنفس الفكره معنا أنا كنا كبشر، كل واحد فينا له أمكانياته، اللي لازم يكون كل واحد فينا قادر على تحديدها بنفسه، طيب أزاى يقدر يحددها؟

في الفصل ده حأتكلم عن تفصيله واحده في حياة أي أنسان، و اللي بيكون فيها معرفة الإنسان لقدراته الشخصيه، هي النقطة الفاصله في باقى مسار حياته كلها، حأتكلم عن أول لحظة أختيار حقيقية في حياتنا، و للأسف فبالرغم من كونها لحظة الأختيار و الأختبار الأولى الحقيقيه في حياتنا، إلا أنها تعتبر من أصعب الأختبارات على مدار الحياه كلها، و من مساوئها أنها بتيجي في توقيت، مش بيكون الشخص ناضج بالقدر الكافى، و اللي يسحمله بالأختيار الصح.



نقطة بداية_1_ الاختيار الأول

الاختيار اللى بتكلم عليه، هو لحظة تحديد أزاى هنكمل مسارنا التعليمى، و هو اختيار ندخل علمى و لا أدبى، و ده بالنسبة للطلبة اللى فى أنظمة تعليم محليه، أو اختيار المواد المؤهله لنوعيه معينه من الكليات، بالنسبة للطلبة اللى فى أنظمة تعليم دوليه، و من بعده اختيار نوعية الدراسه الجامعيه.

على مدار حياتى شفت طلبه كتير جداً بتختار القسم الأدبى، أما باعتبار أنه أسهل، أو أنها بكده بتكون هربت من المواد العلميه. الاختيار ده بيتم بدون ما الطالب أو الطالبه يكونوا عاملين دراسه لقدرتهم أو حتى تحديد ميولهم، و لا حتى دراسه للمجال اللى هو أو هى عايزين يكملوا فيه باقى حياتهم، طبعاً ده بأفترض أن فى بلادنا الإنسان بيشتغل بشهادته، و دى نقطه ثانيه ليا فيها كلام كتير جداً.

أنا شفت عقليات عظيمه جداً، و ممكن تنجح جداً فى بعض المجالات العلميه، بس كان سبب اختيارها للقسم الأدبى هو الكسل و الأستسهال، تخيل أنك تغير مسار حياتك كله علشان كسل و أستسهال، و بالمناسبه علشان متفهمينش غلط، فمفيش حاجه أسمها علمى أحسن من أدبى على الأطلاق، لأن لكل دراسه أهميتها و دورها فى منظومه الحياه، بس فى حاجه أسمها أيه المجال اللى ممكن قدراتى الخاصه تنجحنى فيه.

خلينى أضرب مثالين بكليتين ممكن تدخلهم من القسم الأدبى، و مدى أهمية دورهم فى الحياه، و مدى أهمية أن مؤهلاتك الشخصيه تكون متناسبه مع النوع ده من الدراسه، و من بعده بالتأكد العمل، و هما كليتى تربيته و حقوق، هل دول كليات مش محتاجين مؤهلات خاصه للشخص اللى يفترض أنه يدرس فيهم؟

بما أن من بين خبراتى الحياتيه كانت مهنة التدريس، و مارستها على أكثر من مستوى، بدايةً من تدريس مناهج مدرسيه، لتدريس كورسات خاصه فى بعض الجامعات، لتدريس مهنى لتطوير كفاءة المهندسين فى الهيئه اللى أشتغلت فيها فتره كبيره من حياتى، لتدريس ورش خاصه بعمل الأفلام التسجيليه، فخبراتى دى تخلينى أكيد أن التدريس مهنة لا يصلح لها إلا الشخص المؤهل لها، و بالمناسبه، فكل ما سن اللى أنت بتدرسلهم صغر، كل ما صعوبه عملية التدريس كانت أكبر.



نقطه بياح_1_ الأختيار الأول

و للأسف فكليات التربية و رياض الأطفال في بلادنا، لا يدخلها إلا الأشخاص الي مجموعهم مسمحش أنهم يدخلو كليه تانيه، و لا تتم لهم أي نوع من اختبارات القدرات، و تخيل أن الناس دي هي الي بتربي الأجيال بعد كده، و ده يوضحلك ليه التعليم عندنا مش ناجح، ليه الطلبة كلها بلا أستثناء بتاخذ دروس خصوصيه، ليه الطلبة مش بتحب العلم، و كل هدفها هو النجاح و المرور من مرحلة المدرسه بأى شكل أو طريقه، بدون إدراك أهمية اللي يفترض أنهم بيتعلموه في مستقبلهم كله، علشان كده حتى الي ذاكر منهم بجد، إستحاله يفتكر حاجه من الي ذاكره تاني يوم بعد الأمتحان.

طيب الكلام الي قلته ده، بيُمثل أول اختبار حقيقي في حياة أى إنسان، و هما مرحلة اختيار القسم العلمى أو الأدبى بعد أولى ثانوى، أو اختيار المواد المؤهله، و مرحلة اختيار الكليه أو نوع الدراسه، و المشكله -و خصوصاً في المرحلة التانيه الخاصه بأختيار الكليه- أن في عوامل كثير جداً بتتدخل في أختياراتنا، لكن المهم هو أنت أراى تقدر تكون إيجابى و تشارك في تغيير سوء الأختيار، الي بيكون واحد من أهم الأسباب الي بتدمرنا باقى حياتنا، سواء بأختيار نوع دراسه أحنا مش مؤهلين لسوق العمل فيها، أو دراسه مش قادرين عليها، أو أخيراً دراسه ملهاش سوق عمل، و السبب الأخير ده، و الي كنت ذكرت من شويه أنى حنتكلم فيه بإستفاضه، أكثر سبب بيؤدى لكل الحالات الي بنشوفها من أن الغالبية العظمى من الخريجين، بيتشغلوا في مجالات، أبعد ما تكون عن دراستهم.

أول نقطتين قولتهم نقدر نجمعهم بسرعه مع بعض، و هما أختيار دراسه أحنا مش مؤهلين ليها، أو دراسه مش قادرين عليها، يعنى أيه؟ يعنى فيه طلبه كثير بعد ثانوية عامه أو أى دراسه موازيه، مجموعها الكبير بيخليها تدخل طب أو هندسه أو سياسه و اقتصاد، لمجرد بس أن مجموعها كبير، أو العكس، ناس بتدخل حقوق أو تربيه، لمجرد أن مجموعهم قليل، طيب أنت كطالب المطلوب منك تعمل أيه؟

طبعاً أنا منكرش أن في مسئوليه كبيره على وزارة التربية و التعليم، لأن في أوروبا و الدول المتقدمه، بيوجد شخص في كل المدارس العليا، و أقصد بكلمة العليا High Schools أو مرحلة ما قبل الجامعه مباشرة، أسمه Student Coordinator.



نقطه بياص_1_ الأختيار الأول

الشخص ده كل دوره في المدرسه هو أنه يساعد الطالب على اختيار المرحله اللي جايه في حياته، يعني بيقوم الطالب و يقوله أنت تصلح لكلية أيه، أو أمكانياتك تؤهلك لدراسة أيه و متأهلكش لدراسة أيه. طيب للأسف الشخصيه الهامه جداً دى، و المحوريه في حياة طلاب الـ High Schools، مش موجوده في مدارسنا، فهل ممكن أنت كطالب تقوم بيها بنفسك؟

الأفضل أن أولياء الأمور هما اللي يقوموا بيها، وده لسببين، الأول أن غالباً الشخص اللي بيكون محتار بين أكثر من أختيار -و خاصة في المرحله العمريه دى-، لو هو اللي أختار بنفسه، مش حتكون أختياراته في الأغلب مبنيه على دراسه، لكن حتكون مبنيه على العواطف و الأهواء بنسبه كبيره جداً. ثانياً أن دايماً اللي شايف من بره بيكون شايف أفضل، أضف إلى ذلك إن لو الشخص اللي شايف من بره شخص عنده خبره، و كمان أمر الطالب ده يهمه، فحيكون أقدر على مساعدة الطالب على الأختيار من الطالب نفسه.

هنا حاوجه كلامي لأولياء الأمور، فيه عشرات الأختبارات اللي تقدر تقيم بيها قدرات أبنك من صغره، بدايةً من مستوى ذكائه، لنوعيه مشاكله التعليميه، و دى ليها أختبارات كتير لمعرفة إذا الطفل أو الطالب بيعانى من أى نوع من صعوبات التعلم زي Dyslexia, Dyscalculia و Dysgraphia، و اللي بتمثل 3 أنواع مختلفه من صعوبات التعلم عند بعض الأطفال أو الطلبة.

كمان فيه نوعيه ثانيه من الأختبارات لتحديد تفاصيل شخصيته و قدراته الأبداعيه، يعني في عشرات من الطلبة بيغمى عليها في أول حصه تشريح في كلية طب، و أحياناً نش بيكون عندهم القدره على التأقلم مع فكرة المشرحه، أو طلبه أيدها بتترعش أو بتعرق بغزاره، فمينفعش أنها تشتغل في بعض المجالات اللي محتاجه تعاملات يدويه. كمان فيه طلبه كتير بتفشل في الأقسام الفنيه اللي محتاجه أبداع و قدره على التخيل زي قسم عماره في كليات الهندسه أو فنون جميله.

هنا حيكون دور أولياء الأمور مهم جداً جداً في مساعدة الأبن أو البنت على تقييم قدراته، بعيداً طبعاً عن الأهواء الشخصيه اللي ممكن تكون عند الأب أو الأم نفسهم،



نقطة بداية_1_ الأختبار الأول

زى أنا أبني لازم يدخل طب أو هندسه، أو عايز أبني يدخل صيدله علشان يدير الصيدليه، إلخ من أمثلة تحكيمات أولياء الأمور في مصير أبنائهم.

ندخل على النقطة الثالثه و هي دراسة ملهاش سوق عمل، أيه برضه معنى الكلام ده؟ الكلام ده معناه أنك ممكن تختار كليه ممتازه، و متناسبه جداً مع قدراتك، لكن للأسف أن نوعية الدراسه فيها، سوق العمل مش طالبتها، بيكون يا أما مشبع و مش محتاج أى أعداد ثانيه، أو أنها كمهنه بدأت تتراجع بسبب أما التغيرات الاقتصادية اللي بتحصل كل فتره، أو التطور التكنولوجي الرهيب اللي بيغير في أغلب تفاصيل حياتنا طول الوقت، و النقطة دي حنتكلم عنها في الفصل اللي جاى بأستفاضه، طيب دي أحنا كطلبه، أو أولياء أمور نقدر نعرفها أزاى؟

مره ثانيه و للأسف حارجع لأوروبا و الدول المتقدمه، و خصوصاً الدول اللي الدراسه الجامعيه فيها بتكون أقصر من عندنا، زى أنجلترا مثلاً، لأن أغلب الكليات هناك 3 سنين بس، ليه 3 سنين؟ لأن الدول دي بتعتبر آخر سنتين من المرحله الثانويه، هي مرحله تأهليليه للكليه، زى سنة إعدادى في كليات الهندسه عندنا، طيب الدول دي بتعمل أيه زياده عننا؟

الدول دي بتعمل حاجتين في منتهى الأهميه. أولاً، أعداد القبول في الكليات لازم تكون مربوطه بسوق العمل الفعلي و احتياجاته. ثانياً، و ده بييجي أثناء مرحله الجامعه، أن الشركات الكبيره بتبدأ تاخذ بعض الطلبة علشان يتدربوا عندها من بعد أول سنه في الكليه، تمهيداً أنها تشغل الأكفأ منهم بعد التخرج على طول، فبتخلى الطالب طول الوقت عنده الولاء لشركتها، علشان تقدر توظف عندها الأميز و الأكفأ منهم بعد التخرج، و بتكون إعلانات التوظيف جوه الجامعه نفسها، بتتقدم لها و أنت في سنه التخرج، يعنى بتتعيين أحياناً، و أنت لسه في آخر سنه.

أنا عايز كمان أتكلم عن مجال التعليم الفني، و أزاى أن في الدول دي بتكون أغلب المدارس الفنيه Sponsored أو برعاية أو اللي بتصرف عليها شركات من نفس مجال



نقطة بداية_1_ الاختيار الأول

التعليم، بل أحياناً بتكون المدرسه تابعه بشكل مباشر أو الى مؤسسها هي الشركه نفسها، فهنا كمان بيكون التدريب أو الجزء العملي في مصانع الشركه دى، كجزء من الدراسه، و بيكون الطالب المتفوق أو على الأقل المهتم دراسياً، ضامن أنه حيشغل من لحظة دخوله المدرسه، ففي الحاله دى بيصبح سوق العمل و الدراسه هما الأثنين حاجه واحده، و ده المطلوب.

طيب أحنا في دولنا العربيه معندناش الكلام ده خالص، طيب تعمل أيه كطالب أو كولى أمر؟ حتتعب نفسك شويه و تشوف أيه نوعيات الشغل المطلوبه. أضرب مثل أن لو الفتره دى مجال الاتصالات في دولة ما له الأولويه، يبقى نقدر نقول أن الفرصه أكبر في المجال ده عن غيره كسوق عمل، فيكون أختيارك سواء كليه أو معهد أو تعليم فنى في المجال ده.

مثال تانى، مجال زى ال Overseas call centers، مجال من المجالات المهمه جداً، و اللى حتفضل مطلوبه لسنين، و طبعاً فلوسها كويسه جداً، بس هو مجال محتاج لغه، فمممكن يكون مجال كويس جداً لكثير من الطلبة أو الخريجين اللى معاهم لغه، أو عندهم القدره على تعلم اللغات.

و من النقطة الأخيره حأنهى الفصل ده بضرورة تعلم اللغات أياً كان توجهك أو نوع دراستك، لأنها من أهم النقط اللى حتديك دائماً تميز في أى اختبار شغل حتدخله، و من النقط اللى حتديحك دائماً فرصة الشغل أو السفر خارج البلد، و كمان فيه كتير من الدول بتعمل منح دراسيه، بيكون من أهم عوامل الأختيار و التفضيل فيها هو اللغه، زى ألمانيا. فيا ريت تركز قوى على تقوية اللغات اللى أنت عارفها، و لو تقدر تدرس معاهم لغه تانيه يبقى شيء رائع، يعنى يُفضل يكون معاك لغتين، لأن دى من أكثر الحاجات اللى حتخلى عندك فرص حياتيه أكثر، فتقدر تبعد عن واحد من أهم أسباب الأكتتاب اللى ذكرهم تقرير منظمة الصحه العالميه، و هو البطاله.

06 يناير 2023



نقطة بداية_2_ نقطة، ومنه أوله السطر

"متى يمكن أن تتخذ القرار ببدايه جديده؟
لماذا نخاف دائماً من التغيير؟
و على أى أسس سيكون الأختيار الثاني؟"



نقطة بداية_2_ نقطه، و من أول السطر

في الفصل اللي فات أتكلت معاك عن أول -و يمكن أهم- أختيار في حياتك، الأختيار اللي في الغالب بيكون سبب في تحديد مسار باقي حياتك العمليه لأخر العمر، و أنا هنا بقول في الغالب لأعتبرات كثير خاصه بأوضاع بلادنا الأقتصاديه و الأتماعيه و التعليميه، و هو أختيار نوع دراستك، سواء كانت جامعه، معهد، أو تعليم فنى.

الأختيار ده أنا بعتره أصعب أختيار في الحياه لأسباب كثير، منها أن الشخص في الفتره دى بيكون في مرحله عمرية غير ناضجه بالشكل الكافي، لسه أهداف حياته محددهاش بشكل واضح. و منها برضه أن خبراته في المجالات اللي حيختار ما بينها مش بتكون كبيره، علشان يقدر يعمل عمليه تقييم لهل حينجح في مجال معين و لا لأ. و منها أحياناً أنه بيكون بالفعل محتار بين أكثر من أختيار.

نرجع تانى للتعليم في أوروبا و الدول المتقدمه، و في بعض الجامعات الأجنبيه في مصر، الطالب بيبقى عنده المساحه أنه يغير الدراسه بتاعته، أو ما يسمى بالMajor حتى بعد مرور سنتين من الدراسه، و مش بس كده، ده كمان مش كل السنين اللي قضاهم في البدايه بيروحوا عليه، لأ ده بيتم أختيار المواد المشتركه بين الأثنين Majors، و بيتحسبوله في أختياره الجديد، و ده لأن أغلب الجامعات في العالم شغاله بنظام الCredit hours أو الساعات المعتمده، مش نظام السنه الدراسيه. طبعاً أحنأ لحد اللحظه دى، كليات حكوميه قليله جداً عندنا، هي اللي شغاله بالنظام ده. طيب أيه اللي حيحصل لو أنت فعلاً دخلت دراسه أكتشفت بعد فتره أنك محبتهاش، أو أن ميولك أو أمكانياتك مش متناسبه معاها؟

الحل الأول حيكون في المقوله الشهيره: إذا لم تفعل ما تحب، فحب ما تفعل، و دى فعلاً ناس كثير بيكون عندها الإراده للخطوه دى. كان ليا جار و صديق عزيز من أيام الطفوله، كان حلم حياته أنه يكون دكتور، أقصد طبعاً طبيب، و كان متفوق جداً



نقطه بدايه_2_نقطه، و منج اوله السطر

طول سنين المدرسه، لكن متعرفش أيه اللي حصل له في ثانويه عامه، ممكن توتر، ممكن ثقته زياده، المهم أنه جاب مجموع ميدخلوش كلية الطب.

في البدايه كانت حاله في البيت عنده أقرب لحاله الحداد، كأن حد مات لهم، و كان التفكير بين أنه يحاول يعيد الثانويه مرة ثانيه، و دى للأسف مغامره مش مضمونه على الإطلاق، و بين أنه يكمل في الكليه اللي التنسيق حيخترهاله. أختار صديقي الأختيار الثاني، و قرر أنه حيكمل زى التنسيق ما يختارله، و بالفعل دخل كلية التجاره. هنا ظهرت عنده إرادة التحدى، اللي خلته يدرس و يتفوق، لحد ما أصبح معيد في الكليه، ثم دكتور، و تخيل معايا أنه أصبح أحد مستشارى الدوله الأقتصاديين في مرحله ما، و كان وقتها سنه صغير جداً، و ده لأنه أختار الحل الأول و هو، إذا لم تفعل ما تحب، فحب ما تفعل.

الحل التاني بيكون محتاج منك قرارا جري، بمعنى أوعى تتردد للحظه لو حسيت أنك بالتأكد مش حتقدر تكمل في دراستك، أحياناً ضياع سنه أو سنتين من حياتك، بيكون أفضل من ضياع عمر كامل، حتى لو كانت عليك ضغوط من كل الناس اللي حواليك، بما فيهم طبعاً أسرتك.

أختيارك في المرحله دى بيتبنى عليه جزء كبير جداً من مسار حياتك، ده إن ممكنش حياتك كلها، ممكن جداً تغلط بدون قصد في أختيارك أول مره، لكن أوعى تسبب الغلط ده يجرك لطريق أنت مش عارف حتكمل فيه أزاى، خليك دائماً أنت اللي بتتحكم في مسار حياتك، مش الظروف هي اللي بتتحكم فيك، النقطة دى هي موضوع الفصل ده، خليك دائماً أنت اللي بتدير مسار حياتك.

الفصل مش بس حأتكلم فيه على مرحله الجامعه بس، لكن الأهم عندى هو باقى المراحل اللي حتمر بيها على مدار حياتك كلها.

تعمل أيه لو لقيت نفسك و أنت في سن ممكن يعدى ال40 و أحياناً ال50، و مضطر تعمل Shift career أو تغيير جذرى في مسار حياتك الوظيفيه. ممكن جداً تلاقى نفسك مضطر تدور على شغل جديد، ممكن تكون عمره ما أشتغلته أو تعرف



نقطه بدايه_2_نقطه، ومنه اوله السطر

حاجه عنه. طيب ممكن يكون عندك سؤال بيدور في راسك، أيه اللي ممكن يجبرني أسيب شغلي اللي طول عمرى بشتغله و أنا في السن ده؟ خليني أبدأ بأجابه السؤال ده، لأن أجاباته كثير جداً، و حاجييهالك بأمثله من واقع حياتنا اللي بنعشها، و من كثير من مشاهداتي اللي عاصرتها بنفسى على مدار حياتي.

أول سبب حأذكره، محتاج أرجع بيك لورا، لحوالى 30 سنه فاتت، علشان أدي أقوى مثال عشته بيدلل على السبب ده. في بدايات التسعينات بدأ الكمبيوتر يغزو مصر، أنا هنا بتكلم على الكمبيوتر بشكله و أنظمه تشغيله اللي أحنا لسه عارفينها لحد اللحظه دى، لأن كان فيه كمبيوتر بأنظمه مختلفه تماماً خلال فترة بدايات التمانينات و ما قبلها.

الكمبيوتر لما ظهر و بدأ أستخدامه يزيد بشكل موسع على أرض الواقع، قضى على عشرات المهن اللي كانت موجوده في مصر، و طبعاً أكيد كان له نفس التأثير في كثير من الدول التانيه. يعنى مثلاً في مجالى الأساسى و هو الهندسه، و تحديداً العماره، كان في مهنة أسمها الرسام، و هو الشخص اللي بيرسم اللوح الهندسيه. و كمان كان فيه مهنة تانيه تخص العماره تحديداً، و هو الشخص اللي بيعمل مناظير للمباني قبل مرحله بناءها. المهنتين دول أنقرضوا تماماً بعض ظهور برامج الرسم بالكمبيوتر، زى Autocad.

من بين اللي كانوا بيشتغلوا المهنتين دول، و مقدروش وقتها يتعلموا تطبيقات الكمبيوتر، خصوصاً أنه كان صعب جداً وقتها شراء كمبيوتر شخصى في البيت، لأن مش أى حد كان يقدر يتحمل تمنه، زائد أنه كان صعب جداً، و مش كل شخص ممكن يكون عنده القدره أن يتعلم التطبيقات دى، خصوصاً أيام مرحله الDOS، قبل ظهور الWidows operating system، فالأشخاص دول، و اللي كانوا قبل ظهور الكمبيوتر يعتبروا عمله نادره و مطلوبه، أصبحوا للأسف عمله بلا قيمه، لأن أغلب المكاتب وقتها تحولت تماماً لتطبيقات الكمبيوتر.

تاني مهنة كان لها وزن جداً وقتها، و ناس كثير كانت بتحتاجلها، و خصوصاً برضه في كليات الهندسه بشكل عام، و المحلات التجاريه، و البرامج و المسلسلات التلفزيونيه، و قضى الكمبيوتر عليها تماماً، هي مهنة الخطاط، و زياها زى المهن اللي



نقطه بدايه_2_ نقطه، ومنه اوله السطر

أنا لسه ذاكرها، أنتهت تماماً مع أنتشار الكمبيوتر، و غيرها عشرات المهن اللي راحت مع بدايات ظهور الكمبيوتر.

تاني سبب لأنك تغير مهنتك في سن كبيره هي العوامل البيئيه و المناخيه، و حأضرب في السبب ده مثالين، من قلب الحياه اللي أحنا عايشينها. الأول هو سبب مناخى، و حضرب فيه مثل بمهنة صيد الأسماك. كثير من بحيراتنا جفت بشكل كبير جداً من الأسماك، زى بحيرة المنزله، و الصيد كان المهنة اللي عايش عليها كل سكان المدن المحيطه بالبحيره، فمع أختفاء الأسماك أنتهت مهنة الصيد بالنسبه لأغلب السكان في المدن دى. أنا كنت عملت من حوالى 13 سنه فيلمين هناك عن البحيره و سكان الجزر اللي في قلب البحيره، و كانت وقتها لسه البحيره بخيرها، و كان أغلب رجال مدينة المطريه -اللى على شاطئ البحيره مباشرة- بيشتغلوا في مهنة صيد الأسماك و توابعها، زى صناعة القوارب، الشبك، أسواق السمك... إلخ.

بعدها بحوالى 5 سنين رحت هناك، لكن بحكم عملى في إحدى الهيئات الحكوميه، و كانت البحيره خلاص... جفت بشكل شبه تام من الأسماك، فلقيت أغلب الناس اللي كنت صورت معاهم الفيلمين، أصبحوا عاطلين عن العمل، و الحالة الأقتصاديه بتاعتهم أصبحت في منتهى السوء، و أتدمر حال المدينه بشكل كبير جداً، لأن الناس هناك متعرفش تشتغل مهنة غير الصيد و توابعها، و قليل جداً -ده إن ممكنش منعدهم- اللي معاه فلوس، يقدر يفتح بيها سوبر ماركت أو أى مشروع تجارى صغير.

أوصل معاك للمثال التانى و هو السبب البيئى، اللي منع مهن كثير من المهن من الأستمرار لأنها مهن مضره بالبيئته، و قليل جداً منها تم نقله لخارج حدود المدينه، بس ده برضه مأنقذش عمال و تجار المهن دى، زى مهنة دباغة الجلود، اللي أنتقلت كل ورشها من حوالى 6 سنين من منطقه مصر القديمه، لمنطقه أسمها الروبيكى على طريق الأسماعيليه، فكتير من العمال مقدروش ينقلوا للمكان الجديد، لبعده التام عن أماكن سكنهم، و اللي كانت قريبه من أماكن الورش القديمه، و صعوبه المواصلات، و طبعا تكلفتها العاليه، فكتير جداً من العمال و التجار، أضرطوا يسيبوا تماماً المهنة دى.



نقطه بدايه_2_ نقطه، ومنه اوله السطر

في أسباب تانيه كثير ممكن تجبر أى أنسان أنه يسبب عمله أو مهنته الى أتعود عليها طول عمره، و هو في مرحله عمرية مش صغيره، بس مش كثير منهم للأسف، بيقدر يتأقلم على فكرة أنه يدور على مجال تانى، أنه يحاول يبدأ من جديد، كثير منهم بيستسلم للأحباط، و مش بيحاول يدور على أى حلول بديله، و للأسف هنا بيظهر الجانب السلبي من التجربه.

طيب السؤال هنا تعمل أيه لو ظروفك أضطرتك تسبب شغلك و أنت في سن كبيره؟ أو أن المهنة اللي كنت طول عمرك بتشتغل فيها، أصبحت مهنة مش مطلوبه في السوق.

الأجابه بمنتهى البساطه في الكلام، لكن منتهى الصعوبه في التنفيذ، أنك تعمل زى أسم الفصل ما بيقول، نقطه، و من أول السطر، بمعنى أنك تعيد التفكير في حياتك بشكل عملي، لكن المهم و الضروري أولاً، هو إعادة ترتيب أفكارك، لأن هو ده اللي يقودك للأختيار الجديد السليم.

طبعاً أكيد أن أياً كان البلد اللي أنت عايش فيها، ركبت أوبر أو كريم أو أى Application مشابه، و أكيد برضه أنه دار بينك و بين الكابتن حوار، و أكتشفت أنه ممكن يكون مهندس أو دكتور أو محامى أو عشرات المهن تانيه، و الى كثير من أصحاب المهن دى، أضطرتهم الظروف لتغيير شغلهم، أو على الأقل أنه يكون فيه عمل إضافي بجانب عملهم الرئيسى، و الشغل مش عيب، أنما العيب أنك تستسلم للظروف أياً كانت.

أول خطوه لازم تفكر فيها، هي قدراتك في المرحله العمريه دى حتسمحلك بأيه، يعنى مثلاً متحاولش تجرب تشتغل شغل أنت حقيقى قادر تعمله، لكن المطلوب دايماً فيه مرحله عمرية أصغر، لأن دايماً في كثير من الشركات، بيكون التفضيل في بعض الوظائف للسن الصغيره، علشان المرتب أحياناً، و علشان سهوله إدارته أحياناً، و علشان قدرته على الحركه الأسرع أحياناً تالته، و ده علشان ميجيلكش حاله إحباط. دور دايماً على أيه اللي ممكن تعمله في المرحله العمريه دى، و عامل السن مش فارق فيه، بالعكس ده فيه مهن كثير بتحتاج للسن الكبير.



نقطه بدايه_2_نقطه، ومنه اوله السطر

تاني حاجه متستعيبش أى نوع من العمل، لكن في نفس الوقت متخترش نوعيه من العمل، أنت حتكون حاسس أنك مكسوف منها، و ده طبعاً غلط في الأساس، لكن وارد جداً أنه يحصل، لعشرات الأسباب الشخصيه الخاصه بكل إنسان وظروفه في الحياه.

أنا بحبي كل اللي متكسفش و جاب عربيه بالقسط و أشتغل أوبر، أو حتى أشتغل على عربيه حد تاني، بحبي كل واحد عمل عربيه قهوة أو أكل صغيره و وقف بيها في الشارع، بحبي كل ست عملت مشروع أكل من بيتها، و عملت تسويق لنفسها، سواء بين المعارف، أو على صفحات التواصل، بحبي كل اللي جاب ماكينه طباعة تي شيرتات بكام آلاف جنيه، حتى لو بالتقسيت، و أشتغل بيها، و كمان كل اللي عمل نفسه صفحه على وسائل الSocial media، و باع فيها أى نوع من المنتجات.

أنا عايز أقولك أن كل النماذج اللي أنا ذكرتها دي و أكثر، أنا بمر عليها كل يوم في شارع بيتي، نماذج النجاح من كل الأعمار كتير جداً، بس المهم تكون أيجابى، و تعرف تختار أيه المشروع اللي ممكن تبدأه في المرحله دي، و إن لم يتح لك أنك تعمل مشروع، شوف أيه الشغل اللي يناسب خبراتك و إمكانياتك.

كان عندي عم توفي من كام سنه عن عمر 84 سنه، عمى ده قرر و هو معدى السبعين أنه يشتغل مدرس رياضيات خاص، لأنه في الأساس كان محاسب، و بالفعل بدء ببعض أبناء الجيران من غير فلوس. في خلال فتره صغيره، قدر يثبت نفسه كمدرس شاطر، و بدأ اسمه يتعرف، و الطلبة بدأوا يجيبوا بعض، و طبعاً أصبحت الدروس بفلوس، و حقق منها عائد مئى، ده بجانب العامل النفسى و هو عمليه تحقيق الذات، و قتل وقت الفراغ، و أنه قدر يشغل نفسه بشئ مفيد و نافع للمجتمع، و هو في السن الكبير ده.

لو درسنا الحاله دي، فحنلاقي عمى قدر يختار مهنة هو فاهم فيها، قدراته تسمح بيها، سنه و قدراته الجسمانيه تسمح بيها و مش حتمثل أي عائق بالنسباله، و في نفس الوقت سنه الكبير ممكن يكون عامل ثقه أكبر للأهالى و للطلبه، و هنا يجي



نقطه بدايه_2_نقطه، ومنه اوله السطر

الأختيار السليم للمهنه الى ممكن تقدر تعمل لها Shift career، حتى لو كان سنك كبير.

فيه نوع تاني من القدرات اللي عندنا، و اللي نقدر نشتغل بيها في أي سن، و هو المهارات الشخصية و مهارات الكمبيوتر. أنا عايز أكلمك عن بعض نماذج Applications اللي تقدر تشتغل نفسك من خلالها و أنت قاعد في بيتك ك Free lancer، و تجيلك فلوسك لحد عندك، بس الأول دور جواك على المميزات اللي حتؤهلك للنوع ده من الشغل.

مثلاً هل صوتك حلو -مقصدش للغنا- لكن أقصد أنك تعمل تعليق صوتي أو إعلانات، حتى لو كان سنك كبير، و السن الكبير بيكون مطلوب بشكل كبير جداً في النوع ده من الشغل، خصوصاً الإعلانات الصناعيه، و أكيد كلنا حفظنا صوت الممثل القدير أحمد فؤاد سليم، و اللي محتكر بصوته أغلب الإعلانات الكبيره الخاصه بالدوله.

هل أنت شاطر في اللغات و بتعرف تترجم؟ هل أنت شاطر في الPhoto editing أو برامج المونتاج؟ كل المهارات دي وغيرها كتير، تقدر تستغلها في أي سن من خلال بعض الApplications زي Fiverr، و غيره كتير، لأن العميل هنا بيدور على الأفضل، بيدور وسط مئات الموهبين على مستوى العالم على اللي حيديله شغل أفضل، مش بيدور على الأسم.

نقطه أخيره و مهمه جداً، و هي أنك دايماً تدور على أيه الجديد في المهنة اللي أنت بتشتغلها، متعتمدش على أنك عارف بس اللي بيشغلك. خليني أدى مثال عاصرته في مجال السينما في مصر. كان فيه جيل مهم جدا من المخرجين ظهر في نهايه التمانينات و بدايه التسعينات، و أنا أخترت المرحله دي تحديداً، لأنها بتمثل النقله الحقيقيه في التكنولوجيا. الجيل المميز ده بعد أقل من عشر سنين أنقسم نصين، نص قعد في بيتهم لأنهم فضلوا على عقليه بداية التسعينات، و متعاملوش مع معطيات السوق، اللي بدورها غيرت تماماً في ذوق الناس سينمائياً. أما النص التاني فكمل و أستمر لأنه طور من نفسه، عرف أيه الجديد في تكنولوجيا صناعة السينما، و كان في ذوق الناس، و قدر يتواكب مع كل ده، فأستمر بعضهم لحد النهارده.



نقطة بداية_2_ نقطة، ومنح أوله السطر

في النهاية عايز أقول أنك قادر تبدأ حياتك من جديد في أى مرحلة، وخلينى قبل ما أنهى الفصل أفاجئك ببعض النماذج البشرية المبهرة، اللى بدأت مشوار نجاحها بعد الخمسين، و قدرت بصوره مبهره في تحقيق نجاح على مستوى العالم كله.

أولهم كولونيل ساندرز، اللى أسس سلسلة مطاعم كنتاكي، و اللى صورته أكيد أنت شفتها على العلبة أو على واجهة المطعم. تانى شخص هو راي كروك، اللى في سن 63 قدر يحول محل الأخوين ماك دونالدز، من مجرد محل صغير جداً، لأكبر سلسله في الولايات المتحدة، و من بعده العالم. هو بدأ معاهم كمجرد Salesman، ببيعهم ماكينات ال Milk shake. راي كروك حقق النجاح ده بفكرة كانت جديدة على العالم وقتها و هى ال Franchise أو حق الأمتياز.

تالت نموذج، و هو نموذج غريب جداً، و هى أنا ماري موزيز، اللى أكتشفت في نفسها موهبة الرسم في سن ال 77، و بدأت تبيع و تتكسب منها، و ماتت سنه 1962 و هى عندها 101 سنه، و كانت لسه بترسم. و بعد وفاتها في ب 44 سنه، في 2006، أتباع و واحده من لوحاتها ب 1.36 مليون دولار.

و بمناسبة أنا ماري موزيز، عايز أذكر نموذج مصرى عاصرته بنفسى، وقتها كنت عامل ورشه لصناعة الأفلام التسجيليه في مركز التحرير لاونج، التابع لمعهد جوته الألمانى، و النموذج اللى حأذكره لسيدة مصريه عظيمه -حأكتفى بذكر أسمها الأول و هو نهله-، مدام نهله كانت على وشك -لما قابلتها أول مره- تحتفل بعيد ميلادها الستين. هى طول عمرها كانت ست بيت، عمرها ما أشتغلت، زوجها توفى، و كل بناتها ما عدا الصغيره، كانوا متزوجين.

مدام نهله طول عمرها بترسم، لكن لنفسها بس، لكنها قررت و هى بتحتفل بعيد ميلادها الستين، أنها تعمل معرض لشغلها، كهديه منها لنفسها في عيد ميلادها الستين، و بعض المقربين نصحوها بالتحرير لاونج. أول زياره ليها للتحرير لاونج تزامنت مع الورشه اللى كنت عاملها. المركز رحب بيها جداً، و حقيقى القائمين على المركز دعموها بشده. أنا سعدت جداً بمشاركتي ليها في أول يوم لمعرضها، أولاً للأحتفال بالمعرض، و ثانياً بعيد ميلادها الستين، و اللى كان نفس يوم الأفتتاح.



نقطه ببايه_2_نقطه، ومنه اوله السطر

حاولت أعمل عنها فيلم تسجيلي، لكن للأسف هي ترددت كثير جداً، و في الآخر أعتذرت. لكن لا أنكر أني أستمعت أنا وبعض أفراد فريقتي، بواحد من أجمل عزومات الغدا اللي أتعزمت عليها في حياتي في بيتها، أثناء نقاشاتنا حوالين موضوع الفيلم، علشان تفضل تجربة مدام نهله، واحده من أكثر التجارب الملهمة في حياتي كلها.

رابع نموذج هو مورجان فريمان، الممثل الأمريكي الشهير، و اللي خاض تجربة جديده تماماً عليه، و هي تقديم سلسلة وثائقيات The story of God، و The story of us، و اللي أحتاجوا منه أنه يسافر العالم كله، و هو في سن ال79. و لو أتيت لك فرصة أنك تشوف أى حلقة من السلسلتين، حتلاقيه بيشتغل بحماس و نشاط شاب عنده 22 سنه، لا يمكن تصدق أن اللي قدامك ده داخل على التمانين. و بالمناسبه فالسلسله تم تصورها خلال 3 سنين، يعنى كان وصل لسن 82 سنه.

خامس و آخر نموذج حأتكلم عنه هو رونالد ريجان، الممثل اللي كان مش ناجح قوى، فقرر في سن ال54 سنه أنه يبدأ العمل السياسى، علشان بعدها يوصل و هو في سن ال70، و تحديداً سنه 1981، أنه يُصبح الرئيس رقم 40 للولايات المتحده الأمريكيه.

12 يناير 2023



"لماذا نبذل كل هذا الكم من المجهود
الضائع؟
وكيف نستطيع إعادة ترتيب أولوياتنا؟"



“Under Pressure” اللعبة

في واحده من أهم و أحلى فترات حياتي، وقتها كنت بشتغل مهندس في أحد الهيئات الحكوميه، و بما أن تخصصي كمهندس معماري مكنتش له أى احتياج في الهيئه، فكننت بشتغل في الهيئه حاجات ثانيه تجمع بين بعض الفروع الأخرى للهندسه، أو مهام غيرها ملهاش أى علاقه بالهندسه من الأساس، و كانت أهم فترة أو مرحله خلال عملي في الهيئه، هي الفتره الرائعه اللى قضيتها في إدارة التدريب و التعليم المستمر.

الفتره دى في حياتي كانت في مرحله أقدر أسميها مرحله قمة المثاليه، و اللى زاد من مثاليتي وقتها، أنى كنت متعين في مرحله عمريه كبيره شويه -يعنى مش بعد التخرج على طول-، و بمعنى أدق أنى مخدتش سلم الفساد أو اللامبالاه من أوله، لأن في المراحل الكثير اللى عدت على الهيئه، و اللى سبقت فتره بداية عملي، و أقدر أقول كمان أستمر الوضع لفتره مش صغيره خلال الفتره اللى أنا قضيتها هناك، كانت الهيئه منقسمه لنوعين من الناس، الأول و هم الأقل عدداً، و دول الفاسدين المنتفعين، و النوع الثاني و هو بيمثل باقي الناس اللى ماشيه جنب الحيط أو عايشين حالة اللامبالاه في كل شئ.

المهم تزامن بداية عملي في إدارة التدريب و التعليم المستمر مع أنتقال إدارة الهيئه لرئيس هيئه و مجموعه مساعدين معاه، كانوا مختلفين عن كل من سبقوهم. لأول مره تكون إدارة الهيئه، عندها فكر و طموح غير محدود للتغيير و التطوير، و ده كان من حسن حظي وقتها، بس حسن حظ مستمرش كثير، لأن الأداره الرائعه دى مستمرتش في الهيئه أكثر من سنه، و ده كان سببه الظروف اللى مرت بيها مصر في الفتره دى، فتم تغيير الأداره بعد فتره صغيره من ثورة يناير 2011، علشان تبدأ الهيئه بعدها مرحله السقوط الحر، و هو التعبير المهدب اللى أخترتة علشان أوصف بيه الأذهيار التدريجي اللى حصل للهيئه بعدها.

نرجع بقى لمرجعنا، و لفترة عملي في إدارة التدريب و التعليم المستمر، و اللى بالفعل كانت من أهم الفترات اللى قضيتها في الهيئه دى بشكل خاص، و في حياتي



"Under Pressure" اللعب

بشكل عام، و وقتها كان أحد مهامى الوظيفيه هو أعداد بعض الكورسات و ترشيح المحاضرين ليها، سواء من داخل الهيئه أو من خارجها، و أكيد طبعاً كان فى بعض الكورسات اللى كان لازم أحضرها و أدرسها بنفسى.

المهم، فى يوم طُلب منى تحضير كورس خفيف للSoft skills، و اللى بتعتبر جزء من مهارات التنميه البشريه، و دى كانت من الموضوعات الممتعته جداً اللى بحبها، بس كنت عايز أقدم كورس بشكل مختلف، مش المواضيع التقليديه اللى حفظناها كلنا، و خدمنى الحظ جداً بوجود صديق عمرى -و اللى حانكلم عنه أكثر من مره خلال هذا الكتاب- و اللى كان وقتها دكتور فى أحد جامعات بريطانيا -حالياً هو عميد كليه و نائب رئيس واحده من أهم جامعات بريطانيا-، و قصدته فى تحضير أفكار الكورس معايا، و بعدين قلت لنفسى ليه لاء، ما أستغل وجوده و أخليه هو اللى يدرس الكورس بنفسه، خصوصاً أنه طول عمره شخصيه مش بيشغلها موضوع المقابل المادى، طالما أنه بيقدم حاجه بتفيد الناس.

و فعلاً وافق و عملنا أكبر و أهم دوره تدريبيه فى تاريخ الهيئه، لدرجة أنه من كتر الأقبال عليها، أتعلمت فى قاعة مؤتمرات الهيئه، اللى كانت بتسع لأكثر من 300 فرد، بدلاً من قاعات الأداره بتاعتنا و اللى كبيرها كان حوالى 20 فرد. المهم أن من بين كل المهارات اللى أتقدمت من خلال الكورس، كان فى تمرين هو أقرب للعبه، يمكن أغلب اللى حضروا دوره مركزوش معاه لعمقه الشديد، لكن بالنسبه ليا التمرين أو اللعبه دى كانت نقطه تحول حقيقيه فى حياتى، ليه؟ لأن التمرين أو اللعبه دى -و خلونا نثبت مع بعض على كلمة اللعبه-، عرفتنى موضع الغلط فى حياتى، عرفتنى ليه أنا و كتير من الناس بنبذل مجهود حقيقى، بس الناتج دايماً مش بيكون على قد المجهود المبذول، بالضبط زى ما تكون بتترق عربيه على مطلع. طيب أيه هى اللعبه دى؟ و أزاى ممكن تساعد أى شخص فى تقييم حياته، و بالتالى تغييرها، تعال معايا أشرحها لك ببساطه.

اللعبه ببساطه كان أسمها The Priority Matrix، و اللى ترجمتها بالعربى مصفوفة الأولويات، لكن أسمها الأشهر هو The Eisenhower Matrix أو مصفوفة أيزنهاور، و قبل ما حابداً فى شرح اللعبه -زى ما أنا مسميها- أو المصفوفه



المصنف "Under Pressure"

-زى أسهما المتعارف عليه-، خلينى أتكلم بسرعه عن نشأة فكرة المصفوفه، و أرتباطها بواحد من أهم الشخصيات العالميه فى التاريخ الحديث.

المصفوفه أتسمت فى البدايه على أسم واحد من أشهر و أهم رؤساء الولايات المتحده الأمريكيه فى القرن العشرين، و هو دوايت أيزنهاور، و اللى تولى رئاسة الولايات المتحده الأمريكيه لفترتين، من سنة 1953 لسنة 1961، و كان قبلها ضابط فى الجيش الأمريكى و أترقى لحد ما وصل لرتبة رئيس أركان الجيش الأمريكى، و بعدها أصبح رئيس لجامعة كولومبيا، لحد ما تولى رئاسة الولايات المتحده، و شارك فى الحربين العالميتين الأولى و الثانيه.

أشتهر أيزنهاور أثناء خدمته فى الجيش الأمريكى بقدرته الرهيبه على التخطيط، لدرجة أنه كان بيقدر يضع خطط تدريبات عسكريه لحوالى 50,000 جندى، لحد ما خرج من خدمه بعد 37 سنه فى الجيش، و بعدها سياسياً أصبح رئيس الحزب الجمهورى، و طبعاً بعدها تمكن من الوصول لمنصب الرئاسة.

أيزنهاور واحد من أكثر الرؤساء اللى كان عنده عشرات التحديات خلال فترة رئاسته، لأن العالم كان فى بداية مرحلة تغير كامل خلال الفتره اللى حكم فيها، لأن الحرب العالميه الثانيه كانت أنتهت قبلها بـ 8 سنين، بعد ما ألقى بتوابعها على العالم كله.

أيزنهاور بعد ولايته كرئيس، و تحديداً سنة 1954، ألقى خطاب أمام الجمعية الثانية لمجلس الكنائس العالمى، و فى كلمته أستوحى أيزنهاور جملة كان سمعها من ج. روسكو ميللر، الرئيس الـ 12 لجامعة نورث وسترن، و كانت بتقول: "I have two kinds of problems: the urgent and the important. The urgent are not important, and the important are never urgent" و ترجمتها: "لدى نوعان من المشاكل التى تواجهنى، الأمور العاجله ليست مهمه ، و الأمور المهمه ليست عاجله أبداً."


و من هنا بدأ أيزنهاور يرسخ لواحد من أهم عوامل نجاح أى فرد أو مؤسسه أو دوله، و هى أهمية إدارة الوقت، و أضاف أيزنهاور أن الشخص علشان يكون ناجح فعليه أنه يعمل فى حياته نوعين من الأشياء أو المهام، العاجله و المهمه.



اللمح "Under Pressure"

أستخدم أيزنهاور فكرته خلال فترة رئاسته للولايات المتحدة الأمريكية، من غير ما هو نفسه يضع قواعد المصفوفة التي أتسمت بأسمه، لكن كان هو الذي أرسى قواعدها، بس أيزنهاور بخبراته و مهاراته و عقله المنظم جداً، عدى بالولايات المتحدة الأمريكية من واحده أصعب فتره في تاريخها، لكن ده برضه يخلينا لسه نسال، مين الذي عمل المصفوفه دي؟

بعد عقود، و تحديداً في 1989، و في كتاب للكاتب ستيفن كوفي أسمه "The 7 Habits of Highly Effective People" أو العادات السبع للناس الأكثر فعالية، و ده أسم الترجمة العربية للكتاب، نشر لأول مره فكرة الرئيس أيزنهاور، لكن بعد ما حولها لمصفوفه أو لعبه، و سمياها زى ما قلنا The Eisenhower Matrix أو مصفوفة أيزنهاور، و من هنا بدأت شهرتها العالميه، و أصبحت أشهر مصفوفه في العالم لإدارة الوقت، زى بالضبط مصفوفة SWOT لعمل دراسات الجدوى، و تعال معانا نشوف الأول شكل المصفوفه، لكن عايزك في الأول تسأل نفسك سؤال مهم جداً، يا ترى أنت قادر تفرق في حياتك بين الأشياء أو المهام العاجله و المهمه؟





المصباح "Under Pressure"

بعد ما أخذت وقتك في التفكير، و بعد ما أكيد درست تصميم المصفوفه، تعال ندور علمياً على الفرق بين التعريفين: العاجل و الضروري.

عشرات المواقع شرحت الفرق بين الأثنين، أنا جمعتها كلها و أختصرتها في التعريفين اللى يعتبروا تقريباً ملخص كل ما كُتب في الفرق ما بين العاجل و المهم:

- الأشياء أو المهام العاجله: هي المهام التي تركز على اللحظة الحاليه، و يجب أنجازها في التو و اللحظه، و إذا لم يتم أنجازها بشكل فوري، ستكون العواقب أيضاً فوريه، و هي غالباً ترتبط بتحقيق أهداف لشخص أو جهة أخرى. هي أيضاً تمثل الأشياء التي غالباً ما ينصب تفكير المرء عليها، و التي تحتاج دائماً للتركيز فيها.
- الأشياء أو المهام الهامه: هي المهام المرتبطه بالأهداف متوسطة أو بعيدة المدى، و تكون غالباً ذات بعد استراتيجي للشخص وهي أشياء لا تحتاج للتنفيذ العاجل، و غالباً ما تكون جزء من تخطيط طويل الأمد للشخص ذاته، لتحقيق أهداف، سواء على المستوى الشخصي أو العملي.

التعريفين اللى لخصت فيهم كل ما قيل عن الفرق بين العاجل و المهم، نقدر نبدأ نحللهم واحد واحد، و نشوف النقط اللى أتكلم فيها كل تعريف، و خلونا نبدأ بالأشياء أو المهام العاجله:

- أول نقطه حنكتشفها من خلال الأسم، أنها أمور لازم تُنفذ في الحال، يعنى The time frame أو المدى الزمني بتاعها صغير جداً، و مفيش فيها فرصه للتأجيل.
- تاني نقطه بتقولها كل التعريفات أن تأجيل أو عدم تنفيذ الأشياء أو المهام دى بيكون له عواقب وخيمه.
- ثالث نقطه بتقول أن المستفيد من الأشياء أو المهام العاجله هما دائماً ناس تانيه، إنما أنت نفسك مش بتكون مستفيد، لكن مضطر لتنفيذ الأشياء أو المهام دى.



اللمح "Under Pressure"

- رابع نقطه إن الأشياء أو المهام العاجله دى، بتشغل جزء كبير من حيز تفكيرك، و غالباً بتُفقد القدرة على التركيز فى أمورك الحياتيه الأخرى لحد ما تقوم بتنفيذها.

ندخل على النقط اللى ممكن نستنتجها من التعريف التانى، و هو تعريف الأشياء أو المهام الهامه:

- أول نقطه حنكتشفها أن الأشياء أو الأمور دى غالباً مش بتكون طارئه أو محتاجه سرعة التنفيذ، بالعكس هى غالباً ما بتكون جزء من تخطيط على المدى الطويل.
- تانى نقطه بيوضحه لنا التعريف أنها عكس الأمور العاجله، الفايده أو العائد منها بيكون لصالح الشخص نفسه.
- ثالث نقطه بنكتشفها أن الشخص نفسه هو اللى بيقررها، مش مفروضه عليه زى الأشياء أو المهام العاجله.
- رابع نقطه أن الأشياء أو المهام المهمه بتكون لها أهداف إستراتيجيه للشخص، سواء على المستوى الشخصى أو على المستوى العملى.

طيب بعد ما أسهنا فى شرح الفرق بين المهام العاجله و المهام المهمه، و اللى هى الفكره اللى بُنيت عليها المصفوفه، خلونا نبدأ فى شرح المصفوفه -زى ما اللى فكر فيها ما سماها-، و اللعبه -زى ما أنا سميتها-، و حنشرحها من وجهتى نظر، الأولى وجهة النظر العلميه الإداريه -و هنا حنسميها مصفوفه- كألبيه لإدارة الوقت، و حنشرح فيها طريقه استخدام المصفوفه، و طريقه إستخراج نتائج تفيدك فى تنظيم وقتك. و التانيه حتكون شرحها من وجهة نظرى، و خصوصاً أنى شخص طبق المصفوفه دى على نفسه، و هنا حاسميها اللعبه، علشان هى فعلاً أصبحت بالنسبالى لعبه حياتيه.

البدايه طبعاً حتكون بالجزء العلمى الإدارى، و خلىنا سريعاً نبدأ نفهم أقسام المصفوفه الأربعة، و هما:



المربع الأول (أعلى اليمين): عاجل ومهم
 المربع الثاني (أسفل اليمين): عاجل، لكن ليس مهماً:
 المربع الثالث (أعلى اليسار): مهماً، لكنه ليس عاجلاً
 المربع الرابع (أسفل اليسار): ليس مهماً ولا عاجلاً

▪ المربع الأول (أعلى اليمين): عاجل ومهم:

و ده المربع اللى له الأهميه القصوى، لأنه بيضم كل المهام اللى محتاجه تاخذ كل اهتمامك اللحظى، و ده بيسمى مربع "أفعل"، و أفعل هنا معناها نفذ فى الحال، و حلالقى المهام دى تقريباً هى المهام اللى بتاخذ أغلب يومك، لأنها بتكون بتجمع بين صفتين، الأولى أهميتها بالنسبالك، و الثانیه قرب ميعاد الdeadline بتاعها.

من المهم جداً أنك أثناء أنشغالك بمهام تنتمى للمربع ده، أنك تحاول متشغلت نفسك بأعمال أخرى فى باقى المربعات، على الأقل لحد ما تخلص المهام دى، فلو حترتب أولوياتك، فلازم تكون لها الأولويه.

وأخيراً، لازم أوضح أن إبقاء المربع ده ملئ بالمهام، حيؤدى إلى كميّه كبيره ملهاش لازمه من المجهود، و فى النهايه الإرهاق البدنى، علشان كده حاول تعيد دائماً تقييمك فى المهام الموجوده فى المربع ده، و اللى ممكن نقلها لمربعات: ليست مهمه وعاجلة، أو: مهمه وليست عاجلة، علشان لو نجحت فى كده، حتقدر تخفف من الضغط النفسى و البدنى الواقع عليك.

مثال لبعض المهام اللى ممكن توضع فى المربع ده، لو عندك أمتحان قريب، فده شئ حيفيدك على المستوى الدراسى، و فى نفس الوقت له ميعاد محدد قريب، فعلىشان كده أصبح عاجل و مهم فى نفس الوقت.



المصعب "Under Pressure"

مثال تانى لو بتجهز لسفريه خاصه بشغلك، فده برضه ممكن يكون مفيد لك على الجانب الشخصى، علشان كده تعتبر السفرية "مهمه"، و فى نفس الوقت "عاجله" لأن لها ميعاد محدد لازم تلتزم بيه.

▪ المربع الثانى (أسفل اليمين): عاجل، لكن ليس مهمًا:

أحياناً المربع ده بيصنف على أنه الثانى، و أحياناً على أنه المربع الثالث، و اسمه "فوز"، و هو بيحتوى على المهام اللى محتاجه أهتمام فورى، لكن مش بالضرورة لازم تكون مفيده بالنسبه لك. و يمكن يبدو من غير المنطقي إعتبار مهمة حتقوفه بيها "عاجلة" و "غير مهمة" فى نفس الوقت، لكن من هنا بتيجى قوة المصفوفه بتاعتنا و أهميتها، و هى أنها بتخليك عندك القدره على إعادة تقييم المهام الخاصه بيك، و بالتالى ترتيب أولوياتك.

على سبيل المثال، كثير من الأشخاص -خصوصاً فى وظائف زى السكرتاريه- بتقضى وقت كبير جداً فى الرد على رسائل البريد الإلكتروني، أو بعض ملاحظات العملاء. لو قيمنا مهمه زى ده حنلاقيها ضروريه، و فى نفس الوقت أحياناً كثير بيكون الرد الفورى على العميل من أساسيات الوظيفه، إذن فهى لازم توصف بأنها "عاجله". لكن بالنسبه للشخص اللى بيقوم بيها "مش مهمه"، لأنها على المستوى الشخصى مش حتضيفله أى شئ، زى ما بيقال فى التعبير الشهير اللى لازم أعتذر عنه قبل ما أقوله Donkey work، لأنها بتكون من نوعية الشغل الروتينى اللى تقريباً بتعمله كل يوم و أنت ملزم بيه و مجبر عليه، لكن من غير أى عائد شخصى يُذكر بالنسبه لمنفذهها، أكثر من أنها من مهام العمل.

مثال تانى شخصى، أنك لازم تروح قسط مصاريف مدرسة الأولاد، و اللى لو مدفعتهاش فى ميعادها، الأولاد ممكن ميقدروش يروحوا المدرسه، أو على أضعف الأيمان ممكن يتعرضوا لمضايقات.

مثال تالت أنك لازم تروح السوبرماركت، و ممكن تقف نص ساعه فى أنتظار دورك فى قسم البقاله، و زيهم فى طابور الكاشير، لأنك لازم تجيب بقالة البيت، و لو مجبتهاش، مش حيكون فيه أكل فى البيت.



المعب "Under Pressure"

أمثلة العاجل في المربع ده كثيره جداً، و هي تقريباً بتشكل غالبية المهام اللى بنقوم بيها كلنا على مدار يومنا، بس حنسيب الكلام ده مؤقتاً لحد ما نوصل لآخر الفصل ده، في الجزء التحليلي اللى حنلخص فيه الموضوع ككل.

طيب نرجع لأسم المربع و هو "فوض"، و هي كلمه لها دلالات كبيره جداً، و معناها أنك تحاول قدر جهدك أنك تخلى شخص تانى ينوب عنك في المهام دى - طبعاً إذا قدرت-، لأنها مهام بتاخذ جزء كبير من وقتك، من غير ما تضيفلك أى عائد على المستوى الشخصى.

▪ المربع الثالث (أعلى اليسار): مهماً، لكنه ليس عاجلاً:

و ده المربع الثالث و أسمه "قرر"، لكن أحياناً بيعتبر المربع التانى، و ده اعتماداً على طريقة هيكلتك للمصروفه، و هو مخصص للمهام اللى حتفيدك في مستقبلك، و اللى حيكون لها دور كبير في تغيير حياتك بشكل أفضل، سواء على المستوى الأنسانى أو التعليمى أو الوظيفى، لكن أهم ما يميز مهام المربع ده، أنها مش مربوطه بأى مواعيد محدد، بمعنى أنك أنت اللى بتحدد لها الوقت تبعاً لظروفك.

في العاده المهام دى زى ما قلنا قبل كده، بتكون جزء من خطه طويله المدى، علشان كده أسم المربع "قرر"، و كلمه قرر هي كلمه مريحه جداً، بتديك السماح أنك تشوف الوقت المناسب لتنفيذ المهمه دى، لكن لازم تاخذ بالك أنك متأجلهاش لحد ما وقت أو أهمية المهمه أو الشئ ده تروح، أو أضعف الأيمان تتحول لمربع عاجل و مهم، فتضطر تنفذها تحت ضغط.

طبعاً أمثلة المهام في المربع ده كثيره جداً، زى الأقدام على خطوات حياتيه مهمه زى الزواج، أو قرارات السفر بمختلف أسبابها، أو دراسة لغة جديده، أو أنك تقرر بشكل عام تدرس أو تتعلم أى شئ جديده، أو حتى أنك تفكر تبدأ قناه أو Blog ليك على شبكة الأنترنت، أو ما شابه.

و لازم يكون في تفكيرك دايماً -زى ما أنا لسه قائل-، أن ممكن المهام دى تكون في البدايه مفتوحة الوقت، لكن التأخير فيها ممكن جداً يوصلنا لمرحلة ضغط الوقت،



المعب "Under Pressure"

و فيه حاجات كثير جداً لو متعملتش و أنت مرتاح نفسياً و عصبياً، حتفقدك كثير من شغفك بيها، لدرجة الوصول لمرحلة فقدان أهميتها ككل.

▪ المربع الرابع (أسفل اليسار): ليس مهمًا و لا عاجلاً:

وده المربع اللي أسمه "أحذف"، وهى بأختصار كل المهام اللي أنت محتاج ترميها فى ال Recycled bin أو سلة المهملات بتاعت حياتك، المهام اللي ملهاش أى فايده بالنسبالك، و للأسف كلنا بلا أستثناء بنعمل حاجات كثير جداً ملهاش أى لازمه و لا فايده، و بستنزف مننا وقت كبير جداً من حياتنا.

أهم ما يُميز المهام اللي حتُوضع فى المربع ده، أنها لو أتلغت من يومك أو من حياتك مش حيكون لها أى تأثير سلبي على حياتك، بالعكس تماماً ده ممكن يكون لإلغاءها تأثير إيجابي جداً، و مش حأضرب أى أمثال دلوقتي بالمهام اللي ممكن توضع فى المربع ده، و حأجلها لما أوصل للجزء التحليلي.

أوصل معاك للجزء التاني من شرحي لمصفوفة أيزنهاور أو مصفوفة الأولويات، و هنا حاسميها اللعبة، و فى الجزء ده حيكون تحليلي و اللي حيكون مبني على جزء علمي، و جزء كبير خبرات حياتيه و تجارب شخصيه، و كمان حيتبني على تجربتي الشخصية مع اللعبة دى، و اللي أنا سميتها بأسم واحده من أهم أغاني فريق "Queen" الأنجليزى الشهير، و هى "Under Pressure" أو "تحت ضغط". الجزء ده بالنسبالى هو الجزء الأهم فى الفصل ده، و اللي فيه الرساله اللي أنا عايز أوصلها من الموضوع كله.

أول حاجه و قبل ما تبدأ تستخدم لعبتنا دى، لازم تكون أولاً عندك القدره على التقييم لحاجتين مهمين جداً:

1. أنك تقدر تعمل حصر يومي -أو أضعف الأيمان أسبوعي- لكل حاجه بتقوم بيها أو بتبدل فيها مجهود، و الأهم عندى أنها تكون بتاخذ جزء من وقتك، اللي هو فى الحقيقه جزء من حياتك بيروح و مش بيرجع تانى.



المصعب "Under Pressure"

2. أنك وبمنتهى الحياديته تقدر تصنف كل الأشياء أو المهام دى لعاجل أو مهم، وده طبعاً تبعاً لأهميتها بالنسبالك أنت، مش بالنسبه لأى شخص تانى، و تراجع تقييمك ده مره و اتنين قبل ما تبدأ فى عملية ترتيب المهام دى فى اللعبه.

لما تكتب كل المهام اللى قمت بيها فى اللعبه، طبعاً حتلاقى فى مربع عنده عدد مهام أكثر من غيره، و هنا حتبدأ أنت شخصياً المرحلة الأهم، و هى أنك حتبدأ تقييم حياتك ماشيه فى أى اتجاه.

قبل ما أبدأ الجزء التحليلي، أحب أكد مره تانته أن جزء كبير من اللى حاقوله مبني على خبراتي الحياتيه و مشاهداتي، و تجربتي أنا الشخصيه فى تحليل حياتي من خلال المصفوفه أو اللعبه دى.

نبدأ مع بعض بأول مربع، و بدايةً، هو أصعب و أندر مربع ممكن حياة شخص تتواجد فيه، فلو لقيت أن معظم اللى بتعمله فى حياتك فى المربع الأول، و هو المربع الخاص بالمهام العاجله و الهامه فى نفس الوقت، فده ممكن يوصلنا لأكثر من تحليل، ممكن يكونوا عكس بعض، لكن كلهم بيؤدوا لنفس النتيجة، علشان كده حأطلب منك -لو كانت حياتك فعلاً فى المربع ده- تدور من بين النتائج دى على أنت مين بالضبط من الأختيارات اللى حاقولها دلوقتي:

1. أنك شخص طموحاتك كبيره جداً لدرجه مبالغ فيها، لدرجة أنك مش عايز تضيق أى فرصه متاحه، فممكن تكون بتمشى فى أكثر من سكه فى حياتك، و عامل لنفسك أكثر من Plan B أو خطه بديله، بس الطموح الزائد عن حده ممكن يكون طول الوقت عامل ضغط نفسى عليك، لأنك مدخل نفسك فى أكثر من مشروع فى وقت واحد.
2. أنك ممكن تكون شخص تايه و غير محدد الهدف، و دى فعلاً بلا حظها فى ناس كثير، و يمكن أنا نفسى وقعت فى الغلطه دى فى وقت ما فى حياتي، فعدم تحديد الأهداف بيخليك بتدخل نفسك فى تجارب كثيره طول الوقت، على أمل أن واحده فيهم تنجح فتكمل فيها، يعنى بمعنى أدق سايب الظروف هى اللى تحددلك مصيرك.



"Under Pressure" اللعب

3. أنك شخص بتأخذ قرارات، بس طول الوقت بتأجل تنفيذها، فتأخرك ده بيحولها تلقائى من المربع المريح، و هو مربع المهم الغير عاجل، لمربع المهم العاجل، لأنك أتأخرت فى التنفيذ، و بالتالى حتنفذ -زى ما قلنا قبل كده- و أنت دايماً تحت ضغط، و غالباً حتكون وصلت لمرحلة فقدان الشغف بالشئ اللى بتعمله.

طيب وجهة نظرى فى الناس اللى عايشه فى المربع ده -و هو مش أحسن مربع للحياه زى ما ممكن بعض الناس تعتقد- أنها هى اللى ظالمه نفسها بنفسها، أياً كان السبب، لأن ال 3 أسباب اللى أنا لسه قاييلهم كلهم بيمثلوا أخطاء واقعه من الشخص على نفسه.

الناس اللى عايشه فى المربع ده هى شخصيات طموحه، لكن بالتأكيد أنها كمان شخصيات قلقوه جداً، و قلقها متغلب على طموحها، فممكن يكونوا بيخافوا أن أى فرصه تضيع عليهم، مع أن أهم عنصر من عناصر النجاح هو تحديد الأهداف، و التركيز فى أختياراتك، لكن فى ناس كتير بتخاف من عواقب أى أختيار -حتى لو كان مبنى على دراسات مضبوطه-، بس أنا عايز أكاد أن هى دى الحياه، الحياه نفسها لعبه، فلازم تراهن على أختياراتك بكل قوه، طالما أنها مبيينه على دراسه، أما النجاح و الفشل، فنسبه مش قليله منه بتكون خارجه عن أطار قدراتنا، و أنا هنا بقول نسبه مش قليله، مش بقول أن كله بيكون خارج عن أطار قدراتنا.

فيا ريت إذا لقيت نفسك فى المربع ده، عيد حساباتك مع نفسك مره تانيه، دور على الغلط اللى مخليك تحت الضغط طول الوقت، بالرغم من أنك من الواضح أنك شخص طموح، و أبدأ مره تانيه فى إعادة أولوياتك على أرض الواقع، أدرس كل خططك المستقبلية بشكل علمى، و متخافش من النتائج، خصوصاً الجزء اللى مش فى أيديك، لأنه وارد يحصل مع أى أختيار تانى.

نكمل مع تانى مربع، و هو مربع المظلومين حياتياً، و هو تبعاً لكل التقييمات أسوأ مربع ممكن شخص يعيش فيه، و هو المربع الخاص بالمهام العاجله و غير المهمه، و المربع ده مع المربع الأخير هما سبب كتابتى للفصل ده، لأن المربع ده تحديدأ هو المربع اللى عايش فيه الغالبية العظمى من الناس، أياً كانت الأسباب، لكن هو



بالفعل بيمثل حال المصريين و بعض الشعوب العربيه الأخرى، طيب أيه أسباب أنك ممكن تكون حياتك كلها في المربع ده:

1. أولاً ممكن تكون أسباب خارجه عن إرادتك، بمعنى أنك تكون شخص شايل على كتفك مسئولية ناس تانيه طول الوقت، و دى بتكون الحاله الأنسانيه في المربع ده، أنك شخص مُحمل بمسئوليات مش بتاعتك، فغالباً مش بيكون عندك وقت للتفكير في نفسك و مستقبلك، إذن فأنت شخص بيدور في ساقيه أبعديه من المهام الغير مهمه خالص بالنسبالك، لكن في نفس الوقت هي مهمه و ضروريه للأخر، زى مشاوير المستشفيات و تخليص الأوراق الحكوميه...إلخ.
2. تانى سبب أنك ممكن تكون شخص لا تتصف بالشخصيه القياديه و معندكش طموح، فأنت متحامى طول الوقت في شخص أو في وظيفه هي اللي بتضمنلك الأمان، فأنت حياتك كلها بتدور في فلك الشخص أو الوظيفه دى، و لاغى كل طموحك تماماً، بكره ده مش في بالك خالص، بتعيش اليوم بيومه، و دى فعلاً بالنسبالى هي المشكله الحقيقيه الأولى اللي بتظهرها اللعبه، الناس اللي عايشه بلا طموح في ظل أمان زائف، لو راح ممكن حياة الأشخاص دى تتدمر تماماً.
3. ثالث سبب سوء التنظيم في تقدير الأمور -خاصةً المالىه- خصوصاً في بلدانا العربيه، لأن مثلاً في أغلب دول العالم شراء عربيه أو موبايل على الإمكانيات شئ بسيط جداً، و لا يُمثل أى نوع من العبء على المواطن هناك ، لأن متوسط دخله مقارنةً بسعر الحاجات دى أعلى بكثير، يعنى في الدول دى الشئ الوحيد اللي بيضلع الناس فعلاً هو شراء المنازل، أما باقي الحاجات فشرها سهل جداً. بالنسبه لنا في دولنا فده شئ مش موجود على أرض الواقع، و كل حاجه شرها مُضلع مادياً.

فمع ظهور فكرة التقسيط -و اللي مكنتش موجوده قبل كده- من حوالى 15 سنه تقريباً أو يمكن أكثر-، و الشركات و البنوك اللي بتسلفك، فأصبح كثير من الناس شايفه أن ده حل كويس جداً، و كمان ممكن يتيح لها أنها تجيب حاجات هي فعلاً أعلى من قدراتها الماديه بكثير، و يمكن كمان



اللمح "Under Pressure"

تكون مش ضروريه في حياتها، وأنا خصيت بالذكر سلعتين، سلعه عاليه التمن زى العربيات، و سلعه متوسطه التمن زى الموبيلات، فالعبء المادى الزيادة الى الناس بتعمله على نفسها، بيتحول لنوع من العبء الحياتي، الى بيتحول أنك حتقبل تعمل أى لتزويد دخلك.

أحب أوضح أن سوء التنظيم ممكن كمان يتمثل في حاجات كثير جداً بتضغط عليك و على وقتك -مش بس الفلوس، يعني سوء تنظيم وقتك بيتحول لعنصر ضغط، أنك تعمل حاجات ملهاش لازمه بيضغط على وقت الحاجات الى لها لازمه، وهكذا.

وجهة نظرى الأخيره في الناس الى عايشه في المربع ده -و هو أسوأ مربع نفسياً ممكن أى أنسان يعيش فيه- أنها شخصيات عايشه بلا تفكير، مضغطه طول الوقت بلا أى سبب و بلا فائده تذكر، محتاجه ثوره حقيقيه علشان تخرج من اللي هي فيه، هما عايشين عبيد طول الوقت، سواء لشخص أو وظيفه أو لشيء، و ده سواء كانت الظروف هي اللي ظالمهم -زى في الحاله الأولى-، أو هما اللي ظالمين نفسهم -زى في الحاليتين التانيه و الثالثه-، لكن حتى لو كانوا من الحاله الأولى، فمحتاجين يشوفوا نفسهم، يفكروا في مستقبلهم، يوازنوا ما بين المسئوليات الى عليهم و طموحاتهم، لأن منظومتنا أو لعبتنا قائمه على مبدأ قدرتك على تقييم كل اللي بتقوم بيه على مدار يومك، علشان تقدر تدير وقتك بنجاح، و تحقق أقصى أستفاده من حياتك -أيأ كان طولها-.

أنا عارف أن الناس الى عايشه في المربع ده هي أصعب ناس ممكن الواحد يطلب منهم التغيير، و ده علشان نكون على أرض الواقع و مبيقاش كلامي نظري، لكن زى ما قلت أكثر من مره في الكتاب ده، أنا مش جاي علشان أقولك أن الحياه حلوه، لكن بحاول معاك أننا نفكر في الخروج بأقل الخسائر، من الحياه اللي أحنا مجبرين نعيشها، فحاول تساعد نفسك لأن الزمن مش مضمون، و أعتقد التجارب اللي مر بيها العالم في الكام سنه الى فاتوا، بياكدولك أنك متقدرش تركز على شئ و تقول أن هو ده الأمان، و لا أنك تسبب ظروفك هي اللي تمشيلك حياتك.



المصباح "Under Pressure"

نوصل لتالت مربع و هو مربع البهوات، هو المربع الخاص بالمهام الغير العاجله و الهامه في نفس الوقت، و ده المربع اللي مش حأنكلم فيه خالص، لأن ده مربع البيوتوبيا، محتاج لناس مقتدره مالياً، مسئولياتها العاجله الغير هامه قادره تحولها على ناس تانيه تقوم بيها، فالنوعيه دى من الناس أكيد مش هي اللي حتهتم تقرأ الكتاب ده، و لا هما أصلاً محتاجين منى أى نصيحه، ده أنا اللي المفروض أخذ منهم النصيحه.

نتنهى برابع مربع، و هو المربع الكارثي بكل ما تحمله الكلمه من معنى، و للأسف في ناس كثير جداً عايشه فيه، و هو المربع الخاص بالمهام الغير العاجله و الغير الهامه في نفس الوقت، المربع اللي أسمى "أحذف"، لكن ال Recycled bin أو سلة مهملات الناس اللي عايشه فيه مش بتفضى أبداً، المربع ده نقدر نسميه مربع الضياع، مربع التيه، و للأسف أن أغلب الناس اللي عايشه حياتها فيه هما من الشباب.

طيب أيه أهم مظاهر المربع ده؟ أهم مظاهره بكل تأكيد أن الشخص اللي عايش فيه هو شخص بيضيع وقت، سواء ده كان ناتج عن حالة أحباط أو حالة لا مبالاه أو حتى حالة جهل. النوع ده من الأشخاص هو اللي حتشوفوا ماسك الموبايل طول الوقت على صفحات التواصل الاجتماعي بس، أو بيعمل فيديوهات تافهه بتقلل من قيمته، و طبعاً مش بيكون لها عائد مادي على كثير من ال Applications، أو هما الناس اللي نص حياتها الليلى أما على القهوه أو الكافيهات أو على ال PlayStation، أو الناس اللي حتلاقيها نايمه أغلب الوقت.

الكارثة بجد بالنسبالي، أن أغلب الناس دى -إن مكنش كلهم- من الشباب اللي مفروض في مرحلة التخطيط لمستقبله، لكن زى ما قلت من كام فقره، أن أياً كانت الأسباب فالنتيجه كارثيه، و ده هو المهم.

أنا مش حاكتب أى نصايح أو توجيهات في الجزء ده للناس اللي عايشه في مربع أربعه، لأن كثير من فصول الكتاب حتوصل للي أنا عايز أوصله، فلا داعي لتكرار نفس الكلام.



"Under Pressure" اللعبه

في النهايه فيه كلمه أخيره أحب أقولها، أنك لازم تجرب تقييم حياتك من خلال مصفوفه أيزنهاور أو مصفوفه الأولويات، أعتبرها لعبه زي ما أنا أعتبرتها، و على فكره حتلاقيها كApplication على Google play أو App store، أكتشف حياتك من خلالها، محدش حيقدر على ده غيرك، قيم حياتك، و لما تشوف النتائج بنفسك خد قرارك بشجاعه، و لو أكتشفت أنك محتاج تعيد حساباتك، عيدها و متخافش، عندك دائماً الفرصه تصلح مسار حياتك، أو حتى أنك في أى لحظه تبدأ من جديد.

24 فبراير 2023



ما بيننا "أسمعني أنا" و نظريتي المزامرة"

"هل حقاً نحن مستهدفون ؟
لماذا نشعر بتلك الحالة من الظلم طوال
الوقت؟"



"عن الإنسان في اللد زمكان"

ما بين "أشمعني أنا" ونظرية المؤامرة"

ما بين "أشمعني أنا" و "نظرية المؤامرة"

بنى الوحيدة كانت بتدرس لحد Grade 9، أو ما يوازي الصف الثالث الأعدادى، فى مدرسة ألمانيه فى مصر. المدرسه مش معروفه قوى لأنها كانت جديده، مكملتش 5 سنين، عكس المدارس الألمانيه القديمه اللي أغلب الناس عارفينها، طبعاً متستغربش أزاى 5 سنين وهى فى Grade 9. الأجابه ببساطه لأن الكل -و الكل هنا تعنى كل الطلبة اللي دخلت المدرسه الجديده- كانوا فى مدرسه ثانيه قبلها، بس المدرسه مكملتش و قفلت.

المدرسه الجديده كان لها ميزه فى غاية الأهميه ميزتها بالنسبالى عن كل المدارس الألمانيه الثانيه الموجوده فى مصر، وهى أنها كانت جزء من سلسله مدارس موجوده فى أماكن كتير فى العالم، ما بينها فرعين فى ألمانيا.

الميزه دى أتاحت الفرصه لبعض الطلبة اللي كانوا فى الدفعات اللي قبلها، أنهم يكملوا فى واحد من الفرعين اللي فى ألمانيا، و اللي بيتميز أن فيه أقامه داخلى، و تحت إشراف كامل من المدرسه. باختصار هى مدرسه عاديه بس فيها قسم داخلى للمغتربين.

بدايةً من Grade 8 بدأت أخذ قرارى أنى لازم أسفرها تكمل آخر 3 سنين دراسيه هناك، لأنها فرصه و تجربه حياتيه لا تُعوض، و على أمل أن ده يتيح لها فرصة أنها تكمل دراستها الجامعيه هناك بشكل أفضل من لوجت من مصر.

طبعاً وجدت صعوبه بالغه فى إقناع والدتها بالمبدأ، لكن كانت فكرة أنى سفرتها 3 مرات قبل كده مع المدرسه لألمانيا وهى فى مراحل عمرية أصغر، و أنها تأقلمت جداً هناك، فده كان من عوامل ضغطى و أفناعى لها، أما بنى، فطبعاً كان الموضوع بالنسبالها حلم كبير جداً.

المهم، بعث كل ما أملك حرفياً علشان أخليها تدرس الـ 3 سنين الأخيره من مرحلة التعليم العالى فى ألمانيا، و كان معاها من زملاء الفصل ولدين و بنت كمان، كلهم



ما بين "اشمغونج أنا" و نظريته المراسم"

سافروا مع بعض في تجربه جديده تماماً عليهم، و كلهم في سن ما بين ال14 و ال15، للحياه داخل مدرسه داخلى في ألمانيا.

المدرسه -زى ما سبق و قلت-، كان لها فروع في أماكن كثير من العالم، فطبعاً أكيد حتتوقع معايا أن في القسم الداخلى حيكون فيه طلبه من جنسيات كثير مختلفه، و ده كان حقيقى تماماً، التنوع هناك كان فريد من نوعه فعلاً، و ده زود تجربه ثراء بشكل كبير، و اللى خلانى أكثر سعادته، أن مديرة المدرسه الرائعه اللى كانت موجوده في فرع مصر لحد آخر سنه لبنتي فيها، هى اللى أصبحت مديرة المدرسه اللى فيها فرع داخلى في ألمانيا، فكانت عارفه كويس جداً بنتى و باقى زميلها، و دى كانت من عوامل الأمان المهمه جداً، سواء بالنسبالنا كأولياء أمور، أو طبعاً بالنسبه للطلبه نفسهم.

طيب أنا بحكى القصه الطويله الخاصه دى ليه؟ لأن من لحظه وصول بنتى و بدء الدراسه، بدأت أفاجئ بكلام غريب منها، حتى مكنتش متوعد عليه في مصر. بدأ الموضوع بفكرة أن في عنصريه شديده تجاهم كمصريين، و أن المشرفات بيعاملوهم معاملة مش كويسه، مش زى باقى الجنسيات، و دى كانت نقطه أنا أستغربتلها جداً، لأن المدرسه قايمه على التنوع العرقى، و ده واحد من أهم مبادئها، و أن الفرع الموجود في ألمانيا، و اللى فيه القسم الداخلى، معمول علشان الهدف ده، علشان أى طالب في أى فرع تانى في العالم عايز يكمل، طبعاً أكيد كان فيه طلبه ألمان، لكن كان تقريباً نص المدرسه من الطلبه الوافدين.

بدأت أستغرب أكثر لما الموضوع بعد فتره تحول من الشكوى من المشرفات في أماكن الأقامه، للشكوى من بعض المدرسات في المدرسه نفسها، و هنا تحول الموضوع من إضطهاد جماعى بالنسبه لبنتى في الحاله الأولى، لأستقصاد فردى، بمعنى أن بعض المدرسات مستقصدينها، و أنها مهمما بتعمل، مش بيدوها درجات كويسه، و..... و..... و.....

في اللحظه دى بدأت أركز كويس جداً مع تصرفات بنتى و زميلها، بالرغم من أنى كنت في مصر، و بالرغم من أن طول السنين اللى هى قضتها هناك، عمرى لا أنا و لا والدتها رحنا المدرسه في ألمانيا، حتى المره الوحيده اللى رحت فيها ألمانيا كانت هى



ما بين "أشمعني أنا" و نظريته المأزره"

في أجازته في مصر. بدأت أتابع كل سلوكياتهم و أفهم الخلل فين، سواء فيها أو في زمائليها الى أنا عارفيهم كلهم من KG1، علشان أعرف أقيم أيه أسباب الشكوى المستمره دى.

السبب ببساطه ناتج من البيئه اللي كلنا أتربينا فيها كلنا، البيئه اللي كنت أتكلمت عنها في الفصل اللي سميته "No Signal"، و اللي بتخلينا طول الوقت عندنا مشكلتين أبدتين، الأولى اللي سبق و ذكرتها في فصل "No Signal" و هي فكرة عدم قبولنا على الأطلاق الاعتراف بمبدأ أننا ممكن نكون غلطانين في أى حازه طول الوقت.

أحنا -سواء في مصر أو أى مجتمع مشابه- مبنغلطش، دايماً الأخر هو اللي غلطان، إنما أحنا دايماً عاملين الصح، بس طول الوقت مش بنعرف ليه بالرغم من أننا عاملين كل حازه صح، زى ما بنتي أو أى حد تانى بيتهيأله، لكن الأخر مش ببشوف الصح ده. بالعكس ده بيغلطنا، و أحياناً بيحاسبنا، و هنا بتظهر المشكله التانيه اللي أنا حأتكلم عنها في الفصل ده، و هي "عقدة الأضطهاد"، و فكرة "أشمعني أنا"، و الأعتقاد الدائم أما أن الأخر بيميز الناس التانيين عنك، أو أنه رفضك و كرهك لسبب أنت مش قادر تفهمه.

قبل ما أخوض في الكلام عن فكرة عقدة الأضطهاد خليني أحكى عن تجربتي الشخصيه بسرعه، أنا في مرحلة ما بعد الكليه على طول، غيرت المكاتب اللي كنت بأشتغل فيها أكثر من مره، خلال حوالى أربع سنين، و كنت بأعتقد في أحيان كثيره بعد ما باسبب مكتب منهم، بأني تم أضطهادى و أنى أتظلمت، و أن في تفضيل تم لناس تانيه عليا.

لكن من بعد مرحله معينه في حياتي، لما بدأت أعيد حساباتي في كل مرحله اللي فاتت، و الأهم، أنى بدأت أشوف نفس المشاكل من وجهة نظر صاحب العمل، فهمت قد أيه أنا كنت غلطان، بدأت أفهم أن تقييم أى شخص لأى شى مشترك بينه و بين الأخرين في الحياه، لازم يكون له معايير حاكمه يشوفها الطرفين من نفس المنظور، مش كل طرف يحكم على الأمور من وجهة نظره.



ما بيننا "اشمئزازنا" ونظريتنا المراسمة"

طبعاً أنا مش بأقول أن الأضطهاد مش موجود، لأ هو موجود و بشده، بس أنت تقدر تحكم على رأى الطرف الأخر إذا كان صح و لا إضطهاد بسهولة جداً، لو قدرت ترجع لنقطتين. الأولى المعايير الحاكمه اللى بتحكم العلاقه بينكم، و الثانیه هى فكرة وجود مصالح شخصيه خاصه بالطرف التانى و مدى تأثيرها، و ده حقيقى جداً، و موجود فى مجتمعاتنا و بشده، فكرة أن فيه أمور كتير مش بئدار بالمعايير، لكن بئدار بالمصالح الشخصيه. و هنا بتظهر فكرة إضطهاد أو ظلم أى شخص بيبجى على المصالح الشخصيه دى.

أرجع معاك لتجربة بنتى و زميلها، و نحاول مع بعض نناقش أياه كانت نوعيه مشاكلهم. فى البدايه سواء هى أو زميلها، أو أى طالب مصرى تانى هناك، فهو أو هى بالرغم من دراستهم فى مدرسه ألمانيه فى مصر من الصغر، إلا أنهم فى بيوتهم أتربوا على العقليه و السلوكيات المصريه، و ده شئ أنا لمستته بنفسى، فلما سافروا فى السن الصغير ده، أصطدموا بالعقلية الألمانية المنظمه جداً، و اللى هما مش متعودين عليها، فكانت فيه مشاكل كتير من نوعيه أن الأكل بمواعيد، أن دخول الغرف بمواعيد، أنك مينفعش تكون نايم وقت المدرسه، و دى كانت نقطه كلهم بيشتكوا منها، لأن فى آخر سنتين مكنش نظام يوم دراسى، لكن حسب المواد اللى الطالب مختارها بتكون مواعيد حصصه، فطبعاً أولادنا مكنوش فاهمين أن فى ألمانيا عيب طالب يكون نايم للساعه 11، حتى لو مكنش عنده حصص، و للأسف كنت بسمع من الأولاد دايماً فكرة أن ده تدخل فى الحريه الشخصيه، .

إذن فالفكره مكنتش أضطهاد أو تدخل فى حريه شخصيه، لكن فكرة نظام مؤسسى المدرسه ماشيه عليه، مينفعش يتم الأخلال بيه، لأن المبدأ هنا بيكون أنك لو سمحت لطالب واحد، فأنت مجبر تسمح لكل الطلبة، و ده طبعاً مينفعش، فهنا الأولاد مكنوش قادرين يستوعبوا أن فيه معايير بتحكم المكان، لازم الطرفين يلتزموا بيها.

خلينى أكملك باقى الحكايه، بنتى خلصت المدرسه من سنه و نص بالضبط، و من ساعتها مش عارف أسفرها هناك للجامعه، بسبب تراجع سعر الجنيه، لحد ما وصل



ما بين "اشمغوني أنا" و نظريه المؤامرة"

وقت كتاباتي دلوقتي لما يوازي تلت قيمته من سنه و نص، فأى حسابات كنت حاسبها وقتها مبقتش تنفع، ده غير صعوبة توفير اليورو أو أى عمله تانيه من مصر حالياً، و اللى أنا كنت محتاجهم كمصاريف تقديم، فهي أضطرت تقعد في مصر، و مؤقتاً دخلت كلية في مصر، و بندور أنا و هي من ساعتها على Scholarship أو ما شابه للسفر و الرجوع مره تانيه لألمانيا.

وجودها في مصر حول المشكله للعكس، لأنها بعد 3 سنين رجعت مشبعه بالنظام الحياتي الألماني، فأصبح بالنسبالها نمط الحياه في مصر غريب جداً، و هنا بتظهر عقدة الأضطهاد للمره التانيه، لأنها أصبحت بتقييم الأمور من وجهة نظر مختلفه عن اللى بيتم التقييم بيها في مصر، و من هنا رجعنا تاني لعقدة الأضطهاد و أن محدش فاهمها أو بيقيمها صح، لأنها ببساطه مرجعتش للمعايير المصريه في إدارتها للأمر، لكن طبعا شتان الفارق بين المعايير الألمانيه في الإدارة -حتى لو كان فيها بعض الأخطاء-، و معايير ألا معايير اللى عندنا، لكن حتى معايير ألا معايير لازم تتاخذ في الحسب، علشان تكون قادر تفهم عقلية المجتمع اللى أنت بتتعامل معاها.

خليني أبدأ معاك تحليل الفكره مع بعض من منظور أشمل، من فكرة عقدة الظلم و الأضطهاد اللى أحنأ طول الوقت بنستخدمها كشماعه لكثير من مشاكلنا في التجاوب و التأقلم مع القوانين الحاكمه لأى حاجه، أو مع المعايير المفترض أننا نمشي عليها أو نتبعها.

من تجارب حياتي السابقه كانت مهنة التدريس، أولاً لأني بعشقها، لأن متعة أنك تشارك العلم اللى عندك للآخرين، بجد متعه ما بعدها متعه. وقتها أنا كنت ماشي على قاعده أن مفيش طالب يدخل بعد الميعاد بأكثر من 10 دقائق، و أعتقد أن ده زمن كافي جداً للتأخير، لأني كنت بأضطر أنتظر الـ 10 دقائق دى علشان أبدأ. كان فيه طالب لازم ييجي كل مره بعد الـ 10 دقائق، و أحياناً بتوصل لنص ساعه. فوتله مره و أتنين، لكن بعد كده أصريت على عدم دخوله. طبعا هو أعتبر أن ده نوع من الأضطهاد الشخصي له، و أشتكى أكثر من مره، لكن كان أصراري على احترام المبادئ



ما بين "أسمعني أنا" و "ظريخ المزارع"

اللى أتفقنا عليها، و اللى محدش يقدر يغلطها، بيخلى كل الناس اللى كانت بتطلب منى أنى أسمحله يدخل تسكت تماماً.

مبدأ وجود معايير هو شىء من أساسيات الحياه على كوكب الأرض، و هى الأديان أياه غير مجموعه من المعايير الحاكمه اللى بتنظم التعامل بين الناس، و زيها القوانين، و ده اللى بيسهل تحديد الغلط أو مين المذنب.

فى الصين مؤخراً وصلوا لمرحلة من تنظيم المعايير لدرجه أنا بعتبرها لا أنسانيه، و كنت عملت عنها حلقة كامله فى واحد من البرنامج اللى عملتها على قناتي على الـ Youtube، و هى فكرة أن الناس مراقبه بكاميرات طول الوقت، و إن الـ AI أو الذكاء الأصطناعى، بيقدر يميز الشخص عن طريق وجهه، حتى لو كان ماشى بين ألف شخص. الفكره قايمه على أن كل مواطن صيني له رصيده أجتماعى زى رصيده فى البنك، أو زى نظام النقاط فى قيادة السيارات، و الموجود فى بعض الدول.

المواطن الصينى اللى الكاميرا بتضبطه بيعمل أى غلطه، زى مثلاً أنه رمى ورقه فى الشارع، أو اللى بيتم الإبلاغ عنه و بتتأكد صحة البلاغ، زى مثلاً أنه كان معلى التلفزيون فى بيته و عامل إزعاج للجيران، بيتم الخصم من رصيده الأجتماعى ده، لدرجة أن فيه مواطن أتمنع من السفر بالطياره لأن رصيده لايسمح، الكلام ده بجد و أنا شفته فى أحد البرامج. ممكن كمان رصيد المواطن ده يمنعه من الزواج، تخيل.

بالرغم من قسوة النظام المُطبق فى الصين، و اللى أقدر أعتبره أنه لا إنسانى، لكن هنا النظام و المعايير أصبحوا مش محل نقاش، مفيش حد حيقول أنا مُضطهد أو أتظلمت. أولاً لأن حياة الناس كلها متراقبه بالكاميرات، فالأثبات موجود و متوثق. ثانياً لأن اللى بيقيمك هو الـ AI أو الذكاء الأصطناعى و مش عنصر بشرى ممكن يتحيز أو يظلم أو يجمال. ثالثاً لأنك تقدر تشتكى، بس قبل ما تشتكى لازم تكون متأكد أنك على حق، لأن كل حاجه بتعملها محسوبه عليك.



ما بين "اشمغف انا" و نظريه المزاره"

أدخل معاك لسبب تانى للشعور المزمّن بالظلم و الأضطهاد فى منتهى الأهميه و الخطوره، سبب متجذر فى كل شعوبنا العربيه من بدايات ظهور الحضاره فيها، لحد ما أصبح هو السلوك الحاكم لكل تصرفاتنا

عايزك تجرب معايا تجربه بسيطه جداً و أنت فى الشارع، سواء ماشى، سايق أو راكب أى مواصله، و حاول تصور أو تكتب كل الجمل اللى حتصادفك مكتوبه على الميكروباصات و أحياناً التاكسيات. النتيجة اللى حتوصلها أن 90% من الجمل المكتوبه، و اللى حقيقى بتُعبّر عن ثقافة السائق، و ثقافة الشعب بشكل عام، كلها بتدور حوالين مواضيع موحدّه، و هى المظلوميه، الحسد، غدر الأصحاب، الخيانه، الهجر، دايماً الفكره أن الأخر هو اللى وحش، و أن الشخص اللى الكلام على لسانه مظلوم، مفعول بيه طول الوقت، كأن إرادته مسلوبه، أو ملوش أى دور.

الفكره دى بدأت فى الغنا المصرى و العربى من بداياته الحديثه، بدايةً من أبو الأغنيه المصريه سيد درويش، مروراً بعبد الوهاب فى أغانى زى "الأ مش أنا اللى أشكى"، لعبد الحلیم صاحب أكبر قدر من البكائيات زى "تخونوه"، وصولاً لأليسا، أكثر مطربه غنت أغانى فيها شكوى و مظلوميه.

الفكره ده أتقل و بقوه مع الأغنيه الشعبيه الحديثه و أغانى المهرجانات، اللى أصبحت المعانى دى هى الأساس لأى أغنيه، إستحاله تلاقى أغنيه فيها حد بيشكر فى حد، الموضوع كله شكوى و ظلم و خيانه،.... نفس الكلام الموجود على ظهر أى ميكروباص، طيب ليه.

ببساطه لأننا كعرب بشكل عام، و كمصريين بشكل خاص، الخنوع ثم الشكوى جزء من تركيبتنا الشخصيه، بدايةً، زى ما سبق و قلت، من بدايات الحضاره فى دولنا كلها. الأهرامات و المعابد الضخمه سواء فى مصر أو العراق أو اليمن، المقابر المبينه تحت الأرض بأكثر من 5 متر، القصور الضخمه، كلها آثار رائعه، لكنها أتبتت بالظلم و الأضطهاد، كل الآثار اللى بنشوفها، كانت كلها لشخص واحد و من يتبعه، كل الشعب ببينيله. هل عمرنا شفنا أثر لبيت شخص عادى عاش فى مصر القديمه؟ فيه بس هي مجرد بعض الآثار البسيطه، و كل اللى فيها لا يُذكر، غير برضه أنها كانت تخص الفئه المقربه من الحاكم.



ما بين "اشمعه أنا" و نظريه الزاوية"

شعوبنا قبلت ده من البدايه، بالرغم من أنها كانت بتشتكى بينها و بين نفسها، درجة أن الشعب المصرى لما جاتله فرصة أنه يختار حاكمه لأول مره بعد أكثر من 2100 سنه أو يزيد من حكم أمبراطوريات و ممالك أخرى له، أختار ممثلى الشعب محمد على اللى جاى من ألبانيا، لعدم ثقة كبار أو ممثلى الشعب فى أنفسهم.

بأختصار جزء من ثقافتنا الأصيلة هى التبعية للأخر، بنخاف دايماً أننا نكون أصحاب قرار، فده بيخلينا طول الوقت عايزين نمشى جنب الحيط، عن طريق أننا نكون تابعين، طيب ده أيه علاقته بفكرة الظلم و الأضطهاد.

علاقته ببساطه أننا من الأول بنختار الأختيار الأسهل بفكرة التبعية، بفكرة أننا مش أحنا اللى بنسن القوانين اللى تناسبنا، لكن تبعيتنا بتخلينا نرتضى بقانون الأخر، لكن بيننا و بين نفسنا بنشتكى، لكنها شكاوى و أحاسيس بالمظلومية لا بتقدم و لا بتأخر. المبدأ ده أتنقل لكل تفاصيل الحياه، و اللى وصلنا لكل اللى بنقرأه على ظهر الميكروباصات، أو اللى بتسمعه فى الأغاني و المهرجانات، و هى الشكاوى من الأخر طول الوقت، أنت مفعول بيه طول الوقت، أنت اللى بتتظلم و تتخان و أصحابك أو حبيبتك بتسيبك، أو الناس بتحسدك، المهم أنك مظلوم و ملكش لا يد و لا حيله طول الوقت. الغريب أن النوعيه دى من الأغاني هى الأكثر أنتشاراً، اللى الناس من كل الأعمار بتحبها، اللى دايماً بيتقال عليها "بتلمس على الوجع".

سبب تالت مش حأتكلم فيه كثير، لأنى أعتقد أنه شارح نفسه، و مش محتاج كلام كثير، و هو أنك تكون فعلاً مُخطأ أو مُقصر، لكن أنت مش قادر تقنتع أو تصدق الفكره، أنك تكون مقنع نفسك طول الوقت أنك عامل اللى عليك، بس أنت مُضطهد، ببساطه، أنك تكون بتضحك على نفسك علشان أنت مش قادر تعمل المطلوب منك بالشكل الصح، و طبعاً زى المبدأ اللى قلته أكثر من مره فى الكتاب ده، و هو أن مفيش حد فى بلادنا بيكون غلطان أبداً، فالغلط اللى بيتقالك عليه، بتحوله أنت لفكرة أنك مُضطهد، و أنك بتتظلم طول الوقت.

السبب الأهم اللى عايز أذكره، و اللى خارج من رحم السبب السابق، هو أن فيه نوع من الخطأ الشخصى، اللى ممكن ميكونش له علاقه مباشره بالشغل، لكن هو



ما بينح "اشمغف انا" و نظريه المؤامرة"

بيأثر عليه بشكل غير مباشر، لأن له علاقه بطبيعة شخصيتك، و ممكن يكون مدى تأثيره أكبر كمان من الأسباب الشخصيه، و خليني أضرب مثال شهير جداً في مجال كرة القدم في مصر، يمكن أنت تكون عارفه أو فاكروه.

لا خلاف على أن الكابتن حسام حسن واحد من أفضل -إن مكنش الأفضل- المديرين الفنيين في مصر، علشان كده في كل مره بيتم تغيير مدرب المنتخب المصرى، بيتم طرح أسم الكابتن حسام حسن، و ده على اختلاف كل إدارات إتحاد كرة القدم في مصر. لكن في كل مره لا يتم اختياره. بعدها ببدا الكابتن حسام بإطلاق تصريحاته بأنه مُضطهد، و أن فيه مؤامره عليه، و كل اللى بنسمعه مع كل عدم اختيار بيتم. طيب يا ترى ليه مش بيتم اختيار الكابتن حسن كل مره، بالرغم من كفاءته، و أنه بيكون دايماً أحسن المرشحين فنياً؟

الأسباب في منتهى البساطه تتلخص في نقطتين. الأولى هي عصبية الكابتن حسام المفرطه، و اللى بتوصل بيه لمستويات غير مطلوبه، فالعصبية دى مش مطلوبه في أى شخصيه قياديه، لأنها ممكن بسهولة تنتقل للاعبين، و ده شىء مش مطلوب على الإطلاق في كرة القدم، لأنها حتخرج اللاعب عن تركيزه في المباراه، و طبعاً من قبله المدرب.

ثانى نقطه تتمثل في إصرار الكابتن حسام الدائم على أن الكابتن إبراهيم حسن توأمه يكون هو مدير الكره معاه، و الكابتن إبراهيم في الأساس هو أكثر عصبية من الكابتن حسام بمراحل، و بما أن مدير الكره ده يُفترض أنه بيكون واجهه الفريق، و بالتالى واجهه لمصر، فده ممكن يسبب بعض المشاكل اللى ممكن توصل بالفعل لمشاكل دبلوماسيه، و ده بالفعل سبب تم ذكره عن الكابتن إبراهيم حسن.

إذا فأصرار الكابتن حسام على وجود توأمه الكابتن إبراهيم معاه، و ده في الحقيقه شرط مينفعش يتقال، لأن عمر ما المدير الفني بيختار مدير الكره، فالكابتن حسام بيضيع على نفسه كل مره الفرصه بشكل أكبر، بسبب إصراره على تواجد الكابتن إبراهيم، ناهيك طبعاً -زى ما ذكرت- عن عصبية الكابتن حسام نفسه.

هنا في الحاله دى الكابتن حسام -زى أي أنسان في مكانه- بيشوف نفسه مضطهد، و ده بسبب أنه الأكفأ، و ده حقيقه لا تُنكر، لكن مش بياخد باله من أسباب الرفض



ما بين "اشمغفج أنا" و نظريته المزامرة"

المنطقيه جداً، و اللي فعلاً ممكن تكون مؤثره أكثر من اختيار مدير فنى أقل كفاءه، لكن عنده صفات القيادة بشكل أفضل.

تاني مثال حأذكره حيكون عن أحد المعارف المقربين ليا، هو بيشتغل فى مكان سياحى عالمى مرموق، و هو من الناس اللي بتعمل شغلها على أكمل وجه، و مُتفانى فى عمله بشكل أكثر من المطلوب، لكن مش بيترقى خالص، طول الوقت بينسوه، و هو طبعاً بيشتكى على طول. للأمانه و قبل ما أذكر السبب اللي أنا شايفه لعدم ترقيته، فالمكان اللي هو شغال فيه، و بالرغم من أسمه الكبير جداً، لكن فيه الواسطه موجوده و بقوه، و دى أفه فى كل البلدان العربيه، لكن برضه هو -من وجهة نظرى- بيديهم الفرصه كل مره أنهم يظلموه، لأنه ببساطه بيغلط غلطه متكرره، لكن قبل ما أذكرها، مرة ثانيه حأكد أن الكلام ده من وجهة نظرى أنا فقط، فيحتمل الصواب أو الخطأ.

الغلطه المتكرره اللي هذا الشخص بيكررها، هى أنه طول الوقت بيعمل مقاطع تمثليه على التيك توك، اللي هي عبارته عن مقطع صوتى و بيتتم إعادة تمثليه Play back. للأسف هو بيعق فى 3 غلطات بجانب فكرة عمل المقاطع دى. أولاً أنه بيصورها داخل المكان نفسه، و أثناء وقت العمل، حتى لو كان خلص كل الشغل اللي عليه. ثانياً أنه بيخلى بعض زميله و زميلاته يشاركوه فيها. ثالثاً أنه بيعت الرباط ده لكل الناس، بما فيهم مديرينه.

مديرين هذا الشخص -فيما أعتقد- أتفقوا معايا فى الرأى، فقاموا بنوعين من التصرفات. أولاً الأبقاء عليه مع لومه كل فتره، و الغريب أنه برضه مش بيتراجع، لأن مقاطع التيك توك هى هدف بالنسباله للشهره. الأبقاء عليه هنا بسبب أنه فعلاً على المستوى الوظيفى موظف كفاً جداً، بيعمل كل اللي عليه، و عدم وجوده فى المكان خساره حقيقيه.

لكن فى نفس الوقت هما تقريباً أخذوا قرار بعدم ترقيته أبداً، لأن شخصيته بالنسبالهم لا تصلح كشخصيه كقياديه فى مكان كبير و عالمى و له أسمه، لأن القيادة لها مواصفات، للأسف مش كل الناس بتكون فاهماها. فهو بسبب أنه مش قادر يفهم ده، و طموح الشهره عنده أصبح عامل مسيطر على تفكيره، و هو بيتهيأله أن



ما بين "اشمعي أنا" و نظريه المؤامرة"

لا تعارض بين ده و ده، فأصبح مُعتقد طول الوقت أنه مضطهد. أما بالنسباليهم - فيما أعتقد برضه- أن مدير بيتعامل مع جمهور، مينفعلش تكون مقاطعه الهزليه منتشره على التيك توك، و ده وجهه نظر أنفق معاهم فيهم تماماً، لأن دي سمعه مش كويسه للمكان، فهنا هو اللي بيظلم نفسه طول الوقت، لكن طبعاً هو مش شايف غير أنه مضطهد، و عايش في مبدأ "أشمعي أنا".

مثال تالت و أخير أحب أضريه، حيكون لشخص أعرفه، و هو كاتب مسرحي و في نفس الوقت هو ممثل مسرحي و أفلام قصيره، و للأمانه فهو ممثل شاطر جداً، بس عنده مشكله جوهريه، أن أول ما بيحيله سيناريو فيلم، بيبدأ يناقش المخرج - خصوصاً لو كان المخرج هو نفسه المؤلف- مناقشه أقرب للأستجواب، عن السيناريو و الرساله الى الفيلم عايز يقدمها... إلخ، و دي بتكون أول مرحله.

تاني مرحله بتتمثل في رغبتة في تعديل بعض صيغ الجمل الحواريه بتاعته، و لما المخرج بيقدم التنازل ده، بيدخل على المرحله التالته، و هي رغبتة في تعديل بعض صيغ الجمل الحواريه لباقي الشخصيات، بعد كده بيدخل على المرحله قبل الأخيره، و هي رغبتة في تعديل السيناريو نفسه. طبعاً المرحله الأخيره بتكون أن المخرج بيغيره على طول و بيحيب بديل له، و يرجع هذا الشخص يشتكى من عقده الأضطهاد، و أن كل الناس وحشه و مش بتلتزم بكلمتها، لدرجه أن فعلاً جاتله حالة أكتئاب و أعتزل التمثيل أكثر من 3 سنين.

مشكله هذا الشخص أن مش قادر يفهم حدود دوره، أنه جاي للعمل كممثل فقط، بتطغى عليه روح الكاتب و القائد، و للأسف العمل الى له أكثر من قائد بيقع، و مفيش في الدنيا كلها مخرج حيقبل أن أي ممثل يتدخل للدرجه دي، فبيخسر الفرصه كل مره، و هو مش عارف هي الناس مش بتكمل لمعاه ليه، لأنه عمره ما واجه نفسه بالحقيقه، و أنه كل مره بيتعدى حدوده كممثل.

عايز قبل ما أختم الجزء الأول من الفصل، أحكي عن تجربه شخصيه مريت بيها من كام سنه، و هي أني أرسلت فيلم روائي قصير كنت كتبتة و أخرجته، للمشاركة في أكبر مهرجان دولي في مصر، و كنت واثق جداً من قبوله في المهرجان، لكن لما تم رفضه، و بعد ما هديت من حالة الثوره من فكرة التمييز و عقده الأضطهاد للتجارب



ما بين "أشعني أنا" و نظريته المؤامرة"

المستقلة، أكتشفت سبب جوهرى لعدم قبولهم الفيلم، وكانت عبارته عن جملة واحدة كانت في الفيلم على لسان البطلة، فيها فكره تنافى أحد اشتراطات المهرجان، وأنا طول الوقت مكنتش واخذ بالى من الموضوع ده خالص، وخاصة وقت ما أرسلت الفيلم للمشاركة، و لو كنت أخذت بالى، مكنتش أرسلته من الأساس للمشاركة في المهرجان ده.

قبل ما أقفل الجزء ده من الفصل، بأرجو منك أن تقييمك لأى علاقه تكون أنت طرف فيها، سواء أنسانيه، عمل، عاطفيه، رياضيه، أو أى علاقه ليك بتربطك مع الآخر، أن مرجعيتك دائماً تكون لمعايير مشتركه بينك وبينه، أن سلوكياتك تكون مرجعيتها المعايير دى، أنه لما يلومك تراجع نفسك و تحاسبها، لأن في الأغلب جزء من الغلط -إن مكنتش كله- بيقع عليك أنت.

أسم الفصل ده بينقسم لجزئين، الجزء الأول أسمه "أشعني أنا"، وكلمة أنا في لغتنا العربيه بتدلك على أن المتحدث شخص واحد، و ده أنا قصدته في اختيار العنوان، أن القسم الأول من الفصل حيثكلم عن عقدة الأضطهاد الفرديه، بمعنى أن شخص واحد فقط هو اللى بيكون عنده الأحساس أن المجتمع اللى حواليه مضطهده، سواء مجتمع عمل، أسر، أو رياضى، أو ما شابه.

طيب ماذا لو كان الشعور بالأضطهاد جماعى، و منبعه أن الجماعه دى من عرق معين أو دين معين أو دوله معينه، أو أى شىء مشترك ممكن يجمع مجموعه من الأشخاص مع بعض. وقتها بيتحول الموضوع لما يُسمى "نظرية المؤامرة".

طبعاً أحنا كعرب أكثر ناس في الكون -مش في العالم بس- نعتقد بوجود نظريه المؤامره علينا، وهى فعلاً المؤامرات موجوده، بس الغريب أنها مش خفيه، أنها طول الوقت بتنتقال في العلن، و معنى كده أنها مبقتش مؤامره، لكن هي مخطط واضح، و هو مخطط هدفه المصالح، مش الأضطهاد ليك، لأن كل دوله بتدور على مصالحها، بس أحنا اللى نايمين في العسل، و مش بنفوق غير لما الكارثه تقع، فبنعتبرها مؤامره، مع أن المخطط ممكن يكون بقاله أكثر من 40 و لا 50 سنه، لكن للأسف، أحنا نايمين على ودانا طول الوقت، و مش بننتبه للأشارات اللى بتجيلنا، بمعنى أن مش



ما بيننا "الشمعوني" و نظريته المأزره"

لازم الحريق يوصل بيتك علشان تبدأ تستعد، ماهو كان موجود في بيت جارك قبلك، وفي البيت اللي قبله... إلخ، أعتقد أنك كده فهمتني.

الجانب السياسي اللي على مستوى الدول مش حأتكلم فيه أكثر من كده، لأنه مش هو المقصود، لكن ممكن نبدأ الجزء ده من الفصل بالجانب السياسي الأجماعي، و هو ليه أحنأ ك شعوب مش مرحب بينا في كثير من الدول، ليه فيه دول مفياش تأشيريه بينها وبين بعضها، بينما أحنأ بنحتاج عشرات الأشرطاطات للتأشيرات، ليه أحنأ كعرب بشكل عام، و المسلمين منهم بشكل خاص، أصبح غير مرحب بيهم في أوروبا، تعال ندور مع بعض على بعض الأسباب.

بدايةً، فأى دولة متقدمه، بتكون دوله برجماتيه، و سبق و شرحت التعبير في فصل سابق، بمعنى أنها يهملها مصلحتها فقط، و ده حق أى دولة، فحقها تختار من بين ملايين الناس اللي بتتقدم بطلب الهجره أو حتى الأقامه فيها من يناسب أحتياجاتها، بل و ممكن تديهم جنسيتها كمان، و يُصبح مواطن له كافة الحقوق، بس أرجع تاني أقول أن المهم أنه يناسب أحتياجاتها.

سبق و أتكلمت برضه في فصل سابق عن دكتور محمد صديق عمرى، و اللي بريطانيا رحبت بيه، و أصبح مواطن له كافة الحقوق، و وصل لنائب رئيس جامعه، و على وشك أنه يُصبح رئيس جامعه في سن صغير جداً.

رئيس وزراء بريطانيا نفسها، ريشى سوناك من أصل هندي، باراك أوباما الرئيس السابق للولايات المتحده كان من أصل كيني، منتخب فرنسا في آخر 2 كاس عالم، كان أكثر من نصه من أفريقيًا. إذن فالمبدأ في الأساس مش مرفوض، لكن أى دولة حقها تختار من يناسبها، و على فكره ده مش بيكون بس في الوظائف المهمه أو العليا، لكن فيه بلاد بتكون أحتياجاتها فقط لناس في وظائف أقل، لأن مواطنين الدوله نفسها مش بيشتغلوا الوظائف دى، و ده عيب منهم هما، و مش معناه أن اللي بيروح شخص أقل، لأن الشغل عمره ما كان عيب.

هنا حأبدأ أتكلم عن سلوكياتنا في الدول اللي العرب و الأفارقة بيهاجرونها، سواء بشكل شرعى، أو بشكل غير شرعى عن طريق الهجره الغير شرعيه، و تعال معايا نشوف هل أحنأ -و خصوصاً اللي بيهاجروا بشكل غير شرعى- بتكون سلوكياتنا متناسبه مع



ما بينج "اشمغفج انا" و نظريه المؤامرة"

أعراف و مبادئ الدول دى، و لالأ، و ده الى بيسبب السمعه السيئه جداً الى أصبحنا موصومين بيها؟ طبعاً لأ، و ده الى خلاهم غير متقبلين وجودنا عندهم بشكل قاطع.

في دوله زى فرنسا، و الى بئمثل أكثر دوله أوريه فيها نسبة مهاجرين، و خاصة من شمال أفريقيا أو من أفريقيا نفسها، نسب الجرائم بكافة أنواعها أرتفعت بشكل كبير جداً على أيد المهاجرين -أيأ كان شرعيين أو غير شرعيين-، لأن أغلبهم عاطل، مش بيشتغل. أولاً، الدوله بتضطر تصرف إعمانات أجماعيه لكثير جداً منهم، و ده بيئمثل عبء إضافي على خزينة الدوله. ثانياً، الجرائم بتزيد، و أصبح المواطنين الأصليين غير أمنين على نفسهم أو على أولادهم. ثالثاً، مستوى النظافه المتدني الى ممكن تشوفه في المناطق الى بيسكنها المهاجرين، و الى بدء يغزو المناطق الثانيه، و ده أدى لأنتشار الأمراض، و من قبله الحشرات و الفئران، زى ما حصل في فرنسا من سنتين على ما أتذكر، و طبعاً فيه أسباب ثانيه كثير جداً غير دى.

كل اللى فات ده هو نوع من السلوكيات السيئه جداً من المهاجرين، و اللى بينتج عنه مشاكل مجتمعيه أكبر، لكن لحد دلوقتى أنا بكلمك في سلوكيات عاديه، لكن لما السلوكيات تمتزج بالدين، فهنا بتكون الكارثه الكبرى، و من هنا حتكون نقلتى للجزء الثاني، و هو الخاص بالأعتقاد الخاطئ طول الوقت بأن فيه مؤامره على الإسلام، و ده الأعتقاد الى بعتبره مشكلة المشاكل فعلاً.

كثير من المسلمين لما بينتقلوا للأقامه في أي دوله أوريه أو في الولايات المتحده وكندا، أو أستراليا، بيحاولوا أنهم يعملوا مجتمعات خاصه بيهم، و ده شيء بيحصل مع أغلب المجتمعات الأخرى سواء عرقيه أو دينيه، بمعنى أن الصينيين بتكون لهم أحياء، اليهود بيكون لهم مناطق، بتنشج عن تجمعات صغيره بتكبر كل شويه، لحد ما بيتم السيطرة على المنطقه كلها.

التجمعات دى لما بتكبر، بتبدأ تسيطر تماماً على المناطق اللى هى موجوده فيها، فيبيبدأوا يفرضوا وجودهم بأشكال كثير، خاصة عن طريق المظاهر الدينيه، زى إقامة صلاة الجمعه و الأعياد في وسط الشارع، زى صوت الأذان بدأ يعلى جداً، بعد ما كان مفيش أذان أساساً،... إلخ. طيب ليه الدول دى سايباهم يمارسوا كل ده بدون تدخل؟ ببساطه لأن أغلب الدول الأوريه بتعاني من عقدة الذنب، من التاريخ



ما بين "اشمغون أنا" ونظرية المؤامرة"

الأستعماري الطويل بتاعها، من حقوق الأنسان الى تم إهدارها في الماضي، و زى ما الكنيسة الكاثوليكية في الفاتيكان تبرأت من كتير من أفعالها في قرون ما قبل عصر النهضة، أوروبا نفسها بدأت تتبرأ من سياستها السابقة، و تحاول تصالح الشعوب اللي قامت بأستعمارها و أضطهادها سابقاً، علشان كده حتلاقى الغالبية العظمى من المهاجرين لفرنسا، من الدول اللي كانت تحت الأستعمار الفرنسى في وقت من الأوقات، و طبعاً دولة زى المانيا عندها عقده لوحدها خاصه باليهود، فهنا الدول دى بتحاول تتساهل و تفوت على قدر ما تقدر، خاصة بالنسبه للمسلمين.

المرحلة الثانيه للتجمعات دى، أنها بتبدأ تنسى أنها هي الضيفه على الدول دى، فهى اللي لازم تتبع قوانين الدول اللي مستضيفاها، و ليس العكس، فبتبدأ تظهر المشاكل نتيجته رفض الجماعات دى السلوك العام للدول اللي هم فيها، و طبيعة شخصية و مفاهيم الناس في الدول دى، و عدم إدراك النقط دى ده وصل في كتير من الأحيان لأرتكاب جرائم قتل، و خلينى أفكر سريعاً ببعض الحالات الأجراميه اللي تمت نتيجته الرفض ده.

أول و أقرب حاله كانت حالة أغتتيال مدرس فرنسى بسبب عرضه بعض الرسومات الكاريكاتريه، و اللي عرضها في أحد الحصص الخاصه بمادة التربية الأخلاقية والمدنية، و اللي كان عايز يدلل بيها على حرية التعبير، و كانت الرسومات للرسول، فتم أغتالياله بشكل بشع أمام المدرسه في سنة 2020، و هنا كان الجاني مسلم من الشيشان.

قبلها في سنة 2015، تمت عمليه إباده جماعيه لعدد من رسامى صحيفة شارلى أيبودو، برضه بسبب بعض الرسومات الكاريكاتريه للرسول في الصحفيه، في هجوم مسلح أستهدف الجريده كلها. و هنا كان الجناه أخين من الجزائر.

لاجئ سورى في ألمانيا قام بالأعتداء على بنات ألمان ليلة رأس السنه، بدعوى أن لبسهم كان غير لائق، و غيرها عشرات الأحداث و الجرائم في أوروبا و أمريكا، و من قبلها خلينا نفتكر سلوكيات بعض الجماعات الدينيه في بعض البلدان العربيه، من ألقاء بعض الناس من فوق العمارات، لأغتصاب بعض غير المسلمات، لحرق و ذبح كتير من المواطنين، كل ده بدعوى أن الدين هو اللي أمر بذلك.



ما بيننا "تسمعنا أنا" ونظريه المؤامرة"

غير المسلم مش حيعرف عن الإسلام غير سلوكيات المسلمين، و طبعاً السلوك السيئ دائماً هو اللي دائماً ببيرز، زى بالضبط ما أحنا بنصف الأوربيين بالإنحلال الأخلاقي، لأن السلوك اللي ظاهر لنا هو السلوك السيئ، فالعكس صحيح، الأوربيين و الأمريكان مش شايفين من الإسلام غير السلوك العدائي و الأجرام لبعض المسلمين، لأن السلوك العدائي ده هو اللي ظاهر، علشان كده أصبحت سمعة الإسلام مش كويسه.

و بالمناسبه ففيه نقطه أحب أوضحها، أن الإسلام هو الدين الوحيد اللي عمره ما كان مضطهد، بس سلوكيات المسلمين على مدار التاريخ هي اللي وصلت الإسلام للسمعه دي، و بالمناسبه فالمسيحيين الأوائل وقعوا في نفس الغلظه بعد مراحل الأضطهاد الأولى اللي تمت ضدهم على أيد الرومان، فأول ما دانت لهم السيطره بعد قرار الإمبراطور قسطنطين الأول بأن المسيحيه تصبح هي الديانه الرسميه للإمبراطوريه الرسميه، أرتكب المسيحيين الأوائل أخطاء كتير جداً، من حرق كتير من العلماء وقتها زى "هيبتيا" باعتبارها كافره، لأضطهاد اليهود، لحرق مكتبه الإسكندريه، و للأسف طول الوقت الأديان تُدان بسلوك أتباعها.

أخرج من الجانب الديني للجانب الاجتماعي السياسي، و أعتقدانا الدائم كعرب بأننا أحسن ناس، لكن فيه مؤامرات علينا، و الكلام اللي ممكن تسمعه طول الوقت في برامج الTalk show المسائيه، و بين الناس و بعضها، لما الناس بتحب تفتي، و هنا السؤال الدائم، طيب من وجهة نظر الشخص اللي عنده أعتقاد الأستهداف ده: ليه أحنا مستهدفين، و يا ترى أحنا عاملنا أيه لمواجهة الأستهداف ده؟

في البدايه بس أحب أكد وجهه نظري، أن مفيش قوه في العالم تقدر تقف أمام شعب عايز يتقدم، و ده شفناه خلال الخمسين سنه الأخيره في أكثر من دوله شرق آسيويه، و أهمهم كوريا الجنوبيه و الصين، للدرجه اللي وصلت دوله زى الصين لأنها تكون المنافس الأول للولايات المتحده الأمريكيه خلال الفتره الأخيره، و تكون المُهدد الأول لعرشها.



ما بينج "اشمغف انا" و نظريه المؤامره"

طيب أرجع للسؤالين اللى سألتهم، هل أحنا مستهدفين؟ الأجابه حتبداً من معلومه مهمه جداً، و هى أننا كشعوب عربيه مقدمناش أى حاجه مفيده للبشرية خلال على الأقل 600 سنه اللى فاتوا، أحنا دايماً مستهلك للحضاره، مش صانع ليها، بالعكس ده تقريباً كل الأختراعات تم تكفيرها في البدايه من قبل القوى الدينيه، لحد ما بيلاقوا أنها ممكن تخدمهم، فيبدأوا يحللوها بشكل مشروط، لكن في نفس الوقت بيستخدموها أسوأ إستخدام لتحقيق أغراضهم، بدايهً من أختراع الطباعه لحد شبكات التواصل الأجتماعى، لكن على مدار الزمن ده كله، أحنا مجرد مستخدمين سيئين للحضاره فقط، لكن عمرنا ما كنا مشاركين في صناعتها.

الدول المصنعه الكبرى، سواء أوروبا بس سابقاً، أو أوروبا و الولايات المتحده في مرحله تاليه، أو معاهم دول شرق آسيا حالياً، شايفنا طول الوقت عالاه على العالم، شايفنا مستهلك سيئ لكل ما ينتجوه، لكن في نفس الوقت دولنا من أكثر الدول اللى فيها مصادر طاقه، فبدأت من حوالى قرنين المرحله الأستعماريه لدولنا، و كان الحصول على مصادر الطاقه و أستغلال الموقع الأستراتيجى، من الأهداف الرئيسيه للأستعمار. لما خلصت مرحله الأستعمار، بدأت المرحله الجديده للوصول لنفس الأهداف، و هى مصادر الطاقه و الموقع الأستراتيجى، و دى المرحله اللى أحنا مسمينها "نظريه المؤامره"، مع أن الموضوع واضح و صريح و معروف أهدافه.

طيب نيحى للسؤال التانى، أحنا عملنا أيه لمواجهة الأستهداف ده؟ طبعاً لا شيء أكثر من الولوله، خصوصاً في برامج الTalk show، لأن الحلول كثير، بس أحنا كشعوب دايماً منتظرين أن الحل دايماً ييجى من خارجنا، أحنا أستحاله تكون لينا خطوة الرياده في أى موقف، لكن دايماً الحل عندنا هو الشكوى و الشعور بعقده الأضطهاد.

خلىنى أضرب مثال بسيط جداً، و على قد بساطته، على قد ما حيوضحلك قد أيه أحنا سلبيين، و المثال يتعلق بتطبيق الFacebook، و اللى حالياً كثير من الناس اللى بتتكلم في القضيه الفلسطينيه بيشتكوا من حذف Posts لهم، و الكل بيتهم التطبيق بالأنحياز و عدم العداله، و طبعاً نظريه المؤامره.



ما بيننا "الشمعوني" و نظريته المؤامرة"

الفكره أن أكيد مالكي التطبيق لهم سياسه و أهداف و توجهات، زيهم زى أي قناه تليفزيونيه أو أى شركه في العالم، بتحركها أهدافها، وده منطقي جداً أن مالكي التطبيق لهم مصالحهم، و لو منشوراتك ممكن تتعارض مع المصالح دي حيحذفها لك، و هنا ييجي السؤال، ليه أحنا مش بنفكر في الحل الأمثل، و هو أننا نعمل تطبيق زى Facebook يكون خاص بينا؟ الموضوع مش صعب، و خاصة في ظل وجود عشرات العباقره اللي يقدرور يعملوا ده. ليه بنشتكى و نولول و بس، مع أن الحل في منتهى البساطه، بالعكس ده أنسحاب كل الناس اللي بتشتكى من تطبيق مهم زى Facebook، ممكن يكون له تأثيره الأيجابي جداً، بس أرجع و أقول أننا في النهايه أننا كائنات في منتهى السلبيه.

أمثلة عقده الأضطهاد الجماعي موجوده في مجتمعاتنا بقوه، سواء دينيه، عرقيه، سياسيه، أو اجتماعيه، فيه منها جزء حقيقي، لكن في الأغلب هو أعتقاد وهمي، و للأسف أحنا بنحب جداً نعيش عقده الأضطهاد و الظلم و نظرية المؤامرة، لأنه بالنسبالنا بيُمثل حل مريح جداً.

في النهايه أحب ألخص وجهة نظري في الفصل ده، بأن حقيقي فيه أضطهاد -سواء على المستوى الشخصي أو الجماعي-، لكن غالباً بيكون منبعه المصلحه، لكن فعلياً و في أغلب الأحيان ، فأنت السبب في الأضطهاد اللي بيحصلك، يا أما لأنك مش قادر تمثي على النسق أو المنهج اللي يُفترض أنك تمثي عليه، أو لأنك سلبي و مش عايز تتحرك، و عايز تقنع نفسك طول الوقت أن السبب مش منك.

04 فبراير 2024



البعد الرابع (فرق توقيت)

"لماذا لا ندرك أهمية أئمن أصل نملتكه؟
لماذا نتعامل مع أعمالنا بلا إكتراث؟"



"عن الإنسان في اللد زمكان"

البعد الرابع (فرق توقيت)

في سنة 2004 كان المطرب الشعبي حكيم بدأ مرحلة الهبوط التدريجي، و اللى على فكره بتحصل مع أى مطرب فى العالم فى مرحلة ما من مشواره الفنى، فنزل ألبوم اسمه "اليومين دول" فى نفس السنه -2004-، محققش نفس نجاح ألبوماته فى فترة ما قبل الألفينات. واحده من أغانى الألبوم قرر يصورها حكيم فيديو كليب، و كانت من إخراج المخرج الكبير هادى الباجورى، و اللى كان وقتها -و ما زال للنهارده-، بيُعتبر من المخرجين الكبار و الفاهمين بجد، بالرغم من أنه مكنش لسه أخرج أى فيلم، لكن كان من المخرجين المشهورين جداً فى عالم "الفيديو كليب" و اللى كان فى أوج قمته -و أقصد هنا عالم الفيديو كليب فى الوقت ده.

الفيديو كليب الخاص بأغنية المطرب حكيم، حقق نجاح غير طبيعى، و ده كان بسبب غرابة فكرته، و اللى بالرغم من أنها بعيدة كل البعد عن كلمات الأغنية، لكن أعتقد أنك مدرك معايا أن عندنا الكلام ده ميفرقش، مش مهم أن كلمات الأغنية فى أتجاه، و التصوير فى أتجاه تانى خالص.

الفيديو كليب حقق نجاح مبهز، و بالتالى نجحت معاه الأغنية بشكل كبير جداً، و أعترف أنى بسبب عدم حبى للسينما الأمريكيه، و ميلى الشديد للسينما الأوربيه و الآسيويه، فكنت معتقد أن هادى الباجورى هو المبدع اللى فكر فى سيناريو الكليب ده، و مش مقتبسه من أى عمل تانى، و حاقولكم أسم الأغنية بعد ما أخلص كل الكلام اللى عايز أقوله، علشان نربط كل الأعمال اللى حنذكرها ببعض.

بعدها ب 5 سنين، تحديداً فى 2009، نزل فى السينمات واحد من أهم أفلام أحمد حلمى، و اللى كون مع فيلمين تانيين عملهم فى نفس الفتره الزمنيه، النجاح المدوى لأحمد حلمى، الفيلم كان مكتوب فيه قبل بداية التترات، أنه مأخوذ عن أسطورة سيزيفيوس الأغرريقيه، بس المره دى أنا قلت لأ، أكيد الفكره دى مش مصريه، أصل مش معقول عملين مصريين يعملوا فكره غريبه جداً زى دى، خصوصاً كمان أن الفكره فيها بعد فلسفى كبير و عميق جداً، و صعب كمان أن الفيلم يكون أقتبس من الفيديو كليب. و بما أن ثقافتنا السينمائيه فى مصر هى ثقافه أمريكيه بحتة، فأكيد أن العملين



البعد الرابع (فرق توقيت)

مأخوذين من فيلم أمريكي، و خصوصاً أن أسطوره اللى ذكرها الفيلم قبل بداية التترات، بعيده بشكل كبير عن فكرة الفيلم.

و بالفعل دورت و وصلت للفيلم، و اللى بالرغم من أن فيلم أحمد حلمى كان حقيقى أكثر من ممتاز، و يمكن يكون أحلى من الفيلم الأمريكى، لكن يبقى أن الفكره الفلسفيه الأخلاقية اللى ناقشها الفيلم الأصلى كانت أقوى، أنا بس بأتمنى و لو مره واحده، أن أفلامنا المقتبسه عن أفلام غير مصريه تذكر المصادر، خصوصاً أن أكثر من 70% من أفلام أحمد حلمى، مقتبسه عن أفلام أمريكيه، أما فيديو كليب أغنية حكيم، فطبعاً مأخوذ من الفيلم الأصلى غير بس الشكل الدرامى، بدون دراسة الهدف الفلسفى و الأخلاقى اللى الفيلم الأصلى كان بيستهدفه.

و بالرغم من أنى مش بحب و لا بقتنع بالأفلام ذات البعد الخيالى، إلا أن الفيلم الأمريكى الأصلى، و اللى أخذت منه كل الأعمال دى، حيكون هو مدخلى لمناقشة موضوع الفصل ده، لأن الفيلم أستخدم عنصر الخيال مش بهدف عمل فيلم مبهر الشكل و التنفيذ كعادة السينما الهوليوودية، لكن لتوصيل رساله مهمه جداً، و اللى هى تقريباً نفس الرساله اللى أنا عايز أوصلها لك فى الفصل ده من الكتاب.

الفيلم اللى حنتكلم عنه هو فيلم "Groundhog day" أو "يوم السنجاب"، و يوم السنجاب هو عيد أمريكى تاريخه 2 فبراير من كل سنه، و بيتم فى اليوم ده عملية توفع هل الشتاء حيستمر 6 أسابيع كمان، و لا الربيع حيجى بدرى، و ده بيحصل بشكل كوميدى جداً عن طريق سنجاب، و أعتقد أنها الفكره اللى أتبتت عليها بعد كده فكرة توقعات مباريات كأس العالم عن طريق أحد الحيوانات. الفيلم كان من إنتاج سنة 1993، و كانت فكرته وقتها مفاجأه و غريبه و صادمه، حتى فى الولايات المتحده نفسها، و ده كان واضح من خلال المقالات الكثيره اللى أنكتبت عنه.

طبعاً أكيد أنت أستنتجت معايا فيلم أحمد حلمى، و هو "ألف مبروك"، بعدها بكام سنه أنفجرت على نسخه أيرانى من نفس الفكره، و كان فيلم أسمه "آخر يوم فى الشهر" إنتاج سنة 2010، و أنا واثق أن فيه أفلام كتير جداً خارج السينما الهوليوودية، أتبتت على الشكل الدرامى للفيلم ده، و هى فكرة ال Time loop أو دائرة الزمن، و أنا بأكد أنها أتبتت على شكله الدرامى و مش رسالته، أما فى هوليوود لوحدها



البعد الرابع (فرق توقيت)

فأتعمل 9 أفلام بنفس الشكل الدرامي بعد فيلم "Groundhog day"، أما أغنية حكيم فكان أسماها "هابوسه"، وطبعاً واضح من أسماها أن كلماتها بعيدة كل البعد عن أى فكر فلسفى أو أخلاقى، وأن الفيديو كليب كان فى اتجاه بعيد جداً عن كلمات الأغنية، و كمان عن رسالة الفيلم اللى أنتقش منها الشكل بس.

ممكن طبعاً و بنسبه كبيره تكون شفت فيلم "ألف مبروك"، و ممكن و بنسبه أقل بكتير تكون شفت "Groundhog day"، لكن خلينا الأول نلخص فكرته ببساطه، و بعد كده نحلله من خلال مقال كُتب عنه على موقع CNN سنة 2016، و حاترجم معاك بعض الجمل المهمه منه.

الفيلم ببساطه بيحكى عن مذيع تليفزيونى فى واحده من القنوات التليفزيونيه الخاصه، متخصص فى الطقس، و المذيع متعجرف و متعالى و مغرور بشكل كبير جداً، و عايش حياته كلها متقوقع على نفسه. بيسافر المذيع مع فريق عمل -زى كل سنه- المدينه اللى بيُقام فيها "يوم السنجاب" علشان يغطوا الحدث، لكن بيتفاجئ فريق العمل أثناء رجوعهم لمدينتهم الأصليه آخر اليوم، أن الطريق مقفول بسبب الثلوج، فبيضطروا يبيتوا ليله تانيه فى المدينه اللى بيحصل فيها "يوم السنجاب". بيصحى المذيع فى اليوم التانى -كما هو مُفترض-، لكنه بيكتشف أنه نفس اليوم اللى فات، و أن اليوم بيتعاد، و يفضل نفس اليوم يتعاد، و مع كل إعادته بيبدأ المذيع -و اللى فقد الأمل فى أنه يعدى من اليوم ده- يصلح من نفسه، من غلطاته، و يعيد تقييم نفسه كل مره، صحيح أنه كان أحياناً ييرتكب أخطاء جديده، لكن كل مره كان اليوم بيبدأ فيه من جديد، كان بيقدر يستفيد من كل خبراته اللى شافها فى المرات اللى فاتت، لحد ما بيوصل فى النهايه لمرحله التطهر الكامل من كل الذنوب و الأخطاء اللى كان بيعملها، و بيقدر يحقق أقصى أستفاده من يومه، فبيصحى المره دى علشان يلاقى اليوم عدى أخيراً، و أن بكره جه بالفعل.

عايز أحلل معاك بسرعه أهم نقطه فى الفيلم ده، من خلال مقالة موقع الـ CNN، و اللى أتفقت معايا فى كل أرائى عن الفيلم. المقال اللى بيبدأه كاتبه ديفيد ألان أن أول مره شاف الفيلم، كان بعد عرضه سينمائياً بكام سنه، من خلال ندوه أقيمت فى متحف والتر للفنون بمدينة بالتيمور، و كان عرض الفيلم هو بداية ندوة لمقارنة الأديان موضوعها عن الفيلم نفسه، علشان بس تتخيل معايا أهمية الفن بشكل عام،



البعد الرابع (فرق توقيت)

و فيلم زى ده بشكل خاص. طيب أيه علاقة الفيلم بندوه عن مقارنة الأديان، هي ده النقطة اللي عايز أكلمك عنها.

الفيلم هو مزيج رائع من مبدئين دينيين، و طبعاً متأثر بأسطورة سيزيفيوس الأغرريقيه، و اللي كان ملمس معاها في نقطه واحده لكن مهمه. بالنسبه للمبادئ الدينيه فالأول يُمثل مجموعته مبادئ "كارما و سامسارا و موكشا و نيرفانا" البوذيه، و اللي لنا معاها فصل كامل في الكتاب. أما المبدأ الثاني فهو فكرة "التطهر" الكاثوليكيه. باختصار علشان منطولش في الجزء ده، فاللي يهمني من موضوع الفيلم، هو اللي تم ذكره في المقال، و هي فكرة أزاى نحقق أفضل أستفاده من ساعات عمرنا، و هو التعبير اللي قاله ديفيد ألان في المقال "How to most fruitfully spend our precious hours."

طيب بعد ما أستفضنا في شرح فكرة الفيلم، أحب أشرحلك النص الأول من أسم الفصل ده، و هو البعد الرابع، و اللي كنت أشرت إليه في الفصل الأول من الكتاب و اللي عنوانه "ليه". البعد الرابع عند أينشتين هو الزمن، و سمي أينشتين العلاقة بين الزمان و المكان ب Spacetime و اللي أترجمت عربياً لل "زمكان" لأن ببساطه الأبعاد المكانية هي 3 أبعاد، لكن بالطبع علشان تتحرك من أى نقطه مكانيه لنقطه تانيه، فلزام يكون هناك بعد رابع معاك، و هو بالطبع الزمن، لأن طبعاً مفيش شخص يقدر يكون في مكانين في نفس اللحظة الزمنيه، و أنا من الناس اللي مؤمنه جداً بأن فكرة التحرك في الزمن فكره قابله للحدوث، لأنها مبنيه على علم، و العلم لحد دلوقتي وصل لبعض شروط تحقيقها، لكن لسه موصلش لأمكانية تحقيقها.

المهم ندخل على موضوعنا، و هو فكرة العامل المُهمل في حياتنا و هو الزمن أو الوقت، اللي هو من وجهة نظري أعلى ما يملك الأنسان. أنت تقدر تعوض أى حاجه في الحياه، إلا الثانيه اللي بتمر من عمرك، و أنا من أهم مبادئ في الحياه أن أكبر ثروه يمتلكها الأنسان دايماً هي عمره.

الأنسان في تعامله مع عامل الزمن و اللي أحنا بنسميه "الوقت"، و ده المسمى اللي حنستقر عليه مع بعض، بيقع في مجموعه كبيره من المشاكل، بتتنوع في أسبابها،



البعد الرابع (فرق توقيت)

فبالتالى بتختلف عواقبها، و بعد ما رصدتها كلها، قدرت أقسمها ل3 أنواع من المشاكل، أحياناً كتير بيكون الشخص نفسه هو الطرف الفاعل أو سبب المشكله، و أحياناً بيكون هو الطرف المفعول به أو المجنى عليه، و ده حيكون مدخلنا لأول نوع من أنواع مشاكل تعامل الإنسان مع الوقت.

النوع الأول من المشاكل، و هو النوع الأكثر أنتشاراً فى دولنا العربيه، و علشان كده أنا بدأت بيه، و اللى أسوأ ما يميزه أن الضرر اللى بييسبه بيصيب أكثر من طرف، و الأغرب أن أصابته للطرف اللى ملوش أى ذنب، أكبر بكثير من الضرر اللى بيصيب الشخص المهمل نفسه، و أحياناً كمان الطرف المهمل مش بيصيبه أى ضرر، و دى نقطه بتمثل كارثية هذا النوع من أنواع مشاكل تعامل الإنسان مع عامل الوقت.

بدايةً، فالتعامل مع عامل الوقت فى حياتنا فيه خلل رهيب، بيصل لدرجة فقدان الأحساس التام بقيمته، و تعال نستعرض مجموعه من أشهر الجمل الدارجه على لسانا، و اللى بتدل على كده، زى مثلاً "حأعدى عليك بعد الضهر"، أو "ميعادنا من خمسه لسته"، أو "حاخلصك الشئ الفلان خلال الأسبوع ده"، و دى نوعية من الجمل اللى كلنا بنقولها بشكل تلقائى جداً و بسيط، من غير ما ندرك كارثية الكلام اللى بنقله، و مع ذلك فهى النوعيه الأيسر من الجمل الغير مدرکه لقيمة عامل الوقت. أما نوعية الجمل التانيه فهى أشد خطوره بمراحل، و ده لسببين، أولاً لأنها مفيهاش أى نوع من التحديد لأى شئ، ثانياً أضفاه صبغه دينيه مشيئيه قدره على الجملة، علشان لو حاولت تعترض، تبقى كافر أو غير مؤمن بالله، فاللى بيقولها لك بيقلها علشان يقطع عليك السكه من الأول، زى الجمل اللى بتبدأ ب "أنشاء الله متقلقش"، "سيبها على الله"، "سبق المشيئه"، "كله بأذن الله"، أو "إن أراد الله ما شابه، و دى نوعية جمل مفيهاش أى نوع من التحديد و الألتزام بأى شكل من الأشكال، هى بس فكرة ألقاء كل شئ على المشيئه، علشان ميطلعش من المتحدث أى كلمه تدل على أى نوع من الإلتزام الوقتى تجاه المتلقى.

طيب النوعيتين دول من الجمل، و على الرغم من كارثيتهم، و توضيحهم مدى إنعدام أحساسنا بأى أهميه لعامل الوقت، أرحم بكثير من الواقع الفعلى، و أسمحل أحكيك تجربتين حصلوا قدامى خلال الشهر اللى فات، لأتتين من الناس القريين



البعد الرابع (فرق توقيت)

جداً منى، و بالصدفه الأتئين كان عندهم مشاكل خاصه بالقلب، و كنت أنا متواجد مع الأتئين فى المستشفى فى المرئين، و المستشفى مستشفى كبيره و لها أسمها.

فى المره الأولى الدكتور جه بعد ميعاده بساعه، و قال لقرىبى -اللى كان حاجز الميعاد قبلها بأسبوعين- أنه لسه مقرأش التقارير الخاصه بحالته، و بمنتهى البساطه و ألا مبالاه طلب منه يحجز كشف تانى بعدها بأسبوع!!! أما الحاله التانيه فكانت المريضه داخله تعمل منظار داخل القلب، و حالتها مقلقه جداً، و كانت صايمه قابلها 6 ساعات، و لما وصلنا، و برضه بعد نصف ساعه من الأنتظار، الممرضه بمنتهى البساطه بلغتنا أن الدكتور أعتذر، و أنها تيجى مره تانيه، و برضه هى و حظها.

أنا أخترت أضرب نموذجين طبيين لسببين أهم من بعض، أولاً أن المريض بشكل عام، أى تأخير ممكن يضر بحالته الصحيه، و بالتأكيد ممكن يسبب مضاعفات، بالأضافه للشعار الشهير للأطباء، و اللى للأسف هو بالنسبالهم شعار و بس، أن الكشف و العلاج المبكر لأى حاله بيكون أفضل بكثير، و ده شعار حقيقى، لكن بيكون بلا قيمه وقت التنفيذ، و بالتأكيد أن فعلاً أى مشكله صحيه، عامل الوقت عمره ما بيكون فى صالحها.

تانى سبب أن الدكتور من المفترض أنه من أعلى الفئات علماً و المفترض كمان ثقافه، و الثقافه مش معناها كم من المعلومات، لكن معناها رؤيه و وجهه نظر فى الحياه، فكان لازم تكون فئة الدكاتره من أكثر الناس تقديراً لقيمة الوقت، سواء بحكم الثقافه أو العلم، أو بحكم خطورة عامل الوقت فى طبيعه عمله، و اللى ممكن الأهمال فيه يؤدى لآنتهاء حياة إنسان، و ما يتبعها من عواقب، بمعنى أن ممكن عواقب التأخير تكون أكبر كمان من موت المريض و بس.

كده أعتقد أنك بدأت تدرك معايا أبعاد النوع الأول من مشاكل تعاملنا مع عامل الوقت، و هى بأختصار عدم تقديرنا لأهميه عامل الوقت عند الطرف الأخر، و اللى حظه المش كويس أجبره على التعامل مع أشخاص عندها حاله من ألا مبالاه فيما يخص الأخرين، و مش لازم المشكله تكون صحيه زى الأمثله اللى ضررتها، علشان يكون عامل الوقت فيها كارثى، لأ الوقت مشكله دائماً كارثيه، و حاضطر أضرب مثال خاص تالت و أخير للتدليل على المعنى اللى أنا عايز أوصله.



البعد الرابع (فرق توقيت)

أثناء عملي في أحد الهيئات الحكوميه، تم أختياري من قبل جهه مانحه مع أثنين مهندسين آخرين، لدوره دراسيه مهمه في أحد الدول الشرق الأسيويه، يعني الهيئه مش حتتكلف جنيه، و دوره دى خاصه بطبيعه عملنا في الهيئه، يعني مفيده لنا و للهيئه، لكن بسبب أهمال مسئول ما في الهيئه في أنه بس يمضى على أوراقنا -يعنى مفيش مجهود حيعمله أكثر من كده-، و طبعاً الأهمال ده أكيد جزء منه أن الأمر ميهموش على المستوى الشخصى، فأتأخر في التوقيع، و كان نتيجة تأخيره ضياع دوره علينا أحنا الثلاثة.

المشكله ببساطه بتبدأ لما تكون مضطر تتعامل مع شخص -في أى منحنى من مناحي الحياه-، و الشخص ده يا أما مش منظم، أو كسول، أو مهمل، و مش مقدر أهميه أحتياجك للشئ اللى هو بيعملهولك، و طبعاً الشخص ده لو كان في مكانك و أضطر يتعامل مع شخص من نفس نوعيته، حتلاقيه كائن تانى خالص، و دى واحده من أهم مشاكلنا الحياتيه المزمناه، و هى الكيل بمكيالين طول الوقت.

أحياناً بتكون الخدمه اللى أنت محتاجها من الشخص ده بسيطه جداً، و سواء كان بيعمله بحكم أنها جزء من عمله، أو بشكل ودى، فهو من المفترض أنه يكون مدرك أنك محتاج الخدمه دى في الوقت المتفق عليه، أن ممكن حاجات تانيه تتبنى على الخدمه اللى حيعملهالك، أن ممكن مواعيد تانيه تترتب عليها، أنك ممكن تكون حتسافر مثلاً و محتاج الشئ ده. و حتى لو كان الموضوع بسيط جداً، زى مثلاً تصوير ورق، أو تصليح شئ معين، فهو ملوش حق يقرر مع نفسه أهميته بالنسبالك، أو أنه يعدل ميعاد متفق عليه من جانب واحد، و هو الجانب الخاص بيه بس. زمان كنا بنقول أن الكلمه إلتزام، دلوقتي لا الكلمه و لا عشر وصولات مكتوب عليهم مواعيد بيعتبروا إلتزام، لدرجه وصلت كثير من الناس اللى محتاجه الخدمه أنها تطلب ميعاد و همى قبل الميعاد المطلوب، علشان هى متوقعه أن مبدأ التأخير حيحصل حيحصل، فتكون زى ما بيقولوا "مأمنه نفسها".

نوعيه الناس اللى بتتعامل بهذا الشكل على المستوى الوظيفي -مش الودى- بتنقسم لقسمين، النوع الأول بيكون شخص أنت مجبر تتعامل معاه تحت أى ظرف، زى موظف الحكومه، فده بالنسباله تقريباً مفيش أى عواقب حتقع عليه من اللى بيعمله، غير فيما ندر.



البعد الرابع (فرق توقيت)

أما النوعية الثانية فهي الأشخاص المهنيين، بدايةً من أصغر شخص يقدم ملك أي نوع من الخدمة، لحد الدكتور، وهنا الوضع يختلف، لأن النوعية دي وهي بتعامل بالشكل ده من أشكال عدم إدراك قيمة عامل الوقت، مش بتدرك كمان مقدار عواقب النوع ده من الأخطاء عليهم هما نفسهم. من أهم الحاجات اللي بيكبر فيها أسم أي شخص في مجال عمله هي السمعة، و عامل الوقت واحد من أهم عوامل بناء السمعة دي، فتخيل معايا لو أن تأخير شخص مهني أذاك بأى صوره من الصور، و الشخص ده جه أسمه قدامك، فأنت تلقائي حتلاق نفسك بتشتكي من سوء مواعيده، أو تأخيره، فبالتالي حتبدأ تكون عنه سمعه مش كويسه، و ممكن تخوف ناس تانية كتير من التعامل معاها.

خليني أدخلك على مستوى أعلى من كده و هو "عقود الأذعان". بدايةً، ففكرة أي عقد في الدنيا هو أنه وثيقه بتضمن لكل طرف حقه، في حالة أحل الطرف الأخر بأى شرط أو بند من البنود المتفق عليها، لكن في دولنا العربية كل العقود الموجوده تقريباً و الخاصة بالمدارس، العقارات، قروض البنوك.... إلخ، هي عقود فوقيه، بيكتبتها دايماً الطرف الأقوى، و هو مالك المدرسه، أو شركة العقارات، أو البنك، يعني مش بتكون مكتوبه من قبل طرف محايد على الإطلاق، فبنلاقي نوعية شروط جزائيه مجحفه على الطرف الضعيف، ممكن فعلاً توصله للسجن، و مش بنلاقي أي شرط جزائي على الطرف الأقوى. أذكر أني من 3 سنين قرأت أكثر من عقد لمجموعه من الشركات العقاريه كان من ضمنها أن التسليم بعد سنه، لكن بدون أي شرط جزائي في حالة التأخير، و كمية شروط على المشتري لو تأخر بس في سداد قسط واحد. و فات على السنه سنتين، و دلوقتي كل ما أعدى على كل العقارات اللي كان من المفترض تتسلم و تكون ساكنه من سنتين، بلاقيها ما زالت زي ما هي، مجرد هياكل خرسانيه، و طبعاً المشتري ما زال بيدفع في أفساط و بس.

هل الشركات دي فكرت في مدى احتياج المشتريين للوحدات السكنيه دي؟ هل فكرت في مدى الضرر المادي و المعنوي و الاجتماعي الواقع عليهم من التأخير؟ طيب أزاى شخص ممكن يرتب و يخطط لحياته، في ظل حياه مفيش فيها أي التزام من ناحية كل الأطراف اللي بيتعامل معاها في حياته؟



البعد الرابع (فرق توقيت)

أجمالاً، وعلشان أختصر كل اللي ذكرته عن النوع الأول من مشاكل تعاملنا مع الوقت، فعدم احترام أى شخص بيقدم خدمه ما -و خاصةً لو كانت بشكل وظيفي-، لقيمة الوقت، وعدم أدراكه لأهمية التزامه الزمنى مع العميل، ممكن يضر على المدى القريب العميل، و حجم الضرر ممكن يكون كبير، لكن على المدى البعيد، بيقع الضرر على الشخص نفسه، في فكرة "السمعه"، و اللي للأسف ناس كتير مش بتدرك أهميتها، أو بتدركها بس مش بيفرق معاها، و في ناس كتير بتقول يروح زبون بيجي ألف، بس بالتأكيد أن العالم داخل على مرحله، و أحنا داخلين كلنا كجزء من المنظومه الكونيه معاها، حيكون فعلاً عامل الوقت له قيمه أكبر بكثير، خصوصاً مع التنافسيه الكبيره و سوء الأوضاع الأقتصاديه العالميه، فاللى حيخسر سمعته فعلاً حيخسر كتير.

النوع الأول زى ما شفت معايا، بيكون الخطأ فيه من طرف، لكن الضرر بيقع على طرف آخر، لكن في النوعين التانيين اللي حنبدأ نتكلم فيهم، بيكون الخطأ من الشخص نفسه، و اللي بيضر نفسه بنفسه، و نبدأ بالنوع التاني، و اللي سبق أنكلمت عنه بشكل سريع في فصل سابق من الكتاب، و اللي كان أسمه "اللعبه Under Pressure"، و ذكرت أننا حنتكلم عنه بالتفصيل في فصل تاني، و تعال معايا قبل ما نبدأ نتكلم نسأل سؤال، هل في يوم من الأيام قررت تحسب مقدار الوقت اللي بتضيعه في حياتك بيُمثل نسبة قد أيه من أجمالى عمرك؟

أتمنى أنك تكون قرأت الفصل المذكور، علشان تقدر تستوعب معايا كلام كتير من اللي حأقوله، بدون تكرار لما سبق ذكره في الفصل ده، لكن سريعاً كده، فالفصل اللي كان أسمه "اللعبه Under Pressure" " أتكلمنا فيه عن أليه أتخذت من كلام الرئيس الأمريكى الشهير جداً دوايت أيزنهاور، تقدر من خلالها تقييم حياتك ماشيه في أى اتجاه، و هل الاتجاه ده صحيح أو لأ، و ده من خلال مصفوفه بنفس طريقه مصفوفه SWOT، اللي بتستخدم في عمل دراسات الجدوى.

من خلال تقييمنا للأربع خانات الموجودين في المصفوفه، أكتشفنا أن الناس اللي عايشه حياتها في مربع أو خانه "المهام الغير العاجله و الغير الهامه"، هما ناس



البعد الرابع (فرق توقيت)

عايشين خارج أطار الزمن، عامل الوقت ملوش أى أهميه فى حساباتهم، و بتحليلهم قدرنا نقسمهم لفتتين رئيسيتين "المحبط" و "الحالم".

حنبدأ بالفئه الأولى و هى "المحبط". بدايةً، فالأسباب اللى ممكن توصل أى شخص لأن كل اللى بيعمله فى حياته، بيكون مضيعه للوقت و بس، هى أسباب متعدده، و أغلبها طبعاً بتكون أسباب نفسيه، و على رأسها بتكون التجارب السابقه الفاشله، سواء فى مجال العمل أو فى العلاقات الأنسانيه. نوع تانى من الأسباب بيكون الوصول لمرحلة عدم القدره فى أى شئ، و خاصة مادياً، و بيتهيا إلى فى الفتره اللى فاتت شفتنا عشرات من نماذج الأنتحار اللى تمت بسبب الوصول لمرحلة العجز المادى، و بالتأكيد بتكون فيه قبل الوصول لمرحلة الأنتحار، مرحلة طويله من الأحباط. تالت نوع من الأسباب بيكون الوصول لحاله التشبع من أى شئ، و بالتالى بيصاحبها حاله من الملل بكل توابعه.

الأحباط طبعاً بيفقذك الرغبه فى عمل أى شئ، لأن الشخص المحبط بيكون واثق أن أى مجهود حيدله، حيكون فى الأخر بلا أى جدوى، فبيبدأ فى الهروب من أى شئ جدى، لأى شئ بيضيع فيه الوقت و بس، ده لو مفكرش فى الأنتحار. أهم أشكال الهروب بيكون طبعاً النوم الكثير، أو القعهه الغير مجديه على الكافيهات، القهاوى أو الPlay station، أو الهروب لعالم يكون مستخى جواه و محدش يعرفه، و هو عالم السوشيال ميديا، أو طبعاً عالم الGames، أكبر عالم قادر يضيعلك عمرك كله، أو أخيراً الأتجاه لنوعيه من القراءات، ممكن جداً تغيرله تفكيره و أتجاهاته الحياتيه لأتجاهات خاطئه كثير جداً، و أنا هنا مش بقصد أتجاه بعينه، لكن بشكل عام، لأن النوع ده من الأشخاص بيكون سهل جداً التأثير عليه.

و بتتحول كل عناصر الهروب دى -ما عدا آخر عنصر ذكرناه- لنوع من الأدمان، بيوصل الشخص أنه مش بيكون قادر يخرج منه، بل بالعكس بيتحول الموضوع لنوع من اللذه اللى الشخص محتاجها طول الوقت، لأنها فعلياً بتغير كثير فى الكيميا الداخليه لجسمه، فبتصبح فكرة الخروج من مرحلة الأدمان دى فى غلبه الصعوبه.

النوع ده من أنواع فقدان الأحساس التام بعامل الوقت له علاجه، اللى حبيدو سهل جداً فى الكلام، لكن فى نفس الوقت صعب جداً فى التنفيذ، و هو عملية تجديد



البعد الرابع (فرق توقيت)

الأهداف الحياتية بشكل مستمر، ده لو كانت المشكله نفسيه. أما لو كانت المشكله ماديه فهي حلها - وإن كان أصعب نوعاً ما- لكن مش مستحيل، و هو فتح مجالات عمل جديده طول الوقت، لأن واحده من أكبر مشاكلنا كجيل أكبر سناً نوعاً ما، هي فكرة الجمود الفكرى، و أنا من وجهة نظرى أن فيه مجالات و فرص بتفتح طول الوقت، بس محتاجه الى ياخذ الموضوع بشكل مختلف عن اللى أتعود عليه، و يخرج من عباءة التقليديه، اللى عاش فيها طول عمره.

نوصل للفئه الثانيه و هي فئه "الحالم"، و اللى ممكن برضه نسميها فئه "الواهمين"، و حنقسمهم لنوعين محددين، الأولى الحالمين بالثراء، و الثانيه الباحثين عن مكان لنفسهم.

النوع الأول موجود طول الوقت، لكن الأترنت بشكل عام، و تطبيقات التواصل الأجتماعى الكارثيه بشكل خاص، أظهرت النوع ده بشكل واضح جداً، و النوع ده من التطبيقات، و اللى بالتأكيد أنت عارفها أكثر منى، بتدى فلوس علشان تطلع تقول أى حاجه، أو تحددلك حاجات معينه مهينه تعملها، المهم فى الآخر أنها بتدى فلوس، لكن علشان توصل لمرحله الفلوس، فأنت محتاج قبلها مراحل كثير تكون فيها كونت متابعين، و تكون متواجد على طول، و نمط حياتك كله يتغير.

بيبدأ الشخص يبعد شويه شويه عن خط حياته الطبيعى، بيبدأ يكون يومه واقف على التطبيق، يا أما بيكتب Posts، يا أما بيتابع المشاهدات، أو لو محتاج يرد... إلخ. هي حقيقى التطبيقات دى بتدى فلوس، لكن فى نفس الوقت فيها 3 مشاكل، أنا من وجهة نظرى هي بتمثل مشاكل فى العمق.

أولاً، و ده عن تجارب حياتيه كثير شفتها، بتبعد الشخص عن مسار حياته الأصلى، سواء كان شغل أو دراسه، و بتدخله فى دوامه مش بيعرف يخرج منها، غير لما هما يخرجوه من التطبيق ككل. و ده حياخدنا لثانياً و هي أن التطبيقات دى ببساطه جداً ممكن تقفل فى أى لحظه، أو ممكن تغير سياستها، أو ممكن البلد اللى أنت فيها تمنع التطبيق، أو تغير السياسيه الماليه بتاعتها، ففى أى لحظه ممكن الشخص يلاق نفسه بره كل حاجه أتعود عليها، و خصوصاً مادياً.



البعد الرابع (فرق توقيت)

ثالثاً، وأنا عارف أن ناس كثير ممكن متشوفهاش من نفس وجهة نظري، أو ممكن متشوفهاش مشكله من الأساس، وهى أيه هدف التطبيقات دي؟ وليه بتدى فلوس كثير؟ وليه ممكن فى لحظه تلاقى نفسك بره؟ وليه التطبيقات دي بتتعمد تهيّن الناس علشان يوصلوا لمرحلة الفلوس، بنوعيه من الطلبات الغريبه اللى مفروض عليهم يعملها، و يعرضوها على العالم كله؟ عايزك تفكر معايا، حاول تشوف الموضوع من وجهة نظر تانيه، أنا معاك أن الفلوس بتكون مغريه جداً، لكن فيه عشرات التطبيقات ممكن تكسب من خلالها فلوس -صحيح أقل-، لكن بشكل مختلف، عايزك تشوف أنت بتضحى بأيه قدام الفلوس دي، عايزك تراقب معايا المستوى التعليمي لطلبه فى الجامعه، مبيعرفوش يكتبوا جملة واحده صح بالعربي، طيب هما عاملين أيه فى باقى العلوم، وأنا هنا بتكلم عن تجارب بقالها سنين، مش تجارب فى الفتره الأخيره اللى أحنا عايشينها، و اللى ممكن تكون الظروف الأقتصاديّه ضاغطه فيها على كل الناس، فمممكن تضطر تقبل تعمل أى حاجه تدخل فلوس.

نوصل للنوع التاني و هما الباحثين عن مكان لنفسهم تحت الشمس، و كنت من فتره قريبه شفت فيلم أسمه "طريق مولهولاند"، و هو حقيقي واحد من أعظم الأفلام اللى ممكن تشوفها فى حياتك. الفيلم ده فكرنى بجملة قالهاى المخرج الراحل رضوان الكاشف، و اللى كان قريبي، لما كنت عايز أدرس إخراج، بعد ما كنت درست عماره فى كلية الفنون الجميله، هو وجهنى بجملته لنفس السؤال الجدلى الأهم اللى كان الفيلم بيناقشه، و هو هل أنت موهوب و لا موهوم؟ هل فعلاً الخط اللى أنت عايز تختاره لحياتك، و اللى غالباً بيكون خط براق و مميز، أنت مؤهل له؟

المشكلة ببساطه تكمن فى كون بعض الناس عندهم حلم أو وهم بالوصول لمكانه معينه، على فكره هى مش شرط خالص تكون فنيه، يعنى ممكن تكون سياسيه، اجتماعيه، دينيه، بس اللى بيجمع ما بينهم هى فكرة التميز، و كان ليا ذكرى أليمه مع شخص كان وقتها فى حدود ال36، الكلام ده كان سنة 2007، كان حلمه أنه يكون صاحب قناه فضائيه، و هو معدوش أدنى مقومات الأداره، و الغريب أنه بالرغم من كونه مكنش معاه جنيه، إلا أنه بالفعل أفنع ناس كثير بالفكره، و قدر يعمل القناه بفلوس الناس -و أنا كنت منهم-، و عين نفسه رئيس مجلس إداره، و كانت عنده



البعء الرابع (فرق توقيت)

فرصة عمره لتحقيق هدفه بمنتهى السهولة، لكن لأنه معندوش أى مقومات إداريه، القناه وقفت بعد شهرين بالضبط، و خسر الناس كل فلوسها، و أصبح هو عليه عشرات القضايا، لحد ما الموت أخده من مصير كان حيكون أسوء من الموت، و هو السجن. شخص تانى أعرفه ضيع عمره فى البحث عن هويه مميزه، يعنى مره داعيه دينى، مره مدرب تنميه بشريه.. إلخ، و فى الآخر فشل فى كل التجارب دى و فضل محللك سر. طيب أية حكاية التفاصيل دى بموضوعنا و هو الوقت؟

لأ العلاقة موجوده، و هى فكرة أنك تضيع عمرك فى محاولة تحقيق حلم، أنت فى الأساس مش مؤهل له، و يمكن ده بيكون واضح بشده فى مجال الفن، و حاضرب مثال بشخص تالت أعرفه، معندوش أى مقاومات الممثل على الإطلاق، لكن مضيع كل وقته على ورش التمثيل -مش علشان يكتسب مهارات-، لكن على أمل أن حد يكتشفه من خلالها، و بيرفض كل الشغل اللى بيجيله فى مجاله الأساسى، و العمر يروح منه، و الأكيد أنه عمره ما حيحقق الحلم اللى هو راسمه لنفسه، لأنه معندوش الأساس اللى ممكن يتبنى عليه الحلم ده.

الفكره ببساطه أنك محتاج أنك يكون عندك القدره لتقييم نفسك، و فيه فصل كامل فى الكتاب بيتكلم عن الموضوع ده، لكن أحنأ هنا بناقش أضراره من زاوية عامل الوقت، العمر اللى ممكن يروح منك، و ممكن تلاقى نفسك فى النهايه لاحققت نجاح فى الشئى اللى أنت بتحللم بيه، و لا كملت و كبرت فى اللى أنت كنت بتقدر عليه.

الفئه التالته و الأخيره و اللى ممكن نسمى مشكلتها "فرق توقيت" أو فات الميعاد زى ما قالت أم كلثوم، أو حتى "أتأخرت كتير" زى ما قال جورج وسوف، و هى كلها ممكن تكون مسميات بتوصف المشكله، و أعتقد أنك من المسميات دى، بدأت تفهم معايا أيه هى المشكله المتعلقه بعامل الوقت اللى أنا أقصدها، و هى طبعاً مشكله تنفيذ الأشياء خارج إطارها الزمنى.

النوع ده من المشاكل غريب جداً، لأن الشخص حقيقى بيبذل مجهود، لكنه مجهود ضايح، فبتكون خسارته مضاعفه، لأنه خسر وقت و مجهود فى نفس الوقت، بدون الوصول للهدف اللى بذل كل المجهود و الوقت علشانها، و المشكله دى مش متعلقه بس بالعمل، لأ هى متعلقه بكل مناحى الحياه، و ممكن برضه نقسمها



البعد الرابع (فرق توقيت)

لنوعين، النوع الأول المرتبط بالعمل، و هنا ستكون متعلقه بفكرة الTimeline أو خط الزمن لأى مشروع أو نوع من الأعمال، أما النوع الثانى فهو المرتبط بالحياه بشكل عام، بتوقيات حياتك، بفكرة أيه الخسائر الحياتيه اللى ممكن تخسرها لو عملت الشئ ده، بس بعد ميعاده.

نبدأ بالنوع الأول المرتبط بالعمل، و كنا أتكلمنا فى أحد فصول الكتاب المسمى "No Signal" عن فكرة الModules و هى ببساطة أن العمل بيكون مقسم لمراحل، كل مرحله بيكون فيه شخص أو مجموعة أشخاص مسئولين عنها، و الأهم أن كل مرحله بتسلم المرحله اللى بعدها، و يمكن اللى درس الProject management أو إدارة أعمال، فاهم فكرة الTimeline أو خط الزمن، و هو الخط اللى بيترسم عليه الجدول الزمنى لكل مرحله، و مدى تزامنها مع المراحل الأخرى، وصولاً لخط نهاية المشروع. على فكره، أى نوع من مهام العمل بيعتبر مشروع، لو مديرك طلب منك تقرير، فده مشروع، لو يترسم لوحه، فده مشروع، لو بتعمل حلقة من برنامج على تطبيق موبايل، فده مشروع، ببساطة فأى عمل له نقطة إنطلاق و ميعاد تسليم فهو بيتسمى فى علم إدارة المشروعات مشروع.

طيب لو فى شخص أتأخر فى أحد المراحل عن الDeadline بتاعه، اللى ممكن نسميه ميعاد التسليم الخاص بيه، و المشروع ده له وقت تسليم محدد، فهو هنا بيعرض المشروع كله لحاجه من أثنين، يا أما الأنهياري التام، لأن ممكن ميعاد التسليم يكون نهائى و مرتبطه بيه حاجات تانيه، أو أنه -على أحسن الفروض- حيعمل حالة ضغط على الناس اللى حتكمل المراحل اللى بعده، لأنه ضيق عليهم المده الزمنيه الخاصه بيهم، فده ممكن يؤثر على الأقل على جودة المنتج أو الخدمه.

يمكن أقوى مثال فى مجال العمل لفكرة الTimeline هى فكرة المشاريع الهندسيه فى مجال الأنشاءات، و اللى بيفترض أنها دايماً لها ميعاد تسليم محدد، و الميعاد ده ممكن العميل نفسه يكون مرتب عليه جدول زمنى خاص بيه هو، فتخيل معاى أى تأخير فى أى بند حيعمل مشاكل قد أيه، مش بس خاصه بالجدول الزمنى لشركة الأنشاءات، لكن كمان الجدول الزمنى للعميل، فأحياناً التأخير فى جزئيه، بيضر تماماً بمشاريع كامله، و بمصالح العملاء كمان، و أحنا لسه ذاكرين تجربته عمليه من كام فقره فاتت.



البعد الرابع (فرق توقيت)

طيب ممكن الشخص يكون بيعمل بشكل فردى، و هنا الشخص بتكون مسئوليته مضاعفه، زى مثلاً المحامى، الدكتور... إلخ، لأنه ببساطه شايل الليله كلها، و برضه سبق و ضربنا أمثله فى الفصل ده.

أوصل للشكل التانى، و هو المرتبط بالحياه بشكل عام، و اللى علشانه كانت فكره الفصل ده كله، علشان كده أجلته للأخر، و السؤال هنا هو ما مقدار تأثير أى تأخير فى تنفيذ أى شىء على حياتك؟

بدايةً، و بالرغم من أنى مش من الناس المؤمنه بالأمثال الشعبيه، إلا أن فيه بعض الأمثال بعترها نوع من الحكم، زى مثلاً "كل وقت و له أذان"، "بعد العيد ميتفتلش كحك"، أو "بعد ما شاب ودوه الكتاب". فيه كمان حكم بتتكلم عن عامل الوقت، زى "لا توجل عمل اليوم إلى الغد"، و طبعاً "الوقت كالسيف إن لم تقطعه قطعك". كل الأمثال و الحكم دى بتؤكد أن الضمير الشعبى كان مُدرك لأهمية عامل الوقت فى حياتنا، و أن فكرة أثر تنفيذ أى شىء بعد وقته المحدده، مفهومه موجود عندنا من زمان، لكن هل أحنا رغم إدراكنا لأهمية ال Right timing أو فكرة تنفيذ الشىء فى وقته المناسب، مش بننفذ ده على أرض الواقع؟

خلينى برضه أقسم مشاكل الوقت فى حياتنا لنوعين، نوع على ال Short term أو على المدى القصير أو القريب، و نوع على ال Long term أو على المدى الطويل أو البعيد.

طبعاً حنبدأ بالنوع الأول و هو أهمية عامل التأخير على المدى الزمنى القريب، و ده طبعاً بيتمثل فى أغلب تفاصيل حياتنا اليوميه، و هل إحنا بنحسن تنظيم وقتنا علشان متأخرش فى تنفيذ المتطلبات الحياتيه، و اللى التأخير فيها دائماً بيكون مُكلف، سواء على المستوى المادى، أو أى تكلفات أخرى تبعاً لنوع التأخير؟ السؤال ده حيرجنا للفصل المُسمى "اللعبه "Under Pressure""، و مدى تأثير تنظيم وقتنا على التوفيق بين كل متطلبات حياتنا.



البعد الرابع (فرق توقيت)

خليني أسألك سؤال بسيط جداً، لو أنت صانع محتوى على أى Application، و المحتوى الخاص بـيك بيعتمد على الحدث اليومى، أو زى ما يقال الTrend، فما هو تأثير أنك متزلزل الحلقه بتاعتك فى نفس يوم الحدث؟ ببساطه حتخسر حاجتين، أولاً أن ناس كثير حتسبقك، فمش حتاخذ السبق زى ما بيقولوا فى الصحافه، و ممكن جداً متابعتك يبدأوا يتحولوا لمشاهده حد تانى أسرع منك، ثانياً الحدث حيكون الأهتمام بيه بدأ يقل، فبالتأكيد نسب المشاهده عندك حتقل بنسبه كبيره جداً، يعنى النقطتين بيوصلوا لنفس النتيجة.

نفس الكلام بيحصل فى تفاصيل كثيره فى حياتنا، يعنى تخيل مثلاً لو فى إعلان وظيفه، و أنت أتأخرت فى أنك ترسل الCV بتاعك، الأمثله كثير جداً، لكن للأسف أحنأ مش بنتعلم، طبعاً ده غير التأخير فى الأمور الحياتيه العاديه، و كنت ضريت أمثله برضه فى الفصل المسمى "اللعبه "Under Pressure""، زى التأخير فى دفع الأقساط و عواقبها الأجتماعيه و النفسيه و الماديه، زى أهمال أنك تروح تكشف لو بدأت تشعر بأعراض أى مشكله صحيه، و العواقب اللى حتحصلك من مضاعفات ممكن علاجها يبقى أصعب بكثير، زى التأخير فى تسليم أى شغل و عواقبه... إلخ.

خُلاصه الكلام أن الحياه فعلاً بتضغط علينا، أن عامل الوقت أحياناً بيكون مش فى صالحنا، لكن بالتأكيد أن بشئ من التنظيم حنتجنب مشاكل كثير جداً، خصوصاً لو قدرنا نقلل من الوقت اللى بيضيع فى حاجات مش مهمه و نقدر نستغنى عنها.

نوصل للنوع التانى، و هو آخر موضوع حأنكلم عنه فى الفصل ده، و هو تأخير تنفيذ كثير من الأمور فى حياتنا على الLong term أو على المدى الطويل أو البعيد، و النوع ده هو أخطر حاجه ممكن تعملها فى حياتك، أكبر ظلم ممكن تظلم بيه نفسك و يدمرك حياتك كلها، لأن أسوأ شئ ممكن تضر بيه نفسك، هو أنك تعمل الشئ الصح فى التوقيت الغلط.

النوع ده بيشمل كل أنواع القرارات المصيريه فى حياتنا، زى الزواج، السفر، الدراسه، بداية مشروع أو عمل جديد... إلخ، و ده بيكون لعاملين، العامل الأول خاص بـيك، و هو أن مش ده الشئ المناسب اللى ممكن تعمله فى المرحله العمريه دى، أما



البعد الرابع (فرق توقيت)

النوع الثاني فهو تغير العوامل المحيطة بيك، و خليئي أضرب لكم مثال خاص بي على النوع الثاني.

في ديسمبر 2019 قررت أني أبدأ مشروع صغير و هو الCo workspace، و اللي هو عبارة عن مكان بتقسمه لغرف متعددة الأغراض، يعني تصلح لأجتماعات، دروس، بروقات، ورش تدريب، طلبه عايزين يتجمعوا مع بعض... إلخ، وأخترت مكان مناسب جداً، و صرفت على المشروع في تأثيره بشكل مناسب. لكن للأسف مكنتش عامل حسابي -زى كل الناس- أن الكوفيد 19 اللي ظهرت في الصين وقتها، حتكون عندنا بعد أقل من 5 أشهر، و قد كان. وقف المشروع تماماً، و فضلت قافل المكان لمدة سنة كامله، بدايةً من أبريل 2020، لحد ما لغيت المشروع، بعد ما كنت خسرت مبلغ كبير جداً في منتصف 2021.

بالرغم من أني بنسبه كبيره كنت مش غلطان، لكن ده نوع من أنواع أنك تعمل شئ صح في توقيت غلط أو مش مناسب، و ممكن ناس كثير تكون عارفه مصفوفة SWOT أو Strength, weakness, Opportunities and Threats، أو نقاط قوه، نقاط ضعف، فرص و تهديدات، و اللي تعتبر أفضل طريقه لأنك تعمل دراسة جدوى مبدئية لأي مشروع قبل ما تبدأه، و أنا لو كنت وقتها عملتها، كان ممكن أكتب في خانة الأخطار خطر الكوفيد 19.

مشاكل أختيار التوقيت الخاطئ زى ما قلنا ممكن تنقسم لقسمين، الأول و هو اللي بدأنا الكلام فيه، و هو أختيار توقيت خاطئ لتنفيذ المشروع أو القرار، زى المثال اللي أنا لسه ذكره، و علشان كده فلأزم نعمل دراسة جدوى لكل خطوه مهمه في حياتنا، و لأزم نتأكد من أن الظروف مناسبه للخطوه دي. طبعاً ده بيكون واضح جداً في خطوة الأقدام على دخول مشروع تجاري، أو أى عملية شراء أو بيع، يعني مهم جداً تعرف تبيع أمتي أو تشتري أمتي -ده لو مكنتش مزنونق- تبعاً لأليات السوق، علشان لا تشتري بخساره و لا تبيع بخساره.

كمان مهم جداً أنك أو أنك لو داخل أو داخله مشروع زواج أو أنجاب، يكون التوقيت مناسب بالنسبالك، متمسحش لأي ضغوط أنها تأثر على قرارك، و التوقيت المناسب هنا لازم يكون مناسب من أنتاجات كثير، نفسيه، ماديه، اجتماعيه،



البعد الرابع (فرق توقيت)

اقتصاديته، و اقتصاديه هنا تختلف عن ماديه، و كمان المناخ و البيئه المحيطه لازم يكونوا عوامل مساعده في حالة الأناجب، على أنك تربي أولادك بشكل مناسب، مش لازم تعاملك مع الموضوع يكون بمبدأ "سنة الحياه"، أو "نصف الدين" أو فكرة أن تأجيل الأناجب حرام، و أنا مش عارف حرام دى مصدرها آيه، لأن ده قرار بيأثر - مش بس على حياتك أنت-، لكن على أطفالك اللي حبيجوا للدنيا و ملهمش أى ذنب في عامل التوقيت اللي أتولدوا فيه.

أدخل بيك سريعاً على القسم التاني، و هو اللي التأخير بيكون من عندك أنت، و زى ما سميته "فات الميعاد" أو "تأخرت كثير"، و هنا بتكون الكارثة الكبرى، أنك تعمل شئ صح جداً، لكن بعد ما توقيتته المناسب يكون عدى، و ده أمثله الحياتيه كثير جداً، مثلاً في الدراسه، لو قررت تعمل ماجيستير أو دكتوراه متأخر، بعد ما يكونوا خلاص، مش حضيفوا شئ لل Career الوظيفي الخاص بيك، أو أنك تدرس لغه جديده في توقيت أنت خلاص مبقتش محتاج لها، و ده طبعاً ينطبق على كل أشكال تعلم أى شئ جديد. و طبعاً زى قرارات السفر أو الهجره في توقيت غير مناسب، اللهم إلا لو كان الهدف للجيل التاني أو الأولاد، أو إقامة المشاريع خارج إطارها الزمنى. يعنى من 20 سنه كان مازال مشروع الجريده أو المجله الورقيه مريح، أو على الأقل له سوق، دلوقتي اللي يفكر فيه يبقى عايز يخسر. زى برضه خطوة الأناجب في سن متأخر، ممكن الشخص يكون صحياً و نفسياً مش حيقدر على تربية أولاده، و ممكن كمان ما هو أبعد، أنه يعرضهم لمرحلة يُتم مبكره.

طبعاً و بالرغم من كل اللي أنا قلته، فبرضه ممكن الإنسان يعمل كل الأمثله اللي أنا ذكرتها، و في توقيت غير مناسب، لكن لأنها فضلت طول عمره بتمثل حلم عنده، و أنا شخصياً ما زلت مُصر أتعلم كثير من الحاجات أياً كان سنى، لكن بهدف مختلف و هو الرغبة في التعلم، فهنا أختلاف الهدف أعطى للشئ قيمه مختلفه تماماً.

في النهايه فحاول دائماً أنك تكون متأكد من أنك بتعمل الشئ الصح في التوقيت الصح، لأن أحنا أصبنا بنعيش في مرحله زمنيه مينفعش فيها خساره أى شئ، لا وقت و لا فلوس، فتقليل الخسائر شئ ضرورى، أحنا كده كده بنخسر من عشرات الأتجاهات التانيه اللي ملناش يد فيها، فمتبقاش الخساره من عندنا أحنا.



البعء الرابع (فرقة توقيت)

و أخيراً فأحنا مش حُتّاح لنا الفرصه اللي أُتيحت لبطل "Groundhog day" أو أحمد حلمى فى ألف مبروك، بأن الزمن يدينا الفرصه لتصحيح أخطائنا، العمر بيتعاش مره واحده بس، فيا ريت أحنا اللي نعمل عملية مراقبة دائمه لحياتنا، الغلطه اللي وقعنا فيها منكرهاش مره تانى، نقلل الوقت الضايح فى تجارب غير مجديه، لأن مش دائماً الفرصه بتيجى مره تانيه، و يا ريت كمان لو فى قرار أو مشروع قادرين نعمله دلوقتى منأجلوش، لأن الفرصه اللي موجوده النهارده، ممكن بكره نتيجته عشرات العوامل الخارجيه متبقاش متاحه، وأسألنى أنا.

17 أبريل 2023



"هل خُلِق الكون لنا فقط؟
لماذا الآخر دائماً مخطئ؟
لماذا نحن متميزون دائماً؟"



چين أبوكو أيه؟

من حوالى 3 أشهر تقريباً، لما أعلنت شبكة نيتفلكس عن البرومو الترويجي للسلسله الوثائقيه اللى كانت من إنتاجها، و اللى كانت بعنوان "الملكه كليوباترا"، قامت الدنيا فى مصر و مقعدتش لفته مش قليله، و أشتعلت النقاشات على وسائل التواصل الأجتماعى، و ظهر باسم يوسف فى مداخله و مناظره لمدة 9 دقائق كامله فى واحد من البرامج التليفزيونيه الأمريكيه الشهيره، و كان فى حالة إنفعال شديد، و كان المتناظر على الجانب الأخر شخص من المنتمين لتيار الـ "Afrocentrism"، و حأشركك معنى المصطلح ده كمان شويه -لو كنت مش عارف معناه-، لأن ده حيكون جزء مهم جداً من موضوعنا الرئيسى فى الفصل ده، لكن فى البدايه خلينى أستأذنك أنى أتكلم سريعاً عن الكيان اللى أثار الجدل آخر 4 أو 5 سنين، و أتوجهت له عشرات الأنهات المختلفه، سواء بالترويج للمثليه أو طمس الحقايق التاريخيه، و الكيان ده طبعاً هو نيتفليكس.

قبل ما أحكى قصه نيتفليكس، أحب بس أحكيك حكايه سريعه جداً مرتبطه بفكرة نيتفليكس، الحكايه ملخصها أن فى سنة 2008 جالى صديق عمرى، و اللى بعتبره واحد من العباقره اللى أنجبتهم مصر، بفكره جديده و غريبه، و صديقى ده أسمه دكتور محمد موسى، -و اللى سبق و أشرت له بدون أسم فى فصل سابق- و هو مهندس اتصالات مصرى سافر لدراسة الماجستير و الدكتوراه فى بريطانيا، و كمل هناك كأستاذ جامعى، و حالياً هو عميد كليه و نائب رئيس جامعه هناك. كانت فكرته ملخصها سريعاً هو عمل شبكه تليفزيونيه على شبكة الأنترنت، فيها مكتبه من مئات الأفلام و البرامج، و المُشترك يقدر يشوف الفيلم اللى هو عايزه فى الوقت اللى هو عايزه.

دكتور محمد كان نفسه يلاقى فى مصر أى ممول أو راعى للمشروع، لكن كل الناس اللى قابلناهم وقتها، قالوا أن ده مشروع وهمى، أو على الأقل مش عملى، و طبعاً مننشاش أن سرعة الأنترنت فى مصر وقتها كانت فى منتهى البطئ، فأغلب الناس مكنتش متخيله أن ده ممكن يكون مشروع على أرض الواقع، ففشلت فكرة المشروع



من قبل ما يبدأ، لأن مفيش أى ممول أو راعى تحمس له، فى نفس الوقت اللى كان كيان زى نيتفلكس، و بعض الكيانات الأخرى، بياخدوا أول الخطوات الفعلية للمشروع ده، و دى حاجه توضحلك المشكله المصريه الأبدية، أننا مينفعش أبداً نكون الرواد ، لأزم نعمل الحاجه بعد ما غيرنا يكون عملها، بنخاف طول الوقت من المغامر، حتى لو كانت نسبة نجاحها كبيره و شبه مضمونه.

المهم أرجع معاكم لشبكة نيتفليكس، و اللى من وجهة نظرى أنها زى ما هى واحده من أهم الأدوات اللى بتستخدم لتغيير المفاهيم الأصليه على مستوى العالم، و نشر أفكار و قيم غريبه، لكن فى نفس الوقت أنا شايف أن نيتفلكس كان ليها دور مهم جداً فى نشر السينما فى كتير من الدول اللى كانت السينما فيها لسه فى البدايات، زى كتير من الدول الأفريقيه و اللاتينيه و الشرق أسويوه، اللى شاركت نيتفلكس فى إنتاج عشرات الأفلام فيها، و الأفلام دى أنشافت بشكل كويس جداً على الشبكه، زى مثلاً الفيلم النيجيرى "Citation" أو إقتباس، ده غير عشرات الوثائقيات المهمه جداً اللى عملتها شبكه نيتفلكس. و مننشاش أن مسلسل زى تلت التلاته اللى عُرض فى رمضان اللى فات، فكرته كانت متاخده من فيلم Loving Adults الدانماركى الموجود على نيتفليكس، و أعتقد أن لولا نيتفليكس، عمر ما كان كاتب مصرى ممكن يفكر يشوف فيلم دانماركى، بأختصار، فنيتفليكس بالرغم من كل مساوئها، إلا أنها قربت المسافات جداً بين الثقافات فى العالم كله، و ده فى حد ذاته دور فى غاية الأهميه، و بأعتبره دور ريادى فى نفس الوقت.

أما بخصوص الأفكار اللى بتحاول نيتفلكس نشرها، و اللى من بينها الموضوع اللى حنتكلم فيه النهارده، فأنا طول عمرى بقول أن الفكر لا يحارب إلا بالفكر، كل واحد حر، يقول اللى هو عايزه من وجهة نظره، لكن أنت ردك لازم يكون بالحُجه و بالدليل، مش بالصوت العالى. نظرية المؤامره اللى أحنا غارقانين فيها حلها الوحيد أن أحنا يكون عندنا ردودنا، و بالأثبات، و خصوصاً أن شبكه زى نيتفلكس بأشترافات، بمعنى أن اللى بيشفوها بيشفوها بمزاجه، بيدفع فلوس كتير علشان يشوفها، فهى مش مفروضه عليك و لا على أى حد، لكن ردودنا عليها لازم تكون بأن أعمالنا تكون على نفس المستوى الفنى، فبالتالى نقدر نسوقها، و من خلالها نقدر نرد بشكل عملى، لكن للأسف أحنا كدول عربيه لا عندنا علماء أثار أو أركيولوجي



عرب، و دائماً الى بيبيجي يقولنا تاريخنا هما الأوربيين أو اليابانيين، و لا عندنا إنتاج سينمائي أو تسجيلي يرقى لمستوى المشاهده، يعني لا حنقدر نرد لا بالفن، و لا بالعلم -ده إن كنا أحنأ الى صح، فميفعش بعد كده نشتكى و نقول كل شويه التعبير الأشهر "نظرية المؤامرة" تانى خالص.

أرجع معاك تانى للكلام عن نيتفليكس، و خلوني أقولكم بسرعه كام معلومه عن نيتفليكس، الكيان الى أظهر بوضوح من خلال السلسله الوثائقيه "الملكه كليبواترا" المشكله الى حناقشها الحلقه دى، و بالمناسبه نيتفليكس بتحتفل السنه دى بعيد ميلادها ال25، الكيان الى بدأ كشركه صغيره جداً فى سنة 1998، بس تفتكر كيان زى نيتفليكس بدأ أزاى؟

أولاً الى أنشأ نيتفليكس هما شخصين، الأول أسمه رييد هاستينج، و هو عالم رياضيات و كمبيوتر، و الثانى هو مارك راندولف، و ده راجل بتاع marketing، و هنا حنلاقي الخلطه السحريه الى قادره تحقق أى نجاح، و هى الخلطه بين العلم و التسويق، الخلطه الى أحنأ أغلب الوقت مفتقدينها فى أى مشروع بنعمله.

فى سنة 1997، و كان وقتها شرايط الVHS بتنتهى، و الDVD بيظهر بقوه، و الى كان حاضر فترة التمانينات و التسعينات فى مصر، يفتكر حاجه أسمها نوادى الفيديو، و دى كانت عباره عن محلات شبه المكتبات، بس بدل الكتب كانت شرايط فيديو عليها أفلام و مسرحيات، الناس بتروح تأجر الفيلىم لمدة يوم أو يوم مقابل مبلغ مالى معين.

لكن لما بدأت شرايط الفيديو الVHS تختفى، و يحل محلها الDVD، أختفت نوادى الفيديو فى مصر، و مظهرتش فكرة نوادى للDVD، لكن فى أميركا، و دى النقطة الى أستغلها هاستينج و راندولف، كانت الDVD's بتتأجر، فهما بدأوا فى سنة 1997 فكره جديده جداً على العالم كله، و ده بعد ما راندولف أتأثر جداً بموقع أمازون، و فكرة البيع online، ففكره تانى ممكن يتسوق online غير المنتجات الى أمازون بتبيعهها، فكانت الفكره أنهم يعملوا موقع لتأجير الDVD's من خلال شبكة الأنترنت، و أنت كعميل تدخل على الموقع و تدور من خلال قوائم الأفلام و



مدينه ابوكرايه

تختار الفيلم الى أنت حابب تشوفه، و الفيلم يوصلك لحد البيت عن طريق البريد و أنت قاعد مريح على الكنبه.

في السنه الى بعدها على طول دخلوا فكره جديده تانيه على العالم، و هي فكرة الأشتراكات الشهريه، بحيث أنك لو دفعت أشتراك شهري، تقدر تأجر أى عدد من الأفلام طول الشهر، و بدون غرامه تأخير لو تأخرت، و دي كانت فعلاً نقله تسويقيه جريئه جداً.

النقله الحقيقيه بجد كانت النقله الثالثه سنة 2000، و هي الفكره الى بتستخدمها كل مواقع التسويق حالياً، و هي فكرة الcustomization، أو التسويق بحسب العميل، و ده من خلال أستبيان للعميل و تقييم لكل فيلم ببشوفه، و معرفه ذوقه في الأفلام، علشان يقدروا يرشحوله بعد كده الأفلام اللي تناسب ذوقه، بناء على دراسه كل الأستبيانات اللي هو ملاحظها Online، زائد طبعا نوعية الأفلام اللي هو بيختارها، و دي كانت البدايه الحقيقيه لفكرة الإعلانات اللي بتوصلك حسب أهتماماتك، و أن ممكن نفس الصفحه يكون عليها إعلانات مختلفه لكل عميل.

نعدي كام سنه و نوصل ل2007، و معاها حصل أول streaming أو مشاهده مباشره عن طريق الأنترنت، و ده بعد سنتين بس من ظهور الYoutube، و اللي كانت لسه إمكانياته مش عاليه قوى، فهنا كانت شبكة نيتفليكس أفضل بكثير، لأنها أهتمت بزيادة سرعات الأنترنت و البنيه التحتيه لخدمة شبكتها، فكانت سرعات المشاهده عند نيتفليكس أسرع و أفضل.

طبعا أنا بأختصرلك حاجات كثير، علشان نوصل لأخر محطة أذكركها في تاريخ نيتفليكس، و هي مرحله بداية أنتاجهم الخاص، و بدأت بأول مسلسل أنتجوه و هو House of cards سنة 2013، و من هنا بدأنا نسمع عن مشاكل أعمال نيتفليكس، و أقصد هنا طبعا الأعمال اللي هي بتنتجها، مش بتشتريها علشان تعرضها، و النقطة ده هي اللي حتدخلني على العمل اللي أظهر المشكله الأخيره و هو "الملكه كليبواترا"، فيا ترى لو كنت مش عارف القصه، كانت أيه المشكله في عمل docudrama عن الملكه كليبواترا، و كلمة docudrama معناها عمل وثائقي لكن فيه مشاهد تمثيلية، فتعال معايا أستعرض معاك المشكله بالضبط.



ليه السلسله الوثائقيه "الملكه كليوباترا" عملت حالة الغضب دى عند الشعب المصرى؟ و هل سبب الغضب أن العمل بيقول معلومات غلط؟ بالتأكيد لأ، لأن الناس فى مصر ثارت على العمل من قبل حتى ما تشوفه، مجرد بس الناس ما شافت ال trailer الدنيا قامت، طيب هل سمعوا أن العمل بينسب مثلاً لبنى إسرائيل الفضل فى أنجازات الحضاره المصريه القديمه زى كثير من الأعمال التانيه؟ برضه لأ. طيب أيه هى المشكله اللى غضب بسببها الشعب المصرى؟ و طلع بسببها باسم يوسف فى المداخله التلفزيونيه؟

حالة الغضب كان سببها يكمن ببساطه متناهيه فى نقطتين، و الأثنين مربوطين ببعض. النقطه الأولى كانت أن الممثله اللى قامت بدور كليوباترا بشرتها سمراء، حيطلع حد يقولى، طيب ما المصريين سواء قديماً أو حالياً فيهم نسبه مش بسيطه لون بشرتهم يميل للسمار، أقولك -لو مكنتش عارف- أن كليوباترا ما كنتش مصريه أصلاً، لأن كليوباترا اللى حكمت مصر، هى من أحفاد بطليموس مؤسس الأسره البطلميه، و بطليموس هو واحد من القاده اللى جم مصر مع الأسكندر الأكبر، و حكم مصر هو و أولاده و أحفاده من بعده وصولاً لكليوباترا، و معنى كده أن كليوباترا أصلها مقدونى يونانى، و إن كانت أسرتها متواجده و بتحكم مصر من قبل ما كليوباترا تتوج على عرش مصر ب 254 سنه.

السبب التانى هو ربط فكرة اختيار ممثله ذات بشره سمراء، بحركه منتشره بشكل كبير فى العالم الفتره دى، و ده بالرغم من أن الحركه أنأسست سنة 1964 - يعنى من قبل المسلسل ب 59 سنه-، و هى حركة الAfrocentrism، الحركه اللى من أهم معتقداتها -و ده على عهده الموسوعه البريطانيه- أن مصر القديمه كانت جزء من أفريقيا السوداء الموحد، لحد ما الأوربيين سرقوا أفكارها وتقنياتها و حجبوا كل إنجازاتها، و نسبوا الأنجازات دى لنفسهم. و من هنا نفهم ليه كان المناظر اللى كان قدام باسم يوسف هو أمريكي من أصل أفريقي.

و للأمانه فجزء بسيط من منطقهم صحيح، خاصة و أن علمياً و بالأثباتات، فأول تجمعات أنسانيه حضاريه كانت فعلاً فى أفريقيا، و بالتحديد فى منطقة السودان



و أثيوبيا، بالأضافه لأن فعلاً فيه حضارات في الدولتين دول تحديداً، تزامنوا مع الحضاره المصريه القديمه، و هما الحضاره الكوشيه في السودان و جنوب مصر، و اللي هي النوبه حالياً -سواء نوبه مصر أو نوبه السودان-، و حضارة بلاد بنط، و اللي هي أثيوبيا حالياً، لكن فكرة أن مصر كانت جزء من حضارات أفريقيا السمراء، فده تهريج تاريخي، و الدليل على كده عشرات الرسومات اللي على المعابد، و اللي مصوره المصريين بشكلهم و الأفارقه بشكلهم، فهنا الهبد التاريخي ده لا محل له من الأعراب.

الموضوع ده حيدخلني على الحاله اللي حصلت بين بعض المصريين و بعض الأخوه السودانيين اللي جم مصر خلال الفتره الأخيره، من بعد أحداث السودان الأخيره، و كانت العنصريه دائماً محور النقاشات و الخلافات في الحوار، و للأمانه فالمصريين على مدار سنين طويله فاتت، كانت نظرتهم لأفريقيا بشكل عام سيئه جداً، و القيادات السياسيه أهملت أهميه أفريقيا لمصر بشكل تام، و السينما المصريه كانت دائماً بتسيء للأفارقه و البشره السمراء، فده طبعاً كان له رد فعل عندهم، و أصبح عند الكثير منهم حاله من عدم التقبل للمصريين، و حتى كثير من الأخوه الأفارقة اللي بيبيجوا مصر كمرحله لطلب اللجوء لأوربا أو أمريكا، بيعزلوا نفسهم بشكل تام عن المصريين، و كأنهم عايشين في مجتمعات مقفوله لوحدهم، و ده كله بسبب سياسيات و أفكار متخلفه بقالها سنين.

الموضوع ده حيدخلنا على موضوعنا الرئيسي، و هو الهوس العرقي، و اللي بدأ يزيد جداً السنين الأخيره، و الهوس ده طبعاً واحد من الوسائل اللي بتستخدم في إشعال الفتن العرقيه، و اللي طبعاً ليها أكثر من هدف بيخدم أغراض النخبه اللي بتحكم العالم، و تعالوا نبداً ببعض أشهر المشاكل العرقيه اللي حصلت على مدار التاريخ، و اللي سببت كوارث عالميه أثرت علينا لحد اللحظه دي، و حتفضل تأثر في حياة أولادنا و أحفادنا لأجل غير مسمى، و أنا أكتفيت بس ب3 نماذج، لكنها بالفعل نماذج غيرت كثير جداً من ملامح التاريخ، و مآثره في حاضرنا و حياتنا لحد النهارده.



حأبدأ بجزء حيسبب كثير من الأتقادات و الهجوم، بالرغم من أن الأحداث دى مذكوره فى عشرات الكتب اللى أتكتب عن التاريخ الإسلامى المبكر فى مرحلة ما بعد الرسول، لكن فى ناس كثير بتاخذ من أى كتاب اللى يناسب مصالحها و أفكارها، و تنكر تماماً أى حاجه تانيه مش حتناسبها، حتى لو موجوده فى نفس الكتاب، فالعرقية، و اللى كان مفهومها وقتها بيتمثل فى القبليه، من أكثر النقط اللى سببت الصراعات بين المسلمين الأوائل، و اللى تحولت فيما بعد لمذاهب بتكفر بعضها، و تعالوا ندخل على الأحداث الموثقه.

الحادثه الأولى و حأختصرها لكم بسرعه، كانت بعد وفاة الرسول مباشره، لما تم إجتماع للأنصار فى سقيفة بنى ساعده، و كان الأجماع بهدف أختيار خليفه للمسلمين يخلف الرسول، و ده تم حتى دون أنتظار دفن الرسول، و تم أختيار سعد بن عباده سيد الخزرج كأمير للمسلمين، فلما وصل أبو بكر و عمر و أبو عبيده بن الجراح، تمت السيطرة على الموقف من قبل المهاجرين، و وصول الخلافه لأبى بكر و كل اللى تبعوه من خلفاء راشدين، كانت بزعم أن الخلافه لازم تكون فى قريش، بالرغم من أن مفيش أى سند قرآنى بيدعم المبدأ ده، و بسببه تم أعتيال سعد بن عباده، و نُسبت عملية أعتياله للجن، و خلينى أقولكم بيتين شعر قيلوا وقتها، و برضه تم نسبهم للجن، أه و الله، بيقولوا أن الجن هما اللى كتبوهم عن قتلهم لسعد:

نَحْنُ قَتَلْنَا سَيِّدَ الْخَزْرَجِ سَعْدَ بْنَ عَبَادَةَ
وَرَمَيْنَاهُ بِسَهْمَيْنِ فَلَمْ نُحِطْ قَوَادَةَ

ندخل على الحاله التانيه، و هى الأكبر و الأكثر تأثيراً لحد النهارده، و هى أحداث الفتنه الكبرى، و اللى كتب عنها طه حسين كتاب من جزئين بنفس الأسم، و حأختصرها لك بسرعه. لما تولى عثمان بن عفان الخلافه، و هو أصلاً قريشى من بنى أميه، اللى هما أصبحوا الأمويين بعد كده، فكان بيجمال قبيلته بنى أميه فى كل حاجه، بدايه من أنه كان بيخصصهم مبالغ كبيره من بيت مال المسلمين، لتوليتهم المناصب الكبيره فى الدوله الإسلاميه، و كان التمييز بيحصل بشكل سافر و واضح، لدرجة أن ده كان أحد أسباب أعتياله، و كانت عملية الأعتيال بتحريض من الثلاثى السيده عائشه، طلحه بن عبيد الله، و الزبير بن العوام، و كانت السيده عائشه



مبينه ابوكوايد

بتنادى في المسلمين و تقول: "أقتلوا نعتلاً فقد كفر" و تقصد بنعتل عثمان بن عفان، و نعتل ده كان رجل يهودى عايش فى المدينه، شبهت السيده عائشه عثمان بن عفان بيه، و ناخذ بالنأ أن أتئين من المبشرين بالجنه، و زوجة رسول الله، حرضوا على رابع برضه مبشر بالجنه، و كان متجوز أتئين من بنات الرسول.

بعد تولى على بن أبى طالب الخلافه بعد عثمان بن عفان، دخل الخلاف العرقى الى على الخلافه منجى تانى، بين على و أبناء عمومة الرسول من جهه، و بين الأمويين من جهه تانيه، و تقريباً كل الناس متعرفش -و أنا كنت منهم لفته قريه جداً-، أن الحسن بن على بن أبى طالب، تولى الخلافه بعد أبوه لمدة 6 أشهر، لكنه تنازل عنها لمعاويه بن أبى طالب حقناً للدماء، و من بعدها بدأت أهم مشكلتين فى التاريخ الإسلامى يظهران، أولاً: أن الخلافه أصبحت بالوراثه لفته طويله جداً بعد كده، و من ده خلال الخلافات المتتابعه بدءاً من الأمويه. ثانياً: أن الدوله الإسلاميه أنقسمت قسمين، سنة و هما الأمويين، و شيعه الى هما أنصار الحسين و على، بمعنى أن أنقسام الدوله الإسلاميه كان لأسباب قبلية، مش عقائديه خالص.

طيب أنا ليه بذكر المثالين دول تحديداً؟ لأن العرقيه و النظره الطبقيه كانت السبب الفعلى فى أنقسام الإسلام من البدايات، و أنا هنا مش مهم عندى مين الى مذهبه على حق، و مين الى على باطل، لكن المهم عندى هو الفكره، هو التمييز، ليه فكره أن أنا الأحسن، بالرغم من أن فكره الدين نفسه هى دعوه للمساواه، و أدينا لحد اللحظه دى بنعانى من أثار خلافات، و أسمحلى أقول مطامع حصلت من 1400 سنه، ليومنا هذا، لدرجة أن فى كل الأديان أصبح عدوك الأول هو الى من دينك بس من مذهب مختلف، و ده بيفكرنى بمثل مصرى بيقول "ما عدوك إلا ابن كارك".

النموذجين التانى و التالت من أسوأ التجارب الى مرت بيها البشرىه على مدار تاريخها كله، و الى بجد أنعدمت فيها الأنسانيه بشكل تام، و خليينى أبدأ الكلام عن النموذج التانى بمسلسل يمكن كتير من الى فوق الأربعين يفتكروا أيام عرضه على القناه التانيه، و الى كانت مصر كلها بتنظر الساعه 9 علشان تشوفه، و هو المسلسل



مدينه ابركوايه

الأمريكي Roots أو الجذور، و اللى أشهر في مصر بأسم الشخصيه الرئيسيه فيه و هو "كونتا كنتى".

المسلسل كان بيحكي عن الطرق المهينه و ألا أنسانيه اللى أستخدمها الأمريكان الأوائل، و اللى كان أغلبهم من المهاجرين الأوربيين، في عملية جلب الكثير من الأفارقة عن طريق الساحل الغربى لأفريقيا لأمريكا، الدوله الناشئه وقتها. كانوا يربطوا العشرات من رقبتهم في سلسله واحده و يجروهم، و التعامل طبعاً ألا آدمى مع اللى بيرفض أو بيحاول يهرب، و أزاى كانوا بيتعاملوا على ظهر المراكب وصولاً لأمريكا، طيب كان أيه الهدف من جلب الأفارقة لأمريكا؟



طبعاً الهدف كان علشان يشغلهم في بعض الأعمال الوضيعه جداً اللى حيرفضها الأوربيين، بالرغم من أنهم كانوا بيشتغلوها في بلادهم، أو كجنود يكونوا في مواجهه، و طبعاً بيكونوا الأكثر عرضه للموت. لكن أنا مش حأكلمك عن الموضوع ده، أنا حأكلمك عن ما هو أفضح.



مدينة ابوكوايه

في كل من أمريكا أو أستراليا، كان ما زال في بعض السكان المحليين لحد بدايات القرن الـ19، و هما بالنسبة للمهاجرين الأوربيين الى هاجروا أمريكا و أستراليا مش بشر، لكن زيهم زى الأفارقة مجرد حيوانات، فتم عمل حدايق حيوانات في أمريكا و أستراليا و بعض بلد أوربا، لكن الحيوانات هنا كانت الأفارقة، أو الهنود الحمر، أو سكان أستراليا الأصليين، في واحده من أسوء المهازل في تاريخ الأنسانيه، الزوار كانوا بيتفرجوا عليهم، و هما محبوسين في أقفاص زى الحيوانات بالضبط.





حنكمل مع أمريكا و اللى كانت العنصريه فيها على أشدها لحد منتصف الستينات تقريباً، لدرجة أن أصحاب البشره السمراء مكانش ينفع يدخلوا مدارس أصحاب البشره البيضاء، أو يدخلوا مطعم البيض بياكلوا فيه، و طبعاً و بالتأكيد مينفعش يتولوا أى مناصب محترمه، و الكلام ده كان بيحصل فى أمريكا لحد من أقل من ستين سنه. الموضوع كبير و طويل جداً، بس حنضطر نكتفى بالجزء ده، و خلينى أدخل معاك على النموذج الثالث، و اللى ممكن جداً تكون عارفه، لكن خلينى أشرحه ببعض التفاصيل الزياده.

أكثر شخص مصاب بالهوس العرقى فى التاريخ، طبعاً أكيد ممكن تكون أسنتجتته و هو أدولف هتلر. هتلر قسم الأعراق و الأجناس البشرى لدرجات، كان على رأسهم الجنس الأرى، و اللى طبعاً بيضم الألمان، و آخرهم العرب ثم اليهود فى ديل القايمه. أسباب كره هتلر لليهود كانت متنوعه، و كان بينها ما هو خاص بالسمعه العامه بأن اليهود خانوا ألمانيا فى الحرب العالميه الأولى، و كانوا أحد أهم أسباب هزيمتها، لحاله الكره العام لليهود فى أوروبا. لكن اللى شدنى هو احتمالية وجود



مبينه ابروكايد

أسباب خاصه بهتلر نفسه، خصوصاً مع تأكيد سيرجي لافاروف وزير خارجية روسيا، أن جدود هتلر من ناحية الأب يهود، وأن عنده أسباب أسريه خاصه جداً لحالة الكره العجيبه دى.

هتلر أقام واحده من أكبر المجازر البشريه فى التاريخ و هى الهولوكست، كان يقوم بحرق اليهود أحياء فى أفران كبيره جداً بدون سبب، و لحد يومنا هذا المانيا بتحاول تقديم كافة الاعتذارات لليهود على ده، و أنا كنت فى ألمانيا من 3 سنين، و دخلت متحف يهودى فى برلين، بيحكى كل المجازر اللى تعرض ليها اليهود فى ألمانيا، و وجود متحف زى ده فى ألمانيا له معانى كثير، و طبعاً صدرت بعد الحرب العالميه الثانيه قوانين معاداة الساميه فى أكثر من دوله، و الساميه هنا بالمناسبه نسبة لسام ابن نوح، اللى هو يفترض جد اليهود، لكن برضه يفترض أنه جد العرب كمان.

المهم أن بعد الحرب العالميه الثانيه ما خلصت، و اللى تمت خلالها كل الأحداث دى، أُقيمت دولة إسرائيل على حساب الشعب الفلسطينى، و اللى لعبت عنصريه هتلر و إبادته لعدد كبير جداً منهم خلال الحرب، دور كبير فى الأسراع بقيام الدوله الجديده، بعد 3 سنين بس من أنتهاء الحرب، بالرغم من أن العالم كله كان مشغول بالتعافى من أثار الحرب وقتها.

و بالمناسبه دى أنا شفت من حوالى شهر فيلم إسرائيلى، السيناريو بتاعه مبنى على مذكرات شخص يهودى عاش الفتره دى، أقصد فترة بدايات قيام دولة إسرائيل، وقتها كان عنده حوالى 7 أو 8 سنين، و بيقول سواء فى مذكراته أو الفيلم، أن الشعب الفلسطينى أنظلم ظلم بين، و أن كلا الشعبين أتبهدلوا، بس تعالوا نشوف دلوقتى و بعد 75 سنه من أقامه دولة إسرائيل على حساب الشعب الفلسطينى، دول فين و دول فين.

كل اللى فات كان تاريخ، فهل فعلاً العنصريه أنتهت تماماً من العالم؟ لأ طبعاً منتهتش، و خلينى أكلمك فى مثالين قائمين لحد يومنا هذا، و كمان مش بعيد عنك خالص، لأن واحد منهم فى صعيد مصر، و الثانى فى السودان، و حابدأ بالمثال المصرى لأن المثالين على الرغم من تشابههم تماماً، إلا أن تجربته السودانيه تعتبر من حيث



الأسباب و النتائج هي فعلاً الكارثة و الفضيحة الأكبر في قضية العنصرية، و النتائج اللى ممكن توصل لها.

المثال المصرى ببداً من أيام فترة حكم محمد على، و اللى لما غزا السودان علشان يضمها للدولة المصريه، جلب معاه بجانب ما جلب من خيرات السودان، عدد كبير من السودانيين، و ده بهدف إما أنه يضمهم للجيش المصرى نظراً لما يُعرف به السودانيين من أنهم من أفضل الجنود في العالم، أو لأستغلالهم في أعمال الزراعة أو غيرها من الأعمال اللى بتحتاج تحمل بدنى. و بالمناسبه فمحمد على و جنوده تعاملوا بنفس الطريقه ألا إنسانيه مع اللى جلبوهم لمصر، زى بالضبط اللى حصل مع الأفارقة اللى هُجروا للأمريكا.

تجاره العبيد، و اللى موجوده في مصر من زمن بعيد جداً، كانت مستمره للوقت ده، و أستغل عدد كبير من السودانيين اللى جم مع حملات محمد على على السودان، كعبيد بصبك رسمى عند بعض العائلات المصريه، و خاصه في محافظات أسبوط، سوهاج و قنا في الجنوب، و محافظة الشرقيه بس في الشمال، و كان أملاك العائلات دى للعبيد و نسلهم من بعدهم، بشكل رسمى و ورقى تماماً.

لما بدأت الحملات العالميه لأنهاء الرق و العبوديه، ركب محمد على الموجه و قرر أنه ينهى عملية تجارة العبيد. و في 1 ديسمبر 1837 بعث محمد على رساله لحكمدار السودان خورشيد باشا، بيأمره فيها بإبطال تجارة الرقيق، و قال في رسالته "يجب عليك أن تعلم أني لا أريد ربحا من تجارة لا تشرفني".


و فعلاً في 4 ديسمبر من سنة 1838 أعلن رسمياً أنه أنهى تجارة الرقيق و العبيد، لكن كأى شئ جذوره ضاربه في التاريخ، مقدرش محمد على يحقق ده بشكل فعلى، لكن فعلياً -و أقصد بكلمة فعلياً هو المستوى الرسمى بس- تحقق ده على أيد الخديو إسماعيل، و اللى أصدر صبك حريه للعبيد بشكل رسمى، يعنى زى ما كان شراهم بشكل ورقى رسمى، عتقهم برضه أصبح بشكل ورقى رسمى، لكن هل ده حقق أى شئ على المستوى الشعبى؟ طبعاً لأ.



مبين أبو كرايم

فضل العبيد و أولادهم ملك للعائلات الكبرى في صعيد مصر، بل و كمان و بمنتهى الوحشية، كان بعضهم -الى بيتعامل مع سيدات الأسره- بتتم عملية أخصائه من قبل بداية عمله مع الأسره.

ما زال من يُطلق عليهم العبيد موجودين في مصر لحد النهارده، حتى اللي منهم ساب الخدمه عند العائلات الكبيره، ما زال بيطلق عليه لفظ "عبد"، حتى لو كان أستقل و أصبح أغنى من العائله نفسها، و دى حالات موجوده و منتشره بشكل كبير جداً في صعيد مصر. ما زال ممنوع تماماً زواجهم من أى عائله أياً كان مستواها، ما زالت النظره لهم نظره دونيه، ما زال التعامل معاهم له حدود، الكلام ده ما زال بيحصل في مصر، و أنا شفته بنفسى كتير جداً، فهل تتخيل معايا -طبعاً لو مكنتش من المحافظات اللي أنا ذكرتها-، أن ده بيحصل في مصر ليو منا هذا.



نوصل للمثال الثاني، وحنلاقى مثيلة القصة لكن في السودان، لكن الأعراب أنها بين السودانين و السودانين، لكن السودانين الأولانيين هما الشماليين أصحاب البشره الأفترح نوعاً ما، و السودانين الثانيين هما الجنوبيين أصحاب البشره الأكثر سماراً.

أعتبر الشماليين على مدار التاريخ أن الجنوبيين دول مجرد عبيد، و كانوا في السودان مش بييشغلوهم غير في أعمال الخدمه أو الأعمال الوضيعه، و كانوا بيحذروا و بيخوفوا الأطفال من التعامل معاهم، و اللي عمل الفجوه دى بشكل أكبر أن الشماليين أنتموا للعرب بشكل أكبر، بينما الجنوبيين أعتبروا نفسهم أفارقه مش عرب، و خصوصاً أن نسبه كبيره جداً منهم مسيحين، و أغلهم مكنش مهتم أنه يعرف يتكلم عربي، و أكتفوا ببعض اللغات المحليه، و اللي عددها أكثر من 60 لغه، أو تعلم اللغه الأنجليزيه.

فضلت الفجوه تكبر، و الضغط النفسى و الأحساس بالأغتراب عند الجنوبيين يزيد، فبدأت فكرة المطالبه بالأستقلال، و بما أن جنوب السودان هى منجم خيرات، فقامت بعض الدول الخارجيه بدعم و مساعدة الجنوبيين في دعاوى الأستقلال دى، و اللي نجحت بالفعل، و تم الأعراف بدولة جنوب السودان رسمياً في سنة 2011، و علشان تخسر دولة السودان بسبب القبليه و العنصريه جزء كبير جداً من أرضها، و عدد كبير و مهم من شعبها، ده غير الشئ الأهم و هو ثرواتها، زى البترول و الذهب و الفضة، و غيرها. أنا بعتبر نموذج السودان ده هو النموذج الكارثى الصارخ لفكرة العنصريه و العريقيه، و اللي وصلت دوله زى السودان لحاله من الأنقسامات، محدش يعرف حتوصل تانى لحد فين.

قبل ما أقفل الجزء ده، عايز أقول أن التمييز العرقى ما زال موجود بيننا بأشكال كثير مختلفه، و حابب أحكى بسرعه عن تجربه صديق نوبى أعرفه بيمثل مسرح، قرر مؤخراً أنه يوقف تعامل مع مؤلف و مخرج مسرحى، و لما سألته ليه، فكانت الأجابه لأنه طول الوقت بيجبني علشان يعمل أفيهاات عليا، و للأسف ده نوع من الكوميديا البذيئه اللي موجوده عندنا من زمان، و أعتقد أنك تفتكر معايا جمله محمد هنيدي الأسوء في فيلم صعيدي في الجامعه الأمريكيه، و اللي أنا مش حابب أكررها، بس



مدينه ابوكرايه

للأسف حتى الفن عندنا، و اللى يُفترض أنه أما للثقافه أو للتسليه على أضعف الأيمان، بيرسخ للعنصريه طول الوقت.

أحنا لسه فى مجتمعاتنا كثير جداً من العرقيه الدفينه، بتبان بشده فى حالات الجواز، ورفض كثير من الأسر الأرتباط بأسر ثانيه بسبب النظره العرقيه، بتبان بشده فى الجامعات و اللى بعتبرها الخليه المصغره للمجتمع كله، بنلاقى مثلاً أن المسيحيين لهم المجتمع بتاعهم، و النوبيين لهم المجتمع بتاعهم، و اللى جاين من وجه بحرى لهم مجتمعهم.... إلخ، كل مجتمع قافل على نفسه و مش قادر يختلط مع الأخر غير فى أضييق الحدود، و لو الظروف أضطريته بس.

أتكلمنا عن الماضى، أتكلمنا عن الحاضر، أوصل معاك لأخر جزء فى الفصل ده، و هو المره دى خاص بالمستقبل، و اللى حتكون فيه العنصريه أكثر شده من كل اللى فات، لأنها عنصريه أنتقائيه جداً، و ده حيكون له جزء كبير جداً من الكتاب اللى جاى، لكن أنا حأكتفى معاك بذكر نقطه واحده بس، لأنها فعلياً مرتبطه بموضوع الفصل ده.

حأتكلم معاك عن موضوعين، هما ظاهرياً يبدو أنهم مش مرتبطين ببعض، لكن فعلياً الأول فيهم تمهيد للتانى، و كان أول من ربطهم ببعض هى دكتوراه مصريه أسمها هبه جمال الدين أنكلمت عنهم و عن الخطر القادم من وراهم فى أكثر من حوار تليفزيونى على عدد من القنوات المصريه، زى صدى البلد مع مصطفى بكرى، و الحدث اليوم مع سيد على، و حلقاتها ما زالت موجوده على الـ Youtube. فتعال معايا أستعرض معاك الموضوعين و نشوف أيه الرابط بينهم زى ما دكتوراه هبه ربطتهم قبل كده.

الموضوع الأول هو أتفاقيه الأمم المتحده رقم 169 بشأن الشعوب الأصلية والقبلية فى البلدان المستقله، و دى تم توقيعها سنة 1989 تأكيداً على أنفاقيه أقدم كانت سنة 1957. الأنفاقيه دى بتخص كل الشعوب الأصلية اللى كانت موجوده فى دوله أو أقليم ما، و تم تهميشهم نتيجة أستعمار، أو تكوين دوله فى نفس المكان، زى



مدينه ابركوايه

أمريكا أو أستراليا، أو ما شابه، و خد بالك معايا من ما شابه دى، و تم تعريف ما هى الشعوب الأصلية فى نقطتين حناخداهم من نص الاتفاقية نفسها:

تنطبق هذه الاتفاقية على:

(أ) الشعوب القبلية فى البلدان المستقلة، التي تميزها أوضاعها الاجتماعية والثقافية والاقتصادية عن القطاعات الأخرى من المجتمع الوطني، والتي تنظم مركزها القانوني، كليا أو جزئيا، عادات أو تقاليد خاصة بها، أو قوانين أو لوائح تنظيمية خاصة .

و دول زى الهنود الحمر، أو سكان أستراليا الأصليين.

(ب) الشعوب فى البلدان المستقلة، التي تعتبر شعوبا أصلية بسبب انحدارها من السكان الذين كانوا يقطنون البلد أو إقليما جغرافيا ينتمي إليه البلد وقت غزو أو استعمار أو وقت رسم الحدود الحالية للدولة، والتي، أيا كان مركزها القانوني، لا تزال تحتفظ ببعض أو بكامل نظمها الاجتماعية والاقتصادية والثقافية والسياسية الخاصة بها.

و الاتفاقية بتنص على أعطاء الشعوب دى، و اللى تم تعريفها فى النقطتين اللى فاتوا، كتير من حقوقهم اللى سلبت منهم، بل و تعوضهم ماديا كمان.

حنقف عند الجزء ده من اتفاقية الشعوب الأصلية، علشان ندخل على الموضوع التاني، و هو مشروع الجينوم. فى البدايه، أعتقد أنك لامس معايا حالة الهوس الموجوده على مستوى العالم من ناس كتير، بأنهم يعملوا تحليل معرفة أنحدار الأصل، و ده طبيعي جدا أن أفراد -حتى لو سبيل التسليه تقوم بعمله-. طبعاً أغلب اللى عملوه بيكتشفوا أن أصلهم مخلط، مش من جذر أو أصل واحد خالص، لأن خلاص مبقاش فيه فى العالم فكرة العرق النقي تماما. لكن الغريب جدا أن دول -مش أفراد- هى اللى تعمل التحليل ده، و ده أسمه مشروع الجينوم المرجعي، و من بين الدول اللى بدأت تعمل تحليل الجينوم المرجعي مصر، و خلينى أقولك بعض بيانات المشروع، و اللى دُكرت فى مقال بموقع سكاى نيوز العربيه.



المشروع بدأ في 2021، و حينتهى تنفيذه نهاية 2025، بتكلفة مبدئية وصلت ل 2 مليار جنيه (128 مليون دولار أمريكي).

و في نفس المقال كان تعريف الجينوم المرجعي: الجينوم المرجعي (المعروف أيضاً باسم التجميع المرجعي) هو قاعدة بيانات رقمية لتسلسل الحمض النووي، تم تجميعها من قبل العلماء كمثال تمثيلي لمجموعة الجينات في كائن فردي مثالي لأحد الأنواع. وفي النهاية يشبه الجينوم المرجعي فسيفساء ولا يمثل أي فرد، بل يحدد صفات عامة للإثنيات والعرقيات.

طيب ليه دول كتير في المنطقه بتعمل تحليل جينوم مرجعي، و خاصة أنه تكاليفه مرتفعه جداً. أيه الفايده اللي حتعود من معرفة أصل سكان مصر أو أى دولة أخرى، و خصوصاً مع كل حالة الأختلاط دى؟ و هل ربط الدكتور هبه الفقره (ب) من أتفاقية الشعوب الأصلية، و خاصة أنها مش مُحده أو مربوطه بفترة زمنيه معينه، بمشروع الجينوم المرجعي، و بعرق بيدعى أنه طرد قصراً من بعض المناطق من أكثر من 2000 سنه؟ و هل شعوب أستراليا أو أمريكا الشماليه أو الجنوبيه أستفادوا أى شئ من أتفاقية الشعوب الأصلية دى، و اللي بقالها أكثر من 33 سنه؟ طيب هى أصلاً معموله لمين؟ و هل كل اللي قالته دكتور هبه في أكثر من قناه مصريه، مفيش أى حد تانى واخذ باله منه؟

في النهايه، و بعيداً عن كل اللي قلته، فالهوس العرقي، و اللي أصله في الأساس هو الأنتماء القبلي، أساس جزء كبير من الشرور اللي بتحصل في العالم، و سواء كان وراه اللي بيخططله، أو هو هوس قبلي أو عرقي عادى، فالنتائج في الأخر مُدمره للجميع. أحنا لازم نقبل التعايش مع الأخر، و لازم نُقر أن مفيش عرق نقي 100%، زى ما كل تحاليل معرفة أنحدار الأصل بتثبت.

خليني أضرب مثال صغير ببعض الأعراق اللي أندمجت داخل مصر، بدايةً من عصر محمد على لحد النهارده، يعنى خلال 220 سنه بس، حنلاقي الألبان و الأتراك، حنلاقي اليونانيين، حنلاقي الأرمن، حنلاقي السوريين من فترة كبيره جداً، من نهايات القرن ال19، حنلاقي السودانيين، و مؤخراً الروس و الأوكران اللي أندمجوا من خلال



مدينه ابوكرايمه

الزواج مع مصريين، كل دول أندمجوا و تزاجوا مع المصريين، علشان يجيبولنا ناس
بتركيبات جينيه مختلفه و جديده على الشعب المصرى،
لكن فى النهايه أصبحوا مصريين.
25 يوليو 2023



محتج السيطرة ج: فورمك السامبلو

"هل نجحوا في تحويلنا عبيد أهوائنا؟
لماذا نعتقد أن أخطائنا قدره؟"



"عنه الإنسان في اللد زمكانه"

تحت السيطره ج1: فورمة الساحل

في بعض الأحيان بتتكون في عقلي فكره موضوع أو مضمون عايز أكتبه، بس مش بعرف ألاقى الصياغه المناسبه التي تصلح لتوصيل فكرتي، وده بالضبط اللي حصل مع الموضوع اللي عايز أناقشه في الفصل ده، بقالي شهور بحاول ألقيله مدخل مش عارف، لحد ما بالصدفه من يومين كنت بسمع مساحه على تويتر، و مساحه ده الأسم اللي أختارته منصة تويتر للـ podcast أو أى برنامج صوتي يُبث عليها، و من خلال المساحه اللي سمعتها، كان في جزء عن شخص تواجد أيام حكم الأسكندر الأكبر، وكان أحد أتباع مذهب أسمه الرواقيه، و هو فيلسوف أسمه ديوجينيس.

ديوجينيس كان شخص زاهد تماماً في الحياه، كباقي الرواقيين الكلبيين، أيوه، هو كان من طائفه من الرواقيين أسمهم الكلبيين، و دول كانوا أنصار التوحد مع الطبيعه، زى الهيبيز الى ظهروا في أمريكا فترة الستينات و أنتشروا في العالم كله، و زى كتير من المذاهب الشرق آسيويه المتوحده مع الطبيعه.

القصه اللي شدتني عن ديوجينيس، من بين عشرات القصص اللي ذكرت عنه في المساحه، أن ديوجينيس كان زاهد و لا يمتلك من الدنيا غير ما يُشبهه كوبايه صغيره بيملها من شلال أو مجرى مائي لما بيعطش. في أحد المرات شاف ديوجينيس طفل صغير كان عايز يشرب، فأستخدم الطفل كفين أيده في الشرب، زى ما كلنا كنا بنعمل و أحنا صغيرين من أى حنفيه، فديوجينيس لما شاف الطفل يشرب بالطريقه دي، قال لنفسه طيب ما أنا كمان أقدر أستغنى عن الكوبايه، و بالفعل كسر الكوبايه -و اللي كانت بتمثل الشئ الوحيد اللي كان بيملكه في الحياه- علشان ميتحولش لعبد لها، زى ما أستغنى عن كل شئ ثاني في حياته لنفس السبب، أنه ميتحولش لعبد أسير لأي شئ في الدنيا، أنه ميخليش أى شئ في الكون يكون مصدر للتحكم فيه.

مش عايز البدايه دي تاخذك لفكره أني بدعو للتقشف، لأ خالص، بس درس ديوجينيس هو درس مهم جداً، و هو بالضبط الموضوع اللي بقالي شهور عايز أكتب



فيه، لكن مكنتش عارف أصيغه، فشكراً لديوجينيس و أفكاره، و اللي كانت بالفعل الدليل بالنسبالي لأني أعرف أصيغ أفكار الفصل ده.

بدايةً، فالفكره الرئيسيه اللي عايز أناقشها معاك، هي نفسها الفكره اللي أتبنت عليها فلسفه ديوجينيس، و هي ليه أحنأ طول الوقت بنسيب نفسنا نتحول لعبيد كل حاجه حوالينا، و منها المادى و منها المعنوى، لكن في النهايه أحنأ بنسلم نفسنا تماماً، و بنسيب عشرات الأشياء و الأفكار تتحكم فينا، و الأهم في الموضوع أن كل المسيطرات دى بتكون فعلياً أكاذيب، و في الأغلب بتكون مترتبالك، أنت مقصود و مُستهدف طول الوقت أنك تكون عبد و أسير، علشان بمنتهى البساطه، تفضل طول الوقت "تحت السيطره".

حاولت أعمل عملية حصر لكل أنواع المسيطرات اللي بتتحكم في مسارات حيواتنا (جمع حياه)، و بتفرض عليك إتجاهات معينه، حتى لو كنت أنت نفسك مش حاسس بكده، و قدرت أقسمهم لمجموعات تبعاً لطبيعه كل نوع منهم، لكن قررت أكتفى بنوعين فقط، نوع بيمثل نموذج للسيطره عليك بشكل مادى، و مادى هنا تحمل المعنيين لكلمه "مادى"، و النوع التانى بيمثل نودج السيطره المعنويه. حأتكلم عن النوع الأول في الفصل ده، و عن النوع التانى في الفصل التالى، لكن مره تانيه أحب أؤكد أن النوعين اللي حنتكلم عنهم هما بس نماذج، لكن فيه عشرات النماذج و الأشكال من أنواع السيطره التانيه، غير اللي حأستعرضها معاك.

أول و أخطر نوع من أنواع المسيطرات، و هو اللي حأتكلم عنه في الفصل ده، هي المسيطرات الماديه، المسيطرات الملموسه، اللي بتشكل تفاصيل حياتنا اليوميه، و خلبني أشرحلك الفكره، بالشكل اللي أنا شايف أنه الأمثل لشرحها.

مما لاشك فيه، سواء أنت حتسميها نظريه مؤامره أو لاء، سواء كنت حتصدقني أو لاء، أن فيه إداره بتتحكم عالمنأ، و بالطبع لو كنت مش مصدق، فده لن يُغير من الأمر أى شئ، بالفعل فيه إداره بتتحكم و بتتحكم في عالمنأ، إداره بتتحكم في كل تفاصيل حياتك، بتشكل ملامح تفكيرك، بتحدد كل أختياراتك -اللى أنت بيتهيألك أنها قراراتك- بدايةً من شكل شرابك القصير، لحد نوع دراستك، لأغلب أختياراتك على مدار حياتك. حأشرح معاك ده بيتم أزاى أولاً، و ليه بيتم ثانياً. و بالمناسبه فده بيتم



تمت السيطر ح ج: فورمك السامرح

في كل أنحاء العالم، بمعنى أن مش أحنا بس كعرب أو كدول عالم تالت المعنيين بالفكره.

كالعادة حارجع للسينما و الدراما الأمريكيه، و اللي ليها معايا أكثر من فصل في الكتاب القادم. السينما و الدراما الأمريكيه هي طول الوقت جزء دائم من خطة السيطر على عقلك، لكن الغريب أن كل فتره بيرمولك فكره لشيء يحصل في العالم بعد ما بين 20 ل 30 سنه، و طبعاً ناس كتير سمعوا أو عارفين قصة عشرات التوقعات اللي أتحققت بعدها بسنين، و ده كان من خلال مسلسل الكارتون الأشهر "The Simpsons" أو "عائلة سيمسون"، لكن أختياري النهارده هيكون لفيلمين بيحملوا أفكار فلسفيه لشكل العالم اللي أحنا بنعيشه، و أزي أننا مجرد لعب بيتلعب بيها من أشخاص تانيين. الفيلمين بالرغم من الفارق الزمنى الكبير منهم، و شكل و فكرة كل فيلم فيهم، إلا أن كلا الفيلمين بيوصل نفس الرساله، لكن بألية تنفيذ و فكره مختلفه.

الفيلم الأول كان من إنتاج سنة 1998، للنجم الكبير چيم كارى، واحد من أهم النجوم أصحاب الفكر، و اللي كان دايمياً في أغلب أفلامه عايز يوصل رساله أو وجهة نظر، و أغلب أفلامه كانت يا أما عباره عن رسائل تحذير خفيه، أو تمهيد لأختراعات أو تكنولوجيا جديده، حتظهر في العالم بعدها بأكثر من 10 سنين، زى مثلاً فيلم Cable Guy 1996، و اللي أتكلم فيه عن فكرة ال Smart phone على أنه هيكون أمر واقع في المستقبل، و حصل ده بعدها ب 11 سنه بالضبط لكن حيفضل فيلم "The Truman show" أو "عرض ترومان" إنتاج 1998 زى ما ذكرت، هو الفيلم الأهم في مسيرة النجم العملاق چيم كارى.

بيحكى الفيلم عن ترومان بيربانك، شخص في الثلاثين من عمره، و يا ريت تاخذ بالك معايا من دلالة الأسم Truman، و اللي ممكن تقسمه ل True man، و اللي معناها الرجل الحقيقي، مجرد مندوب لشركة تأمينات على الحياه، في مدينه أسمها Seahaven سيهافين، اللي برضه لو قسمناها حنلاقبها Sea haven أو ملاذ البحر. ترومان متجوز من غير أولاد، حياته تقليديه جداً، أمبارح زى النهارده زى بكره.



تمتبه السيطرة ج: فورمك السامليه

ترومان عنده عقده من البحر، بسبب موت والده قدام عينيه، لما طلعا مره و هو صغير رحلة صيد، و حصل وقتها ما يشبه الإعصار، الوالد غرق لكن ترومان العنايه الألهيه أنقذته، علشان تفضل عقده ترومان مع البحر باقى عمره.

ترومان كان عنده حلم واحد فى حياته، و هو أنه يسافر جزر فيجي و يعيش هناك، لكن كل ما يخطط للسفر، تحصل حاجه تمنعه، و ده لسبب بسيط، و هو أن ترومان تم اختياره من قبل ولادته علشان يبقى بطل مسلسل مستمر على مدار حياته، كل اللي حواليه ممثلين، مدينة Seahaven ما هي إلا أستوديو كبير جداً أتبنى للمسلسل ده، و يبقى الشخص اللي مش عارف أن كل ده تمثيل هو ترومان نفسه.

لما بيكتشف ترومان الحقيقه، بيدور حوار مهم جداً بينه و بين مخرج العمل -الى ترومان مش شايفه لكن سامع صوته-، و هنا كان حوار ترومان مع المخرج، أشبه بحوار بين أنسان و ربه، و قاله فيه مخرج العمل أنه حر لو كان عايز يمشى و يسيب الحياه اللي أترسمتله، لكن بيخوفه من العالم الخارجى، بي فهمه أن الحياه اللي أترسمتله هي الأفضل ليه من كل الجوانب، لكن بيكون قرار ترومان أنه لازم هو بنفسه يختار حياته، حتى لو كان حبيدأها لأول مره بعد سن الثلاثين.

أما الفيلم التانى فهو الأحدث إنتاجاً و الأشد خطوره، و هو فيلم "Free Guy" أو جاى الحر، الفيلم إنتاج سنة 2021. و بنفس منطق تحليلنا لأسم فيلم The Truman show، أحلل أسم فيلم Free Guy لأكثر من تحليل. كلمة Free ممكن يكون معناها حر أو حرر، و Guy ممكن ترمز لأسم البطل أو Guy بمعنى شخص، فهنا ممكن الأسم يكون معناه حرر جاى -و هو الأسم الأقرب من وجهة نظرى-، أو جاى الحر، أو شخص حر، و كلمها تمشى مع فكرة الفيلم.

فيلم "Free Guy"، و اللي أنتج بعد "The Truman Show" ب23 سنه، هو بالفعل بيدخلنا لمرحلة "اليقيل الوحش"، لأنه نقل الرساله المقصوده فى فيلم جيم كارى لمرحلة أخطر و أبعد، و خلينى أحكيلك قصة الفيلم، لو مكنتش بالفعل شفته.

الفيلم بيحكى عن جاى، موظف تللر فى بنك، أعزب، و بنشوف بداية الفيلم هي بالضبط نفس بداية فيلم "The Truman show"، و هي ببساطه أن جاى شخص تقليدى جداً، حياته زى ما التعبير الأمريكى بيقول From 9 to 5، و اللي معناها



تمت السيطرة ج: فورمك السامبلو

موظف بيشتغل 8 ساعات في اليوم، 5 أيام في الأسبوع، و زى بداية فيلم "The Truman show"، بيوضح فيلم "Free Guy" أن يوم جاي هو يوم متكرر، أحداث النهارده زى أمبارج زى بكره.

بيبدأ الفيلم بمشاهد لمدينه أسمها Free city أو المدينه الحره، وكلمة حره هنا مش مقصود بيها زى بورسعيد أن مفيهاش جمارك، لأ هو أسم المدينه كده، و حنعرف ليه بعدين، و الناس في المدينه منقسمين لفئتين، الأبطال و الناس العاديين، و بتعرف تفرق بين الفئتين، بأن الأبطال هما بس اللي لابسين نظارات شمسيه طول الوقت. الأبطال لهم قدرات غير عاديه، لكن بيكون أستخدامها في أغلب الوقت في أعمال غير أخلاقيه، بدايةً من السرقة لما هو أكبر.

بطل فيلمنا جاي مش من الأبطال، لكن من الناس العاديه اللي بتتضرب و بتتسرق كل يوم، و زى ترومان بالضبط، فجاي عمره ما خرج من مدينته Free city، لحد ما بيكتشف يوم زى ما ترومان أكتشف، أنه مجرد NPC في لعبه زى Free fire و The Sims و PubG و هي لعبه أسمها Free city، و NPC معناها Non player character، يعنى الشخصيات اللي الناس مبتلعبش بيها في اللعبه، الشخصيات اللي كل دورها أنها تكون مفعول به، يعنى تتضرب، تتسرق.. إلخ.

و زى ما ترومان ثار على وضعه و رفضه، جاي بيقود ثوره لكل ال NPC's، و بيغير كل التخطيط اللي وضعه مالك الشركه المنتجه للعبه، و البرمجه اللي عملها كل ال programmers اللي كتبوا أكواد اللعبه.

طيب بعد ما أستعرضنا سريعاً قصة الفيلمين، أنا عايز أوصل معاك لأيه؟ الأجابه ببساطه أن السينما الأمريكيه -اللى أنا مش بحبها على الإطلاق- هي أحد أهم أدوات الترويج، سواء لتسويق و ترويج أفكار مطلوب أنها تنتشر، أو أنها نوع من التنبيه لحاجات كثير حتحصل في المستقبل. التنبيه هنا مش بهدف التحذير -علشان حضرتك تاخذ بالك-، لأ خالص، لكن الهدف هو تأهيلك نفسياً للمرحله اللي لسه حتيجي. أما تالت من أشكال الترويج فبيكون توصيف حاله بشكل غير مباشر، زى الفيلمين اللي أحنأ أستعرضناهم، و زى فيلم "Eyes Wide Shut" من إنتاج سنة



تمت السيطره ج: فورمك السامله

1999، من بطولة توم كروز و نيكول كيدمان، و أخرج الرائع ستانلى كوبريك، و ده الفيلم اللى تسبب فى موت مخرجه بطريقه غامضه قبل عرض الفيلم سينمائياً، و كان السبب برضه فى طلاق توم كروز و نيكول كيدمان بعد تصوير الفيلم و عرضه بفترة صغيره جداً.

طيب الفيلمين برغم الفارق الزمنى الكبير بينهم عايزين يوصلولنا أيه؟ ببساطه أن أكثر من 85 أو 90% من البشر هما مجرد لعب بيتلعب بيها، و دى الجملة اللى أنا قلتها فى أول الفصل، و هى أن مش أنت اللى بتختار، أنت بتختار من بين المتاح ليك أختياريه، و أن أحنا كلنا بيتم التحكم فينا و فى مسارات حياتنا "جمع حياه"، و دى حقيقه شئنا أم أبينا لازم نعترف بيها، و أن أحنا أصبحنا فقط أدوات بيتلعب بيها، عن طريق تحويلنا لكائنات إستهلاكيه طول الوقت، كائنات بتدور حوالين نفسها على مدار عمرها كله، و أى محاولات لتغيير المسار ده، أو أى محاوله للخروج عن الإطار المحدد حتى لو كان باكتشاف أو اختراع يخدم البشريه، دايماً بتنتهى بموت غامض للشخص اللى بيجاول، زى الموت الغامض و المريب لنيقولا تسلا، العالم اللى كان حيغير وجه الكون، و اللى أكتشف كهرباء بدون أى تكلفه من الطبيعه، و ده فى مقابل تحويل توماس أديسون، و اللى سرق أغلب الأختراعات المنسوبه له لأيقونه، و زى العالمه المصريه سميره موسى، و زى جون كنىدى و مايكل چاكسون، أو الطبيب الصينى لى وينليانج، و اللى كان أول من أكتشف فيروس الكوفيد 19 فى بداياته تماماً، و أنتهت حياته بعدها بأسابيع بالكوفيد نفسه، و زى عدم ظهور أى علاج حقيقى للأورام السرطانيه لحد النهارده، و ما شابه.

الفكره ببساطه أن من بعد الحرب العالميه الثانيه، و اللى أنتهت سنة 1945، بدأ العالم يتحول لشكل جديد تماماً، أول ملامحه هو تعميق الفجوه بين الدول المتقدمه و الدول الناميه أو النايمة، و ده طبعاً لسببين لا يخفوا على أحد. الأول علشان تفضل الدول الناميه سوق أو مستهلك كبير لمنتجات الدول المتقدمه، أصل طبعاً مفيش شخص حيعمل منتج ملوش سوق. أما السبب الثانى الأكثر كارثيه فهو أن أغلب الدول الناميه هى اللى بيحتوى باطن أراضها على الثروات، و الثروات دى بتتمثل فى المواد الخام اللى بتحتاجها أغلب الصناعات، خصوصاً البترول و المعادن، و طبعاً الذهب، و اللى هو أحد الأسباب الرئيسيه للحرب اللى دايره فى السودان حالياً.



تمت السيطرة ج: فورمك السامليه

فطبعاً طول ما الدول الناميه مش بتصنع، طول ما الدول المتقدمه قادره تاخذ الثروات دى بأبخس الأسعار، وللأسف ده بالفعل تحقق، و منجاش من عمليه النوم فى العسل دى، غير بعض دول الشرق الأقصى أو النمر الأسيويه.

تاني ملمح هو عمليه الGlobalization أو العولمه، و اللى هى بأختصار غير مخل خطة طمس هويه كل الشعوب و الأعراق، و تحويل العالم كله لشكل واحد، الخطه اللى سموها العولمه، لكن هو فى الحقيقه "Americanization" أو أمركه، و ده عن طريق تحويل كل الناس للنموذج الأمريكى "شكلاً"، سواء فى اللبس أو الأكل أو الLifestyle أو الثقافه، بحيث يتحول الناس فى العالم كله لشكل واحد، و ده بيتحقق عن طريق نشر المبادئ لرأسماليه، و اللى هى الشكل الوحيد اللى حيقدر يحقق عمليه الأمركه دى، و حتى دول زى اليابان و كوريا الجنوبيه، بالفعل تحولت للشكل ده، و بدأت عمليات طمس هوياتها الأصلية بشكل تدريجى سريع جداً.

طبعاً فيه ملامح تغيير تانيه كثير، لكن مش حتخدمنا فى موضوع فصلنا، علشان كده مش حاذكرها لعدم الأطاله، لكن حاكتفى منها بملمح واحد حيكون مدخلنا لأول حاله من حالات السيطرة، و الملمح ده مرتبط أو مأخوذ من قلب عمليه العولمه أو الأمركه، و هى فكره تحويل أغلب سكان كوكب الأرض لكائنات أستهلاكيه، كائنات تعيش للشراء فقط، و اللى حتشتره النهارده، حتدورله على بديل تاني بكره علشان تشتريه، و تفضل على كده لأخر يوم فى عمرك، علشان يفضل محور حياتك هو السؤال الدائم "حأشترى أيه النهارده؟".

خلينى أديك مثال بسيط منتشر جداً الفتره دى. بقالى أكثر من 6 أشهر كل ما أدخل شركه من شركات المحمول لعمل أى خدمه أنا محتاجها، بسمع نفس الجمله "أيه رأى حضرتك عندنا خطوط جديده عليها عرض حلو جداً"، أرد عليه أنى بالفعل معايا خطين، و الخطين دول مربوط عليهم كل شئ فى حياتي، فيفضل الموظف يعددلك فى مزايا الأنظمه الجديده، و أنك ممكن تنقل كل بياناتك بسهوله، و بالمناسبه فالمزايا دى بيكون أقصاها 3 أشهر. و ينسى الموظف تماماً الخدمه اللى أنت دخلت علشانها، و يركز فى موضوع الخطوط الجديده، لدرجه بتوصل لفرضها عليك أحياناً



تمت السيطرة ج: فورمك السامح

في شركه معينه، و بتضطر تقبل أحياناً، علشان يتعملك الخدمه اللي أنت أساساً داخل تطلبها، طيب ليه ده بيحصل؟

فيه نوعين من الأسباب، السبب الظاهري هو أن كل شركه عايزه توصل لأكبر عدد خطوط أتباع من الشركه، حتى لو الرقم كان وهمي، بس علشان يقولوا مثلاً أحنا عندنا 10 مليون مشترك، فتفضل الشركه تحاول تبيع في خطوط طول الوقت، و متستهونش بالمبلغ -اللي ممكن تشوفه بسيط- الخاص بتمن الخط الجديد.

أما السبب الخفي، و اللي بيستهدفه من هم يتحكمون في الشركات دي، و بيستخدموه للوصول لأهدافهم، فهي فكرة أنك تفضل طول الوقت في دايرة البشر، لأن عادة مفيش شخص بيشتري خط كل شهرين و لا ثلاثه، يعني أنا مثلاً الخطوط اللي معايا بقالها أكثر من 17 سنه، و ده طبعاً كارثي بالنسبه لأي شركه، مش بس بالنسبه لفكرة بيع الخطوط، لكن بالنسبه للمنظومه اللي عايزاك تفضل تحت السيطره طول الوقت، حتى لو كان عن طريق التغيير و الشر لخط موبايل.

مثال تاني بيحصل لكثير من الناس الأيام دي، خصوصاً اللي عندهم مرتب واضح و ثابت، و هي فكرة تهافت البنوك على أنها تدليك قرض، و تلاقى 3 أو 4 موظفين من بنوك مختلفه يكلموك و يعددولك في سهولة تقسيط القرض، و يحاول الموظف بكل الطرق أنه يعملك كم من الأغراءات بشكل غير طبيعي، كأنه هو اللي عايز يستلف منك.

مثال ثالث و ده الأكثر وضوحاً، و هو أنتشار شركات و طرق التقسيط بشكل غير طبيعي خلال الفتره الأخيره، علشان حتى اللي مش قادر يشتري، يلاقى طريقه تمكنه من ده، بالعكس ده التقسيط حيخليه يبدأ يفكر في شرا حاجات مكانتش في دايره أولوياته أصلاً، بس أصل سهولة الدفع -حتى لو كنت حتدفع تمن الحاجه مرتين-، هو الهدف، فتلاقى عينيك رايحه على الفئارين طول الوقت، و أكيد حتضعف قدام حاجه منهم ممكن متكونش محتاجها قوى، أو كانت خارج دايرة أهتمامك.

طيب أيه تاني عندنا من وسایل تحقيق السيطره الكامله عليك، من خلال فكرة تحويلك لكائن أستهلاكي؟ أنا حتكلم دلوقتي في موضوع في منتهى الخطوره، سواء في آلية تنفيذه، أو أبعاده الصحيه و الاجتماعيه، و الموضوع اللي حأتكلم فيه من أخطر



تمت السيطرة ج: فورمة الساحل

الوسايل الى أتبعت لتحقيق أغراض كثير، كلها للأسف أسوأ من بعضها، و خليني أتكلّم معاك في وهم كارثة "The Perfect Body" أو الجسم المثالي، و اللي أحنا كمصريين سميناه أسم لطيف كعادتنا، و هو "فورمة الساحل"، طيب أيه قصة فورمة الساحل، و أيه أبعادها الخفيه؟

حزج مع بعض كام فقره، و نوصل لتانى ملمح من ملامح التغيير الى تمت بعد الحرب العالميه الثانيه، و هو الGlobalization أو العولمه، و اللي أتفقت معاك على تسميتها أمركه، طيب أيه علاقة فورمة الساحل بالأمركه دى؟ لأ دى ليها علاقه و علاقه وثيقه جداً.

الشكل المثالى أو فورمة الساحل، هي جزء من خطط كثير جداً، حاستعرضها معاك كلها، لكن حأبدأ بفكرة طمس الهويه، و هنا الهويه المقصوده هي هويه على مستويين، الأول المستوي العرقى و الثقافى، و الثانى المستوى الأنسانى الشخصى. مفهوم و مقاييس الجمال بتختلف من بلد للتانيه، و من عصر للتانى، يعنى لحد النهارده في بلد لسه متأمركتش بالقدر الكافى و هي موريتانيا، جمال المرأه بيقاس بوزنها الزائد، و كنت لسه شايف فيلم موريتانى بيتكلم عن الموضوع ده. و ده برضه كان المفهوم السائد في مصر يمكن لحد بدايات الخمسينات، و تقدر تتأكد من كلامى من خلال الأفلام القديمه. الكلام ده مكنش في مصر أو الدول العربيه و بس، لكن تقدر تتأكد منه من خلال عشرات الرسومات الكلاسيكيه لرسامى عصور النهضه و ما بعدها.

طيب أيه الأهداف المطلوبه من تحويل الناس في العالم كله لهوس الجسم المثالى؟ تعال معايا نستعرضها مع بعض:

أولاً زى ما قلت طمس الهويه، بتحويل الناس سواء سيدات و دلوقتي كمان الرجال لشكل واحد بس يكون هو المقبول و المطلوب، و أحياناً كثير بيكون من معايير قبولك في بعض الوظائف، و لازم تاخذ بالك أن تحويل الشكل ده مش مرتبط بس بالبنيه الجسديه، لأ هو بيتبعه كمان style للبس، أمال تبقى فورمة الساحل أزاي، مش لازم تبينها؟ و هنا أصبح الرجال قبل السيدات بيتجهوا للملابس الضيقه الى حتيين العضلات، و اللي طبعاً بدأت تبقى هي الموضه.



تمت السطر ج: فورمة الساحل

الشخص الى خارج منظومة فورمة الساحل، يعنى الى مش بيحب اللبس الضيق Skinny)، أو شكل جسمه مش حيسمح بيها، مش حيلاقى بسهولة الى هو عايزه، الأذواق أصبحت أغلبها فى اتجاه واحد، المقاسات أصبحت صغيره جداً، لدرجة أن المقاسات نفسها تعريفها صغر، يعنى الLarge بتاع دلوقتى هو الMedium بتاع 10 سنين فاتوا، وهكذا، وبالتالى يا تدخل فى المنظومه و تصبح واحد من ملايين الرجال أو السيدات اللى بقوا شبه بعض، يا حتعانى من كل حاجه.

يدخل معنا فى موضوع طمس الهوية جزء خفى بس هو فى غاية الأهميه، وبيتمثل فى سلوكيات ما بعد الوصول للجسم المثالى أو فورمة الساحل، بتبدأ مرحلة إظهار هذا الجسم بطرق مختلفه، وأكسسوارات و تفاصيل تناسب أيه الجزء اللى حيبان، يعنى هى الناس حتعمل كل ده علشان تخبيه؟ طبعاً لا.

هنا تبدأ تفاصيل كثير تظهر، عمرها ما كانت من تقاليدنا أو سلوكياتنا قبل كده، زى عمليات أزاله الشعر بالليزر للرجال، طبعاً علشان نبين تفاصيل العضلات، زى ما بيعمل لاعبو كمال الأجسام فى البطولات، و ده سلوك كارثى و غريب علينا جداً، و أذكر من 3 سنين قابلت صحفیه -بتكتب فى واحده من المواقع الصحفیه المهمه جداً- فى ورشة عمل، و كانت عامله تحقيق صحفى عن الموضوع ده، و بتدافع عن الفكره بشكل غريب جداً، و أعتبرت أن رفضى للفكره سلوك غير حضارى. كمان طبعاً ظهرت فكره الTattoo أو الوشم، و هى وإن كانت موضوع مستقل بذاته، لكن نقدر برضه نربطه برضه بفكرة هوس الجسم المثالى.

بالنسبه للبنات لازم برضه يُظهروا هذا "الجسم المثالى" و ده طبعاً بيبكون عن طريق الملابس القصيره، و خاصة القصيره من فوق، و اللى حتُظهر منطقة البطن، و ده بدأ ينتشر حتى فى الشارع، و معاه بدأت تظهر فكرة الحلق فى أماكن غريبه و غير معتاده فى الجسم، زى البطن، و طبعاً ده أكيد مرتبط بفكرة أن الجسم يكون مثالى. كل التفاصيل دى و أكثر هى بنود بسيطه جداً فى عملية طمس هويتك الثقافيه من خلال بس وهم "الجسم المثالى".

ثانياً أو تانى الأهداف، هو عملية تحويلك لكائن ببصرف طول الوقت على الوصول للجسم المثالى، أو طبعاً الحفاظ على الجسم المثالى اللى أنت وصلته، و الصبر ده



تمت السيطر ج ٦: فورمة الساحل

بيتم من خلال أربع أماكن للصرف، أولهم طبي، من خلال عمليات كارتية زى شفت الدهون و تكميم المعده، عمليات ضررها الطبي أضعاف نفعها، و دى بتكون المرحلة الأولى.

نتقل للمرحلة التانيه، و اللي فيها 3 أشكال للصرف، أدويه و مكملات غذائيه كارتية الضرر، و كتير منها مش بيكون مُعتمد من أى هينئه طبيه محليه أو عالميه، و طبعاً الأنترنت ملين بأعلانات لبيعها، ده غير توافرها بسهولة فى أماكن و محلات كتير، ثانياً الصرف على نظام غذائى مفهوش كل العناصر الغذائيه، و كمان غالى جداً، بس كلمة السر "Low calories" أو "قليل السعرات الحراريه". و أخيراً رياضه معلبه، و زى كل ما سبق ذكره، ضررها أكثر من نفعها، و هى الGym، و نبعده طبعاً عن الرياضه الصحيحه، و اللي فعلاً بتكون مجديه و صحيه، زى المشى و الجرى و العجل... إلخ.

كده يبقى تانى هدف من الأهداف، و هو أنك تفضل تصرف طول عمرك للوصول أو للحفاظ على شكل جسم مثالى أتحقق، لأنك طالما دخلت فى الدايره المغلقه دى، حتفضل تلف أو تلفى فيها طول العمر، و كارتبه بقى لو الوزن زاد نص كيلو.

قبل ما ندخل على باقى الأهداف، لازم أكد على موضوع أنكلمت عنه فى فصل تانى، بس نظراً لأن ترتيب الفصول فى الكتاب مش بترتيب كتابتها، فالفصل موجود فى الآخر، و الموضوع ده هو برضه واحد من أهم مواضيع كتابي القادم، و هو موضوع "المليار الذهبى"، و اللي ممكن تكون سمعت عنه، و ممكن تكون فاكده نظريه مؤامره، بس زى ما كتبت عنه فى فصل تانى، فقلاديمير بوتين نفسه أكد الحقيقه دى، أن فى مؤامره لتقليل سكان العالم من 8 مليار لمليار واحد بس، و دى بدعوى أن ثروات الأرض قربت تخلص، و مش حتكفى كل العدد ده من البشر، طيب أيه علاقه فورمة الساحل بموضوع المليار الذهبى؟

خطة المليار الذهبى بتهدف لتقليل عدد البشر، طيب التقليل دى بييجى أزاى، أكيد مش حيبجى فى يوم و ليله، لكن حيبجى بالتدريج، و على مدى زمنى مش قصير،



تمت السيطرة ج: فورمك السامرح

وأكد برضه مش حيتم بعمليات قتل، لكن حيتم من خلال تفاصيل حياتيه كثير، حترود نسبة الوفيات و تقلل المواليده.

تزيد الوفيات طبعاً بيتم عن طريق نشر العنف، الحروب الأهليه، الأوبئه، نقل بعض الصناعات المسببه لكثير من الأمراض القاتله لدول ناميه، زى صناعات السيراميك و الأسمنت، نشر فكرة الأنتحار...إلخ.

طيب كل اللى فات ده ملوش علاقه بموضوع هوس "الجسم المثالى"، طيب أيه اللى له علاقه؟ اللى له علاقه هو تقليل المواليده، و ده بيتم برضه بأشكال كثير، زى نشر فكرة المثليه، زى تقليل نسبة الخصوبه، زيادة نسب الطلاق، و السببين الأخيرين دول هما اللى حيخصونا فى موضوعنا.

أغلب الأدوية و المكملات اللى بتتاخد للوصول بسرعه جداً للشكل المثالى، هي أدويه زى ما قلنا مش معتمده من أى هيئه طبيه محليه أو عالميه، و كل الأدوية دى و بلا أستثناء لها أعراض جانبيه، و من أهم الأعراض الجانبيه دى هو أن كثير منها بيتسبب فى العقم، و ده بيكون التأثير الصحى المباشر اللى بيسببه هوس "الجسم المثالى" على فكره تقليل نسبة المواليده.

فيه نوع تانى من التأثير، و هو التأثير الغير مباشر، و ده بيعتمد على العامل النفسى، و نقدر هنا نقسمه لقسمين، أثر هوس الجسم المثالى على العلاقه بين الأزواج، خاصه من جانب الرجال، و التانى تأثير التنمر أو حتى العامل النفسى على الأشخاص اللى مش بيملكوا "الجسم المثالى"، و خاصه من جانب السيدات، و بالأخص البنات اللى لسه متزوجوش.

القسم الأول هو أن كل راجل -أيأ كان مظهره و أمكانياته-، و سواء كان متزوج أو لأ، أصبح عنده هوس بالبنت ذات الجسم المثالى، فلو كان متزوج، يفضل طول الوقت يعمل مقارنة بين زوجته، و بين البنات الكثير اللى بيشوفهم فى التلفزيون، على الأنترنت، و فى الشارع، حتى لو كان هو مش براد بيت Brad Pitt -و طبعاً عمره ما حيكون-، و حتى لو كانت أمكانياته الماديه متمسحش أن مراته تشتري حتى صباح روج، لكن برضه حيبقى بالنسباله الغلط منها، و حيبداً طول الوقت يعقد مقارانات ظالمه، فبتبداً شيئاً فشيئاً العلاقه بينهم تفتر. فى نفس الوقت، ممكن مراته نفسها



تمت السيطر ح ج: فورمة الساحل

تبدأ تتطالبه بفلوس علشان تقدر تبقى زيهم، المهم أن في النهاية، الموضوع بيوصل للخلافات، و اللي أحياناً كتير بتوصل لأنهاء كتير من الزيجات، بسبب شكل الزوجه، اللي مش زى "فورمة الساحل" المطلوبه.

القسم التانى و هو العامل النفسى، و أزاى أن البنت اللي معندهاش مواصفات "الجسم المثالى" بتعانى نفسياً، سواء بينها و بين نفسها، لما بتقارن بينها و بين صاحبات "الجسم المثالى"، أو من التنمر سواء المباشر أو غير المباشر، و التنمر المباشر ده موجود بقوه فى المدارس، خاصة المرحله الثانويه، و ممكن تفتكر معايا من كام شهر، قصة الطالبه اللي كانت فى المرحله الثانويه و أنتحرت بسبب تنمر البنات عليها بسبب شكلها. كان فى مشهد قاسى جداً فى مسلسل الغرفه 207 لفلاش باك للفنانة سلوى عثمان لما كانت طالبه فى المرحله المدرسيه، و البنات بيتنمرنوا عليها بسبب زيادة وزنها، و المشهد مع قسوته بالنسبالى، لكن هو حقيقى و بيحصل طول الوقت.

طيب الأسباب السالف ذكرها، مش كفيله تقلل أعداد البشر، سواء بتوقف الإنجاب بسبب حالات الطلاق، أو الأنتحار المبكر؟ أنا عارف أن حضرتك ممكن تعتبر أن فكرة المليار الذهبى دى "نظرية مؤامره"، لكن للمره التالته حأكد أن عدم تصديقك أو معرفتك لشيء، لا يعنى أبداً أنه مش موجود.

موضوع "الجسم المثالى" حياخدنا لشكل تانى من أشكال السيطره، و هو سيطرة ال Up to date و اللي أسماها الدارج هو "الموضه". اللبس و الأكسسوارات و ما يتبعها، هى من أكثر العناصر الى الناس بتصرف فيها بعد الأكل طبعاً، و ممكن لو أنت بتشوف أفلام قديمه، حتكتشف أن زمان الراجل العادى كان ممكن كل اللبس اللي عنده هو بدلتين بيبدل فيهم، و البنت بتفصل فستان كل سنه، و ده كنا بنسمعه فى كتير من حوارات أفلامنا القديمه. طيب أزاى التغيير الكبير ده حصل، و اللي خلى بنات كتير أعرفهم قدراتهم المالىه مش عاليه، لكن لازم تقريباً بيحبوا ملابس كل شهر، أزاى وصلنا للمرحله دى.



تمت السطر ج: فورمك السامح

نبدأ من مرحلة بدايات القرن العشرين لحد منتصفه تقريباً، وأنا هنا حأتكم عن دولنا العربية، و حأدى مثال بمصر، و اللى كانت مع 4 أو 5 بلدان عربيه فقط، هما الأكثر تطوراً فى الجزئيه دى و بعض الطبقات فيها قادره تتابع تغييرات الموضه، وقتها كانت مصادر مُتابعة الموضه هى بس مجلات الموضه، و كانت أغلب الناس بتفصل، مش بتشتري جاهز إلا فيما ندر، و الأهم من كل ده، أن كان معدل تغير الموضه بطيء جداً، طيب أزاى النقله الكبيره دى بدأت تحصل؟

مع ظهور التلفزيون، و اللى بالتدريج بدأ يدخل كل البيوت، و زى ما الأترنت كان رفاهيه فى البدايه، و تحول لجزء لا يتجزء من حياتك، بدأ التلفزيون بالتدريج يغزو حياتنا، لحد ما أصبح فى الثمانينات من القرن العشرين عنصر أساسى فى الغالبية العظمى من البيوت المصريه، جزء من خطة الزواج، و أعنى بيها الحاجات اللى حيتم سراها للبيت قبل الزواج.

التلفزيون كان أول مرحلة غزو للعقليات، تبعه التطورات الطبيعیه اللى بتعُقب أى اختراع، بعد التلفزيون ظهر الفيديو و من بعده القنوات الفضائيه و الـ DVD، و أخيراً الـ Youtube و ما شابه، و أصبح الناس Up to date أو على مواكبه بكل متغيرات الموضه فى العالم لحظه بلحظه.

كل الأختراعات دى كانت وسایل مساعده لفكرة نشر الهوس بالموضه، فكانت النتيجة أن معدلات التغير فى الموضه أصبحت سنويه، و طبعاً سنويه دى المقصود بيها كل فصل من فصول السنه، بمعنى أن كل سنه بتظهر لنا 4 متغيرات فى الموضه، تبعاً للأربع فصول، و وصل الأمر لأن الملابس الصيفى مثلاً اللى البنت حتشتريها السنه دى، السنه الجايه حتكون موضتها راحت. و هنا بيوت الأزياء الكبرى، و من وراها الجهات اللى بتديرها، عرفوا أزاى يجبروا أغلب الناس، و خاصة السيدات، على فكرة التغير المستمر، بدايةً من الملابس، للنظارات الشمسيه، لأبسط الأكسسوارات، بس المهم تفضل تدور فى دايرة عملية الشرا طول الوقت.

طيب بالنسبه للناس اللى قدراتها الماديه مش حتقدر على كل هذا الكم من الصرف، هل ممكن يتسابوا كده؟ لأ طبعاً، بالعكس، فهذه الشريحه هى الأكثر أستهدافاً، و من هنا ظهرت فكرة الـ High Copy و الـ Copy، و اللى عمرنا ما سمعنا



تمت السيطرة ج: فورمك السامح

أن الشركات الأصلية بتحاربهم، بالعكس ده أغلب الوقت ال Copy بيكون عليه نفس شعار المنتج الأصلي، و كل ده مقصود، علشان اللي مش قادر مادياً، يلاقى نفسه برضه قادر على متابعة الموضوع طول الوقت زى القادر، و داخل فى نفس المفرده، لكن كل واحد بحسب قدراته، و أحب أكاد مره ثانيه، أن الهدف مش بيكون بس المكسب المادى، لكن الهدف الرئيسى بيكون أنك تفضل دايماً تحت السيطرة.

وأصل معاك لأخر شكل من أشكال السيطرة الماديه فى فصلنا، و هو الأهم و الأخطر و الأكثر تأثيراً من كل ما سبق، علشان كده أجلته لأخر الفصل، و لازم أعترف أنى شخصياً من الناس المقصوده فى هذا الجزء، و هو السيطرة التكنولوجيه، سيطرة أنك تكون عبد للتكنولوجيا و خصوصاً تطبيقات الموبايل طول الوقت.

بدايةً، أنا مش شخص له أى علاقه بتطبيقات ال Social media على الإطلاق، و أقصى علاقتى بيهم هو WhatsApp علشان أبعت ملفات للأشخاص اللي مش بيتعاملوا مع فكرة ال Emails، و ال Messenger علشان أتواصل تليفونياً مع بعض الناس اللي عايشين بره مصر و بس، علشان كده أخذت قرار فى الصيف اللي فات أنى أخوض تجربة أنى أرجع للموبايل القديم، موبايل مش Smart Phone، و بالفعل أشترت واحد، و عشت بيه لمدة حوالى شهرين، لكن تجربته فشلت تماماً، ليه؟

لأن ببساطه حياتنا كلها أصبحت مجموعه من التطبيقات، فمعرفةش أتعامل بدون مجموعه تطبيقات يحتاجها كل يوم، الأولى فئة تطبيقات وسائل النقل و حجز القطارات و الباصات أو سيارات الأجره. و الثانيه التطبيقات البنكيه اللي كانت بتوفر عليا مشاوير البنك، و اللي أصبحت -خصوصاً بعد فيروس الكوفيد 19- ضروريه جداً، و كان علشان تعمل خدمه بسيطه فى البنك، ممكن تضبع ساعتين أو ثلاثه غير وقت المشوار، ده غير فكرة حجز الشهر العقارى أو كل المصالح الحكوميه، أو تقديم إقرارك الضريبى، و اللي أصبح بعضها ضروره من خلال التطبيقات و بس.

ببساطه ففكرة ال Smart phone، و اللي أصبح بيدير كل حياتنا، فكره فى منتهى الخطوره، على قد ما سهل علينا عشرات التفاصيل الحياتيه، و على قد ما وفر لنا وقت كبير، على قد ما أضراره مئات الأضعاف مقارنةً بالمميزات اللي قدمهالنا، و



تمت السيطرة ج: فورمك السامح

خليني أبدأ من آخر سبب أجبرني على الرجوع لأستخدام Smart phone مره ثانيه، وهى أن أصبح فيه ضروريات فى حياتك مش حتقدر تعملها من غيره، و تعال معايا أحكيك الحكايه من الأول.

ظهرت خدمة الهاتف المحمول فى مصر فى أواخر سنة 1995 و بدايات 1996، و كانت تابعه لوزارة الاتصالات، و كانت بنظام أشتراك شهرى على جدى وقتها، و الأشتراك كان لا يشمل أى مكالمات، يعنى حتدفع الأشتراك و معاه تكلفه المكالمات. فخلال الفتره دى كان التليفون المحمول دليل على ثراء فاحش، و مع صفوة المجتمع المصرى و بس.

بعدها بسنتين بس، يعنى فى سنة 1998 أشتري نجيب ساويرس الشبكه بأبراجها، و سماها وقتها "موبينيل"، فى الفتره دى أعلن نجيب ساويرس أنه حيخلى كل شخص فى مصر معاه موبايل، و خلى ال Slogan أو شعار شركته "المحمول فى يد الجميع"، وقتها أنا أستغربت جدى، يعنى أيه اللي حيخلى واحده زى البياعه اللي فارشه على الأرض فى الشارع، ولا عامل نظافه، و لا حتى طالب فى مدرسه يمسك موبايل، و أنا هنا مش قصدى التقليل من أى مهنة على الأطلاق، لكن قصدى أنى متخيلتش أن حيكون عندهم أحتياج لوجود موبايل معاهم من الأساس.

بس كعادة نجيب ساويرس، اللي عمره ما قال كلمه و هو مش عارف ما ورائياتها، حقق ما أعلنه حرفياً، و فى خلال حوالى 11 سنه، تحديداً فى 2009، كان بالفعل أكثر من 72% من سكان مصر معاهم موبايل، وصلت لـ 90% سنة 2010، و ده من خلال الأحصائيات الحكوميه الموثقه، و أعتقد أن فعلاً النسبه حالياً تكاد تكون قربت توصل 100%.

الموبايل خلال أقل من عشرين سنه أنا عشتهم، و تابعت خلالهم تطور أستخدام الموبايل فى مصر و العالم كله، أصبح أهم وسيله للسيطره على العقول بكافة الأشكال، الغالبية العظمى من الناس أصبحت تحت سيطرة الموبايل تماماً، و خاصة الفئه المستهدفه وهى الشباب تحت سن العشرين. فىا ترى كان أيه الهدف الأساسى من وجود ال Smart phone و اللي نوه عنه بشكل واضح النجم چيم كارى فى فيلم Cable Guy 1996، قبل ما يظهر بالفعل بحوالى 11 أو 12 سنه، ده طبعاً غير



التنويهاات الكثيره المستتره فى المسلسل الكارتونى The Simpsons أو عائلة سيمسون.

المحمول زى ما أعتقد هو الوسيله الأهم للوصول للمرحله الأخيره من مراحل السيطره على البشريه ككل، و السيطره هنا لها أكثر من أسلوب، و كلها للأسف أسوء و أخطر من بعض، و خليينى أستعرضهم معاك -و بشكل تصاعدى قدر الأمكان- تبعاً لخطورتهم.

أول أشكال السيطره حتكون بتحويلك لألة شراء دائمه، بمعنى أنك حتفضل تشتري طول الوقت، و حتكون البدايه طبعاً شراء الجهاز نفسه، و الجهاز الى حتشترته لازم يكون قادر على تحمل كل التطبيقات الى أنت عايز تنزلها من المتجر، فبنلاقى أن الشباب بالأخص، بيتجهوا لشرا أعلى الموبايلات أمكانياتاً، و طبعاً حتكون أغلاها سعراً، و الكارته أن بعد فتره فى حدود سنتين أو ثلاثه على أحسن تقدير، بيكون حصل خلالهم تطور كبير للتطبيقات، فبالتالى أمكانيات الموبايل بتكون أقل من الى التطبيقات محتاجاه، فبيبدأ الشخص فى البحث عن موبايل يناسب احتياجات التطبيقات دى بعد تطويرها، أو لظهور تطبيقات جديده محتاجه Hardware أو أمكانيات موبايل بشكل أعلى، و أنا متخيل أن الأحتياج للتغيير قريب جداً حيبقى بشكل سنوى.

من خلال مئات الألاف من التطبيقات، بتكون فيه برضه مئات الألاف من الوسائل الى حتجبرك على الدفع طول الوقت، حاخذ واحد من أخطرها، و هو الألعاب. أنا كتير بروح أقعد مع صديق ليا فى المحل الى بيديره فى منطقه المهندسين، و هو عنده هناك أكثر من ماكينه من ماكينات الدفع الألكترونى، و أنا من عادتى متابعه سلوكيات الناس، فأكتشفت أن نسبة الشباب الى بتدخل علشان تحول رصيد للألعاب Online مش قليله، و ده طبعاً بيكون علشان تشتري حاجه حتحتاجها داخل اللعبه نفسها، و ده بيتحول عند الشباب -زى ما ذكرت فى فصل سابق- لنوع من الأدمان. أفتكر لعبه كانت ظهرت من فتره كبيره، و بصراحه أنا مش عارف هى لسه موجوده و لا لأ، و كان أسمها "المزرعه السعيده"، اللعبه دى تحولت عند كتير من الناس لما يشبه الأدمان، كنت بلاقى ناس كل دقيقين تفتح الموبايل علشان تتظمن على الزرع الى زارعيه فى اللعبه، و طرح و لا لأ، بجد أنا كنت وقتها



تمت السيطر ح: فورمك السامرح

بستغرب تلك الحاله من الهبل و ألا معقوليه. فدلوقتي بدأت مرحلة أنك لازم تدفع علشان تكمل في اللعبة، حتدفع علشان تكسب، حتدفع علشان علشان تشتري أكسسوارات... إلخ، و ده المبدأ اللي بنى عليه مارك زوكريبرج فكرة The Metaverse الميتافيرس، أنك حتدفع طول الوقت، أن الميتافيرس حيكون متجر مفتوح طول الوقت لشراء عالم افتراضى.

نوع ثالث من أنواع السيطر عن طريق تحويلك لألة شراء دائمه، و هو التسوق عبر الأنترنت، و التسوق هنا له شكلين، شكل مهذب و أنيق و رسمى، و ده بيكون عن طريق التطبيقات الرئيسيه، اللي الناس أصبحت بتشتري أغلب احتياجاتها من خلالها. ده بجانب البيع الألكترونى اللي تحولت له أغلب المتاجر، سواء كانت ملابس، أدوات كهربائيه، أكل، أو حتى بقاله. أنا شخص مش قادر أتخيل لحد دلوقتي أنى ممكن أشتري أى قطعة ملابس من غير ما أقيسها و أشوف شكلها عليا، و برضه مش قادر أتخيل أنى أقدر أشتري بقاله أو خضروات، من غير ما أنزل بنفسى، لأن طول عمرى بتعامل مع نزلة السوبر ماركت كنوع من الفسحه و تغيير الجو.

وأخيراً و في نفس الأطار المهذب الأنيق، فالأنترنت برضه سمح لكل شخص بيعمل أى منتج يدوى، بيقدم أى نوع من الخدمه، أو حتى عايز يتاجر بأى شكل، أنه يعمل ده بأريحيه كامله، من غير عناء وجود محل و إجراءات تسجيل...، يمكن بعض الدول قررت أنها تعمل نوع من السيطر على الفكره دى، علشان الناس متعملش أقتصاد موازى خارج المنظومه الأقتصاديه الحكوميه، لكن الأنترنت نفسه معملش على التجاره الألكترونيه أى قيود، هو بس أحياناً بيبشاركك في جزء من المكسب.

أوصل معاك لرابع نوع من أنواع السيطر عن طريق تحويلك لألة شراء دائمه، بس الأول أحب أشركك شئ بسيط، في علم الProject Management أو إدارة المشروعات، هناك ما يُسمى سياسة الPush notifications أو الأشعارات المدفوعه، و مدفوعه هنا مقصود بيها أنها بتتزلزلك علشان تشوفها غصب عنك، و ده طبعاً كلنا لامسينه، سواء على الYoutube، أثناء الGames، أو حتى الأعلانات الثابته اللي بتظهرلك و أحياناً بتكون مغطيه على الخبر أو الموضوع اللي أنت عايز تقرأه، و دى أخطر نقطه عايز أتكلم عنها في الفصل ده كله



تمت السيطر ح ج: فورمات السامله

الكلام الى قلناه في ال3 أنواع الى فاتت من طرق تحويلك لماكينة دفع، كان يمثّل الشكل مهذب و أنيق و رسمي، فماذا عن الشكل الغير رسمي؟ تعال معايا ناخذ الموضوع بالتدرّيج و خطوه خطوه.

الأعلانات اللّى بتظهرلنا دى بتكون إعلانات Tailored و الكلمه دى معناها متفصله على مقاسك، بمعنى أن كل كلمه حضرتك بتستخدمها فى محركات البحث، بتتحول ل Keyword أو كلمه دلاليه عند المحرك البحثى، علشان تبدأ تصنفك، يعنى مثلاً شخص بيدور على مواقع رياضيه أغلب الوقت، غير شخص بيدور على مشاهدة أفلام، غير بنت بتدور على ملابس، و طبعاً مع الكلمه الدلاليه بيكون فى عامل آخر بيتم التعامل معاه، و هو موقعك الجغرافى، ده غير المعلومات الخاصه ببيك، زى عمرك، الجندر بتاعك (ذكر أو أنثى)، ... إلخ، و من كل المعلومات دى، بتبدأ الإعلانات اللّى بتخص اهتماماتك تحاصرک.

بيكون قدام حضرتك أختيارين، يا تقبل فكرة الإعلانات، و اللّى طبعاً حيكون لها أثر كبير فى توجيه عقلك الباطن للشراء، أو أنك تدفع اشتراك شهرى على المواقع اللّى أنت بتدخل عليها - اللّى الإعلانات بتحاصرک من خلالها- علشان تمنع وصول الإعلانات لك. و هنا هو نجاح و أجبرک على الدفع علشان الإعلانات متقطعش ال Game اللّى حضرتك بتلعبه، أو الفيديو اللّى كنت بتشوفه إلخ. بالضبط زى ما تكون بتدفع فلوس لشخص بيضايقك علشان يبطل يضايقك.

الى أنا قلته ده، و بالرغم من كونه بيخترق خصوصياتك من خلال تسجيل كل كلمه أنت بتكتبها، لكن لسه باعتبره برضه فى إطار الشكل المهذب الأنيق الرسمى، لكن حيكون مدخلنا لما يمكن أن نُطلق عليه "ليثيل الوحش"، المستوى ألا آدمى من التعامل معاك و التدخل فى خصوصياتك، علشان يتم التحكم فى حياتك كلها من خلال نفس تجربة سياسة ال Push notifications أو الأشعارات المدفوعه، عن طريق برضه فكرة الكلمات الدلاليه، لكن بشكل تانى أسوأ بكتير، و لا يحترم أى نوع من الخصوصيه.

طبعاً حضرتك أكيد مريت بتجربه أنك تكون تكون بتتكلم مع شخص ما عن موضوع أو سلعه معينه، و الموبايل يكون جنبك، و بعدها على طول أول ما تمسك



تمت السيطرة ج: فورمك السامرح

الموبايل، تطلعك أعلانات عن السلعه دى. فى البدايه حتستغرب فكرة توارد الخواطر الغريب دى، لكن مع تكراره، حتبدأ تكتشف أن طول ما أنت فاتح الأنترنت، فكل كلامك بيتسجل، وبيتعمله فلتر فى لحظتها، علشان بعدها بثوانى يفاجئك إعلان أو أعلانات عن نفس الموضوع أو المنتج، اللى أنت كنت لسه بتتكلم عنه. والأغرب أن الذكاء الأصطناعى بيميز صوتك من صوت الشخص اللى بتتكلم معاها!!!!!!

التجربه دى هى المستوى الأول من مستويات مراقبتك و تحليل كلامك، و فيها أفترضنا أن كل الكلام اللى بنقوله و الموبايل مفتوح جنبنا بيتسجل و يتحلل، طيب هل الموضوع وقف عند كده و بس؟

المستوى التانى بيبجى لما تكتشف أن الكلام ده بيحصل حتى و الأنترنت مقفول، أما المستوى التالت و هو الأغرب و الأكثر رعباً، فهو أن ده بيحصل حتى لو الموبايل مقفول، و كمان مفيهوش شريحه، و ده معناه حاجتين أخطر من بعض، الأولى أن أى جهاز Smart phone واصل بالأنترنت طول الوقت، مش محتاج شريحة Data. و الحاجه التانيه أن الموبايل بيسجلك طول الوقت كل كلمه أنت بتقولها، و أحب أكد أن المستوى التالت ده، و هو أن الموبايل حتى و هو مقفول عارف أنت قلت أيه، و بيحوله لKey words أو كلمات دلاليه بيعرضلك بعدها أعلانات عن نفس الشئ اللى أنت أتكلمت فيه، تجربه مريت بيها أكثر من مره، و بأكدلك أنها حقيقه 100%.

فيه مستوى ما بعد كل المستويات دى، بس حيكون كلامى عنه فى الكتاب اللى الجاى، و هو مستوى قراءة عقلك، و ده موضوع حقيقى و بيحصل بجد، يعنى السيطرة وصلت لمرحلة قراءة العقول و كمان التحكم فيه. طبعا المشروع ده لسه فى مرحله الBeta version، أو التجربه، بس أصبح موجود، و ممكن ناس كتير تبدأ تفكر فى شئ، بعدها مباشرة يلاقوا اللى فكروا فيه على الموبايل أو الأنترنت. التقنيه دى كانت بدايتها من فتره كبيره جداً، من 1953، و استخدمتها المخابرات الأمريكيه، و كان أسمها MK ultra mind control، بس طبعا أحنا حالياً فى مرحله أعلى بكتير جداً من مرحله غسيل المخ اللى بدأت بيها من 70 سنه.



كل الكلام الى فات ده بيتمثل بس أول شكل من أشكال السيطرة بأستخدام هذا الجهاز الشيطاني المُسمى "Smart phone"، و هو الشكل اللي بيوصل أى مستخدم من مستخدمي الموبايل لتحويله زى ما قلنا ل"ماكينة شراء دائمه"، لكن طبعاً هذا الجهاز الشيطاني برضه مخليك طول الوقت تحت السيطرة بأشكال تانيه كتير جداً، تعال معايا نستعرضها بشكل سريع.

تاني شكل من أشكال السيطرة بيتمثل في فكرة السيطرة الكامله على وقتك و تركيزك، و اللي خلانا نشوف المشهد الغريب اللي عمرى ما تخيلت أنى حاشوفه في حياتي، لما تلاقى أربع أو خمس أشخاص مجتمعين مع بعض، وكل واحد فيهم ماسك موبايله و تركيزه الكامل فيه، و ممكن المجموعه دى تقعد مع بعض 3 أو 4 ساعات كامله، من غير ما يدور بينهم أى حوار، أو فكرة الطالب اللي ممكن تلاقيه أثناء المحاضره ماسك الموبايل طول المحاضره، و تركيزه بس في مواقع التواصل الأجتماي، و المُحاضر اللي واقف قدامه، كأنه مش موجود.

موقف مهم جداً و دال جداً حصلى عند واحد من محلات الفول و الطعميه الشهيره، و اللي دايماً عليه ضغط كبير. كنت واقف مره عند الكاشير و كانت بنت، و طلبت حاجات بطلبها من هناك بشكل شبه يومى. البنت كان في أيديها موبايل مرفعتش عينيها من عليه، فمن غير حتى ما تبصلى، قالتلى معندناش الطلب ده، قتلتها أنا بطلبه كل يوم، أصرت أن مفيش عندهم طلب زى ده، قتلها ما أنتى لو سيبتي الموبايل اللي في أيديك حتلاقيه، برضه أصرت على كلامها، فقررت أنى لازم أجيّب المسئول عن الوردية، و خليته يطلعها الطلب من البرنامج اللي موجود على الشاشة اللي قدامها، و أتمنى أنها تكون أتجازت بأى شكل من الأشكال، مش رغبةً منى في أذيتها، بس علشان مفيش حد بيتعلم -للأسف- من غير ما يتقررص.

ببساطه، فأشكال التواصل الأجتماي الموجوده كلها، بدايةً من نشر خبر -سواء عام أو خاص-، لنشر الصور الخاصه، لمتابعه الVlogs أو الفيديوهاات الدوريه اللي كتير من الناس بتعملها، أصبحت نوع من الأدمان الحقيقي للناس، الغالبية العظمى من الناس أدمنت المتابعه بس، بمعنى أنهم تحولوا لمتلقين سلبيين طول الوقت، و الجزء الباقي من الناس، و هو الجزء الأقوى و الأقل عدداً، أدمن فكرة أن الناس



تمت السيطر ح ج: فورمك السامله

تتابعه، أنه يكون محور أهتمام و تركيز الناس، أنه يبقى Influencer أو مؤثر، و دى طبعاً بالنسباله بتكون خطوه مهمه على طريق الفلوس، بعد مرحله الشهره.

حنسب الشخصيه اللى قررت تبقى مؤثره و محور أهتمام، لأن الكلام عنها حبيبي فى الجزء الأخير، و حنركز على الشخصيه اللى بتمثل فكرة المتلقى السلبى طول الوقت، الشخصيه اللى بتصحى من النوم تدور على الموبايل علشان تفتح عينها عليه، و هو النموذج اللى بيمثل الغالبية العظمى من الناس حالياً.

فى البدايه خلينى أجابك على سؤال، هو أيه الهدف من وراء وصول الغالبية العظمى من الناس للتحويل لكونهم "متلقى سلبى"؟

الأجابه تشمل جوانب كثيره، منها المادى، و هو دائماً بيكون وسيله لغايه أبعده، و ده بيكمن فى أن الصفحات اللى هذا الشخص متواجد عليها طول الوقت، ما هى إلا فتارين عرض لعشرات الأنواع من السلع، سواء بيع مباشر، زى الصفحات اللى بتبيع منتجات بشكل مباشر، أو غير مباشر، عن طريق الإعلانات اللى بتقابل الشخص طول الوقت، و من هنا بنرجع تانى لفكرة تحويلك لماكينه شراء دائمه، الفكره الأهم دائماً، و اللى بتخليك طول الوقت بتصرف فى حاجات، ممكن فعلاً ميكنش لها أى أهميه حقيقيه عندك، لكن هناك هدف دائم بأنك تكون طول الوقت معندكش أكتفاء بالى عندك بس، بأنك تدور فى ساقية الشرا طول الوقت.

تانى سبب هو نشر الأفكار اللى عايزين يوصلوها، و ده من خلال تواجدك الدائم على مواقع التواصل الأتماعى، فممكن تلاقى خبر يجذبك لصفحه تانيه متكنش متابع لها، تبدأ النداهه تندهك و تقرأ موضوع ورا موضوع، تبدأ الفكره تشدك.. و هكذا، و فى النهايه فدايماً أنت مُستهدف، و دائماً هما عارفين يستهدفوك أمتى..... و أراى.

تالت سبب له علاقة بفكرة المليار الذهبى، حتقولى أراى، هما حيموتونى من على مواقع التواصل الأتماعى، أقولك لأ، بس ده ممكن يتم من خلالك أنت بطريقتين. أولهم زى ما أنا لسه ذاك فى السبب اللى فات، و هى نشر الأفكار، و طبعاً كلنا سمعنا عن لعبة "الحوث الأزرق"، أو صفحات بتنشر أفكار تدعو للانتحار، و الموضوع ده منتشر بشكل كبير جداً فى البلدان الأعلى مستوى أتماعى و دخل. أو برضه عن



تمت السيطر ج 7: فورمات السامح

طريق أستدرجك للدخول في جماعات دينيه مسلحه، و طبعاً الأمثله كثير جداً. أو نشر الأفكار اللى بتعرض على الطائفيه و العرقيه، و اللى بيتبعها في الأغلب حروب أهليه.

كل اللى فات ده بيُمثل بس بعض نماذج الطريقه الأولى، أما الطريقه الثانيه فهي الأخطر و الأبعد و الأكثر عمقاً، و هي فكرة أنعزال الناس عن بعض، فكرة التباعد الأتماعى اللى بتحصل عن طريق مواقع التواصل الأتماعى، و طبعاً أنت ممكن تكون سمعت عن "Metaverse" أو الميتافيرس، و اللى أنا لسه ذكره من شويه، و هو الشكل الجديد اللى حيثحوله الـ Facebook، و اللى الشركه كلها أتغير أسمها له، فأصبحت كلمه الميتافيرس أسم للشركه و تقنيه في نفس الوقت.

بأختصار فالتقنيه دى حتحول عالمنا كله لعالم أفتراضى، و اللى بدوره حيسبب أقصى تباعد للناس عن بعض، لأن التعليم، الشراء، الرياضه، السياحه، كل شئ سيكون أفتراضى، كل شخص على الميتافيرس حيبنى العالم اللى نفسه يعيش فيه -بس بشكل أفتراضى-، و طبعاً كل ده مش حيكون ببلاش، حيكون طبعاً فيه دفع، بس دفع بسيط و في متناول اليد، في مقابل أنك حتعيش الحياه اللى نفسك فيها، و حتبدأ تصدق نفسك شويه بشويه، لأن مش أنت بس اللى حتكون عايش بالشكل ده، مليارات البشر على كوكب الأرض برضه حتكون عايشه زيك.

طيب ده علاقته بأيه بفكرة المليار الذهبى و تقليل عدد سكان الأرض، ببساطه التباعد و الأنعزاليه حيكون معناهم أن بالتدريج الأرتباطات الأتماعيه و منها الزواج حتقل، و بالتالى عدد سكان العالم حيققل، و عايز أكاد أن تجربه الكوفيد 19 أو الكورونا، و اللى عزلت سكان العالم عن بعض لمدة تقريباً سنتين، ما هى إلا جزء من التمهيد للمرحله اللى جايه دى.

تالت شكل من أشكال السيطره، و هو آخر موضوع في الفصل ده، بيتمثل في فكرة السيطره الكامله على طموحاتك و تحويل مسار حياتك، و خاصه عند الشباب الصغير ما بين 13 لـ 25 تقريباً، و القضاء شبه التام على فكرة أن أى شاب من الأجيال



تمت السيطرة ح: فورمك السامح

الجديده يكون له طموح علمى بأى شكل، مع تحويلك لمسح أو أراجوز، بس بمقابل، المهم..... أنك مستخدمش عقلك.....متفكرش.

حأبدأ الحكايه معاك من زمان جداً، و على مستوى العالم كله، و مره ثانيه حتكون مع بداية ظهور التليفزيون و دخوله كل بيت. قبل التليفزيون كان كلاً من السينما و كرة القدم ملهمش غير و سيله واحده لمشاهدتهم، و هى بالتأكيد أنك تنزل بنفسك، و تروح دار العرض أو الأستاذ، فكانت طبعاً نسبة المشاهده مش حتزيد عن عدد كراسى الأستاذ، لأن المباراه مش بتم غير مره واحده، أو عدد الأشخاص اللى حتروح و تشوف الفيلم داخل دور العرض.

دخل التليفزيون و تقريباً وصل كل بيت فى كل مكان فى العالم، فبدأ عدد اللى ممكن يشوفوا فيلم ما -حتى لو بعد نزوله فى السينما بسنين-، يتحول من عشرات الألوف لعشرات الملايين، و نفس الحكايه فى مباريات كرة القدم، و طبعاً بما أن المشاهد مش بيتحرك من بيته، و لاحتى بيدفع جنيه فى المشاهده، و بما أن فيه قاعده بتقول أن أكثر الحاجات اللى عليها أقبال هى المجانيه، فبدأت من هنا تظهر أهمية الإعلانات و الرعايه.

و مع ظهور الرعايه و الإعلانات، بدأت أجور لاعبى كرة القدم و الممثلين تزيد بشكل غير متناسب مع باقى المهن و الوظائف -الأكثر أهميه بالتأكيد-، فأصبح مفيش وجهه مقارنه تماماً بين اللى بياخده لاعب الكره أو الممثل، و اللى بياخده دكتور أو مهندس أو محاسب عادى. و من هنا حأبدأ تحويل الموضوع من الشكل العالمى للمحليه، و حأتكلم عن تجربه مصر، و طبعاً ما شابها من دول، زى دول شمال أفريقيا.

للأسف فى مصر العلم ملوش سعر، و مش عايز أقول ملوش قيمه، و ده اللى حول كليه فى غاية الأهميه زى كلية علوم، لكليه بتخرج مدرسين ثانوى، بدلاً من أنها تخرج علماء، يكفى أن حتى يومنا يومنا هذا، كل الأستكشافات الأثريه و عمليات التنقيب اللى بتم فى أغلب دولنا، بتكون أما أوروبيه، أو أمريكيه، أو يابانيه.

كان ليا تجربه إنتداب لمدته سنه فى واحده من أهم هيئات البحث العلمى فى مصر، و صُدمت فى السنه دى من وضع واحده من أعلى الهيئات العلميه فمصر، طبعاً ده



تمت السيطر ج: فورمات السامرح

يتوازي معاه إنخفاض الميزانيه المخصصه للبحث العلمى ككل، فبالترديج أصبح إتجاه الغالبية العظمى من الناس للشغل اللى بييجيب فلوس، و خصوصاً مع الظاهره الخطيره اللى مصر بتعانى منها، وهى أن الغالبية العظمى من الناس بتشتغل فى غير مؤهلها، فأصبح الطلبة بيدوروا دايماً على أسهل شهاده ممكن يحصلوا عليها، لأن كله فى النهايه محصل بعضه.

بدايةً، تقريباً من منتصف التسعينات حصل التغيير ده، و اللى تزامن و تأثر بظهور 3 ظواهر فى غاية الأهميه، غيرت بشكل كبير نموذج الحياه فى مصر. الأولى كانت بداية الأحتراف الفعلى فى كرة القدم فى مصر، و ده معناه أن لاعب كرة القدم أصبحت مهنته الوحيدة هى كرة القدم، و أصبح اللاعبين اللى بيلعبوا فى أندية الدورى الممتاز -و اللى طبعاً هما دول اللى الناس عارفاهم-، بيقبضوا بالملايين.

فى نفس الوقت كانت المسلسلات الدراميه فى أوج مجدها، و اللى تزامنت مع الظاهره المهمه جداً التانيه، و هى ظهور الفضائيات، فبرضه أصبح الممثلين النجوم بياخدوا بالملايين، ناهيك عن الشكل الأسطورى اللى بدأ يظهر عليه لاعبى كرة القدم و الممثلين و طبعاً المطربين، لأن التلميح ده بيعلى سعرهم، و سواء دول أو دول، فكان دايماً فى إدارة كامله وراهم بتحركهم و ترسلهم كل خطوه بيعملوها، زى ما سبق و ذكرت فى فصل "مسار كايروكى الأجبارى". طيب أيه دخل الحكايه الطويله اللى أنا حكيتها كلها بموضوع الموبايل؟ حأبدأ أربط معاك الموضوعين ببعض.

من منتصف التسعينات أصبح فى هوس من أغلب الناس -سواء من بعض أولياء الأمور أو الأبناء نفسهم- أن الأولاد يكونوا أما لاعبى كرة القدم، أو مطربين و ممثلين، و غالباً بيكون الهدف من فكرة الغناء، أن هو أو هى يتحولوا للتمثيل بعد كده، و ده طبعاً أما رغبة فى الشهرة أو الفلوس، أو الأثنين مع بعض. كل ده طبعاً تزامن مع الأبحار التدريجى المستمر فى مستوى التعليم فى مصر، سواء مدرسى أو جامعى.

و تزامناً مع الظاهرتين السابقتين، ظهرت الظاهره الثالثه الأهم من الأثنين، و هى تغير نمط و شكل الوظائف فى مصر، و خاصة بعد ظهور الموبايل، و معاه أتشقلب الهرم الأجتماعى-المادى فى مصر. بدأت تظهر وظائف كثيره Out of nowhere أو من العدم، زى خدمة العملاء أو الTele marketing، و فكرة الDelivery، و



تمت السطر ج: فورمك السامح

الشيء في مطاعم الFast food، و صيانة الموبايلات، وكلها بدأت مرحلة الأنتشار من الفتره دى، و معها عشرات المهن الثانيه المرتبطه بالتطور اللى حصل. و بدأ الشباب يلاقى منافذ ثانيه للعمل، خارج الأطر السابقه، و اللى كان أقصاها قبل كده العمل في فندق في الغردقه أو شرم الشيخ.

من هنا زادت المعايير أنقلاباً، و أصبحت الأجيال الجديده اللى طالعه في قمة البرجماتيه، و اللى ممكن أختصرها بالتعبير الشهير "اللى تكسب به أعبه"، فبدأ الشباب يدور على أيه اللى حيجبله فلوس، بدايةً من التمثيل و كرة القدم، لكل الوظائف الجديده، و اللى كانت خارج الأطار التقليدى للوظائف القديمه، و اللى كلها بعيده عن العلم المعرفى التقليدى، لكن ليها علومها و قوانينها و ألياتها الجديده، و أنا هنا بتكلم عن جيل مدته حوالى 15 سنه، من أواخر التسعينيات، لحد تقريباً 2013 أو 2014، وقت ما أصبح الSmart phone حقيقه واقعه في مصر.

الأجيال الجديده بدأت تلاقى أنها ممكن تكسب من بيتها، و هى لسه عندها 17 أو 18 سنه، و بأقل مجهود، و بمبالغ شهريه والده نفسه ممكن ميعرفش يدخلها في سنه، هى كل القصه أنك تظهر و تقدم محتوى. طبعاً في ناس كثير جداً بتقدم محتوى مفيد، و أنا بأعتبر نفسى واحد منهم، لكن الغالبية العظمى بتقدم لا شئ، بالعكس هى بتقدم تنازلات أكثر ما بتقدم محتوى، و ده طبعاً الأسرع وصولاً، و الأكثر أنتشاراً.

الموبايل وفر لمئات الملايين من الناس في العالم كله فرصة المكسب السهل البسيط، و كل ده و أنت كمان في بيتك، و مش بطريقه واحده لكن بأكثر من طريقه، بالكتابه، بأعادة نشر أخبار، برفع صور، بأنك تكون صاحب محتوى، بأنك تكون أداة تنفيذ لمحتوى مطلوب، بأنك تطلع Live على الهوا تقول أى حاجه، بأنك تغامر بشويه فلوس في بورصة العملات الرقميه، و بعشرات الوسائل الأخرى.

الوسائل دى بتنوع في درجة قيمتها، بس في النهايه كلها بتحقق دخل، و للأسف كل ما كانت درجة المحتوى تافهه و مفهياش مجهود، كل ما زادت نسبة مشاهداتك، و بالتالى نسبة دخلك. أغلب الناس في العالم كله بشكل عام، و في الدول منخفضه المستوى الأتماعى بشكل خاص، الطموح الرئيسى لها هو الماده.. الفلوس، و أحب أوضح أن ده و عن خبره موجود برضه بين الأجيال الجديده في بعض الدول



تمت السيطره ج 7: فورمك السامليه

المتقدمه، لكن في النهايه هناك عندهم في توازن، ما زال فيه ناس بتهمتم بأنواع أخرى من الطموح. لكن في بلادنا، ومع إنخفاض مستويات الدخل بصوره مخيفه، فطبعاً بتتضائل لحد ما تختفى أى طموحات تانيه محتاجه وقت و مجهود للوصول بس لمرحلة الأستقرار المادى.

ظهور التطبيقات اللى بتكسبك بشكل سريع، و بطريقه مفيهاش أى أبداع، بل غالباً بتكون بطريقه مهيئه، مش ظهور أعتباطى، بل جزء من تخطيط منظم جداً، زى تقليد مقاطع فيديو، أو أنك تطلع Live تقول أى كلام، و أحياناً تصرفات لا أخلاقيه، أو أنك تعرض حياتك الشخصيه سواء بشكل حقيقى أو كاذب، للدرجه اللى وصلت سيده من حوالى شهر أنها تقول كلام صادم عن أولادها، و الحمد لله أنها تم اتهامها و احتمال تتحاكم، علشان تكون عبره و عظه للأخرين. اللى بيحصل حالياً تغيير كارثى في المفاهيم و الأخلاقيات، و أنا حتى هذه اللحظه مش واضحلى، هل التطبيقات دى ذاتها بتحقق أى نوع من الريح، و لا هو الهدف منها توجيه الأجيال الجديده لأتجاهات جديده بتطمس هويتهم، بتقتل أى طموح علمى، بتزود العنف و الأفكار الجنسيه و المفاهيم الخاطئه و بس.

في النهايه، و بعد الفصل الطويل جداً ده، فأنا مش حاقدر أوجهلك أى نصايح، أنت لازم تكون الدليل لنفسك، حاول بس تفكر قبل ما تجرى ورا أى ظاهره، هل هى مناسبه لك؟ هل فيه هدف من وراها؟ حاول دايماً يكون تفكيرك نابع من عقلك، متبقاش تابع طول الوقت، و في النهايه أنت اللى تحصد نتائج أفعالك.

26 مايو 2023



تمت السيرة ج2: صناعة الورق (اصنام و تابوهات)

"هل من الممنوع أن نصنع مبادئنا بأنفسنا؟
هل يجب أن نصدق دائماً ما يقال لنا؟
كيف نمنع تلك الموجات الخفية من اختراقنا؟"



تحت السيطره ج2: صناعة الوهم (أصنام و تابوهات)

في الفصل اللي فات بدأت معاك رحلة ندور فيها مع بعض، عن بعض من الأشكال و الوسائل التي بيتم بيها السيطره على حياتنا و أختياراتنا، و خصصت الفصل اللي فات عن نوع من أنواع السيطره، و هي السيطره اللي بتخليك على مدار حياتك بتدفع علشان تشتري طول الوقت، و ممكن اللي تشتريه النهارده، تلاقى أنك محتاج تشتري غيره بكره، و ممكن كمان توصل السيطره عليك لأنها تدفعك أنك تشتري حاجات ممكن تكون مش محتاجها بشكل حقيقي، بس هما عارفين طول الوقت أزاى يسوقوا بضاعتهم، أزاى يخلوك تشتري حتى اللي مش ضروري بالنسبالك، و لو كنت مضغوط مادياً.

الفصل ده حأتكلم معاك في إتجاه تاني خالص، إتجاه مفيهوش أى ضغط أو دفع فلوس -غير بمزاجك-، إتجاه بيتبنى على تشكيل قناعاتك، أو اللي أنت بيتهياك أنها قناعاتك.

عايز أبدأ معاك لأول مره بتحليل العنوان اللي أنا أخترتة للفصل ده، الفصل أسمه مكون من 3 أجزاء؛ عنوان رئيسي، عنوان تحت العنوان الرئيسي، و عنوان فرعي، و تعال أحلل معاك كل واحد من العناوين الثلاثة، علشان يكون التحليل ده مدخل سريع للفصل.

العنوان الرئيسي "تحت السيطره" و اللي مكمل معنا من الفصل السابق، زى ما سبق و ذكرت، هو عنوان بيذكرك أن أحنا طول الوقت موضوعين تحت التحكم، و ده بيتم عن طريق وسایل كثير، سميتها معاك المسيطرات، و أخترت من كل الوسائل دى نوعين، نوع مادى أنكلمنا عنه في الفصل السابق، و نوع معنوى حنتكلم عنه في الفصل ده.

ندخل على العنوان اللي تحت العنوان الرئيسي و هو "صناعة الوهم". بدايةً، فكلمة الوهم دائماً ما بترتبط بالعقل، بأشياء -سواء كانت ماديه أو معنويه- أنت



تمت السيرة ج2: صناعة الوم (أصنام و تابوهات)

بتعتقد بوجودها، بس هي في الحقيقيه مش موجوده، بأفكار ممكن تتصدرك، لكن هي مش حقيقيه، لكن ممكن أنت تبني حياتك كلها عليها، بأحلام ممكن تكون بتتمنى تعيشها، بس هي بالفعل مش حقيقيه.

أوصل معاك لأخر عنوان، و هو العنوان الفرعى "أصنام و تابوهات"، و هنا تبدأ الأمور توضح بشكل كبير. أنا قسمت عملية صناعة الوهم العقلى ده لفتتين، و الفتتين بيمثلوا بالضبط طرفى مقص، كل فئه فيهم على النقيض تماماً، لكن بما أنى شبهتهم بطرفى مقص، فالمقص دايماً بيكون مُثبت من نقطه واحده في النص، و بيدار بأيد واحده، و مش حارق لك أيه الفتتين اللى أنا حأتكلم عنهم دلوقتى، لكن كل اللى حأقدر أوضحه، أن الفتتين بيهدفوا لوصولك لمرحله الExtreme، أو التطرف بمعناه الأشمل، علشان كده أحياناً كتير بنلاق أشخاص بتنتقل من فئه منهم للفته العكسيه تماماً بشكل مفاجئ، مع أنهم فعلياً طرفى نقيض، و كالعاده حأدلل بفيلم رائع، و الأهم أنه فيلم مصرى على الفكره دى، بس لما نوصلها.

في البدايه حأتكلم برضه عن فيلم، بس فيلم تانى غير اللى أنا لسه ذكره، زى ما بدأت العديد من الفصول اللى فاتت، لكن لأول مره حأدلل على فيلم و أقول أنه فيلم سئ جداً، و كنت خصصتله حلقة في واحد من برامجى السابقه على القناه، و أنا مهتم أنى أوضح أن مبدأ التدليل بعمل فنى، بيكون لتوضيح الفكره بشكل أكبر، فحتى لو كان الفيلم سئ جداً، و حأقول ليه هو سئ، لكنه تناول الفكره من وجهة نظره، و تحليلى لليه هو سئ، هو بالفعل جزء من توضيحي للفكره.

الفيلم المره دى هو فيلم تسجيلى، و أحب بس أوضحك ليعنى أيه فيلم تسجيلى، و أيه هو الفرق بين الفيلم الوثائقى و التسجيلى، بما أن إخراج أفلام تسجيليه كان هو أكثر عمل قمت بيه على مدار حياتى، فمهم جداً أنك تفهم معايا معنى مصطلح "فيلم تسجيلى"، و الفرق بينه و بينه "فيلم وثائقى" قبل ما أبدأ.

الفيلم التسجيلى، و زى ما هو واضح من أسمه، هو فيلم بيصور أو بيسجل بشكل محايد بعض الأحداث اللى بتحصل بشكل حقيقى في الحياه، السيناريو الخاص بيه مش بيكون فيه أى نوع من الFiction أو الخيال، إنما بيعتمد على تصوير أو تسجيل



تمت السيطر ح 2: صناعة الروم (اصنام و تابهات)

الأحداث الحقيقية، أو حياة شخص أو أشخاص، أو حتى توثيق لحدث أو لحظة ما، زى مثلاً الأفلام اللى بتتكلم عن البعثات الأستكشافية للأثار، أو أحداث ثوره، أو ما شابه من أفلام.

أحياناً بيكون فى نوع من الأفلام الوسيطه بينه و بين الأفلام الروائيه العاديه، و هو نوع أسمه "Docudrama"، و اللى واضح من أسمه أنه مزيج ما بين الفيلم التسجيلى "Documentary"، و الفيلم الدرامى "Drama". فى النوع ده بيتم تمثيل بعض المشاهد داخل الفيلم التسجيلى، طيب ليه بيتم الجزء التمثيلى؟ علشان ممكن تكون فيه بعض الأحداث اللى تمت فى الماضى، و من المهم أنها تظهر فى الفيلم، سواء لنفس الأشخاص اللى موجودين فى الفيلم، أو لأشخاص توفوا، ففى الحاله دى بيتم تصوير أجزاء دراميه أو تمثيليه، سواء بنفس الأشخاص الحقيقيين، أو بالأستعانه بممثلين.

كده أكون وضحت معنى الفيلم التسجيلى، أما الوثائقى، فهو فيلم بيعتمد بصوره كبيره على الوثائق و الأحصائيات و المواد الأرشيفيه، و لقاءات حواريه مع أشخاص مسئولين أو معنيين بالموضوع، و مش بيعتمد على تصوير أحداث فعليه بتتم. و كده أكون قربتلك الفكره بشكل كبير، و ندخل بقى فى الكلام عن الفيلم.

الفيلم هو "فى سبع سنين" من إنتاج قناة الجزيرة فى أوائل سنة 2019، و الفيلم مزيج من الأنواع الثلاثه اللى أنا لسه ذاكرهم، يعنى هو يبدو أنه فيلم تسجيلى فى ظاهره، و بالفعل فيه جزء تسجيلى مهم فى النصف الثانى من الفيلم، لكن فى نفس الوقت هو فيه أجزاء Docudrama، و أجزاء وثائقيه، إذن ففيلمنا كان مزيج من الأنواع الثلاثه، و دى يمكن تكون من نقاط القوه القليله جداً فيه، لكن خلينى الأول أشرحلك هو الفيلم بيتكلم عن آيه، قبل ما أبدأ أعددلك عيوب الفيلم الكارثيه.

الفيلم تم تصويره فى سنة 2018، يعنى بعد 7 سنين من ثورة يناير 2011، و من هنا كان أسم الفيلم. الفيلم بيتكلم من وجهة نظره على المتغير اللى طرأ على كثير من الشباب خلال فترة السبع سنين اللى تلت ثورة يناير 2011، و خاصه بعض الشباب أصحاب توجه دينى معين، و تأثير أحداث يونيو 2013 و تغير الحكم فى مصر عليهم،



تمت السيرة ج2: صناعة الهم (أصنام و تابوهات)

و إتجاه بعضهم للجهاد المسلح في سوريا، و المجموعة دى بتُمثل النص الثانى من أحداث الفيلم.

النص الأول بيتكلم عن شباب كان مسلم، لكن ترك الديانة الإسلامية، و أنا مش بقتنع تماماً بتعبير "إلحاد" لأنه تعبير بلا معنى، و بفضل دايمياً إستخدام تعبير "ترك الدين"، لأن تعبير إلحاد ببساطه ليس له أى أصل لغوى، خاصةً أن الجذر اللغوى له و هو "لحد" معناها دفن أو حفر حفرة، و أنا مش عارف أساس إستخدام اللفظ كتعبير عن ترك الدين أياه. المجموعة دى بتُمثل النص الأول من الفيلم.

الفيلم ببساطه هو عبارة عن مجموعة لقاءات مع تاركى الدين فى القاهرة فى النص الأول من الفيلم، و دول أولاد و بنات، و مجموعة لقاءات مع الشباب الللى إتجه لسوريا بأى وسيلة ما للجهاد المسلح، و ده تم تصويره فى سوريا، و طبعاً دول أولاد بس، و كان كلهم ملثمين.

بعد كده، و فى نهاية الفيلم، بيرجع تانى لجزء تاركى الدين، و ده بيتم من خلال بعض الجمل المهمة الملهمه و ذات الدلالة، و بعدها بيتم إستعراض بعض الأحصائيات الللى قام بيها محمد ماهر عقل، منتج و مقدم و راوى الفيلم، علشان يعملنا مشهدين فى آخر الفيلم ملهمش أى لزمه، الأول مشهد صغير جداً لشاب مصرى مسيحي، برضه ترك الدين، و الثانى عبارة عن لقطه لمحمد ماهر بيخبط راسه فى حيطه عليها مجموعة أحصائيات، مع صوت أغنية أم كلثوم "فات الميعاد"، و المعنى طبعاً واضح.

أسف لو كنت طولت شويه فى شرح الفيلم، بس الفيلم ده تحديدأ و عملية شرحه، فيها جزء مهم جداً من الللى عايز أوصله فى الفصل ده، و خلينى أبداً معاك مرحلة نقد الفيلم.

بدايةً، فالفيلم من نوعية الأفلام التسجيليه الللى بتتميز بوجود مرافق على مدار الفيلم، الشخص دى بيعمل الحوارات و التعليق الصوتى، بيكون أقرب لدليل أو Guide معاك يبسطلك الأمور، و ده بتعمله الـ BBC بنجاح كبير جداً، و خصوصاً فى الأفلام التسجيليه العلميه. الشخص ده يُفترض دايماً أنه بيكون من عوامل نجاح الفيلم، لأن الناس بترتبط بيه لأنه بيكون الدليل بتاعها على مدار الفيلم، و هنا



تمت السيرة ج2: صناعة الوم (اصنام و تارهاج)

الموضوع سيكون سلاح ذو حدين، يا ينجح الفيلم، يا أما لو هو مش فاهم دوره كويس، فيباخذ الفيلم لشكل تاني خالص، و دى أول غلظه في الفيلم، أن محمد ماهر عقل مكنتش فاهم دوره على الأطلاق، بس يمكن بما أنه من فريق الأنتاج، و غالباً أنه صاحب فكرة الفيلم، فكان بيعمل اللي هو عايزه، مش اللي الفيلم محتاجه على الأطلاق، و ده حاوضحه سريعاً في مجموعة نقط.

أول غلظه وقع فيها، أنه مفهمش الفارق الكبير بين حلقة في برنامج و فيلم تسجيلي، فبالتالي مفهمش الفارق بين دوره و بين أى مقدم برامج. بدايةً، فحلقة في برنامج يومي أو أسبوعي غالباً بتعتمد على Trend أو على إهتمام الناس في الفتره دى، فبالتالي هي بتنتهي بالنسبة للمشاهد بمجرد ما ببشوفها. أما الفيلم التسجيلي أو الوثائقي، و اللي بيعتبر زى كتاب، بس كتاب مرئى، فبالتالي بيفضل مرجع حتى لو عدى عليه سنين، و أنا فعلاً بعمل ده في شغلى طول الوقت، إني أحياناً برجع لأفلام تسجيليه قديمه بتوثق مرحله فاتت، فهنا محمد ماهر عقل و المخرج محمد رشيدى، وقعوا في خطأ تحويل جزء كبير من الفيلم لحلقة في برنامج بنوعيه الأسئلة و أسلوب الحوار اللي كان مُتبع طول الفيلم.

تاني غلظه أنه مفهمش برضه أنه مش مذيع، بمعنى أنه مش دوره يحاور و ينقد و يقاطع الضيف، ده موجود في البرامج، حتى لو أنا كنت برفضه، لكنه أصبح عُرِف في الشكل البرامجي، لأن الشكل ده بيعلى المشاهدات، أما في الفيلم التسجيلي فميجبش أن رأيك الخاص يظهر خالص، وجهة نظرك لنفسك، لأن المفروض أنك عامل الفيلم علشان تشرح وجهة نظر الأخر، مش علشان تقطعه و تشرح وجهة نظرك و تجاريك الشخصية، الفيلم التسجيلي مفروض يكون وثيقه، مش وجهات نظر.

أوصل لأخر نقطه في نقض الفيلم، و دى بيشارك فيها صانعي الفيلم، المخرج محمد رشيدى، و محمد ماهر عقل، منتج و مقدم و راوى الفيلم، و هي أيه الهدف من الفيلم؟ و هل أختياراتهم في الفيلم مناسبه للهدف؟ و هل برضه نوعية الأسئلة مناسبه للهدف؟

الأجابات على الأسئلة دى هي أهم ما يخص الفيلم، و لو بدأناها بالتدرج، فطبعاً لازم أى فيلم تسجيلي يكون فيه هدف من صناعته، وجهة نظر محتاج صناع الفيلم



تمت السيرة ج2: صناعة الوم (اصنام و تارهاج)

يقدموها، فلو حاولنا نجاب عليها من خلال الى شفناه من الفيلم، فحتكون الأجابه هي أنهم حاولوا يوصلوا وجهه نظرهم أن ما حدث بعد ثورة يناير 2011، و من بعدها يونيو 2013، غير في كثير من توجهات الشباب المصري، و الفكره أو وجهه النظر دي مقبوله جداً، لكن هل عرفوا يحققوها في الفيلم؟ ده ياخدني للسؤال الثاني، و هو هل أختيارهم في الحالات الى قدموها كانت مناسبه للطرح و وجهه النظر الى حاولوا يوصلوها؟ الأجابه القاطعه لأ.

طيب... لأ ليه؟ أنهم قسموا الشباب لشريحتين فقط، الأولى من تركوا الدين، و الثانيه الى توجهوا للکفاح المسلح في سوريا. بداية الأمر أساساً أن الفئه الأولى لا تصلح للطرح الى حاولو يطروحوه، بمعنى أنه لا توجد علاقه لأحداث البلد من بعيد أو من قريب بفكرة ترك الدين. بدايةً، فظاهرة ترك الدين موجوده بقالها أكثر من 60 سنه، و كانت منشره جداً فترة الستينات و أوائل السبعينات، و مؤخراً هي منتشره جداً، و من قبل 2011، و بالتأكيد مش بسبب الأحداث التي بتحصل، لكن بسبب زياده فرصه القراءه و المعرفه من خلال الأنترنت، و النقطة دي أنا شارحها بشكل أكبر في آخر فصل في الكتاب.

إذن فئه التي تركوا الدين كانت أختيار خاطئ تماماً، و مش هي الأتجاه المضاد لفئه التي شالت السلاح في سوريا. و أخيراً طبعاً كانت نوعية الأسئلة و فرض الرأي من جانب المحاور، الى نسي أنه بيعمل فيلم تسجيلي، لأن المطلوب من الشخص الى بيناقش ظاهرة ما، أنه بيعرض آراء أصحابها، مش رأيه الشخصي.

طيب الفيلم، و الى أنا بأعتذرلك أني طولت شويتين في الكلام عنه حيوصلنا لأيه؟ حيوصلنا لفكرة عمليات غسيل المخ الى يتم لكثير من الناس بشكل عام، و للشباب بشكل خاص، علشان يبدأوا ينخرطوا في إتجاهات متطرفه و لها أيولوجيات معينه، و الأتجاهات دي دائماً بيكون هدفها خروجك عن المسار الطبيعي، و الدخول في أشكال من التطرف في كلا الأتجاهين المعاكسين.

في الأول أنا عايز أوضح وجهه نظر شخصيه، و هي أني لا أعتبر من ترك الدين دائماً شخص مؤدلج، أو شخص بيتبع تيار معين، و أنا هنا بأقصد أي دين، لأن ببساطه



تمت السيرة ج 2: صناعات الروم (أصنام و تابوهات)

مفيش حركه أو تيار أو ما شابه أسمه تاركى الدين، بالعكس فتاركى الدين لهم 4 فئات تبعاً لما وصل إليه عقل كل منهم، و من بينهم الربوبيين و ألا أداريين، و الفئتين دول بيكونوا من الأشخاص اللى معترفين أن عقلهم لسه موصلهمش للحقيقه المطلقه، فبس حبيت أوضح أن تاركى الدين مش من الفئات اللى حأتكم عنها فى الفصل ده، لأنهم أشخاص مش بيكونوا واقعين تحت تأثير غير تأثير عقلهم.

أنأزى ما قسمت فى العنوان الفرعى الفئات اللى حأتكم عنها لفئتين، فئة من وقعوا تحت تأثير الأصنام، و فئة من وقعوا تحت تأثير التابوهات، و حابداً بالفئة التانيه، فئة من وقعوا تحت تأثير التابوهات.

بدايةً، يعنى أيه مصطلح "تابوهات" للى ميعرفوش؟ تابوهات تعنى محرمات. طيب يعنى أيه محرمات؟ المحرمات هى سلوكيات أو عادات أو أشياء منعها الشخص عن نفسه لأعتقاده أنها غلط. التابو (مفرد تابوهات) مش شرط يكون سببه دينى، و تعال معايا ناخذ مثال بمنطقه مهمه جداً فى مصر، و بعض تابوهاها، المبنيه على ثقافه متوارثه، و مش عقيدته دينيه.

النوبه منطقه شديده الثراء الثقافى، لأنها ببساطه أثرت و تأثرت بكل الحضارات و الأديان اللى مرت بيها، فتأثرت بالحضاره المصريه القديمه، و تأثرت برضه بتحولها من عبادة الألهه المصريه القديمه، لليهوديه، للمسيحيه للأسلام. فى كل مرحله من مراحل التحول أخذ النوبيين جزء من عبادات هذه الديانه، و تحولت عندهم لعاده خاصه بيهم. حأضرب مثال أن النوبيين عندهم طقس أشبه بالتعميد المسيحى أو الصابئى (نسبةً للديانه الصابئيه)، بيُمارس لحد وقتنا هذا فى بعض القرى اللى متغيرش مكانها، و ما زالت مطله على النيل.

ندخل على المهم، و حنلاقى فى النوبه و حتى وقتنا هذا، فى كثير من القرى -سواء اللى لسه فى مكانها، أو قرى التهجير-، ما زالت السيده اللى زوجها بيتوفى، بتقوم بكل الطقوس اللى حأذكرها، و الطقوس دى مينفعش الزوجه ترفضها، لأنها أصبحت طقوس غير قابله للنقد أو النقض.

أولاً حلافة شعرها تماماً، و ممنوع أستخدام المرايا، ثانياً متولعش نار فى بيتها أثناء فترة الحداد، يعنى بمعنى أوضح متطبخش، و الجيران هما اللى يجيبولها أكلها، ثالثاً



تمت السيرة ج2: صناعات الروم (اصنام و تابوهات)

متخرجش من بيتها لمدته أربع أشهر كامله، رابعاً تفضل لابسه الأسود باقى عمرها كله. الأربع طقوس دول، و اللى حتقدر تتأكد منهم لأنهم مذكورين فى أكثر من مقال و بحث، معاهم طقس خامس سمعته بس من صديق نوبى لما زوج عمته توفى، و هو أن أثناء فترة الحداد مينفعش زوجة المتوفى تنام على سرير أو أعلى حاجه عاليه، لكن بتفرش على الأرض و تنام.

طبعاً الطقوس و العادات دى بتنقرض شويه بشويه، لكن هى ما زالت موجوده فى بعض القرى، و ده شئ كافي بالنسبالى للتدليل على الفكره اللى أنا عايز أوصلها.

طيب الزوجه اللى متعملش كده يبقى أيه موقفها؟ بتكون كسرت التابوهات أو المحرمات، و اللى ما زالت معمول بيها فى كثير من قرى التهجير، أو القرى اللى متغيرش مكانها، و بتكون بنفس قوة و تأثير المُحرم الدينى.

طيب السلوكيات دى مش منبعا دينى، لكن منبعا عادات و تقاليد، لكن أصبحت تابوهات أو محرمات، و اللى يخالفها يُعتبر أثم، لأنها خلاص أصبحت فى العرف "تابوهات".

طيب منين بتيجى التابوهات بشكل عام؟ التابوهات بتيجى من المُعتقدات. و هنا حنبدأ نفسر معنى كلمة "مُعتقد" و مفهومها، لأن هنا المعنى غير مفهوم تماماً.

كلمة "عقيدته" فى معجم المعانى الجامع شرحها "الحُكم الذى لا يُقبل الشك فيه لدى مُعتقدته"، بمعنى أبسط أنه هو الرأى الذى يصل إليه عقل الشخص، و أصبح عنده قناعه تامه بأنه صح، سواء الرأى ده كان دينى أو غير دينى، زى بالضبط ما بنسمع كثير مصطلح "العقيدته العسكريه"، علشان كده أنا حيكون إستخدامى ليها بشكلها الأشمل، مش الدينى بس.

و من العقيدته برضه بييجى مصطلح "مُعتقد"، و هنا المصطلح بيوصلنا دلالتين أهم من بعض، الأولى مصطلح "العقيدته"، بمعنى أن "المُعتقد" ده هو عقيدته عند الشخص، لكن فى نفس الوقت، هى عقيدته مش مبنيه على دليل، بمعنى أنه حُكم أو مبدأ الشخص مؤمن به، لكن بدون أى أثبتات تصل لدرجه الدليل القاطع، و الأثبات



تمت السيطرة ج 2: صناعة الروم (أصنام و تابوهات)

على كده هو استخدامنا الدائم لتعبير "أنا أعتقد"، لما نكون عايزين نقول رأينا، لكن مش متأكدين تماماً من صحته.

كده أكون وصلتك المعنى الفعلي لكلمة مُعتقد، لكن للأسف المفهوم الدارج للكلمة دائماً بيكون مرادفه "الدين"، لكن فعلياً لا كلمة "العقيدة" أو المُعتقد مرادفها الدين بس.

بدايةً، و أول نقطه حناقشها في مفهوم "المُعتقد" هيكون الأديان، لكن مش في أصل الدين، لكن في الإضافات اللي أتجمعت على مدار السنين، و أصبحت دلوقتى بتمثل أكثر من 75% من الدين، و أسمحيلي أني أضرب أمثله حياتيه كلنا عايشنا، و أقتبس كلامي من حلقة من واحد من البرامج اللي كتبتها، و أتقدمت على قناتي على الـ Youtube، و كانت بتناقش الموضوع اللي عايز أتكلم فيه، لكن من زاويه و وجهة نظر مختلفة.

"الإضافات اللي بتدخل على الدين، و شويه شويه بتصبح جزء منه لها نوعين، النوع الأول بيكون عبارته عن أضافه بيقررها الحاكم أو تكون في مصلحته، و فجأه بيطلعها أى سند يقول أنها من صلب الدين، و هنا حاضرب مثالين، واحد أسلامي، و الثاني مسيحي، و الأثنين كانوا في فترات تاريخيه قريبه، بما يعني أنها التعديل تم بعد ظهور المسيحيه بحوالى 2000 سنه، أو بعد ظهور الإسلام بأكثر من 1400 سنه، و الغريب أن المثالين بيعدلوا في موضوع شائك جداً، و هو الزواج، يعني موضوع المتضرر فيه بتكون أسرهم كامله، مش فرد، و تعال نستعرض مع بعض المثالين.

المثال الأول كان أول قانون ظهر في مصر في الألفية الجديده، بمعنى أنه كان القانون الأول في مصر لسنة 2000، يعني من حوالى 23 سنه، فاللى فيكم أكبر من 35 ممكن يفتكر ظهور هذا القانون الديني، و اللي بظهوره تم تحليل شئ مكش له أى وجود قبل كده.

القانون اللي حأتكلم عليه طبعاً هو قانون الخلع، و اللي صدر نهائياً سنة 2000، بعد ما تمت الموافقه عليه دينياً، و طلع بعد كده أنه من صميم حقوق المرأة في الإسلام. طيب ده يجربنا لسؤال، هل ما قبل سنة 2000 كان هو اللي مش صح،



تمت السيطر 2ج: صناعة الروم (أصنام و تابوهات)

و كنا بنحرم المرأة من حق المفروض أنه شرعى، و لا القانون هو الذى غلط، و بيحلل شئ مش موجود فى الدين أصلاً، و بالتالى ممكن يسبب مشاكل أكبر؟ طبعاً أسئلته ملهاش أى أى أجابات، و لا فيه أى شخص على وجه الأرض حيفيدك فيها. لكن من المؤكد أن القانون أصدر لأسباب سياسيه، لأن الفتره اللى ظهر خلالها، كان فى توجه نسوى كبير، فبغض النظر عن سؤال هو القانون ده صح و لا غلط، و لا شرعى أو غير شرعى، لكن فى النهايه القانون ظهر لتوجه ما.

و على الجانب الأخر، حدث شئ مشابه فى الكنيسه الأرثوذكسيه المصريه، أحاول أشرحه بسرعه. خلال فترة تولى البابا كيرولس الرابع، من 1853 لحد 1961، بدأت الدوله المصريه تفكر فى وجود قوانين للأحوال الشخصيه، و طبعاً عهد للبابا كيرولس الرابع -و اللى لُقّب بأبو الإصلاح- تنظيم قانون الأحوال الشخصيه للمسيحيين، و من ضمنه طبعاً الطلاق، فكان فى القانون اللى أصدره البابا كيرولس الرابع، أكثر من عله أو سبب للطلاق، بمعنى السماح لطلب الطلاق من الطرفين لأكثر من سبب أو عله.

القانون تم اعتماده مره ثانيه من خلال المجلس المملى فى عهد البابا يؤانس التاسع عشر سنة 1933، و فضلت أسباب طلب الطلاق زى ما أقرها البابا كيرولس الرابع. لكن لما تولى البابا شنوده كرسى الباباويه سنة 1971، كان من أول قراراته تعديل القانون الخاص بالطلاق، و أصبح السبب الوحيد للطلاق فى المسيحيه من وقتها هو "علة الزنا". ده حياخدنى لنفس السؤال السابق، هو مين فيهم الصح؟ كلا الثلاثه تولوا كرسى الباباويه، يعنى أعلى مرتبه كنسيه، لكن كما يقال "هناك تأويل فى فهم النص"، و هنا النص كان عباره عن آيه فى الأنجيل خاصه بالطلاق.

طبعاً عندى عشرات الأمثله الأخرى على التفاصيل اللى دخلت الأديان، سواء الأسلامى -بدايةً من الخلافة العباسى-، أو المسيحي -بدايةً من الأمبراطور الرومانى قسطنطين العظيم-، و كل تفصيله بتزيد، من جيل لجيل بتتحول لركن من أركان الدين، و المشكله أن الناس لا تقرأ، الناس بتسمع اللى بيتقالها عليه و بس."



تمت السيطر ج 2: صناعات الروم (اصنام و تابهات)

النموذج الثاني هو التشريع أو السنه الى بيسنها أو يشرعها عالم ما، و فجأه بتتحول لجزء من الدين، زى مثلاً شروط شرعيه الزواج، و حاديكم مثال بسيط بمسأله فقهيه شهيره، 2 من أشهر علماء الدين أصحاب المذاهب اختلفوا فيها، و رأى كل واحد فيهم عكس الثاني، و أحنا مش عارفين الصح فين، مع أن الحلال بين و الحرام بين، و خليني بسرعه أقولك أيه هي المسأله، و أنت لوحدك حتستنح الرأيين. المسأله هي هل يجوز يمين الطلاق الى حيرميه رجل على زوجته و هو في حالة سكر، و لا يعي ما يقول؟ بمعنى هل يُعتبر يمين الطلاق في حالة سكر الزواج و هو يرميه سارى؟ طبعاً في رأى قال يجوز، و رأى قال لا يجوز، و أنت بقي تختار الرأى الى يعجبك."

عايز أدل على كلامي بجمله شديدة الخطوره قالها شيخ الأزهر الشيخ أحمد الطيب من أربع سنين في الأحتفال بالمولد النبوى، و هي أن السنه تُمثل أكثر من تلت أرباع الدين في التشريع، بمعنى أن القرآن يُمثل فقط ربع مصادر التشريع، بمعنى آخر أن الدين الأسلامى حالياً أكثر من تلت أرباعه مش موجود نصه في القرآن، و لا تعليق.

طيب من الأمثله الى أنا ذكرتها دى كلها، أنا عايز أوصل لأيه؟ ببساطه عايز أوصل لنقطه في منتهى الخطوره، و بتتلخص في فكرة أن الأنسان بشكل عام بيميل لفكرة الدين، و أنا سافرت أكثر من دوله و شفت طقوس العباده في أديان مختلفه، و أكتشفت أنها عقيدته مترسخه داخل نفسية قطاع كبير جداً من البشر، و خاصة في البلدان ذات البعد التاريخي، البلاد الى ليها حضاره و تاريخ ممتد، و الدين فيها كان جزء من الحضاره، زى مصر و الهند و المكسيك. الشخصيه دى من السهل جداً الدخول لها طول الوقت من مدخل الدين، و زى ما كارل ماركس -الشيوعي- قال: "الدين أفيون الشعوب".

إذن فالدين -أى دين- بيستخدم طول الوقت لتمرير قرارات لصالح حاكم، لإخضاع الناس بكافة الأشكال لأحكام تخدم مصالحه، و حاددل بأكثر مثال أنا بددل بيه في مناقشاتي مع أى شخص، مثال أنا مسميه "المثال الكومبو"، لأن فيه نوعين من الأخطأ، الكذب و التدلليس بأسم الدين، و ده عن طريق التفسير الخاطئ لأيه، و في نفس الوقت الأمر المباشر للناس بالأنصياح التام لفئة من يسموا خطأ "علماء الدين"، لأن تعبير علماء هنا خاطئ جداً.



تمت السيطر ج 2: صناعات الروم (أصنام و تابوهات)

المثال هو التفسير المتعارف عليه لجزء من الآية 43 من سورة النحل الى يقول: "فَاسْأَلُوا أَهْلَ الذِّكْرِ إِنْ كُنْتُمْ لَا تَعْلَمُونَ". بدايةً، زى ما أنا لسه ذاكر، فده جزء من آيه، مش آيه كامله، و اللى بيفسرها كان واجب عليه أنه يقرأ الآية الكامله، و هى زى ما قلت فى سورة النحل، آيه رقم 43: "وَمَا أَرْسَلْنَا مِنْ قَبْلِكَ إِلَّا رَجُلًا نُوحِي إِلَيْهِمْ فَاسْأَلُوا أَهْلَ الذِّكْرِ إِنْ كُنْتُمْ لَا تَعْلَمُونَ".

قصة الآية و تفسيرها كما هو موجود فى كل كتب التفسير الكبرى، و كمان لى عايز يتأكد، ممكن يدور على تفسير الآية من الشيخ الشعراوى، و التفسير بيقول ببساطه أن لما بُعث الرسول، أنكر العرب أنه رسول من الله، و كان سبب اعتراضهم أن أزاي الله يُرسل بشر مثلنا، فجاوبهم القرآن أن كل الأمم السابقه من يهود و نصارى، و اللى كانوا عايشين بينهم فى الجزيره العربيه، كان كل أنبيائهم من البشر برضه. و بالمناسبه فكلمة "الذكر" فى القرآن، دايماً معناها الكتب السابقه لليهود و النصرارى. و لو عايز تتأكد من كلامي، ده الموقع الرسمى لجامعة الملك سعود، و اللى بيُمثل أهم موقع لتفسير القرآن، و فيه تفسير لكل آيه من كافة كتب التفاسير و أسباب النزول <http://quran.ksu.edu.sa>، و كمان ممكن تراجع تفسير الشيخ الشعراوى لنفس الآية.

طيب معنى كده أن مشايخنا أما مدلسين، أو مش عارفين، و الكارتتين أكبر، و أنا بأميل دايماً للأختيار التانى "مش عارفين"، لأن ببساطه الدراسه الأزهرية مهتمه فقط بالأحاديث و الفقه و التشريع و أستنباط الأحكام، تفسير القرآن و أسباب النزول يكاد يكون ملوش أى اهتمام فى الدراسه الأزهرية، لكن الغريب أن دايماً كان الأهتمام بالقرآن بيبجى من المستشرقين، و كفايه أن عندنا طول الوقت مسابقات لحفظ القرآن، و مفيش مسابقه واحده على مدار التاريخ لتفسيره أو فهمه.

فى نهاية كلامي عن السيطر عن طريق الدين، و أرجع و أكد أنى هنا أقصد أى دين، أن هذا النوع من السيطر، من أهم وسائل التحكم فى البشر، فالدين كان دايماً مُستغل كأهم وسيله لحكم الناس، و كان فى أوروبا لحد القرون الوسطى، سلطة البابا أعلى من سلطة الحاكم، لحد بدايات عصور الإصلاح. نقطتين متشابهتين، و احده منهم مؤكده تماماً و التانيه مش مؤكده بنسبة 100%، أن الأزهر -و دى النقطة المؤكده- فى القرن ال19، فى عهد محمد على، رفض تماماً طباعة المصحف، بأعتبار الطباعة



تمت السيطره ج 2: صناعات الروم (أصنام و تابوهات)

بدعه، لكن محمد على أصر و كسب المعركة في النهايه، و طبع أول نسخه من المصحف سنة 1932.

من قبل الأزهر برضه كانت الكنيسه الكاثوليكيه في أوريا -و دى اللى مش مؤكده قوى-، رفضت برضه في البدايه فكرة طباعة الكتاب المقدس.

السبب في الحالتين بسيط جداً، أن قبل الطباعة كان عدد النسخ -سواء القرآن أو الكتاب المقدس- قليله جداً، لأنها يدويه، ففكرة أنتشار الكتب المقدسه -سواء القرآن أو الكتاب المقدس- مع كل الناس، و سهوله الحصول عليها، معناها طبعاً تقلص كبير جداً في السلطه و القداسه الخاصه بالمشايخ أو الهيكل البابوى، و أنهيها جزء كبير جداً من القدسيه الرهيبه اللى كانوا يملكوها قبل ظهور إختراع الطباعة.

أوصل معاك لجزء ل Level 2 أو المستوى الأعلى، و أطلع معاك خطوه لفوق، و لسه مكملين مع بعض بالسيطره عن طريق الدين، و كنا أتفقنا فيما سبق بأن الدين أصبح وسيله لخضوع كثير من الناس لأحكام و أوامر بأسم الدين، و تبليغ رسائل للناس عن طريق الدين، كل ده حتى لو كان عندى عليه كثير من الاعتراضات، لأنه بيحول شعوبنا لشعوب خاضعه و نايمه طول الوقت، و بعيدة كل البعد عن اللى بيحصل في العالم من حوالها، لأن الناس بتكون مشغوله طول الوقت بسفاسف الأمور، لكن ضررها بيتحملة كل شخص مع نفسه، أو مع أسرته اللى بيورثها أو بيفرض عليها نفس الأفكار.

في المرحله دى حاوصل معاك لما هو أبعد، لمستوى علاقتك بالأخر اللى مش على نفس دينك، و أحياناً اللى على دينك لكن مش على نفس مذهبك، و أزاى عملية غسل المخ و التغييب اللى بيعيش فيها هذا الشخص المضحوك عليه، حتوصلنا لما هو أبعد من كده بكتير، و ده كان السبب الرئيسي في أستعراض فيلم "في سبع سنين" في أول الفصل.

خليني برضه أتكلم معاك بس عن الأديان الأبراهيميه، و اللى حفاجتك أنها أربع أديان مش ثلاثه، و خليني أذكرك من القرآن أولاً، ثم من المسيحيه ثانياً. نبدأ من



تمت السطره ج2: صناعت الروم (اصنام و تابوهاج)

سورة البقره، الآية 62 " إن الذين آمنوا والذين هادوا والنصارى والصابئين من آمن بالله واليوم الآخر"، و نفس الآية موجوده في سورة المائده، الآية 69 " إِنَّ الَّذِينَ آمَنُوا وَالَّذِينَ هَادُوا وَالصَّابِئُونَ وَالنَّصَارَى مَنْ آمَنَ بِاللَّهِ وَالْيَوْمِ الْآخِرِ وَعَمِلَ صَالِحًا فَلَا خَوْفَ عَلَيْهِمْ وَلَا هُمْ يَحْزَنُونَ" مع فرق واحد و هو رفع كلمة الصابئون بدلاً من جرهما. و هناك عشرات التفاسير تخص ليه الأيتين اللى متشابهين حرفياً، لكن هنا كلمة الصابئين، و هنا الصابئون، ممكن حضرتك ترجعلها. كمان وردت كلمة الصابئين مره تالته في سورة الحج.

الصابئون هم إتباع ديانة "الصابئه"، و نفتكر دايماً في بعض الأفلام الدينيه القديمه، أستخدمت كلمة "أصبئت" بشكل خاطئ جداً، و كان معناها الخاطئ في الأفلام دى "خرجت عن المله"، لكن فعلياً هى معناها الدخول في ديانه الصابئه. و على فكره هما ما زالوا موجودين، لكن بأعداد قليله جداً في العراق.

من المسيحيه أحب أوضح أن يوحنا المعمدان، و اللى قام بعملية تعميد المسيح بنفسه، هو أحد أهم أنبياء الصابئه، و هو فعلياً آخر أنبيائهم، و هو معروف أسلامياً بأسم النبى يحيى، و الشئ بالشئ يُذكر، فطقس التعميد المسيحى، هو في الأساس طقس صابئى بيُمارس لحد النهارده، و التعميد بيتم في نهر، و ده اللى قام بيه يوحنا المعمدان مع المسيح. و الصابئه يُفترض أنها أقدم حتى من اليهوديه، ده بحسب عقيدتهم الحاليه، و أن أول أنبيائهم هو شيث بن آدم.

أسف للأستطرد في موضوع الصابئه، بس هو موضوع مهم حبيت أدل بيه على جهل الناس بأشياء كثير في صلب العقيده، و أرجع معاك لموضوعنا الأساسى، و خلينى معاك أكتفى بالديانات الأبراهيميه الثلاثه، و ننسى الصابئه لأنهم بعيدين شويه عن الموضوع، فالأساس العقائدى في الديانات الثلاثه، و اللى يفترض في الأساس أن كل دين منهم بيكمل ما سبقه، هو أن محدش يؤمن بالديانتين الأخرتين، و ممكن برضه حضرتك تتأكد بنفسك من النقطه دى علشان ما أطولش عليك.

كمان بيكون داخل كل ديانه فيه طايفتين أو ثلاثه رئيسيتين، و تحت كل منهم عشرات الطوايف الأصغر، و الأختلافات أحياناً بتوصل لمفهوم العقيده نفسها. كل ده مفهوش مشكله لو كل فصيل في حاله، لكن للأسف فيه كثير من الفصايل لا



تمت السيرة ج 2: صناعات الروم (أصنام و تابهات)

تكتفى بالأختلاف العقائدي، ومبدأ "لكم دينكم و لي ديني"، لكن أحياناً بتعتقد بعض الفصائل أن محاربه الآخر جزء من مرضاة الله.

أوعى تفتكر معايا أن كل من يدعى "الجهاد في سبيل الله" يعمل كده لأعتقاده الأيماني بس، لكن ورا أي حركة جهاديه، بيكون فيه دايماً 4 مستويات من الأشخاص، 3 منهم مستفيدين، ووصلوا للمستوى الرابع المضحوك عليه دائماً بأسم الدين، و اللي بيكون الأداة التنفيذية في النهايه.

خليني قبل ما أدخل في ضرب أمثله من العصر الحديث، أرجع بكم لقصه من التاريخ، هي حقيقي مش مؤكده، بس أنا أميل لأسباب كثير أني أصدقها، خصوصاً كمان لسماعها من أكثر من مصدر محل ثقته بالنسبالي، و حتى لو كانت من ضرب الخيال -وإن كنت أشك-، فهي حكاية لطيفه تستحق السمع، بتضريك مثال بكيفية استخدام فكرة الشهادة و ضمان الجنه، طبعاً بما فيها من ملذات و حور عين، لأستغلال كثير من الأشخاص في تنفيذ مخططات ممكن تودي بحياتهم، و في نفس الوقت تحقق أطماع اللي بيضحكوا عليهم بأسم الدين طول الوقت، و القصة هي لفرقه إسلاميه شهيره جداً في التاريخ الإسلامي أسمها "الطائفة الأسماعيلية، و الشهيره بأسم الحشاشين، و حنعرف مع بعض سبب التسميتين.

بدايةً، فالطائفة هي فرقة شيعيه، و أسم "الطائفة الأسماعيلية" جه بسبب إيمانهم بإمامة إسماعيل بن جعفر الصادق، بعد أبوه الإمام الصادق، ورفض بعضهم التسليم بأنه مات في عهد أبوه، و أدعوا بأن الإعلان عن موته و جنازته، كانت تقيه من أبوه الإمام الصادق، و تقيه نقدر نقول أن معناها خدعه، و الهدف منها الحفاظ عليه و إخفائه عن عيون العباسيين، اللي كانوا عايزين يقتلوه.

أقسمت الطائفة الأسماعيلية لفرق كثير، كان من بينهم الفاطميين اللي حكموا مصر فتره كبيره، و من الفرق الثانيه اللي أنقسمت لها الطائفة الأسماعيلية، كانت فرقة الحشاشين، و اللي أسمها "الحسن بن الصباح الإسماعيلي"، أما عن أسباب تسميتهم ب"الحشاشين" فبيذكر سببين، الأول أنهم كانوا بيخطفوا لأعدائهم في الحشائش، يعني زى ما بنقول في مصر "بيلبدولهم في الدره"، و الموضوع ده سواء حقيقي أو مش حقيقي، بس بالتأكيد أن مش هو ده سبب الحقيقي للتسميه، السبب



تمت السيرة ج 2: صناعات الروم (أصنام و تابوهات)

الحقيقي هو تعاطيهم الحشاشين، ويقال أن تعاطيهم الحشيش كان ويتم قبل خوض أى معركة، عlishان يوصلوا لنوع من التخدير العقلى، يوصل الخايف منهم لحاله من عدم الشعور بأى شئ، فمحدث فيهم يفكر فى التراجع، و الحشيش حىكون سبب الحكايه الى خلتنى أذكر فرقة الحشاشين.

حسن الصباح أقام 35 سنه هو و أتباعه من الحشاشين فى قلعه أسمها "ألموت" فى إيران، و معنى "ألموت" مش الموت، لكن معناها عش العقاب، و هو طائر شبه النسر، حسن الصباح مخرجش من القلعه أبداً طول ال 35 سنه ، لأن يُشاع أن داخل القلعه كان أشبه بالجنه، و فيها كل شئ، المهم أوصل بيكم للنقطه المهمه، و هى أنه يُقال أن حسن الصباح كان قبل أى عمليه أو هجوم على أى أعداء، كان بيخلط أكل أتباعه بالحشيش من غير ما يعرفوا، فلما كانوا بيوصلوا لمرحله ألاوعى، كان بيحبيلهم داخل القلعه بنات فى غاية الجمال أثناء فترة غيابهم عن الوعى، و ده كان بيتم فى وسط الجنانين الى جوه القلعه، فكان بيقدر يقنعهم بعد ما بيخونوا من أثر المخدر، أنهم شافوا الجنه و الحور العين، فبعدها على طول أول ما بيرجعوا لوضعهم الذهنى الطبيعى، بيتحول كل الأتباع لجنود بتحارب طلباً للشهاده، عlishان طبعاً يروحوا الجنه -الى بيقترض أنهم شافوها كرؤيه- و يشوفوا بالتأكد الحور العين. و الحور العين كانوا دايماً من أهم وسائل الجذب للجماعات الجهاديه لحد يومنا هذا، و بالمناسبه، فكريم عبد العزيز حىكون بطل مسلسل بيتكلم عن الحشاشين، حىنزل فى رمضان 2024.

و بالمناسبه فكلمه Assassin و الى ليها نفس المعنيين فى اللغتين الأنجليزيه و الفرنسيه، و المعنيين هما "قاتل" أو "حشاش" فالكلمه جايه من أسم الطايفه و هو "الحشاشين"، و طبعاً أكيد أنت ملاحظ معايا التقارب الكبير فى الكلمتين.

نرجع مره ثانيه للعصر الحديث، و الأربع مستويات من الناس الى بتوصلنا لفكرة الجماعات الجهاديه، و نبدأ بالمستوى الأول المستفيد، و هما الفئه الى سمينها فى الفصل الى فات "الحكومه الخفيه للعالم"، الى هما بالفعل مجلس إدارة العالم، و الى بيحددوا أيه يحصل فىن و أمتى، و ده بيكون لأهداف بعيدة المدى فى خططهم المستقبلية، فتكوين جماعات جهاديه بيكون الهدف منه تحقيق أغراضهم طول الوقت.



تمت السيطرة ج 2: صناعة الروم (أصنام و تابوهات)

المستوى الثاني من المستفيدين سيكون دائماً دول كبرى، زى أمريكا مثلاً، اللي الجماعات الجهادية خدمت مصالحها طول الوقت بأكثر من شكل، سواء مباشر أو غير مباشر، زى مثلاً حرب الجماعات الجهادية بالوكالة عن أمريكا ضد الأتحاد السوفيتي في أفغانستان، وكلمة حرب بالوكالة معناها أن دولة زى أمريكا صدرت دولة أو جماعه في حرب هي عايزه تخوضها، لكن قدرت تخلى الدوله أو الجماعه دي تحارب نيابة عنها، و الحرب دي بتخدم مصالحها هي بس، لكن بدون ما أمريكا تبعت جندى أمريكي واحد، زى ما بيحصل حالياً بين أوكرانيا روسيا ، و اللي تعتبر أوكرانيا فيها بتحارب بالوكالة لصالح أمريكا، و هكذا.

المستوى الثالث من المستفيدين هما رؤساء الجماعات نفسهم، مُدعى الدين، و اللي بالفعل بيكسبوا مليارات بدون طبعاً ما يتحركوا من كراسيهم، لكن بيستخدموا أمكانياتهم الجباره في السيطرة على عقول ألاف الشباب و حشدهم، و القيام بعملية غسيل مخ كامل ليهم، لدرجه بتوصلهم لكل اللي كلنا بنشوفه في الأخبار أو بنسمع عنه، و الفئة الثالثه من المستفيدين بتتكون من تاس حقيقي عندها موهبه نادره، و هي فكرة الأقتناع و السيطرة، و من بعدها قدرة الحشد، لكن هل هما مؤمنين بما ينادوا به، و اللي بالطبع مش بيعملوه بنفسهم؟ أشك طبعاً.

المستوى الرابع طبعاً سيكون ألاف الشباب المضحوك عليها و المغيبه، و اللي بيتم اختيارهم بعنايه بعد دراسة ظروفهم و أستغلالها، و الحكايات عندنا كثير جداً، و في النهايه هما بيكونوا أدوات تنفيذ بس، محدش فيهم بيستفيد حاجه، غير بس حلم الجنه، و طبعاً الحور العين.

في النهايه الناس دي بتتحول -زى ما قلنا- لناس مش بتمارس دينها و بس، لكن لناس بتكفر و بتقتل كل من يخالف معتقدها، سواء من ديانه ثانيه أو حتى نفس الديانه لكن مش معاه على نفس الخط، و اللي بيحصل ده طبعاً واحده من الأهداف الكبرى ل"الحكومه الخفيه للعالم"، لأنه من جهه بيشعل صراعات في المناطق اللي غالباً فيها الثروات، ثانياً ده بيساهم بشكل كبير جداً في تقليل عدد سكان العالم، و طبعاً ده من أهم الأهداف، فهنا كانت فكرة المحرمات الدينيه أو "التابوهات" هي المدخل، فهل اللي بينخرط في جماعه من الجماعات الجهاديه يبقي واصله كل التفاصيل دي؟ مره ثانيه أشك.



طيب هل السيطره الدينيه بيكون ده شكلها الوحيد؟ هل "التابوهات" حتقف بس عند فكرة الأديان المتعارف عليها؟ لأ طبعاً، لأن أحياناً كتير بتكون فيه سيطره في الأتجاه المعاكس تماماً، و هى في شكل مخالف للأديان المتعارف عليها، سواء كانت في شكل توجهات لزعة فكرة الدين، و دى معنديش فيها أى مشكله، لأن أتباعها بيكونوا مسالمين و مفيش منهم أى مشاكل، و كده كده حرية العقيدته مكفوله للجمع، لكن الخطر دايماً بييجى من أتباع فكر غريب أو شاذ، و بيمارس طقوس فيها كتير من اللا آدميه، و ده برضه مش بيتم كده من نفسه، و برضه بيكون وراه تخطيط من "الحكومته الخفيه للعالم"، و خلينى أضرب مثال بتاريخ عبادة الشر - المُمثل في عبادة الشيطان طبعاً- في العالم في العصر الحديث.

أدوارد ألكساندر كراولى، المولود في أنجلترا سنة 1875، و اللى سمى نفسه بعد كده "الياستر كراولى" كان مؤسس أول و أهم جماعته دينيه لعبادة الشيطان في العالم في العصر الحديث. كراولى اللى نشأ في أسره أنجيليه مسيحيه غنيه، شعر من طفولته بنفور للدين. و في سنه 1904 زار مصر، و أتأثر جداً بالحضاره المصريه القديمه و أسرارها، و كانت الزياره دى هى مدخله لكتابة كتابه الأول "كتاب القانون"، و بعدها ب3 سنين كانت بداية جماعته السريه، و اللى سماها "النجم الفضى"، و من سنة 1909 بدأ كراولى تعاليمه، و اللى سماها "الأعتدال".

كراولى سمى نفسه "الوحش 666"، و دى تسميه موجوده في الكتاب المقدس، العهد الجديد، في سفر الرؤيه، و كتير من المفسرين للكتاب المقدس بينسبونها للمسيح الدجال أو شيطان آخر الزمان،

أتأثر كراولى بكثير من التعاليم الدينيه الشرق أسيويه، و الجماعات الخاصه في أنحاء العالم، و كان أول من أهتم ب"التاروت"، و بدأت تعاليم كراولى الغربيه و الشاذه تنتشر في العالم كله، بسبب كتره سفرياتته و تنقلاته.

الكلام عن كراولى كتير جداً، لكن خلينى أطيّر معاك كام سنه، و نوصل لفترة الستينيات من القرن الماضى، مع الشخص اللى أسس فعلاً ما يسمى بال "Satanism" أو عبادة الشيطان، و كلمه Satan هى نفسها كلمه شيطان



تمت السيطرة ج 2: صناعة الوم (أصنام و تارهاجت)

بالعربي، و هو أنطوني ليفي الأمريكي، و المولود سنة 1930، و اللي أسس ما سُمي بـ "كنيسة الشيطان" في 30 أبريل 1960.

ليفي و مشروعه أندعموا بطرق خفيه كتير جداً، منها اللقاءات الكتيره اللي ظهر فيها على شاشات التلفزيون الأمريكي، عشرات الأفلام التسجيليه اللي صورت ما يحدث من طقوس داخل كنيسته، بالرغم من أن فيها طقوس أباحيه كتير جداً أعلى حتى من 18+، لكن تم تصوير الأفلام، و هي موجوده ليومنا هذا، و أنا تقريباً شفتها كلها. الكتب اللي أنكتبت عنه، و خيلنا نعترف بأمانه أن أحياناً الهجوم على شئ معين، بيكون حافز للناس أنها تحاول تكتشف الشئ ده، و ممكن كمان تجربيه.

المهم أن في سنة 1969 أصدر ليفي كتابه المقدس "The satanic bible"، أو الكتاب المقدس للشيطان، و كان ليفي مصر أنهم مش بيعبدوا الشيطان، لكن بيعبدوا ما سماه "His infernal majesty" أو صاحب الجلاله الجهنميه.

عبادة الشيطان و ربطها بأنواع معينه من الموسيقى خاصة "Heavy metal" و هي الموسيقات ذات الأيقاع الصاحب الرتيب أو المتكرر، و طبعاً مع المخدرات، بدأت تنتشر في العالم بفعل فاعل، حتى لو كانت مش هي نفس تعاليم ليفي، لكن كان المهم هو نشر الثقافه نفسها، و كان في قضيه شهيره في مصر سنة 1997، تم فيها القبض على مئات الشباب في أحد الحفلات في قصر البارون في مصر الجديده -وقت ما كان لسه مهجور-، بدعوى أنهم من عبدة الشيطان، طبعاً كلهم طلوعوا براءه بعد كده، لأن الفكره اللي وصلت مصر من عباده الشيطان كانت هي الطقوس المجنونيه، مش الفكر العقائدي نفسه.

المهم اللي عايز أوصله أن نفس اللي دعموا الفكر الديني المتطرف، و حمل السلاح لخدمة أهدافهم، هما نفسهم اللي بيدعموا الأفكار الدينيه أو خيلنا نقول "الألا دينيه" الشاذه، و برضه لخدمة أهدافهم، المهم هو وصول الشباب -و هما طبعاً الفئه المستهدفه-، لمرحله التطرف الفكرى، و التطرف ده بيخليهم يقبلوا تغيير الفطره أو المعتقد اللي أتربوا عليه، فيقوموا بعمل حاجات كان إستحاله يعملوها في حالتهم الأنسانيه العاديه، زى القتل أو تقديم قرابين بشريه، و ده المطلوب منهم، و جزء من



تمت السيطرة ج2: صناعة الروم (أصنام و تابوهات)

الوسائل التي بتحقيق أهداف من يحكمون العالم، طيب هل بس دي الأشكال التي تم أختيارها لتحقيق اهدافهم؟

لأ في أشكال تانيه كثير من التطرف لخدمة أهدافهم، و تعالوا نوصل لشكل حديث كلنا شاييفينه الفتره دي، و هي فكرة "نشر المثليه الجنسيه" بكل الوسائل الممكنه، و غرس الفكره في الأطفال الصغيرين التي لسه شخصيتهم بتتشكل، فمن السهوله أنك توصلهم الفكره في المرحله دي.

الشكل الحديث هو نشر فكرة المثليه الجنسيه بشقيها، الرجالي و النسائي، و ترسيخ فكرة أن ده شكل طبيعي من أشكال العلاقات الأنسانيه، و دعم المثليين بكل الوسائل لنشر أفكارهم، بالإضافة لأخطر حاجه، و هي نشر فكرة أن المثليه شئ طبيعي، و ده من خلال كل حاجه بتوصل للأطفال، سواء أفلام، لعب، حتى الرسومات التي على الكراسيات، و ده طبعاً له أهداف كثير، الكتاب ده مش مختص بيها، لكن كنا أتكلمنا على بعضها في فصل تاني، لكن أنا بكلمك على نتائجها، و التي حتبدأ تشكله على الأجيال الجديده، و تعال معايا نبدأ بالسؤال الأهم، هل المثليه مرض عضوى أم نفسى.

في سنة 1961، ظهر فيلم أمريكي في غاية الأهميه أسمه " The children's hour" أو "ساعة الأطفال" و كان من بطولة أثنين من أهم نجومات العالم في الفتره دي، و هما أودرى هيبورن و شيرلى ماكين، و كان بيتكلم عن مدرستين في مدرسة بنات طلعت عليهم أشاعه أنهم على علاقه ببعض. الفيلم بيصور نظرة المجتمع كله لهم، و أزاي حياتهم أدمرت بسبب الأشاعه دي -اللي لم تكن حقيقيه-، بس التي يخصني من الموضوع ده، هو أن من 60 سنه بس، و يمكن كمان فضلت لفترات أقرب من كده، كانت فكرة المثليه الجنسيه منبوذه تماماً من أكثر مجتمعات العالم حريه، و هي أمريكا.

طيب أنا عايز أوصل لأيه؟ عايز أوصل أن أجابه سؤالى أن بالفعل السببين موجودين، السبب الفسيولوجى، و السبب النفسى، يعنى بالفعل في ناس كثير بتولد و عندها مشاكل في أجهزتها التناسليه، أو اضطرابات هرمونيه، فبتغير من التركيبه الفسيولوجيه لجسمهم، و بالتالى ميولهم الجنسيه.



تمت السيطرة ج 2: صناعة الوم (اصنام و تابوهات)

بالنسبة للأسباب النفسية فهي كثير جداً، وخليتي أضرب مثال بالنسبة للرجال، وهو التعرض لأعتداء جنسى في مرحله مبكره، وبيتهألى رواية "عمارة يعقوبيان"، وطبعاً الفيلم الى أتعلم منها، حللوا المشكله بشكل دقيق جداً. طبعاً ده غير الكبت الجنسى في الأماكن اللى بيكون فيها رجاله بس، زى السجون و الأصلاحيات، و خصوصاً الأصلاحيات، فالكبت ده للأسف بيولد نتايج غلط، و تكون نتيجته أنحرافات جنسيه.

بالنسبه للنساء فالموضوع حالياً أصبح أسهل، و أتذكر أن مره بنت أتكلمت معايا في أنها بدأت تفكر في الأتجاه ده لأن كل الأولاد خاينين، و ده كان بعد أكثر من تجربه فاشله. الأسباب كثير جداً، لكن كلها بتقول أن نسبة المرض النفسى أكثر بمراحل من المرض العضوى أو الفسيولوجى.

لكن اللى بيحصل في الفتره الحاليه، هو محاوله بكل الطرق لنشر فكرة أن ده طبيعى، و مش عيب أو حرام أو غلط، و النشر ده بيتم بقوه بين الأطفال، علشان ينشأوا على فكرة أن ده عادى و طبيعى، أو بين المراهقين، و هو السن المتمرد اللى بيحب يجرب كل حاجه، و في النهايه فسواء دول أو دول، فهما بيمثلوا الفئه المستهدفه للفكر ده، أما الفئات الأكبر، فبيتم محاوله تعويدهم على فكرة "قبول الآخر"، عن طريق التكرار، و دى طريقه متجربه و مضمونه، و تم بالفعل تعويد عيوننا و عقولنا على حاجات كثير، عمرها ما كانت تناسب عادتنا و تقاليدنا، ده غير أن الفئات الأكبر لهم وسائل و أفكار تانيه توصل للمخطط المطلوب للعالم، الخاص بتقليل عدد السكان، بعضها أتكلمت عنه في الفصل اللى فات.

في نهاية الجزء ده من الفصل، فنشر أى أفكار متطرفه -أيأ كان شكل تطرفها-، هو عمليه منظمه لأخراجك عن الشكل المألوف و الطبيعى، و بما أنك لو أستجبت لأشكال التطرف دى حتكسر تابوهاتك الأصليه، و تبدأ تدخل في شكل جديد من التابوهات المُصنعه و المُعده مخصوص علشانك، فأنت حتبدأ تنفذ حاجات عمرها ما كانت تخطرلك على بال، و هو المطلوب، أنك تتحول لأداه و لضحيه في نفس الوقت لتنفيذ مخططات أنت اللى خسران فيها طول الوقت.



تمت السطره 2: صناعة الوم (اصنام و تارهاج)

أوصل معاك للنص التانى والأخير من الفصل ده، و أوعدك أنه ححاول مطولش فيه، و هو ما سميته "الأصنام"، و تعال أدخل معاك بسرعه و بدون مقدمات في تفاصيل الموضوع.

كلمة Idol في اللغة الأنجليزيه لها معنيين بعاد جداً عن بعض، لكن أنا دايماً بتسأل هل لما كلمه واحده في أى لغه بيكون لها أكثر من معنى مختلفين عن بعض بيكون من قبيل الصدفه، و لاكل المعانى بيكون لها جذر مشترك، أو معانى منبثقه من بعضها، و خلينى أرجع للكلمه اللى أنا أخترتها، و اللى هى موضوع الجزء ده من الفصل، و نشوف المعانى المختلفه لها، و مدى ارتباطهم ببعض.

المعنى الأول للكلمه هو صنم أو معبود، تمام، طيب أيه هو المعنى التانى؟ المعنى التانى هو محبوب أو معبود الجماهير، يعنى لما يكون فيه نجم Super star و أغلب الناس بتحبه، و له المهاوويس بتوعه، فده بيتسمى برضه Idol، و زى ما قلت هنا حيكون معناها محبوب أو معبود الجماهير، و نفتكر كلنا فيلم مصرى شهير بطولة عبد الحلیم حافظ و شاديه، كان اسمه "معبودة الجماهير"، و ده يؤكد تطابق الفكره في اللغتين و الثقافتين الأنجليزيه و العربيه، و هى فكره أن النجم محبوب الجماهير، هو أشبه بصنم بتعبده الجماهير، و دى فكره و إن كانت غريبه و مُنفره، لكن لو فكرت فيها معايا شويه، حتلاقيها حقيقيه بنسبه كبيره جداً، لأن النجم ال Super Star أحياناً بيتحول لصنم بتعبده جماهيره، مش لازم العباده تكون بالصوره اللى أنت متخيلها، لكن العباده بتقليده في كل حاجه، بسماع كل اللى بيقولوه كأنه وحي، بأن فيه ناس ممكن تموت نفسها علشان تحضر حفله لمطرب، إلخ....

أعتقد أن واحده من أهم نقاط التحول في تاريخ البشره، كانت هى الحرب العالميه الثانيه، بعدها بدأت حاجات كتير في سياسيات من يحكمون العالم تتغير، خصوصاً كمان بعد العشرات من حركات الأستقلال اللى نجحت فيها دول أفريقيا و آسيا، فبدأت قوة الدولتين الأهم في العالم وقتها و هما أنجلترا و فرنسا تتراجع، و تحل محلهم القوه الجديده متمثله في أمريكا و الأتحاد السوفيتي، بأفكار أستعماريه جديده لكل قوه من القوتين الجدد.



تمت السيطرة ج 2: صناعة الروم (أصنام و تابرمانج)

أمريكا كانت سياستها هي غزو العالم بأفكارها، لحد ما وصلنا لما يُسمى العولمة، و اللى أنا سميتها "الأمركة"، و بما أن غزو أمريكا -و هي دوله في الأساس مُصنعه-، و من وراها صناعيتها، -و اللى بيمثلوا مجلس إدارة العالم-، غزو فكرى هدفه نشر الأفكار، فكان لازم من شكل جديد لرسل يقوموا بنشر الأفكار دى على مستوى العالم، و هدم كل الثوابت الفكرية و العادات و التقاليد القديمه، و اللى من وجهة نظرهم لازم تتغير.

تمثل الرسل دول في فكرة ال Super stars في كل المجالات، الرسل اللى حينشروا الأفكار الجديده في كل المجالات، حتى الدين، يعنى بدأنا في النصف قرن الأخير نشوف فكرة رجل الدين النجم، سواء في الإسلام أو المسيحية، و طبعاً ساعد على كده ظهور التلفزيون و ما بعده من وسائل نشر الأفكار، و رجل الدين النجم، و اللى بيخاطب جمهوره بشكل يناسب العصر، الهدف من ظهوره هو تغيير الأفكار، و تغيير الأفكار لازم يتم بصوره تدريجيه، علشان الناس متحسش بالتغيير ده، و طبعاً لو كنت أكبر من 35 سنه حتفتكر معايا أشهر نموذج تم اختياره أسلامياً لبدايات إحداث التغيير، الداعيه اللى قلب مصر في بدايه الألفيه بشكل جديد للدعوه الدينيه، بمفاهيم و شكل جديد تماماً للدين، و طبعاً خلال سنوات بسيطه أصبح Super star و أتبعه الملايين -الغالبية العظمى فيهم من النساء-، لأنه كان عارف يخاطب النساء صح، كان عارف يدخلهم منين، و بالفعل نجح في تغيير مفاهيم و قيم كثير، بالنسبه للفئه المستهدفه اللى أتبعته، و معاها تم تغيير في كثير من تفاصيل المظاهر الدينيه المرتبطه بنفس الفئه، و اللى بدورها نشرتها للفئات الثانيه، و أصبح التغيير ده هو السائد في يومنا هذا.

بعد كده تحول مشروعه الديني لمشروع تجارى، جمع من خلال تبرعات الناس المليارات، و ده لأنه تحول لIdol، معبود الناس مصدقاه من غير عقل، و محدش طبعاً كان بيتابع مصير التبرعات دى أيه، و في النهايه خد وقته، و زيه زى أى صنم بيتصنع، بياخد وقته و بينتهى بعد ما بيكون حقق الهدف المطلوب منه، و هي ده فكرة ال Idol أو ال Super star، بيلمع لفترة و بعد كده بيختفى تماماً، لكن بعد تحقيق الهدف منه.



تمت السيرة ج 2: صناعات الروم (أصنام و تابهات)

و على الجانب الآخر من الشاطئ أو الجانب المسيحي، تم مؤخراً تلميع و تنجيم فئه مهمه جداً، و هي فئة من يسمون بالعابرين، و مصطلح العابرين لو كنت مش عارفه، فهو مصطلح تم اختياره حديثاً لتسمية المتحولين من الأسلام للمسيحيه، و بدأ تنجيم بعض اللي لهم كاريزما من بين العابرين دول، و اللي تم تهجيرهم لأوروبا و أمريكا، بدعوى طبعاً أنهم مُعرضين للخطر في بلادهم.

و على رأس العابرين دول، عابر من دوله من دول المغرب العربي، أصبح Idol، نجم Super star حقيقي، و بيتعمله برامج من أكثر من عشر سنين للهجوم على الأسلام -باعتباره مسلم سابق عنده كثير من الخفايا عن الأسلام-، و بيتعمله عشرات المناظرات عديمة الجدوى، لكن في النهايه هو حقق الهدف منه، و أنا شايف أنه حالياً دخل مرحلة النهايه لأنه أصبح معندوش أى جديد يقدمه، و خلاص قريب حينتهي زى المثال الأول اللي أنا لسه ذاكره، لأن اللي بينجم هؤلاء الIdols، بيكون محتاج يحقق من وراهم هدف معين في فتره معينه، و بس.

بس سؤال هل الهدف من تنجيم العابرين تبشيري؟ بمعنى هل الهدف هو تحويل كثير من المسلمين للمسيحيه؟ الأجابه لأ طبعاً. الهدف الأساسي من وجهة نظري من برامج هؤلاء العابرين مش نشر المسيحيه على الأطلاق، لكن زعزعة الأسلام، من خلال هذا الكم من التفاصيل اللي بيتكلم فيها هذا العابر أو غيره، و طرحه لعشرات الأسئلة لمشاهديه محدودى الثقافه في دينهم. طيب سؤال تاني، هل هذا العابر و غيره من اللي بيقدموها برامج على قنوات مسيحيه بيشوفهم مسلمين؟ الأجابه القطعيه نعم، لأن دول هما الفئه المستهدفه أصلاً، فلو من يدير المعركه من الخلف مش متأكد من تحقيق هدفه، مكنش صرف كل الصرف ده.

سؤال ثالث و أخير، هل الهدف هو هدم الأسلام؟ الأجابه القطعيه لأ، لكن الهدف هو هدم ثوابتك، لأن من يدير المعركه لا يهجم أسلام و لا مسيحيه، لكن يهجم أنه يشكك في ثوابتك أولاً، لحد ما يخليك تهدمها بنفسك، و هو ده الهدف النهائي المطلوب من كل القصه دى، أولاً هدم الثوابت، ثانياً كسر أنتمائك لأى شئ أنت تنتميلة، سواء ديني أو قومي أو وطني، أو حتى عرقي أو اجتماعي أو موروث ثقافي.



تمت السيرة ج2: صناعة الهم (أصنام و تارهاج)

طيب سؤال سريع قبل ما نتقل لشكل أو نموذج تاني، هل شكل رجل الدين ال Super star موجود في مجتماعتنا أحنا بس؟ الأجابه لأ، ده موجود في كل المجتمعات، بما فيها أمريكا نفسها، و في أمريكا تحديداً هو موجود و منتشر بشكل كبير جداً، لكن في كل مكان بيكون رجل الدين المصنع له هدف مختلف مطلوب توصيله، فالشكل دايماً هو هو، لكن الهدف دايماً بيختلف من مجتمع لمجتمع تاني.

شكل تالت من أشكال ال Idols، و أنا بعتره في الترتيب رقم 2 من حيث الخطوره و التأثير، و ييجي في الترتيب بالنسبالي بعد آخر نموذج حاذكره، لأنه الوحيد من كل النماذج اللى ذكرتها أو حاذكرها هو اللى بيوصلك لحد مكانك، مش أنت اللى بتدور عليه علشان تروحله، و هو المذيع أو مقدم البرامج النجم ال Super star، و اللى بيدخل بيتك من خلال برامجه تقريباً بشكل يومي، و ده ال Idols اللى هدفه أنه بيثلك السموم الفكرية -سواء كانت سياسيه أو فكرية أيولوجيه أو غيره- جوه العسل اللى يُفترض أنه بيقدمهولك.

كل كلمة بتتقال في أى Talk show يومي أو برنامج حتى لو مش على الهواء، بتكون مترتبه و متراجعه و متحدد الهدف منها أيه، أغلب الكلام بيكون رسايل خفيه، حتدخل عقلك الباطن من غير ما تشعر، و شويه شويه مع تكرار الرسايل بشكل يومي، بتلاقى نفسك تأثرت و بدأت في مرحلة تقبل الرساله، و ممكن لو أنت من النوع المُتكمم، تلاقى نفسك بتردها على أنها أفكارك أنت.

الهدف من النوع ده من ال Idols هو تغيير أفكارك السياسه أو الأيدولوجيه زى ما سبق و ذكرت، و النوع ده من تغيير الأفكار هو بالفعل أخطر بكثير من تغيير الأفكار الدينيه، لأنه أولاً بيتم على مستوى جماعي -مش فردى- زى التغيير الدينى، ثانياً بيتم عن طريق رسايل خفيه طول الوقت، مش عن طريق توجيه مباشر، و في النهايه عواقبه أخطر بكثير. علشان كده بيكون ال Super star عمره أطول في مشوار النجوميه من كل اللى ذكرتهم و حاذكرهم، لأن النوع ده بيشتغل على المدى الطويل، و أحياناً الطويل جداً لتغيير الأفكار.



تمت السيرة ج 2: صناعة الريم (اصنام و تارهاج)

الشكل الرابع من أشكال ال Super star هو الشكل التقليدي المتعارف عليه، و هو النجم السينيمائي، لكن هنا ال Idol يلعب دوره بشكل غير مباشر، و ده بيكون عن طريق تحويله لأيقونه من خلال أدواره، و غالباً النجم ال Idol بيكون Super star صاحب أدوار متشابهه، يعنى دايماً بيطلع بطل، أو حرامي أو بلطجي، أو حتى عبيط، أو أمرأه قويه بيجرى وراها كل الرجال. الشكل ده بدأ ظهوره فى السينما العالميه تقريباً من الخمسينيات من القرن اللى فات، و بدأ عندنا تقريباً من الستينيات من نفس القرن، و بيتهيا إلى نماذج الممثلين ال Super stars المنمطين عندنا فى السينما المصريه كثير جداً. طيب أيه الهدف من ده، و أزاى التنميطة ده بيوصل الرساله المطلوبه؟

بدايةً، الأجابه هى ملحوظه صغيره لازم تلاحظها معايا، أن أكثر الأفلام جماهيرية و تحقيقاً للأيرادات دايماً بتكون الأفلام اللى بتحمل قدر كبير من العنف و الجنس و الجريمة و المخدرات، و خصوصاً لما بطل الفيلم بيكون بطل، حتى لو بطل بلطجي أو حرامي أو حتى عبيط، البطوله هنا بيكون معناها أنه بينتصر على كل اللى حوالياه، فده نموذج بتتوحد معاها شخصية المشاهد، لأن دايماً النفس البشريه بتحب حاجتين، أولاً كل ما هو ممنوع، و ده بيتحقق فى الفيلم، ثانياً فكرة البطوله و أنك تكون منتصر دايماً على كل اللى حوالياك.

النوع ده من الأفلام بي جذب جداً فئة المراهقين و العشرينات، و هما الفئة المستهدفه، فبيتحقق عن طريق الفيلم 3 أهداف: أولاً، نشر ثقافة الجنس أو المخدرات من خلال أحداث الفيلم. ثانياً، نشر العنف من خلال التوحد مع بطل الفيلم. ثالثاً، نشر أى أفكار مطلوب نشرها زى المثليه، الأفكار اللى ضد الأديان و القيم، التصديق بالشعوذه و السحر، و ممكن ده يكون نشره بأبسط صورته، زى ملابس البطل أو البطله، تسريحة شعره، تعاملات الشخصيه مع اللى حوالياه فى الفيلم... إلخ. عشرات التفاصيل اللى بتقدر توصل كل الأفكار المطلوب نشرها، و لاحظ معايا أزاى بقالنا حوالى 12 سنه مستوى العنف بيزيد عندنا لدرجة أكثر من حادثه قتل خلال السنين اللى فاتت تتم فى الشارع، و آخرها و ممرش عليها أسبوع هى حادثه قتل بنت أسمها فريده على أيد أخوها فى الشارع فى بورسعيد، و قبلها نيره فى المنصوره، و قبلها حادثه الأسماعيليه، لاحظ معايا تنوع المحافظات، كل ده كان



تمت السيطرة ج 2: صناعة الريم (أصنام و تارهاجات)

أحد نتائج أفلام و مسلسلات العنف اللى بنشوفها طول الوقت، و آخرها طبعاً مسلسل ما زال يعرض حالياً.

إذن فتأثير الدراما كسينما و كمسلسلات، له دور رئيسى فى توصيل كل الرسايل المطلوب توصيلها، و تحقيق الأهداف بأسرع شكل ممكن، و هنا بيكون ال Idol دوره من خلال أعماله، و برضه حاقول أن عمر ال Super star Idol بيستمر، طالما هو لسه فى المرحله العمرية و الجسديه اللى حتمحله بتوصيل الرسايل، أما بعد كده، فبدوره بينتهى بشكل قاطع.

الشكل الرابع من أشكال ال Super star هو المطرب ال Hero، و ده دوره بيختلف تماماً عن مثيله الممثل، بالعكس ده تأثيره بيكون أكبر بمراحل، خصوصاً فى المرحله الأخيره، بعد ظهور الأنترنت، و حأشرح ليه فى وسط كلامى.

المطرب غير الممثل من زمان لفكرة أنه أكثر أحتكاً بالجمهور، و ده من خلال الحفلات، المطرب ال Super star بيكون أيقونه فى كل شئ، شعره، لبسه، أكسسواراته، و أفتر كويس و أنا صغير، فى التسعينيات من القرن اللى فات، أن ملابس عمرو دياب فى بوسترات كل ألبوم جديد أو فيديو كليب جديد، كانت هى الموضه اللى بتنزل فى المحلات بعدها مباشرة، و طبعاً تسريحات شعره اللى كان بيغيرها من ألبوم للتانى، كنت بلاقى تانى يوم كل الشباب عاملها، و ده شئ طبيعى فى مجتمعاتنا، أن نجم أيقونى زى عمرو دياب، كان وسيله لتغيير الذوق العام للشباب، طول الوقت، و يمكن عمرو دياب بما أنه نجم غالى جداً، فده أتحقق معاه من خلال كليباته و بوستراته بس، لأن حفلاته طول عمرها غاليه، و مخصصه لطبقه معينه و بس، هو تعمد يحافظ على ده طول الوقت، لكن خلىنا نشوف أيه الفرق بين عمرو دياب فترة التسعينيات و أوائل الألفينات، و بين نجوم ما بعد ال Youtube؟

الناس اللى قررت تغنى فى المرحله الأخيره، و حتلاحظ أن أكثر من 95% منهم من الذكور، و ده له سبب واحد، أن مبقاش فيه شركات أنتاج زى لحد بدايات الألفينات، فاللى شايف فى نفسه أنه عايز يغنى، لازم يكلف بنفسه الأغانى بتاعته، بدايةً من الكلمات للألحان للتوزيع للأستوديو، و لو كمان فيه فيديو كليب، فدول أنقسموا



تمت السطر 2: صناعة الروم (اصنام و تابوهات)

قسمين، قسم صغير جداً حاول يمشى في سكة عمرو دياب و تامر حسنى و حماقي، و دول منجوش، لأن النوع ده من الغنا حينتهى بأنتهاء الأجيال دى، أما النوع الثانى و هما الأكر، ففهموها صح، فيما أنهم حيكلفوا الأغاني بنفسهم، ففهموا أيه المطلوب علشان ينجحوا، لأن الموضوع بالنسبالهم بيزنس، فبدأ أغلبهم يكتب بنفسه، و كتاباتهم جت من البيئات اللى هما جايين منها، و بدأت الألحان -ده لو كان فيه لحن، إن مكنش مسروق- و التوزيعات الموسيقية تتعمل تحت بير السلم زى ما بنقول، فظهرت أغاني كلها آلات أيقاعيه عاليه، و كلام أغلبه تحريض على العنف، و بما أن الفيديو كليات معلهاش أى رقباه، منها لـ Youtube على طول، فأصبحت الفيديوها فيها كثير من الحاجات الخارجه عن المألوف أو القيم المجتمعيه.

و من هنا كان اختيار Idol جديد فى مجال الموسيقى حيحقق نتايج مبهره، أولاً لأن الشباب حيشوفه حقيقى واحد منهم، لأن هو كده بالفعل، ثانياً هو بالفعل مُحمل بكتير من الرسائل المطلوبه، و خصوصاً العنف، فتشكيله علشان يبقى Super star بصيغه شعبيه سهل، و بالفعل بدأنا نشوف نموذج بيطلع بسرعة الصاروخ، و قادر يحقق التغيير المطلوب فى المرحله دى، بصوره أفضل بكتير من النجوم أصحاب الشكل الكلاسيكى، و بدأ ده يظهر فى حفلاته، فى لبسه، فى تلميعه علشان يبقى من نجوم الصف الأول، حتى لو كان مش شكلهم فى الغنا أو أى حاجه.

الى أنا قلته عن الشكل ده و إن كان الكلام عن الوسط الغنائى فى مصر، إلا أنه ينطبق على العالم كله، لأن المتغير بيحصل فى العالم كله، و إحنا جزء من العالم، بنتأثر بكل المتغيرات اللى بتحصل فيه، لكن أنا دائماً بقرب الفكره بنماذج مصريه، لأن فى الأخر مجتمعاتنا هى اللى تهمنى فى الكلام عنها.

أوصل معاك للشكل السادس و الأخير، و هو زى ما كنت ذكرت، هو الأخطر بكل ما تحمله الكلمه من معنى، و بالرغم من أنه أحدث الأشكال، إلا أن حادثه دى تعنى أنه أكثر الأشكال قريباً للأجيال الصغيره، لأنه متوائم معاهم تماماً، و طبعاً ممكن تكون أستنتجت معايا أنى بتكلم عن الـ Idol الجديد، و هو أو و هى Super star وسائل التواصل الاجتماعى.



تمت السيطره ج2: صناعات الروم (اصنام و تابوهات)

خطورة هذا ال Idol تكمن في تفصيلتين في غاية الأهمية، الأولى في كون هذا ال Super star، هو شخص طالع من قلب البيئه الى مشاهدينه منها، و معدوش أى موهبه خاصه، سواء غنا، تمثيل أو أى حاجه، لكنه قدر بأشياء بسيطه جداً يحقق هدفين مطلوبين عند أى شاب أو شابه في المرحله دى، و هما الشهره و الثروه، و مين مننا مبيحلمش بالهدفين دول، إذاً فهذا ال Idol أصبح قدوه لكل أقرانه في نفس المرحله العمرية، فبالطبع حتتلاشى مع هذه الأهداف سهلة التحقيق أى طموحات علميه، و الكلام ده سبق و ذكرته في واحد من الفصول اللى فاتت.

مكمن الخطوره التانى، و هو يمكن يكون الأكثر كارثيه، هو المحتوى اللى بيقدمه أو بتقدمه ال Super star، و ما فيه من خلل أخلاقي و بعد عن قيم مجتمعيه أتربينا عليها، و عايز أكاد أنى دايماً بتكلم عن القيم المجتمعيه مش الدينيه، لأن الأديان بتختلف، لكن الراسخ معنا كنا هو البيئه اللى بنتربى فيها، و هى دى الأساس، يعنى قيم المسلم المصرى لا تختلف عن قيم المسيحي المصرى فما يخص ما يمكن أننا نسماه Code of Ethics أو الكود الأخلاقي لمجتمعنا، فاللى بيحصل من هذا الشكل السادس من أشكال ال Idols، هو تدمير ممنهج لكل القيم الأصليه و الأصليه عند الشعوب، و على فكره هو ده الهدف الأساسى، لأن أنت لو خسرت قيم مجتمعك، في النهايه بسهولة حتخسر أنتمائك للمكان اللى أنت فيه، و هى دى النتيجة المطلوب الوصول ليها، تدمير الأتماء.

نجم وسائل التواصل الأجماعى هو أخطر وسيله للسيطره على عقليتك وصللها من يحكمون العالم على مدار التاريخ، و بما أنه واحد مننا، فليه أنا كمان موصلش زيه، و بالتالى حيكون عند أى شخص بيتابعه الأستعداد الكامل لعمل أى حاجه، في سبيل تحقيق الهدفين اللى حققهم هذا ال Idol، و هما الشهره و الثروه.

طيب في النهايه و سريعاً جداً أنا عايز أوصل لأيه؟ عايز أوصل معاك للوسائل اللى بتتخذ علشان تغيرلك من أفكارك و من عقيدتك، و العقيدته زى ما قلت قبل كده مش مرادفها "الدين"، لكن مرادفها ما تعتقده و تؤمن به، أنا عارف أن آخر شئ أى شخص بيحبه هو أنه يسمع نصيحه، علشان كده مش حأنصح، لكن حأقولك خد



تمت السيطره ج2: صناعة الوم (اصنام و تابوهات)

بالك، ركز في اللى بيتقالك، خلى قراراتك عقلانيه، مش مدفوعه بأى عواطف، فكر صح قبل ما تجرب أى حاجه جديده، و شوف هل هى مناسبه لك و لالأ، علشان كل خطوه بتأخذها في أى أتجاه، بيكون حقيقى صعب جداً معها الرجوع لورا مره ثانيه.

22 سبتمبر 2023



"ربما لم يكن لنا الحق في اختيار أن نخوض
تجربة الحياة، فهل يحق لنا إتخاذ القرار في
تركها وقتما نشاء؟"



حقك في الأنتحار

من أكثر من 27 سنة أتفرجت على فيلم أمريكي أثر فيا بشكل كبير جداً، الفيلم كان أنتاج سنة 1946، يعني مر عليه حوالي 77 سنة ، لكن الفكره اللي ناقشها الفيلم مهمه جداً، و مازالت قابله للنقاش لحد النهارده، الفيلم أسمه It's a wonderful life أو أنها حياة رائعة، و كان من بطولة و إخراج أتنين من أهم نجوم التمثيل و الأخراج في تاريخ السينما العالميه، و هما النجم جيمس ستيوارت، و المخرج الكبير فرانك كابران. الفيلم فضل عالق في ذهني طول السنين دي لعبقرية فكرته، و أخيراً جه الوقت المناسب علشان أتكلم عنه، و أناقش معاكم من خلاله واحده من أهم الظواهر الحياتيه على مدار التاريخ، و هي زي ما أنا بحب أسميها "فقدان الرغبة في أكمال الحياه".

في نظريه بيولوجيه مهمه جداً أسمها "نظرية التوازن الطبيعي"، و هي بتتمحور في فكرة أن الكائنات الموجوده في الكون وازنه بعضها، بمعنى أن لو فصيل معين من الكائنات زي الضفادع مثلاً أنقرض، حتتأثر معاه كائنات كتير جداً تانيه سواء بالأنقرض برضه أو بزيادة العدد بصوره مخيفه. طيب أيه علاقة النظرية دي بالفيلم؟ خليني أشرحلك ببساطه.

الفيلم بيتكلم عن مجموعة مراحل في حياة رجل عايش في مدينه صغيره في أميركا، بدأ أسمه يلعب في عالم البيزنس و هو لسه شاب في العشرينات، و بدأ نجاحه يثير غيرة كل اللي حوالياه، لحد ما لظروف خارجه عن إرادته و تفاصيل كتيره مش مهم ندخل فيها، وقع كل اللي بناه، و أصبح مهدد بالأفلاس و الفضيحه، و ممكن كمان السجن. المشكله الحقيقيه أن ده حصل بعد ما كمان أصبح رب أسر و عنده أطفال كتير، فبيقدر بعد ما الأمور ضاقت بيه ليلة الكريسماس أنه ينتحر، فوقف عند حافة نهر و قرر يرمي نفسه، و دعي الله أنه يا ريت ممكنش أتولد من الأصل، لأنه وصل بيه الأمر أن مشاكله الماليه حتى بعد وفاته، حتأذى طبعاً كل اللي حوالياه، فلو ممكنش أتولد أصلاً، كان وفر كل المشاكل دي على الناس القريبين منه.



معاك في الأندلس

هنا بتيجي نقطة التحول الحقيقيه في الفيلم، و هي حتى لو كانت خياليه، بس وصلت رساله الفيلم بشكل رائع، و طبعاً مناسب جداً لتفكير الناس سنة 1946، و عايزك تعرف أن الوقت ده كان بعد الحرب العالميه الثانيه مباشرة، و اللي دمترت العالم حرفياً، و فضلت أثارها لعقود بعدها، طيب أيه اللي حصل في الفيلم؟

بينزل ملاك من السما و بيبدأ يناقش بطلنا في الدعوه اللي دعاها، و هي أنه ياريت مكنش أتولد أصلاً، لأن بالتأكيد أن ده حيكون أفضل بالنسبه لأسرته و أهله من أنتحاره، و هنا بيبدأ الملاك يستعرض مع بطلنا حياة كل الناس اللي حواليه لو كان هو متولدش من الأساس، و هل فعلاً حياتهم من غيره أفضل من حياتهم بوجوده؟

حأكتفى معاكم بنموذجين من اللي أستعرضهم الفيلم للتدليل على فكرته، و هي نظريه أن حياة كل واحد فينا مهمه و مؤثره جداً في حياة ناس كتير جداً، حتى ممكن يكون من بينهم ناس منعرفهمش، و النموذجين في الفيلم كانوا أخو البطل و زوجته. أخو البطل و هما أطفال صغيرين كان على وشك الموت، لولا أنقاذ بطلنا له، يعني لو مكنش بطلنا موجود في الحياه، كان أخوه حيموت و هو لسه طفل صغير.

أما مراته فمحدث أتجوزها، و كبرت في السن و أصبحت وحيده، لأن الشخص اللي كان حيتجوزها متولدش من الأساس. طيب أنا عايز أقول أيه من فكرة الفيلم، و اللي بتعتبره مقدمه لحلقتنا؟

حأخرج معاك من الفيلم بأول معلومه عايز أوصلها في الفصل ده، أن مفيش إنسان ملوش لازمه، بس هو لازم يقتنع بأهميته، و أننا كلنا بنكون سلسله مترابطة بتكمل بعضها، بالذات في المراحل الوسطى من العمر، فمش من المفترض أنك تشعر بأن وجودك في الحياه شئ ملوش لازمه أو بلا قيمه، و حاول كده تجرب الفكره اللي ناقشها الفيلم، و هو أنك تتخيل حياة الناس المحيطين بيك من غيرك، ساعتها بس حتعرف أهمية الدور اللي أنت بتلعبه في منظومه توازن الحياه.

طيب عايز أرجع معاك لعنوان الفصل ده، و خلييني أحوله لسؤال، هل أحنا لنا الحق في إنهاء حياتنا في الوقت اللي نختاره؟ في البدايه خلييني أتفق معاك على



مقابلة في الأنتحار

نقطتين، الأولى أني في الكتاب ده مش جاى أقولك خالص أن الحياه حلوه، أو أني أحاول أدي نظره متفائله ليها، بالعكس خالص أنا شخص مقتنع زى كثير من الناس بعبيثية الحياه اللي ممكنش لنا حق الأختيار في أننا نخوضها، بس أنا جاى في الكتاب ده بخبرات حياتي الكثيره اللي مريت بها، أشاركك في فكرة أزاى نعدى من تجربه الحياه الصعبه دى بأقل خسائر وأكبر أنجازات حياتيه نقدر نحققها، أزاى نقدر نتغلب على بعض من المشاكل الكثيره اللي بتحاصرنا، لأن أحياناً الشخص لما بيكون واقع في مشكله، مش بيكون دائماً مركز لأفضل الطرق لحلها، بالرغم من أن الحلول أوقات كثير ممكن تكون سهله جداً وقدام عنيه.

تاني نقطه عايز أنفق عليها معاك، أن السؤال ده له أجابه عندي، و حاجاوبها بس في نهاية الفصل، بعد ما أكون أستعرضت معاك كل النقط المرتبطه بالموضوع، فأرجو منك أن متسرعش في أستنتاج أى أجابه لسؤالي، و لا لأى سؤال آخر أنا طرحته في الفصل ده و لا في أى فصل تاني، غير لما نوصل مع بعض للأجابه، لأن الفكره عندي في الكتاب ده أننا بنستعرض مع بعض كل الأراء، علشان لما نوصل في النهايه لرأى، يكون أغلبنا متفق عليه.

ندخل بقى على قلب موضوعنا النهارده، و اللي سميناه فقدان الرغبه في أكمل الحياه. طبعاً أكيد أنت ملاحظ تصاعد معدلات الأنتحار بشكل كبير جداً خلال الفتره اللي فاتت في مجتماعتنا العربيه، و ممكن يكون بين الناس القرييين جداً منك، و ده للأسف أصبح شئ -مش بس طبيعى-، لكن كمان منطقي جداً، بسبب نمط الحياه اللي بتزيد فيه طول الوقت العوامل اللي ممكن تشجع ناس كثير جداً على التفكير في الأنتحار، -و أنا هنا بقول التفكير-، لأن طبعاً نسبة الأشخاص اللي بيجلهم الجرأة للوصول للمرحله النهائيه، و هى تنفيذ الأنتحار فعلاً، أعتقد لا تتعدى العشره في الميه من اللي فعلاً بيكونوا عايزين ينتحروا.

حأناقش في البدايه بعض الأرقام، لأن في قاعده دائماً بتقول أن الأرقام مبتكدبش، و أن علم الأحصاء هو علم فعلاً بيدينا دلالات حقيقيه، نقدر من خلالها يكون عندنا مؤشرات لكل شئ في حياتنا، فتعالوا نشوف الأرقام أولاً بتقول أيه، كمدخل مهم لمناقشة كل النقط المتعلقه بموضوع الأنتحار.



مقالات في الانتحار

من موقع Our world in data أو العالم بالأرقام، و في الصفحة الخاصه بكل ما يتعلق ببيانات الأنتحار في العالم، حصلت على مجموعة إحصائيات مهمه جداً عن نسب الأنتحار، بس للأسف كان آخر تقرير فيها خاص بسنة 2019، و مفيش أى إحصائيات تاني بعدها، فتعالوا نستعرض مع بعض أهم البيانات و الإحصائيات اللى كانت موجوده على الصفحة :

- عدد المنتحرين في العالم في 2019 كان 759,028 أنسان، يعني أكثر من ثلاث أرباع مليون شخص، و الغريب أن الرقم تقريباً ثابت حوالين ال 800 ألف مع زياده أو أنخفاض بسيط على مدار ال 30 سنه اللى فاتوا، بينما جرايم القتل في العالم كان مجمل ضحاياها في نفس السنه 415,180 إنسان، بمعنى أن الأنتحار كان أكثر بنسبة تصل ل 183% عن جرايم القتل.
- نسبة الأنتحار في الرجال على مدار برضه ال 30 سنه اللى فاتوا، كانت دايماً حوالى ضعف نسبة أنتحار السيدات.
- نسبة مصر في معدلات الأنتحار في أرتفاع، يعني كانت في سنة 1990 تُمثل 0.42% من نسبة الأنتحار في العالم، من سنة 2012 وصلت و ل 0.56% و تقريباً ثبتت على النسبه دى، ما عدا 2015 و 2016 قلت بنسبه بسيطه، و بعدها رجعت تاني، و النسبه دى معناها أن حوالى 42,505 شخص في مصر أنتحروا سنة 2019.

بعد ما أستعرضت معاك بعض الأرقام الخاصه بالأنتحار سنة 2019، أرجع مره تانيه أسأل معاك نفس السؤال موضوع الفصل، هل للأنسان الحق في الأنتحار أو أنهاء حياته بنفسه؟

القاعده عندى في أي سؤال حأستعرضه على مدار الكتاب أنى أحيد الدين، و السبب بسيط جداً، أن اللى حيقراً الكتاب ممكن يكون له أى توجه دينى، و الكتاب ده موجه لأى قارئ، و طبعاً كل واحد عارف دينه أو عقيدته بتقول أيه، لكن هنا الأجابه دايماً حتكون على المستوى الأنسانى، العقائد بتختلف في أحكامها في كثير من المسائل الأنسانيه، و أنا هنا مش قصدى بالعقائد الأديان الأبراهيميه بس، لكن كل الأديان و العقائد اللى موجوده على كوكب الأرض،



مقائمه في الانتحار

بينما الأنسانيه عمرها ما حتختلف، علشان كده أنا بحاول أفكر معاك دايماً بقاعده أسانيه عقلانيه، و واحد مننا لازم يكون قادر يقنع الطرف الثاني بالمنطق.

بدايةً، كل العقائد الدينيه و الا دينيه و القوانين الأرضيه و العقل الأنسانی الجمعي، أتفتت على تجريم القتل، ده شيء مفيش فيه أى خلاف أو وجهه نظر، لكن أختلفت العقائد بشكل كبير في فكرة الانتحار، هل جسدنا و حياتنا ملكنا؟ هل أحنا -الى مكنش لنا الأختيار في أننا نخوض تجربه الحياه- لنا الحق في التخلص من الحياه دي اللي مخترنهاش بنفسنا؟

سؤال مهم جداً لازم نستعرضه في بداية محاولة تحليلنا لفكرة الانتحار، و هل هي حق لأى شخص ضاقت عليه الحياه و لا لأ، و هو ليه الناس بتنتحر، أيه أسباب الانتحار، و عايزين دايماً نفتكر أن أسباب الانتحار في العالم كله تقريباً واحده ، بس بيكون فيه سبب نسبته أعلى في بلد ما عن سبب تاني، و ده طبعاً بيكون نظراً لأختلاف الوضع الأقتصادي أو الطبيعه الجغرافيه، أو القيم المجتمعيه، أو التكوين الديموجرافي للسكان، أو أى أسباب مرتبطه بالمكون البيئي للمجتمع، لكن في النهايه فالأسباب واحده، خصوصاً بعد مرحله العولمه أو الGlobalization.

مره تانيه حنرجع للأحصائيات، و المره دي حتكون من موقع منظمة الصحه العالميه WHO، و في بداية التقرير الخاصه بالانتحار، ذكر الموقع الحقائق دي كنقط أستهلاليه للكلام عن الموضوع:

- ينتحر كل عام أكثر من 700000 شخص.
- تقابل كل حالة أنتحار حالات أخرى عديده من محاولات الأنتحار. و محاولة الأنتحار من قبل هي العامل الوحيد الأهم الذي يزيد من أحتمال الإقدام مره أخرى على الأنتحار لدى المنتحرين.
- الأنتحار هو السبب الرئيسي الرابع للوفاة في صفوف الأشخاص الذين تتراوح أعمارهم بين 15 و 29 عاماً.



مقاتل في الانتحار

- 77% من حالات الانتحار في العالم تحدث في البلدان المنخفضة والمتوسطة الدخل.
- يعتبر ابتلاع المبيدات، والشنق والأسلحة النارية من بين الأساليب الأكثر شيوعاً للانتحار على مستوى العالم.

بدايةً، الأفتتاحية دي صياغتها ركيكه جداً، وفيه بعض الأخطاء المعلوماتية التي حنكتشفها مع بعض كل ما حنتعمق في التحليل، وكل ما حنتيجي نقطه مخالفه لنقطه في الأفتتاحية دي حنوضحها، طبعاً الأرقام كأرقام صح، بس تحليل الأرقام هو اللي وقع في كتير من الأخطاء.

أكثر من ملاحظه شدتني في الأرقام المذكوره، أولاً أن زى ما قلنا سابقاً في الفصل ده، أن مع كل محاولة أنتحار بتتم، بتكون في عشرات من الحالات اللي مبتنجحش، و مئات من اللي بيفكروا في أتخاذ الخطوه، بس مش بتجيلهم الجراه أنهم يقدموا على مرحله التنفيذ الفعلى.

ثانياً أن الأنتحار هو رابع سبب للموت بين الشباب ما بين 15 ل29، و دي ملحوظه في غاية الخطوره.

ثالثاً أن نسبه المنتحرين في الدول منخفضة الدخل -زى دولنا- عدت 77% من نسبة المنتحرين، و ده رقم مفزع فعلاً، لكن النسبه دي حتقابلها أرقام مفاجئه في بعض الأحصائيات اللي حنذكرها كمان شويه، و حتكون واحده من النقط اللي حيكون ليا فيها رأى مخالف لرأى أفتتاحية التقرير.

رابعاً أن فيه حالة أنتحار بتم كل حوالى 40 ثانيه في العالم.

حأكمل مع صفحة منظمة الصحة العالميه مره ثانيه، و اللي أستعرضت في تقريرها برضه أيه الأسباب الأكثر شيوعاً في محاولات الأنتحار، و تحت عنوان من هم المعرضون للأنتحار، حأنقلك حرفياً اللي كان مكتوب و اللي ليا برضه عليه بعض الملاحظات:



من هم المعرضون للانتحار؟

على الرغم من ثبوت الصلة بين الانتحار والأضطرابات النفسية (خاصة الأكتئاب والأضطرابات الناجمة عن تعاطي الكحول) في البلدان المرتفعة الدخل، فإن كثيراً حالات الانتحار تحدث بإندفاع في لحظات الأزمة، عندما تنهار قدرة المرء على التعامل مع ضغوط الحياة، مثل المشاكل المالية، أو الانفصال أو الطلاق أو الآلام والأمراض المزمنة.

وبالإضافة إلى ذلك، ثمة صلة قوية بين النزاعات والكوارث والعنف وسوء المعاملة أو فقد الأحبة والشعور بالعزلة بالسلوك الانتحاري. وترتفع معدلات الانتحار كذلك بين الفئات الضعيفة التي تعاني من التمييز مثل اللاجئين والمهاجرين؛ والشعوب الأصلية؛ والمثليات والمثليين ومزدوجي الميل الجنسي ومغايري الهوية الجنسانية وحاملي صفات الجنسين؛ والسجناء. بيد أن أقوى عامل يزيد من احتمال الانتحار هو الإقدام على محاولة أنتحار من قبل.

أنا من وجهة نظري أن التقرير أهمل بعض نقاط في غاية الأهمية، بعضها خاص بكثير من المجتمعات المحافظه، أو ذات الطبيعه الدينيه، وهى العادات والتقاليد، بمعنى أن في كثير من مجتماعتنا فيه بنات بتنتحر بسبب أنهم أقاموا علاقات جنسيه خارج أطار الزواج، و ممكن العلاقات دى تكون تسببت في ظهور أعراض حمل، أو أقتراب البنت من مرحلة الزواج الرسمى برجل آخر غير اللى أقامت معاه علاقته، فهنا أحياناً الخوف من الفضيحه بيُجبر كثير من البنات في التفكير في الانتحار، خوفاً من رد فعل الأسره و المجتمع.

كمان من وجهة نظري أن التقرير أغفل الضغوط السياسيه في بعض الدول و الأنظمه الديكتاتوريه، اللى بتوصل ناس كثير لحالات الانتحار، و على فكره مش بس العامل المادى بيكون هو المحرك في الحالات دى، لكن الشعور بالقهر في أحيان كثير بيكون سبب، و لنا في قصة البوعزيزى في تونس، و اللى أنتحر بحرق نفسه، و كانت النار اللى حرقتة هى شعله الثوره اللى قادت في كثير من الدول العربيه في 2011.



مقائمه في الانتحار

أما أخطر وأهم نقطه أغفلها التقرير من وجهة نظري، و هي الى كانت الدافع بالنسبالي لأختيار موضوع الأنتحار كفصل في الكتاب، و يمكن التقرير معرفش يصنفها فأدمجها بشكل مش مضبوط ما بين الأسباب الى ذكرها، فهي نقطه فقدان الهدف من الحياه، و دى أهم و أخطر نقطه من وجهة نظري، لأن كل الأسباب الى التقرير ذكرها هي أسباب مبنيه على نوع من الضغوط، فممكن برفع الضغوط دى تقل نسب الأنتحار، يعنى الى بينتحر نتيجة الفقر، لو أنتحسن وضعه الأقتصادي فمش حيكون عنده سبب موضوعي للأنتحار، لكن الى فاقد دوافع الحياه،-و أنا أعتقد من ملاحظاتي و متابعاتي لحالات الأنتحار، أن أغلبهم بيكون في مرحله الشباب، المرحلة الى حددها التقرير ما بين 15--29، فهنا بالنسبالي السبب ده هو بالفعل أصل المشكله.

مره ثانيه حنحتاج نرجع للأرقام، و نشوف نسب الأنتحار لكل 100 ألف إنسان -بمعنى أن نسبة الأنتحار حتمثل نسبه مش رقم-، و حنتفاجئ بأن أعلى دوله نسبةً لعدد السكان هي كوريا الجنوبيه بنسبة 25 شخص لكل 100 ألف شخص، بعدها المجر 21، و بعدها اليابان 19.5، بلجيكا 18.5، و في المركز الخامس فنلندا 16.5، و حنلاق أن لحد المركز العاشر و يمكن أكثر، هي أغلبها دول كبيره و في وضع أقتصادي و مستوى دخل مرتفع، ما عدا المجر الى جت في المركز الثاني، و الى بالرغم من كونها دوله أورييه، إلا أنها دوله بتعاني من كتير من المشكلات، يعنى الأرقام بتقول عكس المعلومه لى ذكرتها أفتتاحية التقرير، و هي أن 77% من حالات الانتحار في العالم تحدث في البلدان المنخفضة والمتوسطة الدخل، لأن لو أول 10 دول في معدلات الأنتحار كلها دول مش متوسطة أو منخفضة الدخل، فأكيد النسبه من الصعب تكون 77% في الدول ذات الدخل المتوسطه أو المنخفضه، طيب الأرقام دى دلالتها أيه بالنسبالي؟

دلالة الأرقام دى أن أعلى نسب أنتحار -و أنا بقول نسب لأنها مربوطه بعدد السكان، و مش أرقام- كانت في دول لا يُعاني سكانها من مشاكل أقتصاديه أو سياسيه أو كبت حريات أو أضطهاد أو عادات و تقاليد بتقيد الشخص بالموروثات، و بتفرض أي وجهة نظر مخالفه لها، إذن هنا حارجع للنقطه



مقالات في المنهج

المهمة جداً الى أنا ذكرتها كأهم سبب للأنتحار، و لم يذكرها تقرير الأمم المتحدة، و هي فكرة فقدان الشغف بالحياه، السبب الذي يعتبره أهم سبب لأستمرار وجودك في الحياه الى أنت -زى ما قلنا من شويه- ماخترتس أنك تعيشها-، و يتأكد على ده أسماء الدول الأعلى في معدلات الأنتحار، دول المُفترض أن الناس فيها مش بتعاني من أى مشاكل، طيب تعال معايا نشوف أيه الوضع عندنا فى مصر، خصوصاً في الكام سنه الى فاتوا، لكن طبعاً وكالعاده عمرنا ما حنلاقي أرقام دقيقه نقدر نستدل بيها.

من موقع National Library of Medicine الأمريكي، و هو موقع حكومي رسمي، لقينا بعض الأرقام الأستدلاليه، و هي أن نسبة مصر في معدلات الأنتحار هي 6 لكل 100 ألف، و طبعاً هي نسبه كويسه جداً مقارنة بدول تانيه، و أن نسبة الرجال ضعف نسبة النساء، زى ما هو موجود في العالم كله، و أوصل معاك للجزء المهم جداً من التقرير، و هو أهم أسباب الأنتحار في مصر، و التقرير ذكر أهم 3 أسباب و هما التنمر والعنف والتفكك الأسرى، و طبعاً التنمر ده كان سبب مفاجئ ليا جداً، و المفاجئ أكثر أن التقرير ربط التنمر بظهور وسائل التواصل الأجتماعى، و الى بدورها أظهرت بشكل صارخ فكرة التنمر، الى أحنا كمصريين مكناش بنسميها تنمر قبل ظهور وسائل التواصل الأجتماعى، و كنا بنتعامل معاها كسلوك حياتى طبيعى، سواء التنمر على شخص أو مجتمع عرقى، و أحياناً كمان فصيل دينى، و كتير بيعجى التنمر في شكل كوميدى، و ده رسخ كتير من المشاكل بين المجتمعات المحليه، زى فكرة ظهور نكت خلال فترة السبعينات، بتبدأ دايماً بكلمة مره واحد صعيدى، و الموضوع ده حيتم الكلام عنه بشكل مفصل أكثر، في واحد من فصول الكتاب.

نكمل بقى مع التقرير الى بيذكر أن التنمر ده بيعمل ضغط نفسى على الشخص، و يفقده الثقه بنفسه، فبيفكر الشخص في الأنتحار للهروب من الضغوط النفسيه. باقى الأسباب الى ذكرها التقرير مش محتاجين نخوض فيها لأن الأسباب بتشرح نفسها، لكن ده حياخدنا لنقطه تانيه مهمه جداً للنقاش، و هي هو الى بيحصل حالياً في مصر -و مصر هنا أنا واخدها كنموذج لنوع من المجتمعات لها طبيعه خاصه و محافظه نوعاً ما- خلى نسب و أسباب الأنتحار



مقالات في الانتحار

تتغير في الفترة الأخيرة، لدرجة أننا شوفنا حالتين لشابين، و الغريب جداً أن الأثنين كان أسمهم أسلام، بينتحروا Live، على الهوا قدام الناس، يعني هوس الTrend موجود حتى لمرحلة ما بعد الموت. كمان شفنا البنت اللي بتنتحر داخل واحد من أهم مولات مصر و هو City Stars، و ده برضه بالنسبالي كان هدفه الTrend. و البنت اللي سافت عربيتها في الطريق العكسي، متعمده أنها تصطدم بعربية نقل كبيره، بمعنى أن أصبح فيه هوس بالظهور و خطف الأنظار، حتى في لحظة الموت، و ده بالنسبالي أنا بعتبره تشبث بالحياه، حتى أثناء الأنتحار.

و أنا بكتب من حوالى أكثر من شهرين، و كنت بأستعرض بعض حالات الأنتحار في مصر خلال أخر كام سنه، لقيت خبر أنتحار حازم الحديدى -واحد من أشهر وكلاء اللاعبين في مصر-، و ما أدراكم يعني أيه وكيلا لاعبين، يعني شخص معندوش بشكل كبير أى مشاكل ماديه، شخص حياته على طول مليانه تفاصيل، شخص مشغول أغلب الوقت، وده حيرجعتنى تانى للنقطه الرئيسيه في موضوعى، و هى أن أهم سبب الأنتحار -من وجهة نظرى- هى فقدان الشغف بالحياه، و هنا خلينى أستعرض معاك من وجهة نظرى أيه أهم الأسباب اللي جدت على مجتمعنا، و أصبحت قادره على توصيل أشخاص كتير للتفكير في خطوة الأنتحار.

حأبدأ بسبب سياسى ناس كتير مسمعتش عنه، و ناس تانيه من اللي سمعوا عنه بيعتبروه من قبيل التصديق بنظريات المؤامره، و ببساطه مش بيحاولوا ياخذوا الموضوع محمل الجد، بالرغم من أن فلاديمير بوتين الرئيس الروسى نفسه ذكره في واحد من خطاباتاته في سنة 2022، و هى فكرة المليار الذهبى، و خلينى أشرح لى مسمعش عن الموضوع ده النظرية ببساطه.

النظرية بتقول أن عدد سكان العالم، و اللي عدى حالياً ال8 مليار، لازم يقل، و ده بسبب قلة الموارد الطبيعیه على كوكب الأرض، و فشل العلم في الوصول لحياه صالحه للعيش على الكواكب المجاوره، و العدد اللي لازم يوصله سكان



مقالات في الأندلس

العالم كان في أختلاف كبير في تفسيره، هل هو مليار أنسان فقط، و لا مليار أنسان مميز و هما المليار الذهبي، و معاهم عدد زيهم حيكون دورهم خدمة المليار الذهبي؟ المهم أن أياً كانت الأجابه فأحنا بنتكلم أن ما بين 6 ل 7 مليار أنسان من بين 8 مليار يجب التخلص منهم، و طرق التخلص من هذا العدد كتيره و متنوعه و حناقشها معاكم في الكتاب القادم "أبوكاليبس"، لكن حيهمني منها في كتابنا ده طريقه واحده بس و هي تسهيل فكرة أفقاد الناس الشغف بالأستمرار في الحياه، و تشجيعهم بشكل غير مباشر على أتخاذ خطوة الأنتحار، حتى لو مكنش عند الشخص أى معوقات حياتيه، طيب أزاى الخطوه دى تتم؟ تعال معايا نستعرض كل الطرق اللى نجحت لحد دلوقتى.

أول طريقه أنا رصدتها هي نشر ثقافة ترك الأديان، و خصوصاً مع سهوله الوصول لكل مصادر الكتب أو الوثائق، يعنى صور كتير من الوثائق التاريخيه أصبحت موجوده و متداوله ببساطه على شبكة الأترنت، فأصبح الأمر أكثر سهوله أنك تقدر تشكك أولاً، ثم تغير ثانياً عقيدة أى شخص، و الخطوتين دول بيكونوا مرحله أولى، يتبعهم المرحلة التانيه اللى بتكون أكثر عمقاً و فهماً لنفسية من تركوا الأديان.

بدايةً، لو الشخص اللى حيترك دينه في دوله مفيهاش أى مشاكل في حرية الأعتقاد الديني، فالأمر بيكون بالنسباله لا يُمثل أى صعوبه، و غالباً الخطوه دى مش حتوصله لأى مشكله نفسيه أو مجتمعيه مع المجتمع المحيط بيه. لكن ماذا لو أن هذا الشخص في مجتمع متدين، أو على الأقل مجتمع بيحاول يحافظ و لو ظاهرياً على المظهر الديني؟ هنا الشخص اللى بيترك دينه بيتحول لحالة من أنتين، يا أما هو شخص قوى الشخصيه، بيكون قادر أنه يبدأ يشوف الدنيا بمنظور آخر، و يبدأ يجدد أهداف حياته بناءً على المتغير الجديد اللى حصله، و في الحاله دى حيكون زبه زى أمثاله في الدول اللى بتسمح بحرية الأعتقاد، فحيقدر يكمل حياته بأقل قدر من المشاكل النفسيه و المجتمعيه، و أحياناً كمان حيقدر يجاهر بتركه للدين.

الحاله التانيه أنه يكون شخص لسه خلفيته الدينيه مأثره عليه، و هنا لازم أستحضر جملة مهمه جداً قيلت في الفيلم اللى أنتجته قناة الجزيرة في 2018،



مقاتل في الأندلس

وكان اسمه "في سبع سنين"، و الفيلم كان عبارته عن عملية رصد لتغير أفكار الشباب المصري ما بعد ثورة يناير 2011، و الفيلم قسم حالة التغيير دى لشريحتين، فنه تركت الأديان، و فنه تطرفت دينياً لحد الأنضمام لجماعات دينيه أرهابيه و تكفيريه، و من بين الفئه الأولى كان في بنت أسمها أسراء قالت جملة بأعتبرها المفتاح لى أنا عايز أوصلهلكم، و هى أن بعد ما أسراء تركت الأسلام بدأت تشعر أنها أصبح ملهاش ضهر، أنها مش حتقدر تدعى تانى و تقول يا رب لو وقعت في مشكله، فده طبعاً كان أكبر مشكله بالنسبالها بعد ترك الأسلام، فقدان الأمان المتمثل في قوه كانت بتلجأ لها وقت الأزمات.

كمان أحب أضيف مشكله تانيه ممكن يصادفها النوع ده من الأشخاص، خصوصاً اللى بيكون منهم لسه عايش مع أسرته، و هى مجتمعه اللى حواليه و خوفه من مواجهة الناس، و اللى بيشكل عليه نوع من الضغط النفسى، خصوصاً في وقت الشعائر، أو مطالبته بالقيام بحاجات هو خلاص كفر بيها، خوفه من نظرة المجتمع، خوفه من المصير اللى حيفضل يلاحقه هو و ممكن كمان أسرته لحد بعد موته، أه بعد موته، لأن حتى أسرته مش حتلاقي مكان تدفنه فيه، لأن ممنوع و محرم شرعاً دفن لا دينى في مقابر مسلمين أو مسيحين، فكل ده بيشكل عبء نفسى رهيب عليه، فكتير ببحاولوا يظلبوا لجوء لدول أخرى، لكن الغالبية العظمى منهم بتبقى معندهاش الفرصه أو الأمكانيه لده، فبتبدأ حالتهم النفسيه تسوء بشكل كبير، مع عدم وجود ضهر بالنسبالهم، زى ما قالت أسراء في فيلم "في سبع سنين"، لأنهم بيفضلوا عايشين ما بين عقلهم اللى خلاص رفض فكرة الدين لقناعات أثبتت له، و ما بين الحاله الروحيه اللى عاشوها طول العمر اللى قبل كده، و ضغط المجتمع اللى حواليههم عدم قدرتهم على مواجهته، و فكرة أن خلاص مبقاش في قوه أكبر قادره تغيرلك حياتك في أى لحظه، فلو كان زمان دائماً عندك أمل في اللى جاى لوجود قوه قادره على إحداث التغيير ده، فدلوقتي التغيير أصبح بأيدك أنت بس.

الصراع ده بيفضل لفته، لكن ممكن جداً ينتهى بعدم قدرة الشخص على مواجهة الحياه اللى حواليه، و مع قناعته بعدم وجود عقاب أو حساب في حياه تانيه، فيبقى أقرب قرار بالنسباله الأنتحار، و أنا أعرف حالتين كانوا قريبين جداً



مقالات في المنع

منى، و الأثنين كانوا من السيدات، لكن مع مع فارق كبير جداً بينهم في العمر، وصلوا لأنهم أنهوا حياتهم بالفعل للسبب ده، و هو فكرة قناعتهم بترك الدين، مع عدم قدره على الحياه المتوافقه مع المجتمع المحيط.

تاني طريقه و أعتقد أنك لمسيها بنفسك، و هي نشر الألعاب و التحديات اللي بتقربك شويه بشويه من فكرة الأنتحار و تجربة الموت القريب، سواء ألعاب Online زى ما حصل مع حالة لعبة الحوت الأزرق، أو تحديات زى اللي بتحصل في مدارسنا حالياً في تجربة كتم النفس، و قبلها بكام سنه كانت لعبة المشنقه، ألخ، و على فكره الألعاب و التجارب دى منتشره بين طلبه المدارس في أغلب أنحاء العالم، و سمعت من فتره أنها كانت منتشره جداً بين طلبة المدارس في فرنسا، و طبعاً الألعاب و التحديات دى عارفه بتستهدف أى فئه بالتحديد، هي بتلعب على فئه الteenagers أو المراهقين، فطبعاً كل ما بتقرب خطوه من تجربة الموت، بيكون دايماً هناك شغف داخلي بالخطوة اللي بعدها.

تالت طريقه هو اللعب على فئه المحبطين علشان يزدادوا أحباطاً و قرباً من فكرة التخلص من حياتهم، و هنا لازم أذكر مسلسلين، واحد مصرى كان أسمه "قابيل" أنتج سنة 2019، و التاني أيراني أسمه "سارق الروح" و كان من أنتاج سنة 2017، و العاملين ناقشوا الفكره بشكل رائع و مميز، لكن كان سارق الروح أكثر تميزاً و تركيزاً في الفكره، بالرغم من أنه ركز فكرته على فئه واحده بس و هي من فشلوا في تجارب أنتحار سابقه، و دول هيكون الكلام عنهم هو ختام فصلنا، بس خيلنا نرجع لموضوعنا أولاً، و أزاى فتى المحبطين، أو أصحاب تجارب الأنتحار الفاشله، بيكونوا الصيد الأسهل، و بيكونوا أكثر الناس أستهدافاً لدفعهم لفكرة إعادة تجربه؟

تالت فئه معرضه لفكرة الأنتحار، و برضه الوسيله عن طريق شبكة الأنترنت، و هي نشر فكرة عبثيه الحياه و عدم جدواها، و ده عن الطريق تسليط الضوء بشكل قوى على أى مطرب أو ممثل أو نجم شاب ما أنتحر، حتى لو كان مش نجم درجه أولى، بس تسليط الفكره بقوه و خصوصاً أسباب أنتحاره، بيحول له لنوع من الأسطوره و القدوه بالنسبه لكثير جداً من الشباب في كل أنحاء العالم،



مقالات في الانتعاش

و الحالة دى ممكن بعضكم يشوفها مش مؤثره، بس أنا بأقولكم أنها مؤثره جداً، و عندى حاله لبنت أعرفها حاولت الأنتحار أكثر من مره، بس كل مره كانت بتتلحق، و السبب كان فعلاً هو ده، تأثير نشر أفكار بعض النجوم اللى أنتحروا.

آخر سببين ذكرناهم بيستهدفوا الشباب من سن 14 تقريباً لسن 21، لكن برضه فى أسباب تخصص المراحل الأكبر تم أختلاقتها للضغط على المراحل الأكبر عمراً و دفعهم للأنتحار، و يعتبر واحد من أهم الأسباب دى هو ما يسمى بال Automation أو تبديل العماله البشريه بالذكاء الاصطناعى، حتى لو مفيش أى مبرر لكده، بالعكس ممكن الذكاء الاصطناعى يكون مش هو الأختيار الناجح، أو ببساطه بيكون الأختيار الأسوء، و حاضرب مثال مهم جداً بمشكله أعتقد أنك زى لاسها و بتعاني منها، و هى خدمة عملاء الشركات الكبرى، و خصوصاً الشركات الخدميه زى شركات الاتصالات، طيب أيه اللى حصل، و مدى تأثيره سواء على العميل، أو على فكرة فقدان الشغف بالحياه.

بدايةً، هى أيه وظيفه خدمة العملاء؟ هى طبعاً بتكون أداره فى أى شركه لتلقى شكاوى العملاء و مناقشتها معهم و حلها، أو تحويلها للقسم المختص بالحل. طيب أيه اللى حصل مع تغيير أغلب الشركات دى إدارة خدمة العملاء من العنصر البشرى لل Automation؟ و أيه هى تأثيراتها السلبيه؟

بالنسبه للعميل هى أجبرته من خلال مجموعه من الأختيارات المحدده أنه يوصف شكوته لكائن ألى، يعنى لو شكوتك بره الأختيارات يبقى تخبط دماغك فى أى حيطه قدامك، فأفقدت العميل أى قدره على التواصل مع الشركه بمبدأ "هى كده لو مكتش عاجبك"، و طبعاً كتير جداً من الشكاوى بتكون خارج القائمه المفروضه عليك، و أسألونى أنا عن تجربتى مع خدعة العملاء زى ما باسميها. فهنا ال Automation هو أختيار غلط، لكن أصبح واقع، علشان الشركات اللى بتكسب مليارات تحقق مكاسب أضافيه، أولاً بتوفير مرتبات إدارة خدمة العملاء، ثانياً عن طريق أجبار العميل -اللى غصب عنه مضطر للتعامل معهم- على اللى هما عايزنه و بس.



مقالات في الانتحار

أما تأثير الAutomation الكارثي بشكل عام في كافة المجالات، فهو تقليل فرص العمل نسبه مخيفه، لدرجه أن في كثير من المطاعم زى في قطر مثلاً، أصبح كل الWaiters فيها من الRobots، و بما أن العمل هو مصدر الرزق الرئيسي للغالبية العظمى من الناس، فمعنى أن مفيش فرص عمل طبعاً أن مفيش دخل أو فلوس، و معنى أن مفيش فلوس أن الحياه بتُصبح أكثر صعوبه، و المرحله التاليه أن الحياه بتُصبح مستحيله، و مع أستحالة الحياه يبيق أيه الحل الأول اللي بيبجي في ذهن الإنسان اللي ضاقت الحياه بيه؟ أكيد طبعاً من أول الحاجات اللي حيفكر فيها حيكون الأنتحار.

كده أكون أستعرضت معاك 3 أنواع من الأسباب اللي بتؤدى لفقدان الشغف بالحياه، أولاً الأسباب اللي ذكرها تقرير منظمه الصحه العالميه، و هى زى ما شفنا، أسباب عامه جداً. ثانياً بعض الأسباب اللي أنا شايفها من وجهة نظري زياده على أسباب منظمة الصحه العالميه، و كان جزء منها أسباب محليه مرتبطه بالبيئه بتاعتنا بشكل كبير. ثالثاً ناقشنا نظرية خطة المليار الذهبى، و محاولة تقليل عدد سكان العالم بشكل كبير، و بعض الطرق المستحدثه و اللي تم أبتكارها، علشان تكون سبب أو دافع للأنتحار. طيب كده أيه اللي ناقص علشان ننهي الفصل ده و نجابو على السؤال الرئيسي فيه و هو، هل حياتنا اللي مخترنهاش لينا الحق في أنهاءها؟ قبل ما نجابو خلينى أستعرض معاك آخر جزء في الفصل، و هو يا ترى هل الناس اللي أقدمت على الأنتحار قبل كده و التجربه لم تكتمل -أيأ كانت الأسباب- ممكن يقدموا على التجربه مره ثانيه؟

حناخد الأجابه من 3 مصادر مهمه جداً و مختلفه عن بعضها، و الأجابه فعلاً كانت بالنسبالي غير متوقعه، و نبدأ بأول مصدر و هو موقع جامعه جامعه هارفرد الأمريكيه، و كانت الأجابه أن نسبة تكرار محاولة الأنتحار لمن قام بمحاوله سابقه و لم تتم -أيأ كانت الأسباب- هى نسبه لا تتعدى ال25%، و أن نسبة نجاح محاولة الأنتحار من أول مره هى فقط 7%.



مقالات في المنع

الموقع الثاني الذي أكد تقريباً على نفس الكلام هو موقع جريدة New York times الأمريكية، واحده من أهم الجرائد وأقدمها في العالم، وكانت المقالة بتدليل من خلال حكاية شخص هو وأغلب أسرته قاموا بالفعل بخطوة الأنتحار و عوامل كثيره رجعتهم مره ثانيه للحياه، فالموقع دلل على نفس الأرقام التي ذكرها تقرير جامعة هارفرد، مدعمه بقصة شخص عاش تجربة العوده من الأنتحار بالفعل.

الموقع الثالث هو موقع National library for medicine أو المكتبه القوميه للطب، و الذي أستعنا بيه قبل كده في الأحصائيات الخاصه بمصر، و بما أنه موقع مختص بالطب، فكانت أحصائياته أكثر تفصيلاً و دقه، و حيهما منها النتيجة النهائيه و هي أن نسب معاودة تجربة الأنتحار بتراوح ما بين ال13% ل ال36% تبعاً لعوامل كثير مش حتكون موضوعنا لكن الأرقام هي التي تهمننا، بمعنى أنها تقريباً نفس المتوسط الذي تم ذكره على موقع هارفرد، و أكدت عليه أرقام جريدة New York times، و المتوسط ده و الذي هو تقريباً في حدود الربع، بمعنى أن من بين كل 4 أشخاص قاموا بمحاولة أنتحار و منجحتش، واحد بس هو الذي ببعاود تكرر تجربته، طيب دلالة الرقم ده عندي بيتمثل أيه؟

أولاً بيُمثل بالنسبالي تشكيك في تقرير منظمة الصحه العالميه، و الذي ذكرناه في بدايات الفصل ده، و الذي من خلاله تم وضع الأشخاص الذي قاموا بتجربة الأنتحار على رأس قائمة أكثر الأشخاص عرضه للأنتحار، هو الكلام كان نظرياً منطقي، لأن الذي بيُقدم على الأنتحار و مبينجحش، طبيعي أن عدم نجاح محاولته لا تعني أن الأسباب التي وصلته للأنتحار مبقتش موجوده، لكن عملياً من الواضح أن التقرير مهتمش بالأحصائيات، و بصراحه التقرير كله بالنسبالي كان فيه نقط ضعف كثيره، وضحنا بعضها في أول الفصل، و بزود عليها النقط الأحصائيه الخاصه بمعاودة الأنتحار.

ثاني نقطه و هي الأهم بالنسبالي، أن نسبة 75% تقريباً من الذي قاموا بمحاولة أنتحار و لم تنجح، و بالطبع مروا خلالها بتجربة Near death experience، أو مرحله الموت القريب، لما أتاحت لهم فرصة العوده للحياه مره ثانيه أعادوا التفكير في تجربته، حتى لو كان من ضمن الأسباب عدم تكرارها مراقبه من



مقابلة في الانتحار

الأهل أو متابعه من جهة ما، لكن في النهاية فالنتيجة أيجابية جداً، وكأنها تجربته بتدى اللي بيخوضها فرصة أنه يشوف حياته من الخارج، فبيكون في وضع يسمح له أنه يفكر بهدوء، زى ما قلنا في أول الفصل، و يعيد تقييم تجربته و أخطائه، و تكون فرصه له أنه يبدأ من جديد، حتى لو كانت مشاكله اللي دفعته لتجربة الانتحار لسه موجوده.

في النهاية وأخيراً، حأجواب اللي السؤال اللي بدأت بيه الفصل، و أستمر معنا على مدار الفصل كله، هل أحنا لنا الحق في إنهاء حياتنا، اللي أحنا ممكنش لنا حق الاختيار في أننا نخوضها؟

الأجابة ببساطه أن جرايم القتل، و اللي فيها شخص بيؤذى شخص آخر و يسلبه حياته بتتم، بل و أحياناً بتكون مقننه سواء في الحروب أو أحكام الأعدام، فأنا شايف أن الأنسان -بعيداً عن الأحكام الدينيه، و اللي أكيد كل واحد عارف أحكام دينه أيه- له الحق في الانتحار، لكنه حق مشروط بشرط، هو في أغلب الأحيان مستحيل، و هو عدم أذية -حتى لو أذيه نفسه- أى شخص أخر بآنتحاره ده، و ده شرط صعب جداً تحقيقه، لكن في النهاية و بعيداً عن الشرط ده، فالأنتحار هو دائماً حل الشخص الضعيف أو السلبي، لكن في الأخر هو حر ما لم يسبب أذيه لغيره، و ده -زى ما قلنا- شرط عامل زى فكرة العدل بين الزوجات، شرط مستحيل.

و من هنا بقول لكل شخص بيفكر أنه يُقدم على الانتحار، شوف كام شخص ممكن يُؤذى بسببك، متخليش حلولك أنانيه و فرديه، قيم حياتك و كأنك شخص بيخوفها من بره، حتلاقي دائماً حلول مخطرتش على بالك قبل كده، و الدليل نسبة الـ 75% الى قاموا بالخطوة بالفعل و فشلوا و مكرروهاش مره ثانيه.

29 يناير 2023



<https://ourworldindata.org/suicide>

<https://www.who.int/news-room/fact-sheets/detail/suicide>

<https://www.washingtonpost.com/wp-srv/world/suiciderate>

<https://www.ncbi.nlm.nih.gov/pmc/articles/PMC9433602>

<https://www.nytimes.com/2016/11/08/well/live/after-a-suicide-attempt-the-risk-of-another-try.html>

<https://www.hsph.harvard.edu/means-matter/means-matter/survival>

<https://www.ncbi.nlm.nih.gov/pmc/articles/PMC5415954>



"كأولاً"، و النسخة الأفضل من تلك

"لماذا تبدو الحياه ظالمه؟
هل سننتظر كثيراً لنصل لمرحلة الثواب؟
هل سنجد الجزاء العادل لأفعالنا؟"

"عن الأنسان في الازمنة"

"كارما"، و النسخة الأفضل منك

هل الحياه اللى إحنا بنعيشها عادله؟

الأجابه بمنتهى السرعه و البساطه حتكون "طبعاً لأ". الحياه عمرها ما كانت عادله بأى صوره من الصور، و مفهوم العداله هنا، هو أننا ندخل كلنا سباق الحياه بنفس الأمكانيات و بنفس الفرص، بمعنى أننا نكون زى مجموعه متسابقين داخلين سباق سيارات، فيُفترض أن أمكانيات عربياتهم تكون قريبه من بعض، مش عربيه موتورها 4000CC تتسابق مع عربيه 1100CC، و ده مفهوم تساوى الأمكانيات و الفرص، لكن للأسف أحنأ بندخل الحياه بأمكانيات غير متساويه، و فرص غير متساويه.

أشكال عدم العدل أو عدم التساوى فى الحياه كتير جداً، و اللى بتخلى طول الوقت فيه ناس عندها فرص فى الحياه أكثر من الآخرين، بتسهل مشوار الحياه عليهم أكثر من غيرهم، و غيرهم دول ممكن يقضوا كل حياتهم علشان يوصلوا بس لمفهوم "الستر"، و مفهوم الستر فى ثقافه شعوبنا هو أننا نعدى الحياه و خلاص، نمر منها بأقل قدر من الخسائر، بدون أى طموح فى تحقيق أى نوع من النجاح، أكثر من نجاح الشخص فى أنه عايش و خلاص، و ده بيحصل لأنه أضطر يبدأ سباق الحياه بأمكانيات أقل من منافسيه فى الحياه بكتير.

صوور عدم العداله فى الحياه كتير جداً، و ممكن تلاقى شخص ظروفه فيها أكثر من صوره من صوور عدم العداله، بمعنى أن صعوبات بداية حياته بتكون فيها أكثر من صعوبه، و تعال معايا نستعرض بعض صوور عدم العداله، اللى ممكن أى أنسان يبدأ بيها مشوار الحياه، و هو ملوش أى ذنب فيها، و طبعاً كل الصعوبات دى بتشكل عشرات الأشكال من التمييز بين البشر، لأن فيه ناس بتتميز عن غيرها، بدون ما يكون لها أى فضل فى التمييز ده.

أول و أهم نوع من الصعوبات -من وجهة نظرى- ممكن شخص يبدأ بيها مشوار حياته، هى الصعوبات الجسديه، أنك تتولد و جسمك معندوش نفس أمكانيات الآخرين، إن قدراتك الجسديه تكون أقل، فبالتالى أنت مولود بفرص أقل من غيرك،

"كلما"، و النسخة الأفضل من تلك

وكلمة أقل دى ممكن توصل لدرجه قريبه من الأنعدام فى بعض الأحيان، و هنا
حقسم الصعوبه الجسديه ل3 أنواع:

- حسيه: و دى تخص الحواس الخمسه، بمعنى فقدان البصر أو السمع.
- حركيه: بمعنى أى نوع من العجز الحركى، أو فقدان أطراف، أو عدم قدرة الجهاز العصبى و الحركى عن أداء وظائفهم.
- عقليه و ذهنيه: و طبعاً دى حتكون خاصه بأى حاجه لها علاقه بالإدراك و التفكير.

تانى نوع من أنواع الصعوبات هى البيئه اللى ممكن أى أنسان يتولد فيها و مدى تأثيرها، و البيئه هنا أنا بفصلها عن الحاله الماديه، لأن فيه ناس كتير بيتولدوا فى ظروف ماديه كويسه، لكن فى نفس الوقت فى بيئات لا تُساعد على النجاح، و البيئه من أكثر العوامل اللى بتؤثر على تكوين شخصيه أى أنسان، و بتشكل إلى حد ما نوعيه طموحاته و أهدافه فى الحياه، لأن البيئه هى اللى بتكون جزء كبير من ثقافته، اللى حتبنى شخصيته و أختياراته بعد كده.

تالت نوع من أنواع الصعوبات هى الحاله الماديه طبعاً، و اللى بالطبع بتحرم بعض الناس من فرص حياتيه كتير متوفره لغيرهم، زى التعليم، التفوق الرياضى، الأبداع العلمى أو الفنى... إلخ من الفرص الحياتيه الكثير اللى بيحرم منها اى إنسان ممكن إمكانياته الماديه متوفره لوش.

رابع نوع من أنواع الصعوبات هو الباسبور اللى أى أنسان شايله، و هنا طبعاً المقصود الدوله اللى أنت ممكن تكون شايل جنسيتها، و دى صعوبه فى منتهى الأهميه، لأن كتير من البشر على كوكب الأرض محرومين من أبسط الحقوق الأنسانيه، بدايةً من الحق فى العيش فى حاله من التوازن المادى، تمكّنهم على الأقل من الحصول على أبسط أحتياجاتهم، اللى هى فى البلاد الأخرى بديهيات و حاجات مينفعش الكلام فيها، للحقوق الأنسانيه من حريه و صحه، لحق الأنسان فى تعليم محترم أو مناخ مناسب يقدر يساعده على تنمية قدراته، لحقه فى أنه لو وقع مادياً أو مش لاقى عمل الدوله تسنده، لحقه فى أنه يشارك بشكل حقيقى فى مجتمعه... إلخ.

"كلوما"، و النسخة الأفضل من تلك

خامس نوع من أنواع الصعوبات هو الشكل و المواصفات الجسديه، فيه ناس كتير فرصها في الحياه بتكون أكثر، لمجرد أنها مولوده شكلها أحسن من غيرها، فبتتلاقى عشرات الأبواب اللى بتتفتح لها، بما فيها أبواب هي نفسها عمرها ما فكرت فيها، يعنى لو بنت مثلاً شكلها حلو و نسب جسمها متناسقه، بتتلاقى عشرات الفرص للشغل، و ده أحياناً بيحصل حتى لو البنت معندهاش أى مؤهلات غير شكلها، يعنى ممكن مؤهلات المهنة نفسها متكونش متوفره عند البنت، و ده حنلاقيه في نوعيات عمل كتير زى التمثيل، الModelling، المضيفات الجويات، السكرتاريه، و غيرها من نوعيات العمل. أحياناً كمان بيكون الأختيار هدفه أنهم يكونوا واجهه كويسه أو مشرفه للمكان، و ده بيحصل كتير جداً في مجتمعاتنا.

كمان ممكن الأختيار بالنسبه للأولاد يكون للبنيه الجسديه، و ده بيحصل بدايةً من الفرص في دخول بعض الكليات، زى الكليات العسكريه أو الرياضيه، للفرص في العمل كموديل أو حتى كممثل، و كتير من ممثلينا دخلوا التمثيل بعضلاتهم، زى ما كتير من الممثلات دخلوا التمثيل بشكلهم، و الاتنين معندهممش أى مؤهلات تمثليه على الأطلاق.

الشكل و المواصفات الجسديه طبعاً مش بتأثر بس على فرصك في العمل، لكن أحياناً كتير بتأثر على حياتك نفسها، على علاقاتك الأنسانيه، لأن جزء كبير من العلاقات الخاصه بين رجل و أمراه بيكون أساسه الشكل، العين في أحيان كتير هي اللى بتاخذ أول قرار، لدرجة أن فيه جمله شهيره في جميع اللغات و هي "الحب من أول نظره"، و أكيد الحب اللى من أول نظره عمره ما حيكون لشخص شكله مش حلو طبعاً، أنا كنت حأتقبل الجملة جداً و أعتبرها عبقرية لو كانت "الحب من أول كلمه" لأن بالكلام الناس بتتواصل و بتفهم بعضها، أما فكرة النظره فهي حصرت تقييم الإنسان في شكله الخارجى فقط، و هنا الناس اللى شكلها مش حلو -و ده غصب عنها- حتتظلم، لأن هي ملهاش ذنب أن شكلها مش حلو، فالناس دى فرصها في أختيار شريك حياه مناسب بيكون أقل بكتير، للدرجة اللى بتوصل كتير منهم أنهم يوافقوا على أول شخص يرضى بيهم، و على فكره أنا هنا بتكلم على الجنسيتين، مش الستات بس.

"كلوما"، و النسخة الأفضل من تلك

طبعاً كمان الشكل ممكن يآثر على حياتك نفسها، و أكيد أنت سمعت معايا عن أكثر من حالة أنتحار بسبب التنمر، خاصة في مراحل المراهقه ما بين طلبة المدارس الأعداديه و الثانويه، التنمر واحد من أسوأ السلوكيات البشريه على مر التاريخ، و للأسف لم يتغير من أيام الجاهليه ليومنا هذا، و هو سلوك بيآثر كثير جداً على شخصية الشخص اللى بيتم التنمر عليه، للدرجه اللى ممكن توصل للأنتحار-زى ما سبق و ذكرت_.

آخر شكل حآذكره من أشكال التمييز نتيجة الشكل هو لون البشره، و ده سبق و أتكلمنا عنه في فصل كامل و هو "چين أبوكو أيه"، و ده تمييز ما زال بيحدث ليومنا هذا، سواء في العلاقات الأنسانيه، لما أسره ترفض أن أبنها أو بنتها يرفضوا الأرتباط بشخص أسمر البشره، و ده شيء أنا عايشته بنفسى كثير جداً، لشكل تانى من أشكال التمييز نتيجة لون البشره، و هو الرفض الغير معلن لوصول أصحاب البشره السمراء لمناصب معينه في كثير من الدول، و هو رفض غير دستورى أو قانونى لكنه بيحصل، للتنمر عليهم حتى لو كان بشكل لطيف، زى لما واحد يعاكس واحده سمرا فيقولها "يا شيكولاته"، و تانى حارجع و أكد-زى ما سبق و ذكرت في فصل "چين أبوكو أيه"- أن السينما المصريه رسخت كثير جداً للعنصريه نتيجة اللون من يوم ما بدأت.

سادس نوع من أنواع الصعوبات هي الموهبه، فيه ناس بتتولد موهوبه في شيء معين، ممكن موسيقى، رسم، رياضه، أو حتى مواهب علميه، و ده بيساعدهم كثير جداً في الحياه، لو عرفوا يستغلوا الموهبه دى، بينما فيه آخرين بيفضلوا طول حياتهم بيحاولوا الوصول لربع الموهبه دى لكن بيفشلوا، بالرغم من أنهم بيكونوا جادين جداً في ده، أنا مثلاً عشنت عمرى كله بحاول أتعلم موسيقى لشغفى الشديد بيها، و عمرى ما قدرت، لأنها في النهايه موهبه، يا أما عندك يا أما مش عندك، و ده بيسبب إحباط لناس كثير، لما بتفشل في تحقيق حلمها.

سابع نوع من أنواع الصعوبات و أخطرها، لأن الأنسان هو اللى عملها لنفسه من يوم وجوده على الأرض، هي صعوبه أنك تكونى أمراه. الأنسان ميز بين الرجل و المرأة من أول يوم على الأرض، فجعل المرأة دائماً تابع للرجل، أعتبرها جزء من أملاكه،

"كلوما"، و النسخة الأفضل مناهج

لدرجة أنها كانت أحياناً بتورث، بمعنى أن زوجة الأب كانت بتورث للأبن، أو زوجة الأخ كانت بتورث لأخوه.

المرأة أتحرمت على مر التاريخ من حقوق كثير جداً، ماليه، تعليميه، وظيفيه، اجتماعيه، للدرجة اللي وصلت أن لو حصل حاجه بين رجل و أمراه، المرأه هي اللي بتشيل العار و المشاكل، و كان زمان الرجل بينكر و الموضوع بينتهي و بتشيله المرأه لوحدها، و بجد شكراً لعلوم الوراثة و الDNA، اللي فضحت و كشفت آلاف و يمكن ملايين الرجال اللي تنصلوا من أبوتهم، و أعتقد أنك ممكن تفتكر معايا 2 من الممثلين الرجال الموجودين حالياً في مصر، كل واحد منهم أنكر تماماً علاقته بأولاده، لكن الحمد لله الDNA فضح الأثنين.

صحيح المرأه بدأت تتساوى مع الرجل في بعض المجتمعات، لكن للأسف لسه عندنا في مجتمعاتنا، اللي ما زال أسم الزوجه أو الأم عوره، فبتتنادى يا أم فلان، أو أحياناً باسم زوجها، أغلب حقوقها مُهدر، و ده بالنسبالي أسوأ و أخطر أشكال التمييز السبعه اللي ذكرتهم، و اللي منبعه الفكر الذكوري اللي حكم تفكير البشريه لقرون.

من السبع نماذج اللي ذكرتهم، حتلاقي معايا أن الحياه عمرها ما كانت عادله، فيها تمييز طول الوقت لناس على ناس، فيها ظلم، طيب يا ترى الناس أزاى تقبلت هذه الأشكال من الأختلافات، حتى من قبل ظهور الأديان و ليومنا هذا؟


المعتقد البشري في العدالة أنقسم على مدار التاريخ البشري ل3 أفكار، و أنا هنا بقول المعتقد، و ده معناه كل اللي البشريه صدقته، سواء كان منبعه دين -أياً كان- أو معتقد أو مذهب، أو حتى فكره بشريه.

أول فكره من المعتقدات البشريه لمفهوم العدالة، هي فكرة وجود حياه أخرى أبعديه، و أن حياتنا اللي بنحياها هي لحظه في زمن الحياه الأبعديه، و أن كل أنسان حيُجازى على قدر الصعوبات اللي صادفها في حياتها، و أن المنح و الهبات الألهيه هي اختبار صعب من الخالق، بينما الصعوبات هي المنحه الحقيقيه منه. علشان

"كلوما"، و النسخة الأفضل من تلك

كده لحد يومنا هذا فيه كثير من الناس مؤمنه بأن الأطفال اللي عندهم إعاقه ذهنيه هما ملايكه ماشيين على الأرض، وأنهم من أهل الجنة، لأنهم مرتكبوش أى نوع من الشرور، مع أن يُفترض أن الحساب يكون بقدر قدرتك على التمييز بين الصح و الخطأ، لكن الناس بتعتقد أن هذا النوع من الصعوبات -و أقصد بيها الذهنيه- هي بالفعل أختبار و ابتلاء، يضمن لصاحبه مكانه في الجنة.

أول من أعتقد بفكرة الحياه الأخرى في عالم آخر -حتى قبل الأديان الأبراهيميه- كان المصريين القدماء، و اللي كانوا أصحاب أول تصور لفكرة الحساب قبل رحلة العالم الأخر، و أن قلب الأنسان بيوضع في كفة ميزان، و في الكفه الأخرى "ريشه ماعت"، و اللي بترمز للعداله و الأخلاق، فلو كانت الريشه أثقل من القلب، فمعنى كده أن المتوفى كان شخص طيب و على خلق أثناء حياته، فبيبدأ حياته الأخرى في حديقه "الجنه". أما إذا كان القلب أثقل من الريشه، فمعنى كده أن المتوفى كان في حياته شخص خاطئ و شرير، و هنا بيتم ألقاء القلب و الميت أمام حيوان خرافي بيكون واقف بجوار الميزان اسمه "عمعموت"، رأسه رأس أسد و جسمه جسم فرس النهر و له ديل تمساح، فبيقوم عمعموت بأكله، و بتكون دى نهاية المتوفى.



"كارما"، و النسخة الأفضل من تلك

اليهودية -أقدم الأديان الأبراهيمية- حصل فيها تغيير جذرى في مفهوم الثواب و العقاب في مرحلة البدايات، لأن اليهودية ديانة كُتبت على مدار أكثر من 1500 تقريباً، ما بين أسفار موسى الخمسة، و آخر سفر كُتب في التوراه. مكننتش فكره الحياه الأخرى موجوده من البدايه، بس تطورت الفكره مع الأيام، و بالمناسبه فهناك فئه كبيره من اليهود بيأمنوا أن الحياه الأخره حتكون على الأرض، فيما يسمى "العالم الذى سياتى"، و ده حيثحقق مع ظهور "المسيح" بمفهومه اليهودى، و هو المسيح الى اليهوديه منتظره، زى ما فى الأسلام فكرة "المهدى المنتظر.

إذن فأول فكره من الأفكار البشريه عن مفهوم العدالة، هى فكرة وجود حساب بعد الموت، و تعويض لكل شخص كان عنده صعوبه فى الحياه، و محاسبه كل أنسان أخذ ميزه أكثر من غيره فى الحياه، عن كيفية أستغلاله للميزه دى، و هل أستغلها فى الخير و لا الشر، و تعويض الناس عن كل اللى شافوه فى الحياه الأولى الصغرى، فى الحياه الأخرى الأبدية، مع أعتبار الحياه الأولى هى دار أختبار و شقاء و بلاء، لكن كل أنسان فينا كان عنده أختبار مختلف تماماً عن غيره.

تانى فكره من المعتقدات البشريه، و المنتشره بشكل أساسى فى شرق أسيا عند كل الديانات الشرق أسيويه، سواء البوذيه أو الهندوسيه أو الجيانيه أو غيرهم، و هى فكرة دورات الحياه، و الأرتقاء بروحك بشكل تدريجى، من خلال أشكال مختلفه من الحيوانات اللى الروح بتعيشها.

قبل ما أشرحك الفكره خلينى أديلك معنى 4 تعريفات مهمه جداً فى الديانات الشرق أسيويه، و هى "سمسارا"، "كارما"، "موكشا" و "نيرفانا".

حأبدأ بأول تعريف و هو "سمسارا"، و معناها: تتدفق على أو تمر عبر، أما معناها الفعلى فهو الدورات ألا نهائيه من الولادة ، و الحياه و الموت ، و البعث من جديد.

تانى تعريف و هو "كارما"، و معناها ببساطة هو الجزاء على الأفعال، بمعنى أخر الثواب و العقاب على الأفعال اللى بنعملها أثناء حياتنا، لكن فى الديانات الشرق أسيويه بيكون له شكل مختلف تماماً، حأشرحه على طول بعض ما أخلص التعريفات.

"كارما"، و النسخة الأفضل من تلك

تالت تعريف هو "موكشا"، و هي مرحلة التحرر من السامسارا، يعنى خلاص الروح بتتخلص من مرحلة الدورات ألا نهائيه من الولادة، و الحياه و الموت ، و البعث من جديد.

رابع و آخر تعريف و هو "نيرفانا"، و نيرفانا هي المرحله النهائيه اللى بتعقب مرحلة "موكشا"، و هي الهدف النهائى فى كل الديانات الشرق أسيويه، بمعنى هي أشبه بالجنه أو الحياه الأبدية فى الديانات الأبراهيميه. فى مرحلة "نيرفانا" بتوصل الروح لمرحلة السلام الأبدى، و بتتوحد فيها الروح مع روح الخالق.

و خلينى أبدأ فى شرح الفكره، الروح فى العقائد الهندية شئ مقدس جداً، و هي تمثل أساس الحياه كلها، و علشان كده لازم الروح تتطهر طول الوقت من أخطائها، و ده بيتم من خلال الأربع مراحل اللى أنا لسه ذاكرهم.

النظريه العقائديه بتقول أن لما أى أنسان بيموت، بتنتقل روحه لجسد كائن جديد لسه فى مرحلة الولادة، و دى هي "سامسارا"، و هي عملية أنتقال الروح طول الوقت من جسد لجسد، لكن الأنتقال ده بيكون له قواعد، و هي أن نتيجته أعمال الأنسان فى الحياه اللى لسه مخلصها، بيكون أختيار الجسد الجديد اللى روح الأنسان اللى مات ده حتنتقله، يعنى لو كانت أعماله خير، حينتقل لجسد شخصيه أعلى درجه من الشخصيه اللى كان فيها قبل كده كنوع من الثواب، و لو كانت أعماله سيئه، حينتقل لجسد شخصيه أقل كنوع من العقاب، و هنا الجسد الجديد ممكن يكون لأنسان أو حيوان أو نبات، و دى هي "كارما"، و اللى بتعنى الثواب و العقاب نتيجته سلوكياتك فى رحله الحياه اللى الروح لسه مخلصها. طبعاً الروح لما بتنتقل لدرجه أقل -حتى لو نبات-، تقدر تعلى فى دورة الحياه اللى بعدها لدرجه أعلى.

الروح بتفضل فى دورات الحياه دى مش لمالا نهايه، لكن النهايه بتيجى نتيجته سلوكيات الروح، لأنها لو وصلت لأعلى درجه من الصفاء و السلوك القويم، بتنتهى من دورات الحياه ألا نهائيه دى، علشان كده تكون وصلت لمرحلة "موكشا"، و هي التحرر من دورات الحياه المستمره، علشان توصل بعدها لأعلى درجه و هي "نيرفانا"، و هي توحد الروح مع روح الخالق، فى معتقد أشبه بفكرة "الروح القدس"

"كلوما"، و النسخة الأفضل من تلك

في المسيحية، و أنا هنا بحاول أقرب الفكره، مش بقول أنها هي هي، لأن في المُعتقد المسيحي دخول الروح القُدس لروح أنسان سر من أسرار المسيحية، لأنها بتديله قدرات أعلى من قدراته البشريه.

المُهم و علشان أختصر كل اللي فات، فشكل الثواب و العقاب على أفعال الأنسان في الديانات الشرق أسيويه، هو أنتقال الأرواح لأجساد مختلفه طول الوقت، لحد ما بتوصل الروح لأعلى درجه من الصفاء، فبتتوحد مع الخالق في مرحله أشبه بمرحلة الجنه في الديانات الأبراهيميه، بس خد بالك معايا أن عقاب الروح على أفعالها هنا بيكون أرضي، من خلال دخولها جسد آخر أقل، علشان تتطهر من أخطائها، مش سماوي زي الديانات الأبراهيميه.

بوذا و هو المعلم الأعظم للديانه، و بالمناسبه، فمن المفاهيم الخاطئه جداً أعتقدانا بأن البوذيين بيعبدوا بوذا، بوذا بالنسبه للبوذيين بشر عادي، لكنه المعلم الأعظم، و هو أقرب لفكرة الرسول في الديانات الأبراهيميه، كان له رأى في فكرة الألم و المعاناه، و أسس مفهوم مهم جداً في البوذيه حأكتبه من نص الكتاب نفسه، و هو الحقائق النبيله الأربعة، اللي لخص بيهم بوذا مفهوم رحلة الحياه كلها و الحقائق النبيله الأربعة كما جاءت في البوذيه هي:

1. طبيعة المعاناه:

و هي أن الولادة هي معاناه، و الشيخوخة هي معاناه، و المرض هو معاناه، و الموت هو معاناه؛ الحزن ، و الرثاء و الألم و الأسف و اليأس هي معاناه؛ الاتحاد مع ما هو محزن هي معاناه؛ الانفصال عن ما هو مرضي هو معاناه، عدم الحصول على ما يريد المرء هي معاناه.

2. أصل المعاناه:

و هو الحنين الذي يؤدي إلى تجدد الوجود، يرافقه البهجة و الشهوة، السعي إلى الفرحة هنا وهناك هي أيضا كذلك، الشغف للمتع الحسية، الحنين للوجود، التوق للخلود.

"كلوما"، و النسخة الأفضل من تلك

3. وقف المعاناه:

و هي تتلاشى بعيدا دون عودة عند وقف الأعمال التي تشغف النفس، والتخلي والتنازل عن ذلك، والتحرر من ذلك، وعدم الاعتماد على ذلك.

4. الطريق المؤدى إلى وقف المعاناه:

و هو الطريق النبيل الثماني، والذي هو النظر السليم، النية السليمة، الكلمة السليمة، العمل السليم، كسب الرزق السليم، الجهد السليم، الذهن السليم، التركيز السليم.

يعنى البوذية بأختصار بتعتبر أن الحياة هي مجموعة من دورات المعاناه الى الروح بتعيشها، كل مرة في جسد مختلف، لحد ما بتوصل للمرحلة النهائية و هي مرحلة "نيرفانا"، زى ما سبق و ذكرت.

تالت فكره عن مفهوم العدالة حتخص قطاع كبير من ألا دينيين، و أنا هنا بقول قطاع كبير مش كل، لأن فيه كتير من ألا دينيين ربوبيين أو لا أدريين، و الفتئين دول معندهم مش رأى قاطع هما متأكدين منه، بينما باقى ألا دينيين معتقدهم بأن مفيش حياه أخرى، أننا بنعيش حياتنا و بس، البعض منهم بيعتقد بإمكانية الوصول لمرحلة الخلود مع تقدم الطب و القدره على السيطرة على أسباب الموت، و البعض الأخر بيعتبر بعض من السبع أنواع من الأختلافات بين البشر الى أنا ذكرتها هي دليل على عدم وجود خالق، لأن من وجهة نظرهم ليه الخالق يخلق طفل مريض أو مشوه، أو أنه يترك شخص يعانى.

المجموعه دى بتعيش حياتها بشكل مادى جداً، و مادى هنا أكيد مش معناه الماديه من ناحية الفلوس، لكن أقصد الماديه فى كل تفاصيل الحياه، لأن المعاناه و الألم مش حيكون لهم مقابل فى أى حياه أخرى، لأن الحياه دى هي الأولى و الأخره. علشان كده بيكون فكرة الأستسلام للألم و عذابات النفس و الجسد مرفوضه، لأن الحياه أقصر من أنهم يضيعوا وقت فيها، فبتكون فكرة الأختلاف عن الطبيعى أحياناً حافظ للأبداع، مش للأستسلام.

"كلوما"، و النسخة الأفضل من تلك

أقرب و أقوى مثال ممكن أضره -و غالباً حتكون أنت عارفه- هو ستيفن هوكينج، العالم الفيزيائي الأشهر بعد أينشتين، و اللي أصيب و هو في مرحلة الشباب بمرض أصاب كل أطرافه و النطق عنده، و عاش باقي حياته على كرسي بعجل متركب فيه جهاز بيخرج الذبذبات من حنجرتة لصوت، علشان يعرف يتواصل مع الناس، لأنه كان فاقد السيطرة على كل أطرافه، فحتى مكنش يقدر يكتب.

بالمناسبه فأغلب علماء الفيزياء الكبار لا دينيين، و خاصة العلماء اللي بيتعاملوا في الفيزياء الكونية، و اللي هي أكبر شىء الفيزياء بتتعامل معاها و هو الكون، أو الفيزياء النووية، و اللي بتتعامل مع أصغر شىء الفيزياء بتتعامل معاها و هو نواة الذره.

إذن فالفته دى من البشر أعتبرت أى عيوب جسديه كأمر واقع مينفعش تضيع الوقت في البكاء عليه، و قررت التعامل مع الحياه بمنطق أنها حياه واحده، فلازم نحاول الوصول لتحقيق أكبر قدر من الأنجازات، و تجاوز محنة الألم.

إذن و علشان أقفل الجزء ده من الفصل، فالغالبية العظمى من البشر بتعتقد أن المعاناه ميزه أو منحه إلهيه، و أن الحياه ما هي إلا دار أختبار و شقاء و بلاء، لكن كل واحد فينا بيكون أختباره بشكل مختلف، مع إعتقاد بعض البشر في فكرة تساوينا كلنا في الحظوظ، و ده بيظهر في فكرة "ال24 قيراط"، إن كل إنسان له نصيب من أشكال السعاده 24 قيراط، ناس بتأخدهم كلهم فلوس، ناس بتأخذ جزء فلوس و جزء صحه، ناس بتأخذ جزء أولاد و جزء نجاح... إلخ، المهم إن كل إنسان نصيبه من السعاده في الحياه 24 قيراط، و دى واحده من أهم النظريات اللي الناس أوجدتها لنفسها لقبول فكرة الأختلاف و فكرة الألم، أما القاعده الرئيسييه للغالبية العظمى من الناس، فهي أن الثواب على الألم حيكون في الحياه الأخرى، و بقدر درجة الألم و التحمل بيكون الثواب.

قبل ما أنهى الجزء ده، أحب أوضح أنى كنت بس بستعرض مفاهيم البشر على كوكب الأرض عن فكرة قبول الأختلاف اللي هما ملهمش يد فيه، عن فكرة تحمل الألم أو المعاناه لوجود هدف أكبر، فأنا هنا تعمدت أكون محايد تماماً، و أستعرض كل وجهات النظر بدون أى تدخل أو إضافة أى رؤيه أو وجهة نظر.

"كارما"، و النسخة الأفضل من ذلك

في الفصل ده، و اللى بعتره الملخص لكل اللى أنا كنت عايز أوصله من خلال الكتاب ككل، عايز أقولك فيه أن كل واحد فينا أياً كان درجة معاناته، و هل هي خارجه عن إرادته أو لها أسبابها الخاصه بيه، قادر يحقق لنفسه "كارما" خاصه بيه على الأرض، و طبيعة "كارما" اللى أنا أقصدها، هي أننا نلاقى جزاء أو مقابل لكل حاجه بنعملها، لكل مجهود بنبدله، أننا نوصل لنتائج واضحة و مرضيه.

عايزك تسأل نفسك سؤال بسيط جداً، ليه كل الشركات في الدنيا، سواء اللى بتنتج منتج مادي، زي العريبات، الغسالات، الكمبيوتر، الموبيل... إلخ، أو الشركات اللى بتنتج منتج غير مادي، زي التطبيقات و البرمجيات، طول الوقت بتعمل نسخ و إصدارات جديده من منتجها، أو جيل جديد من المنتج، بالرغم من أن المستخدمين بيكونوا مبسوطين جداً و راضيين بالمنتج، و ممكن تكون الشركه محققه أرقام مبيعات فوق المتوقع.

الأجابة ببساطه، لأن الشركات المُنتجه دى، طول الوقت بتدور على تحقيق هدفين -بعيداً طبعاً عن الهدف المادى-، و هما التحسين و التطوير، و هناك فارق كبير جداً بين الأثنين.

التحسين هو عملية البحث الدائم عن الأخطاء و المشاكل و العيوب، بمعنى أن أى شركه بعد ما بيظهر لها أى إصدار أو جيل جديد من أى مُنتج، بتبدأ تدور على العيوب و المشاكل و الأخطاء اللى فيه، و ده من خلال أراء المستخدمين، أو عيوب ممكن تظهر مع الزمن، علشان تتلافها في الإصدار أو الجيل الجديد من المنتج، فالشركات المحترمه في العالم طول الوقت شغلها شاغل هو إكتشاف عيوب مُنتجها علشان تتلافها في الإصدار الجديد.

أما التطوير فهو بينبع من السؤالين المهمين جداً و هما: "هو أيه اللى ناقص في المُنتج ده؟"، أو "أيه جديد ممكن نضيفه على المُنتج ده؟". و من هنا بتظهر فكرة New features أو المزايا أو المميزات الجديده لأى منتج، و اللى بتكون أهم وسيله

"كارما"، و النسخة الأفضل منّا

للدعاية لأى إصدار جديد منه، سواء كان مادي أو غير مادي، وأحياناً يُسمى التطوير ده "خاصيه جديد".

و من هنا بنشوف ليه العلم مش بيقف على منتج وبيقول خلاص هو كده أفضل حاجه ممكن تُخرج من المُنتج ده، لأ، أنت طول الوقت بتشوف تطوير في كل مُنتج حواليك. طيب أية علاقة ده بكلامنا، و هل ممكن ربطه بفكرة "كارما" ذاتيه ممكن تحققها لنفسك؟

ببساطه أنا عايزك تتعامل مع نفسك كمنتج أو تطبيق، بمعنى أنك تحاول كل فتره تخرج إصدار جديد منك، و الأصدار ده تكون أشتغلت فيه على تحسين و تطوير نفسك، بمعنى إكتشاف بعض العيوب، و إضافة بعض المزايا. أسعى طول الوقت للوصول لأفضل نسخه منك، و أفضل هنا هي صيغة مقارنه بمعنى أنها أحسن من اللي قبلها، لأن مفيش حاجه في الدنيا أسمها "الأفضل على الإطلاق".

حاول تعيش حياتك بمفهوم "سامسارا" و "كارما"، بمعنى أنك تحاول ترتقى بنفسك طول الوقت، تقسم حياتك لمراحل، زى فكرة الحيوانات في الديانات الهنديه، و اللي هي "سامسارا"، فحتلاقي تلقائى نتايج كل مرحله حتقودك للمرحله اللي بعدها، و دى "كارما". حاول لو وقعت و الحياه عاقبتك، أنك تعيد حساباتك في المرحله اللي بعدها، و تبدأ تطلع مرحله مرحله مره تانيه. هو صحيح عمرك ما حتوصل للمرحلتين الأعلى "موكشا" و "نيرفانا"، لأن مفيش في الحياه فكرة الكمال أو الصح المطلق، لكن زى ما سبق و قلت، حاول توصل لأفضل إصدار منك.

و من النقطه دى، حأدخل معاك على فكرة "الصح" و "الغلط". أنا طول عمري مؤمن بأن فيه شئ أسمه "غلط"، لكن مفيش شئ في الدنيا أسمه "الصح"، لأن الصح طول الوقت هو شئ نسبي جداً، أحنا اللي بنضع قواعد بنفسنا. الغلط نقدر نعرفه ببساطه أنه أى شئ ممكن يسبب ضرر أو مشكله، لكن الصح عمره ما كان له تعريف، و خلينى أضربك مثال بقوانين المرور.

أنت لو كسرت إشارة مرور، بمعنى لو عدت و الإشارة المخصص ليك لونها أحمر، ممن بنسبه كبيره جداً تخبط عريه تانيه ماشيه في الإتجاه المسموح له بالمرور، فده

"كلوما"، و النسخة الأفضل من أي

"غلط" واضح، لكن فكرة أن العربيات تمشى يمين الطريق زى المملكة المتحدة أو شماله زى باقى الدول، فده صح نسبي، خاضع لقوانين كل دوله.

كمان فكرة تحديد السرعة هى شئ نسبي، خاضع للضغط المورورى على كل طريق، فأحياناً لو عربييه مشيت ببطء على طريق سريع بيكون خطر أكبر بكتير من مشيها سريع، لأن سرعتها مش بتكون متناسبه مع سرعة باقى العربيات، فمممكن بسهولة جداً تتعرض لأى تصادم مع عربييه تانيه مسرعه، أو أضعف الأيمان ممكن تُعيق حركة المورور فى الطريق ده.

مثال تانى مهم جداً أحب أضريه، و هو عقوبة القاتل، هل يُفضل أن القاتل يتم إعدامه و إنهاء حياته، و لا كده القانون يكون بيصلح غلط بغلط تانى، ممكن كمان يكون أكبر. هل من الأفضل إعطاء فرصه حياه تانيه لشخص ممكن يكون أخطأ فى لحظه غضب أو ضعف أو خروج عن الصواب، و لا ننهى حياته و ممكن معاها كمان تتأثر حياة كل الناس المسئوله منه. ده برضه شئ نسبي جداً، بدليل أن فى الولايات المتحده، كل ولايها لها قوانينها، و فيه ولايات بتطبق عقوبة الإعدام، و ولايات تانيه مش بتطبقها.

بأختصار أنا عايز أوصلك أن مفهوم "الصح" بكل أشكاله فى الحياه هو نسبي، أنت اللى بتحدده لنفسك بناء على ظروفك أنت، على أمكانياتك، على عشرات التفاصيل الخاصه بيك أنت، مش بأى حد تانى.

و أخيراً و قبل ما أنهى الجزء ده، و بما أن الحياه فى الأساس ظالمه، و بما أننا داخلين سباق الحياه مش بنفس الأمكانيات، فبالتالى معايير نجاحنا لازم برضه متكنش واحده، متظلمنش نفسك طول الوقت بمقارنات مش حقيقيه مع الآخرين، لأنك غيرهم، أنت حتى لو لك أخ توأم، فأنتم شخصين مختلفين تمام الأختلاف، فأنت اللى حدد معاييرك، و بناء عليها طور من نفسك، عيش تجربة الأصدارات الجديده من نفسك طول الوقت، عيش حياتك بمفهوم "سامسارا" و "نيرفانا"، قسمها مراحل، حتلاقى أن الحياه أصبحت أسهل فى التعامل معاها.

"كلوما"، و النسخة الأفضل منائج

بعيداً عن فصلى البدايه و النهايه، و اللى أنا تعاملت معاهم كمقدمه و خاتمه للكتاب، فأنا أخترت فى ال13 فصل الأخرين 13 موضوع كل واحد فيهم بيناقش أكثر من مشكله، لكن داخل نفس الأطار العام، ال13 مشكله دول أنا على مدار حياتى كلها، أكتشفت أنهم أهم المشاكل البشرىة المزمينه، بمعنى أنها موجوده فى كل زمان و مكان، و اللى بسببها كتير من محاولاتنا لتحقيق أى نجاح بتفشل، سواء كان نجاح على مستوى العمل، العلاقات الشخصيه، أو حتى على المستوى الشخصى أو الأنسانى، و أنا مش بستثنى نفسى على الإطلاق، بالعكس كل تجربه غلط فى حياتى علمتنى، و الغلط بيعلم أكثر من الصح.

المشاكل دى اللى أنا أخترتها فى الكتاب، هى مشاكل مرتبطه بالأنسان أينما وجد، و من هنا كان الأسم الفرعى للكتاب "عن الأنسان فى ألا زمان"، بمعنى أنى رصدت نفس المشاكل مئات المرات بمئات الأشخاص فى بيئات مختلفه تماماً، لأن ببساطه الأنسان هو الأنسان، صحيح فيه عوامل كتير بتأثر فيه و بتخلى شخصياتنا مختلفه مع الوقت، لكن الفطره اللى مولود بيها كل الناس هى واحده، و لو شخص فرنسى مثلاً أتولد أو حتى عاش فى مصر لفته، حتلاقيه أصبح يحمل طباع المصريين، لأن المناخ العام أثر فيه، و أنا ضريت المثل ده تحديداً لأنه شفته أكثر من مره، و من جنسيات مختلفه عايشه فى مصر، فرنسيين، هنود، سوريين، أمريكيين، كلهم تحولوا لمصريين، نتاج البيئه اللى عاشوا فيها.

مره تالته و أخيره فى الكتاب ده حأكركل أنى مش بأكتب الكتاب ده خالص علشان أقولك أن الحياه حلوه، لأ على الإطلاق، لكنى بحاول فى الكتاب ده أساعدك تعدى تجربه الحياه بأفضل صوره من خلال أمكانياتك أنت، و فى النهايه فكل اللى كتبتة كان هو وجهه النظر الخاصه بيه، و المبينه على آلاف التجارب الشخصيه و المشاهدات و القراءات، مئات المشاكل اللى شفيتها بعينى، و اللى تشابهت فى كل حاجه، ما عدا الأشخاص، بمعنى أن الغلط البشرى متشابه و متكرر، و للأسف الغالبية العظمى من البشر لا تتعظ بتجارب الأخرين، لكن الأنسان -زى ما بنقول- لازم يتقرص علشان يتعلم، و أحياناً بيحتاج يتقرص أكثر من مره علشان يتعلم، و أفكر مقوله شهيره لأينشتين لما سأل عن أيه اللى مقدرش يفهمه فى الكون، فجاوب

"كارما"، و النسخة الأفضل منّا

أن الحاجه الوحيده اللى لم يجد لها تفسير فى الكون، أن إنسان يكرر نفس الغلظه فى نفس الظروف.

يمكن تلاقى نفسك فى واحد من فصول الكتاب ده، يمكن أكون أتكلمت عن مشكله تشبه مشكلتك، أو يمكن أكون قدرت أنى أعمل معاك نوع من العصف الذهنى، يساعدك على إعادة التفكير فى حياتك، أو أضعف الأيمان أكون شاركتك ببعض خبراتى و مشاهداتى و اللى نتج عنها وجهات نظرى، جازيز تتفق معايا فى بعضها، و جازيز تختلف معايا فى البعض التانى، لكن فى النهايه أكيد أنا و أنت حنستفيد من الخلاف ده، لأنى بحاول طول الوقت أعمل بكل اللى نصحت بيه على مدار الكتاب كله، و أهمها تطوير نفسى، و أنى أعمل إصدار أو نسخه جديده منى كل فتره.

فى النهايه و بالأضافه لكل الاقتراحات و النصائح اللى كتبتها على مدار الكتاب، فعندى كام نصيحه أخيره، أو زى ما بتسمى Famous last words أحب أقولهم، حيساعدوك كتير فى تحقيق "كارما" خاصه بيك، بعيداً عن عدم عدالة الحياه، لكن على الأقل ممكن تحقق عداله ذاتيه لنفسك، و "كارما" خاصه بيك، لما تلاقى نتيجته لمجهودك طول الوقت.

أولاً، أعتبر أن صحتك و وقتك و عقلك هما الكنز الحقيقي اللى بتملكه فى الحياه، هما اللى حتقدر تحقق بيهم أى حاجه، الفلوس مهمه جداً بالتأكيد، بس فيه ناس كتير بدماغها بس قدرت تحقق نجاح، لأن هما خلوا الفلوس هى اللى تجرى وراهم، و من فتره كنت بتفرج على برنامج "Shark Tank"، و شفت عشرات الأفكار الرائعه، أفكار كتير منها بره الصندوق، خلت المستثمر هو اللى يجرى عليه، و خلينى أضريلك مثال بشاب مصرى عمل تطبيق موبايل، من غير ما يملك أكثر من قدرته على عمل التطبيق، التطبيق ده أصبح التطبيق رقم واحد فى مصر فى النقل الجماعى، و تم شراءه من قبل مستثمرين، و كسب من وراه ملايين، و يمكن تكون أكثر. أو مارك زوكربرج اللى عمل تطبيق Facebook، و اللى أصبح حالياً من أغنى أغنياء العالم.

ثانياً، متخليش الحياه هى اللى تمشيك، حاول تكون دائماً أنت القائد فى حياتك، حاول تتحكم فى وقتك، علم الناس أزاى يحترموك بأنك تفرض أسلوبك أنت، يعنى

"كلوما"، و النسخة الأفضل مناك

أنا من الحاجات اللى خلتها نهج في حياتي أنى عمرت ما أتأخرت على ميعاد، و في نفس الوقت مبستناش أى أنسان -حتى لو أنا اللى محتاجه- أكثر من 20 دقيقة، علشان ميتعودش يفرض أسلوبه عليا فيتأخر كل مره. في النهايه نظم وقتك زى ما أتكلمنا في فصل اللعبه، حتلاقي حياتك أفضل بكثير.

ثالثاً، أبدأ دايماً من حيث أنتهى الآخرون، فيه مثل مصري بيقول "أنت مش حتخترع العجله"، بمعنى أنك متضيعش وقتك في حاجه هي موجوده قبل كده، كمل عليها. مثال بشوفه كثير في مصر في مختلف المجالات، أن فيه ناس لسه بتضيع وقتها في حاجات، الكمبيوتر بيعملها في كسر من الثانيه، أنا أعرف كافيه كبير ملك مجموعته من الشباب أنا أعرفهم، بيشتغلوا لحد دلوقتي بالحسابات الورقيه، مع أن فيه عشرات التطبيقات اللى بتعمل ده في ثانيه، و ممكن ده يوفرلهم وقت و مجهود، مع تقليل نسبة الخطأ في الحسابات. كمان فيه مدرسين كثير شفتمهم، مش قادرين يستفيدوا من التطور الرهيب في طرق توصيل المعلومه، أو طرق الشرح و التدريس، لأن عقلهم وقف على كده. بس مش ده اللى أنا قصده بالضبط، أنا أقصد أنك أستفيد طول الوقت من تجارب الناس اللى سبقتك في نفس مجالك، لأن ده حيوفر عليك كثير جداً و أنت بتبدأ، لأن خبراتهم دى حتوفر عليك وقت و مجهود، و تضمنلك بدايه صح.

رابعاً، حدد علاقتك بالناس من خلال فكرة الـ Zones أو دواير العلاقات، خلى علاقتك بكل شخص محدد المعالم، لها شكل و أهداف و أطر متخرجش عنه، و متسمحش للناس اللى في دواير علاقات بعيده أنها تقتحم حياتك، Keep your distance، أو حافظ على مسافه آمنه في كل علاقاتك، لأن تخطى المسافه الأمنه دى، دايماً بيكون له عواقبه و أضراره، اللى ممكن تخسرك كثير جداً في حياتك.

خامساً، حدد في كل مرحله من مراحل حياتك أهدافك منها، متشتتش نفسك في أكثر من هدف في نفس الوقت ممكن يكون بينهم تعارض، النصيحه دى لسه كنت بقولها لشخص من أقل من شهر، كان عايز يحقق 3 أهداف في وقت واحد كلهم متعارضين مع بعض، لأن اشتراطات تحقيق كل هدف منهم، تعارض تماماً اشتراطات تحقيق الهدفين الآخريين، فيا ريت ترتب أهدافك تبعاً لأولوياتها بالنسبالك، و تبعاً

"كلما"، و النسخة الأفضل منّا

برضه لأيه بيوصل لأيه، بمعنى أيه الهدف الى ممكن يوصلك لباقي الأهداف و أبدأ بيه أولاً.

سادساً، متبدأش أى مشروع فى حكايتك، لو كنت مش عامل خطه لتنفيذه لحد آخر خطوه، لأن أسوء شىء فى الحياه أى خطوه أو مشروع ميكملش، لأنك بستنزف فيه وقتك و فلوسك و قبلهم نفسك بدون فايده، ده غير الأثر النفسى الى ممكن يصيبك من إحباط و فقدان القدره على المحاولة مره تانيه.

سابعاً، أعمل بنصيحة أينشتين، النصيحه الى المفروض أن كلنا نكون ماشيين عليها من غير حتى أينشتين أو غيره ما يقولها، و هى أنك متكررش نفس الغلطه مرتين فى نفس الظروف، بمعنى أنك لو حاولت فى شىء و منجحتش فيه، متكررش المحاولة مره تانيه غير لو الظروف الى أدت لعدم نجاحه تكون أنغيرت -طبعاً للأفضل- أو العوائق الى وقفته أول مره تكون زالت، و إلا حتكون بتحاول تكرر الفشل مره تانيه.

ثامناً، و أنت بتخطط لأى حاجه أعمل حساب The worst case scenario أو توقع أسوء الفروض و أبنى عليها، لأنك فى الحاله دى حتكون أمنت نفسك من أى مفاجئات سيئه ممكن تقابلك فى طريقك، و فى نفس الوقت لو الأمور مشيت من غير أى مفاجئات سيئه، تكون وفرت و كسبت كثير، بس أوعى تبني فى حياتك خطه متفائله، و مش معمول فيها حساب أى معوقات.

تاسعاً، أحذر من أنك تلعب مع حياتك لعبة نظرية رهان باسكال، و رهان باسكال بأختصار هو نظريه فلسفيه بتناقش فكرة الأديان و وجود الله، فباسكال بيقول أن طالما أن مفيش حاجه تؤكّد وجود الله أو لأ، فالأفضل الأيمان بوجوده، لأن لو أفترضنا وجوده و أكتشفنا عدم وجوده، فمش حنخسر حاجه، أما لو أفترضنا عدم وجوده و أكتشفنا وجوده فحنخسر كل حاجه، خاصة فى الحياه الأخرى. النظرية دى بعتبرها واحده من أسوء النظريات فى تاريخ البشريه، و هى بتتمثل فى أشكال كثير فى حياتنا، فى فكرة المشى جنب الحيط، فى فكرة الى نعرفه أحسن من الى منعرفوش، فى مبدأ اللعب على ما نظنه مضمون. بأختصار أنا بعتبرها نظرية الجبناء، لأن مينفعش تعمل أى شىء فى الحياه، بدايةً من أول أيمانك بالله، لأختيارك أبسط شىء

"كلما، و النسخة الأفضل منكِ"

في حياتك و أنت متشكك، لازم كل قرار في حياتك يتبنى على الأقتناع، على الأيمان الراسخ بالشئ اللى أنت بتعمله، على تصديق نفسك، و إلا فأنت أخترت رهان خاسر في الحاليتين.

عاشراً، أحذر أنك تعمل أى شىء أكثر من المطلوب منك، أكثر من حدود المهام الوظيفيه بتاعتك، أو حدود المٌطالب بيه في العلاقات الأنسانيه، متعرضش خدماتك فيما هو لا يخلصك، سواء في إطار العمل أو الحياه العامه، لأنك لو عملت غير كده، حتكون النتائج مش كويسه عليك، لأن الناس للأسف حتبدأ تعتبر الخدمه اللى أنت عملتها تطوعاً، أمر مفروض عليك، و تلاقى نفسك طول الوقت مطالب بيها، و مع مرور الوقت ممكن تتحاسب عليها لو معملتهاش، و ممكن كمان اللى يحاسبك، يكون هو الشخص المطلوب منه المهمه دى أساساً. فحاول دايماً تلتزم بمهامك الوظيفيه بس، و ألتزم في حياتك و في كل علاقاتك بالشئ المطلوب منك بس، لأن طول الوقت الناس لو قدمتها خدمه حتطالبك بأكثر، و حتلاقى نفسك مش قادر تخلص من المأزق اللى أنت رميت نفسك فيه.

22 فبراير 2024

شكراً

لكل من شجعني على الكتابة،
لكل من ألهمني فكرة أو تفصيلاً في هذا الكتاب،
لكل من أضاء لي شمساً أنارتني في جزءاً من الطريق،
لكل من نقدني سواء سلباً أو إيجاباً،

وأخيراً،

لأنك أنت يا من تكتبه عناء قراءة جزء من هذا الكتاب،
لأنك كنت مصدر ضوء جديد أنار لي نحو مزيد من المعرفة.

شريف

مارس 2024

للتواصل أوسع الرموز:



اللحمية

شريفه حسينه



“مقوله شهيرة لأينشتاين لما سُأله
عنه أية الله مقدر من يفهمه
فهو الكون، فجاوبه أنه الحامه
الوحيد لله لم يجد لها تفسير في
الكون، أنه إنسانه يكرر نفسه
الفلطه في نفسه الظروف.”



“عنه الإنسان في اللا زمكانه”